



PERKINS LIBRARY

Duke University

Rare Books







CARMINA

*ILLUSTRIUM*

POETARUM  
ITALORUM.

GALE MINA

EXPOSITION

MUSEUM

ITALIUM.

CARMINA  
*ILLUSTRUM*  
POETARUM  
ITALORUM.  
*TOMUS QUINTUS.*

*Bottari, G. G. ed.*



FLORENTIÆ. M DCC. XX.  
Typis Regiæ Celsitudinis, apud Joannem Cajetanum  
Tartinium, & Sanctem Franchium.

---

*Superiorum permissu.*

GLAMINA  
MURATUM  
ITALORUM  
ROMA



ADVENTIS MDCX  
LXXXVIII

# CATALOGUS

## ITALORUM POETARUM

Tomi Quinti.

F

<b>F</b> <i>Racastorus Hieronymus.</i>	pag. 1.
<i>Franchinus Franciscus.</i>	114.
<i>Frangipanius Tarquinius.</i>	136.
<i>Frizolius Laurentius.</i>	137.
<i>Fulvius Publius.</i>	147.
<i>Fulvius Andreas.</i>	152.
<i>Fum. nus Adamus.</i>	231.
<i>Fuscus Leonardus.</i>	237.

G

<b>G</b> <i>Adaldinus Belisarius.</i>	pag. 240.
<i>Gaddius Jacobus.</i>	243.
<i>Gambara Laurentius.</i>	250.
<i>Gauricus Pomponius.</i>	276.
<i>Gauricus Lucas.</i>	279.
<i>Genesius L. Parmenius.</i>	280.
<i>Genuenss Ubaldu.</i>	283.
<i>Gherardius Petrus.</i>	284.

Gian.

<i>Gherardius Joannes Maria.</i>	291.
<i>Giannettasius Nicolaus Parthenius.</i>	294.
<i>Gibellinus Petrus.</i>	338.
<i>Gigans Antonius.</i>	342.
<i>Gorius Benedictus.</i>	358.
<i>Gratianus Alexander.</i>	365.
<i>Gravina Petrus.</i>	366.
<i>Gravina Antonius.</i>	367.
<i>Guadagnus Joannes.</i>	368.
<i>Guarinus Baptista.</i>	370.
<i>Gyraldus Lilius Gregorius.</i>	376.
<i>Gyraldus Cynthius Joannes Baptista.</i>	385.

## H

**H** *Adrianus.*

pag. 397.

## I

**J** *Acominius, Tebalduccius, Malespina*  
*Laurentius.*

pag. 413.

*Fannoctius Donatus.*

414.

*de Imola Benvenutus.*

415.

*Imperialis Joannes Vincencius.*

416.

*Joanninus Angelus.*

418.

*Jovius Benedictus.*

419.

*Jovius Paulus.*

429.

*Jovius Julius.*

443.

*de Julii Joseph.*

445.

CAR.





CARMINA

ILLUSTRIMUM

POETARUM  
ITALORUM.



HIERONYMI FRACASTORII  
VERONENSIS.

Syphilidis, sive de Morbo Gallico Libri tres.

AD PETRUM BEMBUM.

*Liber Primus.*

**Q**ui casus rerum varii, quæ semina morbum  
insuetum, nec longa ulli per sæcula visum  
Attulerint: nostra qui tempestate per omnem  
Europam, partimque Asiæ, Libyæque per urbes  
Sævit: in Latium vero per tristia bella  
Gallorum irrupit, nomenque a gente recepit:  
Necnon & quæ cura, & opis quid comperit usus,  
Magnaque in angustiis hominum sollicitia rebus,  
Tom. V. A Et

Et monstrata Deum auxilia, data munera Colli  
 Hinc canere, & longe secretas querere causas  
 Aera per liquidum, & vasti per sidera olympi  
 Incipiam: dulci quando novitatis amore  
 Corruptum, placidi Naturae suavis horti  
 Floribus invitant, & amantes mira Camoenae.

Bembe, decus clarum Ausoniae, si forte vacare  
 Consultis Leo te a magnis paulisper, & alta  
 Rerum mole finit, totum qua sustinet orbem;  
 Et juvat ad dulces paulum recedere Musas:  
 Ne nostros contemne orsus, medicumque laborem,  
 Quidquid id est, Deus haec quondam dignatus Apollo est:  
 Et parvis quoque rebus inest sua saepe voluptas.  
 Scilicet hac tenui rerum sub imagine multum  
 Naturae, fatique subest, & grandis origo.

Tu mihi, quae rerum causas, quae sidera noscis,  
 Et coeli effectus varios, atque aeris oras,  
 Uranie (sic dum puro spatiaris olympo,  
 Metirisque vagi lucentes aetheris ignes,  
 Concentu tibi divino cita sidera plaudant)  
 Ipsa ades, & mecum placidas, Dea, lude per umbras,  
 Dum tennes auras, dum myrtea silva canenti  
 Aspirat, resonatque cavis Benacus ab antris,  
 Dic. Dea, quae causae nobis post saecula tanta  
 Insolitam peperere litem? num tempore ab illo  
 Vesta mari occiduo nostrum pervenit in orbem,  
 Ex quo lecta manus solvens de littore Ibero  
 Aufa fretum tentare, vagique incognita ponti est  
 Aequora, & orbe alio positas, perquirere terras?  
 Illic namque ferunt aeterna labe per omnes  
 Id morbi regnare urbes, passimque vagari  
 Perpetuo coeli vitio, atque ignorare paucis.  
 Commencine igitur causa accessisse putandum est  
 Delatam contagem ad nos, quae parva sub ipsis  
 Principiis, mox & vires, & pabula sensim  
 Suscipiens, se se in terras diffuderit omnes?  
 Ut saepe in stipulas cecidit quum forte favilla  
 De face, neglectam pastor quam liquit in arvo,



Illa quidem tenuis primum, similisque moranti  
 Incedit; mox ut paulatim increvit eundo,  
 Tollitur & victrix messem populatur, & agros,  
 Vicinumque nemus, flammæque sub æthera jactat.  
 Dat sonitum longe crepitans Jovis avia silva,  
 Et cælum late circum, campique relucent.

At vero, si rite fidem observata merentur  
 Non ita censendum: nec certe credere par est  
 Esse peregrinam nobis, transque æquora vectam  
 Contagem; quoniam in primis ostendere multos  
 Possumus, attactu qui nullius hanc tamen ipsam  
 Sponte sua sensere luem, primique tulere.  
 Præterea & tantum terrarum tempore parvo  
 Contages non una simul potuisset obire,  
 Aspice per Latii populos, quique herbida Sagræ  
 Païcua, & Ausonios saltus, & Japygis oræ  
 Arva colunt: spectâ, Tyberis qua labitur, & qua  
 Eridanus centum fluviis comitatus in æquor,  
 Centum urbes rigat, & placidis interfuit undis:  
 Uno nonne vides ut tempore pestis in omnes  
 Sævit? ut sortem pariter transgimus unam?  
 Quinetiam externos eadem per tempora primum  
 Excepisse ferunt: nec eam cognovit Ibera  
 Gens prius, ignotum quæ scindere puppibus æquor  
 Ausa fuit, quam quos disternat alta Pyrene,  
 Atque freta, atque Alpes cingunt, Rhenuisque bicornis:  
 Quam reliqui, quos lata tenet gelida ora sub Arcto.  
 Tempore non alio, Pœni, sensistis. & omnes  
 Qui lætam Ægyptum metitis, fœcundaque Nilo  
 Arva, & palmiferæ silvas tondetis Idumæs.  
 Quæ quum sic habeant sese, nempe altius isti  
 Principium labi, rerumque latentior ordo,  
 (Ni fallor) graviorque subest, & major origo.

Principio quæque in terris, quæque æthere in alto,  
 Atque mari in magno Natura educit in auras,  
 Cuncta quidem nec sorte una, nec legibus iisdem  
 Proveniunt sed enim, quorum primordia constant  
 E paucis, crebro ac passim pars magna creantur:

Rarius aut alia apparent, & non nisi certis  
 Temporibusve, locisve, quibus violentior ortus,  
 Et longe sita principia; ac nonnulla prius, quam  
 Erumpant tenebris, & opaco carcere noctis,  
 Mille trahunt annos, spatiosaque sæcula poscunt.  
 Tanta vi coeunt genitalia semina in unum.  
 Ergo & morborum quoniam non omnibus una  
 Nascendi est ratio, facilis pars maxima visu est  
 Et faciles ortus habet, & primordia præsto.  
 Rarius emergunt alii, & post tempore longo  
 Difficiles causas, & inextricabile fatum,  
 Et sero potuere altas superare tenebras.  
 Sic elephas sacer Ausoniis incognitus oris,  
 Sic lichen latuere diu, quibus incola Nili  
 Gens tantum, regioque omnis vicina laborat.

De genere hoc est dira lues, quæ nuper in auras  
 Exiit, & tandem sese caligine ab atra  
 Exemit, durosque ortus, & vincula rupit.  
 Quam tamen (æternum quoniam dilabitur ævum)  
 Non semel in terris visam, sed sæpe fuisse  
 Ducendum est, quamquam nobis nec nomine nota  
 Hactenus illa fuit: quoniam longæva vetustas  
 Cuncta situ involvens, & res, & nomina delet:  
 Nec monumenta patrum feri videre nepotes.

Oceano tamen in magno sub Sole cadente,  
 Qua misera inventum nuper gens accolit Orbem,  
 Passim oritur, nullisque locis non cognita vulgo est.  
 Usque adeo rerum causæ, atque exordia prima  
 Et cœlo variare, & longo tempore possunt.  
 Quodque illic fert sponte aër, & idonea tellus,  
 Huc tandem annorum nobis longa attulit ætas.  
 Cujus forte suo si cunctas ordine causas  
 Nolle cupis, magni primum circumspice mundi  
 Quantum hoc infecit vitium, quot adiverit urbes.  
 Quumque animadvertas tam vastæ semina labis  
 Esse, nec in terræ gremio, nec in æquore posse,  
 Haud dubie tecum statuas, reputesque, necesse est,  
 Principium, sedemque mali consistere in ipso

Aëre, qui terras circum diffunditur omnes,  
Qui nobis se se insinuat per corpora ubique,  
Suetus & has generi viventum immittere pestes.  
Aër quippe pater rerum est, & originis auctor.  
Idem saepe graves morbos mortalibus affert,  
Multimode natus tabescere corpore molli,  
Et facile affectus capere, atque inferre receptos.  
Nunc vero quonam ille modo contagia traxit,  
Accipe: quid mutare queant labentia sæcla.  
In primis tum Sol rutilus, tum sidera cuncta  
Tellurem, liquidasque auras, atque æquora ponti  
Immutant, agitantque; utque ipso sidera cœlo  
Mutavere vicem, & sedes liquere priores,  
Sic elementa modis variis se grandia vertunt.  
Aspice, ut, hibernus rapidos ubi flexit in Austrum  
Phœbus equos, nostrumque videt depressior orbem,  
Bruma riget, duratque gelu, spargitque pruina  
Tellurem, & gelida glacie vaga flumina sistit.  
Idem, ubi nos Cancro propior spectavit ab alto,  
Urit agros, arent nemora, & sitientia prata.  
Siccaque pulvereis æstas squallescit in arvis.  
Nec dubium, quin & noctis nitor, aurea Luna,  
Cui maria alta, omnis cui rerum obtemperat humor:  
Quin & Saturni grave sidus, & æquior orbi  
Stella Jovis: quin pulchra Venusque, & Martius ignis,  
Ac reliqua astra etiam mutant elementa, trahantque  
Perpetuum, & late magnos dent undique motus:  
Præcipue sedem si quando plurima in unam  
Convenere, suo vel multum devia cursu  
Longe alias tenuere vias, hæc scilicet annis  
Pluribus, & rapidi post multa volumina cœli  
Eveniunt, Diis fata modis volventibus istis.  
Ut vero evenisse datum est, numerumque diesque  
Exegere suos, præfixaque tempora fati,  
Proh quanta aërios tractus, falsa æquora quanta,  
Telluremque manent! alibi quippe omnia late  
Cogentur spatia in nubes, cœlum imbribus omne  
Solvetur, fumisque voluti montibus animes

Præcipites secum silvas secum aspera saxa,  
 Secum armenta trahent: medius pater impete magno  
 Aut Padus, aut Ganges super & nemora alta domosque  
 Turbidus, æquabit pelago freta lata sonante.  
 Æstates alibi magnæ condentur, & ipse  
 Flumina speluncis flebunt arentia Nymphæ.  
 Aut venti cuncta invertent, aut obice clausi  
 Excutient tellurem imam, & cum turribus urbes.  
 Forsitan & tempus veniet, poscentibus olim  
 Natura, fatisque Deum, quum non modo tellus  
 Nunc culta, aut obducta mari, aut deserta jacebit.  
 Verum etiam Sol ipse novum (quis credere possit?)  
 Curret iter, sua nec per tempora diffuset annus.  
 Ast insueti æstus, insuetaque frigora mundo  
 Insurgent, & certa dies animalia terris  
 Monstrabit nova, nascentur pecudesque, feræque  
 Sponte sua, primaque animas ab origine sument.  
 Forsitan & majora audens producere tellus  
 Cœumque, Enceladumque feret magnumque Typhoëa,  
 Aufuros patrio Superos detrudere Cœlo,  
 Convulsamque Ossan nemoroso imponere Olympo:  
 Quæ quum perspicias, nihil est, cur tempore certo  
 Admirare novis magnum marcescere morbis  
 Aëra, contagesque novas viventibus ægris  
 Sidere sub certo fieri, & per sæcula longa.

Bis centum fluxere anni, quum flammea Marte  
 Lumina Saturno tristi immiscente, per omnes  
 Auroræ populos, per quæ rigat æquora Ganges,  
 Insolita exarsit febris, quæ pectore anhelo  
 Sanguineum sputum exagitans (miserabile visu)  
 Quarta luce frequens fato perdebat acerbo.  
 Illa eadem Assyriæ gentes & Persidos, & quæ  
 Euphratem, Tigrimque bibunt, post tempore parvo  
 Corripuit, ditescque Arabas, mollemque Canopum:  
 Inde Phrygas, inde & miserum trans æquora vecta  
 Infecit Latium, atque Europa sæviit omni.

Ergo age jam mecum, semper sese æthæra circum  
 Volventem, Superumque domos, ardentiaque astra  
 Con-



Contemplare, animumque agitans per cuncta, require,  
 Quis status illorum fuerit, quæ signa dedere  
 Sidera, quid nostris cælum portenderit annis:  
 Hinc etenim tibi forte novæ contagis origo  
 Omnis, & eventus tanti via prima patefcet.  
 Aspice, candentes magni qua Cancer olympi  
 Excubat ante fores, & brachia pandit aperta;  
 Hinc diræ facies, hinc se diverfa malorum  
 Ostendent portenta: una hac sub parte videbis  
 Magna coiffe simul radiis ardentibus astra,  
 Et conjuratas sparsisse per aëra flammæ:  
 Flammæ, quas longe tumulo Sirenis ab alto  
 Prospiciens senior Vates, quem dia per omnes  
 Cœlicolũmque domos duxit, docuitque futura  
 Uranie: miferas, inquit, defendite terras,  
 O Superi; insolitam video per inania ferri  
 Illuviem, & magnos cœli tabescere tractus,  
 Bella etiam Europæ miseræ, bella impia, & agros  
 Aufoniæ passim currentes sanguine cerno.  
 Dixit, & illa etiam scriptis ventura notavit.

Mos superum est, ubi sæcla vagus Sol certa peregit,  
 Ab Jove decerni fata, & cuncta ordine pandi,  
 Quæcumque eventura manent terrasque, polumque.  
 Quod tempus quum jam nostris venientibus annis  
 Instaret, rerum summus fator, & Superũm Rex  
 Juppiter acciri socios in rebus agendis,  
 Saturnum, Martemque jubet; bipotentia Cancer  
 Limina portarum referat, Diisque atria pandit.  
 Conveniunt, quibus est fatorum cura gerenda.  
 Impiger ante alios flammis, ferroque coruscans  
 Bellipotens Mavors, animis cui prælia, & arma,  
 Vindictæque manent, & ovantes sanguine cædes.  
 Post placidus curru invehctus rex Juppiter aureo,  
 Insequitur (ni fata obstant) pater omnibus æquus.  
 Postremus, longaue via tardatus, & annis  
 Falcifer accedit senior, qui haud immemor iræ  
 In natum veteris, nato & parere recusans,  
 Sæpe etiam cessit retro, & vestigia torfit,

Multa minans, multumque animo indignatus iniquo.  
 Juppiter at folio ex alto, quo se solet uno  
 Tollere, percenfet fata, & ventura resolvit,  
 Multum infelicis miserans incommoda terræ,  
 Bellaque, fortunaſque virum, caſuraque rerum  
 Imperia. & prædas, adaperſtaque limina morti;  
 Inprimis ignota novi contagia morbi:  
 Morbi, qui humanæ nulla manſueſcat opis vi.  
 Aſſenſere Dei reliqui: concuſſus olympus  
 Intremuit, tactuſque novis defluxibus æther.  
 Paulatim aërii tractus, & inania lata  
 Acepere luem, vacuaſque inſuetus in auras  
 Marcor iit, cœlumque tulit contagia in omne.  
 Sive quod ardenti tot concurrentibus aſtris  
 Cum Sole, e pelagò multos terraſque vapores  
 Traxerit ignea viſ, qui miſti tenuibus auris  
 Correptique novo vitio, contagia viſu  
 Perrarâ attulerint: aliud ſive æthere ab alto  
 Demiſſum late aërias corruperit oras. (cœlum,

Quamquam animi haud fallor, quid agat, quove ordine  
 Dicere, & in cunctis certas perquirere cauſas  
 Difficile eſſe: adeo interdum per tempora longa  
 Effectus trahit, interdum (quod fallere poſſit)  
 Miſcentur fors, & varii per ſingula caſus.

Nunc age non id te lateat, ſuper omnia miram  
 Naturam, & longe variam contagibus eſſe.  
 Solis nam ſæpe arboribus fit noxiuſ aër,  
 Et tenerum germen, florumque infecit honorem;  
 Interdum ſegetem, & ſata læta, annique labores  
 Corripuit, ſcabraque uſſit rubigine culmos,  
 Et vitiata parens produxit ſemina tellus.  
 Interdum pœnas animalia ſola dedere,  
 Aut multa, aut certa ex ipsis. Memini ipſe malignam  
 Luxuriem vidiffe anni, multoque madentem  
 Autumnum perflatum Auſtro, quo protinus omne  
 Caprigenum pecus e cunctis animantibus unum  
 Corruit, a ſtabulis lætas ad pabula paſtor  
 Ducebat: tum forte, alta ſecurus in umbra

Dum

Dum caneret, tenuique gregem mulceret avena,  
 Ecce aliquam tussis subito irrequieta tenebat,  
 Nec longe via mortis erat: namque acta repente  
 Circum præcipiti lapsu, revomensque supremam  
 Ore animam, socias inter moribunda cadebat.  
 Verè autem (dictu mirum) atque æstate sequenti  
 Infirmas pecudes, balantumque horrida vulgus  
 Pestis febre mala miserum pæne abstulit omne.  
 Usque adeo varia affecti sunt semina cœli,  
 Et varix rerum species, numerusque vicissim  
 Inter mora subest, interque moventia certus.  
 Nonne vides, quamvis oculi sint pectore anhelò  
 Expositi mollesque magis, non attamen ipsos  
 Carpere tabem oculos, sed se se immergere in imuni  
 Pulmonem? & pomis quamquam sit mollior uva,  
 Non tamen iis vitiatur, at ipsa livet ab uva.  
 Nempe alibi vires, alibi sua pabula desunt:  
 Ast alibi mora certa, nec ipsa foramina multum  
 Non faciunt, hinc densa nimis, nimis inde soluta.

Ergo contagum quoniam natura, genusque  
 Tam varium est, & multa modis sunt semina miris,  
 Contemplator & hanc, cujus cœlestis origo est:  
 Quæ, sicut desueta, ita mira erupit in auras.  
 Illa quidem non muta maris, turbamque natantum,  
 Non volucres, non bruta altis errantia silvis,  
 Non armenta boum, pecudesve, armentave equorum  
 Infecit, sed mente vicens ex omnibus unum  
 Humanum genus, & nostros est pasta sub artus.  
 Porro homine e toto, quod in ipso sanguine crassum,  
 Et sordens lentore foret, fœdissima primum  
 Corripuit, se se pascens uligine pingui.  
 Tali se morbus ratione, & sanguis habebant.  
 Nunc ego te affectus omnes, & signa docebo  
 Contagis miseræ: atque utinam concedere tantum  
 Musa queat, tantumque velit defendere Apollo,  
 Tempora qui longa evolvit, cui carmina curæ,  
 Hæc multas monumenta dies ut nostra supersint.  
 Forte etenim nostros olim legisse nepotes,

Et signa, & faciem pestis novisse juvabit.

Namque iterum, quum fata dabunt, labentibus annis  
Tempus erit, quum nocte atra sopita jacebit  
Interitu data: mox iterum post sæcula longa  
Illa eadem exsurgat, cælumque aurasque reviset,  
Atque iterum ventura illam mirabitur ætas.

In primis mirum illud erat, quod labe recepta,  
Sæpe tamen quater ipsa suum compleverat orbem  
Luna prius, quam signa satis manifesta darentur.  
Scilicet extemplo non sese prodit aperte,  
Ut semel est excepta intus, sed tempore certo  
Delitet, & sensim vires per pabula captat.  
Interea tamen insolito torpore gravati,  
Sponteque languentes animis & munera obibant  
Ægrius, & toto segnes se corpore agebant.  
Ille etiam suus ex oculis vigor, & suus ore  
Dejectus color haud læta de fronte cadebat.  
Paullatim caries fœdis enata pudendis,  
Hinc atque hinc invicta locos, aut inguen edebat.  
Tum manifesta magis vitii se prodere signa.  
Nam, simul ac puræ fugiens lux alma dici  
Cesserat, & noctis tristes induxerat umbras,  
Innatusque calor noctu petere intima suetus  
Liquerat extremum corpus, nec membra fovebat  
Obsita mole pigra humorum, tum vellier artus,  
Brachiaque, scapulæque gravi, suræque dolore.  
Quippe, ubi per cunctas jerant contagia venas,  
Humoresque ipsos, & nutrimenta futura  
Polluerant, natura malum secernere sueta  
Infectam partem pellebat corpore ab omni  
Exterius: verum crasso quia corpore tarda  
Hæc erat, & lentore tenax, multa inter eundem  
Hærebat membris exsanguibus, atque lacertis.  
Inde graves dabat articulis extenta dolores.  
Parte tamen leviore, magisque erumpere nata,  
Summa cutis pulsa, & membrorum extrema petebat.  
Protinus informes totum per corpus achores  
Rumpebant, faciemque horrendam, & pectora fœde  
Pro-



Turpabant: species morbi nova: pustula summæ  
 Glandis ad effigiem, & pituita marcida pingui:  
 Tempore quæ multo non post adaperata dehiscens,  
 Mucosa multum sanie, taboque fluebat.  
 Quinetiam erodens alte, & se funditus abdens  
 Corpora pascebat misere: nam sæpiùs ipsi  
 Carne sua exutos artus, squallentiaque ossa  
 Vidimus, & fœdo rosa ora dehiscere hiatu,  
 Ora, atque exiles reddentia guttura voces.  
 Ut sæpe aut cerasis, aut Phyllidis arbore tristi  
 Vidisti pinguem ex udis manare liquorem  
 Corticibus, mox in lentum durescere gummi.  
 Haud secus hac sub labe solet per corpora mucor  
 Diffuere: hinc demum in turpem concreescere callum  
 Unde aliquis ver ætatis, pulchramque juventam  
 Suspirans, & membra oculis deformia torvis  
 Prospiciens, fœdosque artus, turgentiaque ora,  
 Sæpe Deos, sæpe astra miser crudelia dixit.  
 Interea dulces somnos, noctisque soporem  
 Omnia per terras animalia fessa trahebant:  
 Illis nulla quies aderat, sopor omnis in auras  
 Fugerat: iis oriens ingrata Aurora rubebat:  
 Iis inimica dies, inimicaque noctis imago.  
 Nulla Ceres illos, Bacchi non ulla juvabant  
 Munera: non dulces epulæ, non copia rerum,  
 Non urbis, non ruris opes, non ulla voluptas,  
 Quamvis sæpe amnes nitidos, jucundaque Tempe,  
 Et placidas summis quæssissent montibus auras.  
 Diis etiam sparsæque preces, incensæque templis  
 Tura, & divitibus decorata altaria donis:  
 Dii nullas audire preces, donisve moveri.

Ipse ego Cænomanum memini, qua pingua dives  
 Pascua Sebina præterfluit Ollius unda,  
 Vidisse insignem juvenem. quo clarior alter  
 Non fuit, Ausonia nec fortunatior omni:  
 Vix pubescentis florebat vere juventæ,  
 Divitiis, proavisque potens, & corpore pulchro;  
 Cui studia aut pernicious equi compescere cursum,

Aut galeam induere, & pictis splendere in armis,  
 Aut juvenile gravi corpus durare palæstra,  
 Venatuque feras agere, & prævertere cervos:  
 Illum omnes Ollique Deæ, Eridanique puellæ  
 Optarunt, nemorumque Deæ, rurisque puellæ:  
 Omnes optatos suspiravere hymenæos.  
 Forſan & ultores Superos neglecta vocavit  
 Non nequidquam aliqua, & votis pia numina movit;  
 Nam nimium fidentem animis, nec tanta timentem  
 Invasit miſerum labes, qua ſævior uſquam  
 Nulla fuit, nulla umquam aliis ſpectabitur annis.  
 Paulatim ver id nitidum, flos ille juventæ  
 Diſperit, vis illa animi: tum ſquallida tabes  
 Artus (horrendum!) miſeros obduxit: & alte  
 Grandia turgebant ſœdis abſceſſibus oſſa.  
 Ulcera (proh Divûm pietatem!) informia pulchros  
 Paſcebant oculos, & diæ lucis amorem,  
 Faſcebantque acri corroſas vulnere nares.  
 Quo tandem infelix fato, poſt tempore parvo  
 Ætheris invaſas auras, lucemque reliquit.  
 Illum Alpes vicinæ, illum vaga flumina flerunt:  
 Illum omnes Ollique Deæ, Eridanique puellæ  
 Fleverunt, nemorumque Deæ, rurisque puellæ:  
 Sebinuſque alto gemitum lacus edidit amne.

Ergo hanc per miſeras terras Saturnus agebat  
 Peſtem atrox, nec ſæva minus crudelis & ipſe  
 Miſcebat Mavors, conjunctaque fata ferebat.  
 Quippe lue hac naſcente, putem ſimul omnia diras  
 Eumenidas ceciniffe fera, & crudelia nobis.  
 Tartareos etiam barathro dira omnia ab imo  
 Exciviſſe lacus, Stygiaque ab fede laborem,  
 Peſtemque, horribilemque famem, bellumque, necemq;  
 Dii patrii, quorum Auſonia eſt ſub numine, tuque  
 Tu Latii, Saturne, pater, quid gens tua tantum  
 Eſt merita? an quidquam ſupereſt dirique graviſque,  
 Quod ſit inexhauſtum nobis? ecquod genus uſquam  
 Averſum uſque adeo cœlum tulit? ipſa labores,  
 Parthenope, dic prima tuos, dic funera regum,

Et

Et spolia, & prædas, captivæque colla tuorum.  
 An stragem infandam memorem, sparsumque cruorem  
 Gallorumque, Italûmque pari discrimine, quum jam  
 Sanguineum, & defuncta virûm, defunctaque equorum  
 Corpora volventem, cristasque, atque arma trahentem  
 Eridanus pater acciperet rapido agmine Tarrum?  
 Te quoque spumantem, & nostrorum cæde tumentem,  
 Abdua, non multo post tempore, te pater idem  
 Eridanus gremio infelix suscepit, & altum  
 Indoluit tecum, & fluvio solatus amico est.

Aufonia infelix, en quo discordia priscam  
 Virtutem, & mundi imperium perduxit avitum!  
 Angulus anne tui est aliquis, qui barbara non sit  
 Servitia, & prædas, & tristia funera passus?  
 Dicite vos, nullos soliti sentire tumultus,  
 Vitiferi colles, qua flumine pulcher amœno  
 Erethenus fluit, & plenis lapsurus in æquor  
 Cornibus, Euganeis properat se jungere lymphis.

O patria, o longum felix, longumque quieta  
 Ante alias, patria o Divûm sanctissima tellus,  
 Dives opum, fœcunda viris, lætissima campis  
 Uberibus, rapidoque Athesi, & Benacide lymphæ,  
 Ærumnas memorare tuas, summamque malorum  
 Quis queat? & dictis nostros æquare dolores,  
 Et turpes ignominias, & barbara jussa?  
 Abde caput, Benace, tuo, & te conde sub amne,  
 Victrices nec jam Deus interlabere lauros.

En etiam, ceu nos agerent crudelia nulla,  
 Nec lacrimæ planctusve forent, en dura tot inter,  
 Spes Latii, spes & studiorum, & Palladis illa  
 Occidit: ereptum Musarum e dulcibus ulnis  
 Te miserum ante diem crudeli funere, Marce  
 Antoni, ætatis primo sub flore cadentem  
 Vidimus extrema positum Benacide ripa,  
 Quam media inter saxa sonans Sarca abluit unda.  
 Te ripæ flere Athesis, te voce vocare  
 Audite per noctem umbræ, manesque Catulli,  
 Et patriæ mulcere nova dulcedine lucos.

Tempestate illa Aufoniam Rex Gallus opimam  
 Verteabat bello, & Ligurem ditione premebat.  
 Parte alia, Cæsar ferro superabat, & igni  
 Euganeos, placidumque Silim, Carnumque rebellem:  
 Et totum luctus Latium, mœrorque tenebat.

*Liber Secundus.*

**N**unc age, quæ vitæ ratio, quæ cura adhibenda  
 Perniciem adversus tantam. quid tempore quoque  
 Conveniat (nostri quæ pars est altera cœpti)  
 Expediam, & miranda hominum comperta docebo.  
 Quippe nova quum re attoniti, multa irrita primum  
 Tentassent, tamen angustis solertia major  
 In rebus, crescensque usu experientia longo  
 Evicere: datumque homini protendere longe  
 Auxilia, & certis pestem compescere vinclis  
 Victorem, & se se claras attollere in auras.  
 Credo equidem & quædam nobis divinitus esse  
 Inventæ, ignaros fati ducentibus ipsis.  
 Nam, quamquam fera tempestas. & iniqua fuerunt  
 Sidera, non tamen omnino præsentia Divum  
 Abfuit a nobis, placidi & clementia cœli.  
 Si morbum insolitum, si dura, & tristia bella  
 Vidimus, & sparsos dominorum cæde penates,  
 Oppidaque, incensasque urbes, subversaue regna,  
 Et templa, & raptis temerata altaria sacris:  
 Flumina dejectas si perrumpentia ripas  
 Evertere fata, & mediis nemora eruta in undis,  
 Et pecora, & domini, correptaue rura natarunt;  
 Obseditque inimica ipsas penuria terras:  
 Hæc eadem tamen, hæc ætas (quod fata negarunt  
 Antiquis) totum potuit sulcare carinis  
 Id pelagi immensum quod circuit Amphitrite.  
 Nec visum satis, extremo ex Atlante repostos  
 Hesperidum penetrare sinus, Præsumque sub Arcto  
 Inspectare alia, præruptaque littora Rhapti,  
 Atque Arabo advehere, & Carmano exæquore merces:

Au-



Auroræ sed itum in populos Titanidis usque est  
 Supra Indum, Gangemque supra, qua terminus olim  
 Carygare noti Orbis erat: superata Cyambe,  
 Et dites ebena, & felices macere silvæ.

Denique & a nostro diversum gentibus Orbem,  
 Diversum cœlo, & clarum majoribus astris  
 Remigio audaci attigimus, ducentibus & Diis.  
 Vidimus & vatem egregium, cui pulchra canenti  
 Parthenope, placidusque cavo Sebethus ab antro  
 Plauserunt, umbræque sacri, Manesque Maronis;  
 Qui magnos stellarum orbes cantavit, & hortos  
 Hesperidum, cœlique omnes variabilis oras.

Te vero ut taceam, atque alios, quos fama futura  
 Post mutos cineres, quos & venientia sæcla  
 Antiquis conferre volent, at, Bembe, tacendus  
 Inter dona Deum nobis data non erit umquam  
 Magnanimus Leo, quo Latium, quo maxima Roma  
 Attollit caput alta, paterque ex aggere Tybris  
 Assurgit, Romæque fremens gratatur ovanti.  
 Cujus ab auspiciis jam nunc mala sidera mundo  
 Cessere, & læto regnat jam Juppiter orbe,  
 Puraque pacatum diffundit lumina cœlum.

Unus, qui ærumnas post tot, longosque labores  
 Dulcia jam profugas revocavit ad otia Musas,  
 Et leges Latio antiquas, rectumque, piumque  
 Restituit: qui iusta animo jam concipit arma  
 Pro re Romana, pro religione Deorum.

Unde etiam Euphrates, etiam late ostia Nili,  
 Et tantum Euxini nomen tremit unda refulsi,  
 Atque Ægea suos confugit Doris in Isthmos.

Ergo, alii dum tanta canent, dumque illius acta  
 Inclita component, dum forte accingeris & tu  
 Condere, & æternis victurum intexere chartis,  
 Nos, quos fata vocant haud tanta ad munera, lusus  
 Inceptos, quantum tenuis fert Musa sequamur.

Principio, quoniam affecti non sanguinis una  
 Est ratio, tibi sit morbo spes major in illo,  
 Sanguine qui insedit puro: verum, quibus atra

Bile tument, spissoque resultant sanguine venæ,  
 Major in iis labor est, pestisque tenacius hæret.  
 Quare operæ pretium est validis, atque acribus uti  
 Omnibus hos contra miseris nec parcere membris.  
 Quinetiam meliora sibi promittere cuncta  
 Ille potest, qui principiis novisse sub ipsis  
 Serpentem tacite valuit per viscera labem.  
 Namque, ubi pasta diu, vires per pabula longa  
 Auxerit, & jam se vitium firmaverit intra,  
 Heu quanto tibi libertas speranda labore est;  
 Ergo omnem impendens operam te opponere parvis  
 Principiis, memorique animo hæc præcepta reconde.

In primis ego non omni te assuefcere cælo  
 Exhorter: fuge, perpetuo quod flatur ab Austro,  
 Quod cæno, immundæque grave est sudore paludis.  
 Protenti potius campi mihi liber, & agri  
 Tractus, & apricis placeant in collibus auræ,  
 Et molles Zephyri, pulsusque Aquilonibus aër.  
 Hic (jubeo) tibi nulla quies, nulla otia sunt.  
 Rumpe moras, agita assiduis venatibus apros  
 Impiger, assiduis agita venatibus urfos.  
 Nec tibi sit labor aërii cursu ardua montis  
 Vincenti, rapidum in valles deflectere cervum,  
 Et longa lustrare altos indagine saltus.  
 Vidi ego sæpe, malum qui jam sudoribus omne  
 Finisset, silvisque luem liquisset in altis.  
 Sed nec turpe puta dextram summittere aratro,  
 Et longum trahere incurvo sub vomere sulcum:  
 Neve bidente solum, & duras proscindere glebas,  
 Et valida aëriam quercum exturbare bipenni,  
 Atque imis altam eruere ab radicibus ornum.  
 Quinetiam, exercere domi quo te quoque possis,  
 Parvam mane pilam versa mihi, vespere versa.  
 Et saltu, & dura potes exsudare palæstra.  
 Vince malum: nec te fallat, quod desidis otii  
 Assidue desiderium, lætisque sequetur.  
 Tu lecto ne crede, gravi ne crede sopori.  
 His alitur vitium, & placidæ sub imagine pacis

Decipit, e dulcique trahit fomenta quiete.  
 Necnon interea effugito, quæ tristia mentem  
 Sollicitant: procul esse jube curasque, metumque  
 Pallentem, ultricesque iras, omnemque Minervæ  
 Addictum studiis animum: sed carmina, sed te  
 Delectent juvenumque chori, mixtæque puellæ.  
 Parce tamen Veneri, mollesque antè omnia vita  
 Concubitus; nihil est nocuum magis: odit & ipsa  
 Pulchra Venus, teneræ contagem odere puellæ.

Quod sequitur, victus ratio tibi maxima habenda est;  
 Nec sit cura tibi, neve observantia major.

Principio, quoscumque amnes, quoscumque paludes,  
 Quosque lacus liquidi pascunt, quosque æquora, pisces,  
 Omne genus procul amoveo, sunt, quos tamen usus  
 Liberius, quum res cogit, concedere possit.

Omnibus his est alba caro, non dura, tenaxque,  
 Quos petraë, & fluviorum adversa, marisque fatigant:  
 Tales aut pelago phycides, rutilæque per undas  
 Auratæ, gobiique, & amantes saxea percæ.

Talis dulcissum fluviorum scarus ad ora  
 Solus saxa inter depastas ruminat herbas.

Sed neque, quæ stagnis volucres, quæque amnibus altis  
 Degere amant, liquidisque cibum perquirere in undis,  
 Laudarim: tibi pinguis anas, tibi crudior anser

Vitetur, potiusque vigil Capitolia servet:

Viteturque gravi coturnix tarda sagina.

Tu teneros lactes, tu pandæ abdomina porcæ,  
 Porcæ heu terga fuge, & lumbis ne vescere aprinis,  
 Venatu quamvis toties confeceris apros.

Quin neque te crudus cucumis, non tubera captent,  
 Neve famem cinara, bulbisve salacibus exple.

Non placeat mihi lactis amor, non usus aceti,  
 Non fumosa mero spumantia pocula Baccho,

Qualia Cynæi colles, campique Falerni,  
 Et Fucinus ager mittunt: aut qualia nostris

Rhetica dat parvo de collibus uva racemo.  
 Nempe Sabina magis placeant, dilutaque tellus

Quæ tulit, & multo domuerunt Najades amne.

At tibi si ex horto victus, mensæque Deorum  
 Sunt animo, atque olerum simplex, & inempta voluptas,  
 Non mentæ virides, non læta sisymbria defunt,  
 Intybaque, & toto florentes frigore sonchi,  
 Et sia fontanis semper gaudentia rivis,  
 Et thymbræ suaves. & odoriferæ calaminthæ:  
 Læta meliphylla, & riguo buglossus ab horto  
 Carpantur, plenisque ferax erucula palmis,  
 Atque olus, atque rumex, & falsi gramina crithmi.  
 Ipsa lupum dumeta ferent: hinc collige primos  
 Asparagos, albæ asparagos hinc collige vitis,  
 Quum nondum explicuit ramos, umbracula nondum  
 Texuit, & virides iussit pendere corymbos.  
 Singula sed longum est, nec percensere necesse,  
 Jamque aliud vocor ad munus; juvat in nova Musas  
 Naturæ nemora Aoniis deducere ab umbris:  
 Unde mihi si non e lauro intexere fronti  
 Serta volent, tantaque caput cinxisse corona,  
 At saltem ob servata hominum tot millia, dignum  
 Censuerint querna redimiri tempora fronde

Vere novo si quem morbus tenet, aut & in ipso  
 Autumno, si firma ætas, si sanguis abundat,  
 Regalem, mediamve lacerti incidere venam  
 Proderit, atque extra sædatum haurire cruorem.  
 Præterea, quocumque habeat te tempore pestis,  
 Corruptum humorem, & contagem educere turpem  
 Ne pigeat, facilique luem deponere ab alvo.  
 Ante tamen ducenda para, concreta resolve,  
 Et crassa attenua, & lentore tenacia frange.

Ergo Coryciumque thymum sit cura, thymumque  
 Pamphylium, thymbræ similis qui durior exit,  
 Prima tibi coxisse, lupique volubile gramen,  
 Fœniculumque, apiumque, & amari germina capni.  
 His polyporum hirtos imitata filicula cirros  
 Additur, & lymphis tangi renuens adiantus:  
 His sterile asplenum, his pictam phyllirida junge.  
 Quorum ubi decoctum permultis ante diebus  
 Ebiberis, crudumque humorem incoxeris omnem,

Tum



Tum scilla medicare acri, & colocynthide amara,  
Helleboroque gravi, necnon quæ in littore surgens,  
Qua ludit maris unda, ter evariata colorem,  
Ter flores mutata die, rem nomine signat,  
Herba potens radice, suum cui zinziber adde:  
Adde etiam anguineum cucumin, Nabathæaque tura,  
Myrrhamque, bdelaque, hammoniacique liquorem,  
Et lacrimam panaceam. & dulci Colchica bulbo.

His actis, si forte tibi frigentia corda,  
Et molles animi fuerint, nec acerba placebit  
In primis tentare, brevique extinguere pestem,  
Sed placidis agere, & per tempora lenibus uti,  
Tum superest tibi cura animum ad fomenta relictæ  
Vertere, contagisque ad tenuia semina cæcæ,  
Illa quidem consueta modis inserpere miris.  
Profuerint igitur, quæque exsiccantia, quæque  
Marcori resinosa solent obsistere putri.  
Tales sunt myrrhæ lacrimæ, sunt talia tura,  
Cedrusque, aspalathusque, immortalisque cupressus,  
Et bene cum calamo spirans redolente cyperus.  
Ergo nec desint casia, nec desit amomum,  
Macerve, agalochumve tibi, nec cinnama odora.  
Est etiam in pratis illud, juxtaque paludes  
Scordion, omnigenis quod tantum obstare venenis,  
Contagique solet, parvo quærenda labore  
Herba tibi: viret ipsa comis imitata chamædrym,  
Flore rubens, referensque allî cum voce saporem.  
Aurora nascente hujus frondemque comantem  
Radicesque coque, atque haustu te prolue largo.  
Sed neque carminibus neglecta silebere nostris,  
Hesperidum decus, & Medarum gloria, citre,  
Silvarum: si forte sacris cantata Poëtis.  
Parte quoque hac medicam non dedignabere Musam.  
Sic tibi sit semper viridis coma, semper opaca,  
Semper flore novo redolens: sis semper onusta  
Per viridem pomis silvam pendentibus aureis,  
Ergo, ubi nitendum est cæcis te opponere morbi  
Seminibus, vi mira arbor Cithereia præstat.

Quippe illam Citherea, suum dum plorat Adonim,  
Munere donavit multo, & virtutibus auxit.

Quorundam inventum est vitrei intra concava vasis,  
Cui collum oblongum est, venter turgescit in orbem,  
Aut hederæ folia, aut Ida mittente maniplos  
Dictamni, Illyricamve irim, rhamnive nigrantem  
Radicem, aut inulas coquere; in sublime solutus  
Effertur vapor, & tenuis vacua omnia complet.  
Ast, ubi frigenti occurssavit ab aëre vitro,  
Cogitur, & rorem liquidus densatur in udum,  
Decurritque vagis per aperta canalialia rivis.  
Destillantis aquæ cyathum sub lumina prima  
Luciferi potare jubent, stratisque parare  
Sudorem, nec certe ab re: vis utilis olli est,  
Reliquias morbi tenues dispergere in auras.

Interea, si membra dolor convulsa malignus  
Torqueat, æsypo propera lenire dolorem,  
Mastichinoque oleo: lentum quibus anseris unguen,  
Emulsumque potes lini de semine mucum,  
Narcissumque, inulamque, liquentiaque addere mella,  
Coryciumque crocum, & vilem componere amurcam.  
At, fauces atque ora malus si croserit herpes,  
Tange nitro, & viridi medicata ærugine lymphæ  
Semina inure mala, & serpentem interfice pestem.

Verum ipsos ope non alia consumere achores,  
Urentum quam vi, poteris, quibus addere debes  
Pingue aliquid, quod secum intus siccantia portet.  
Hæc eadem, & miseros artus si qua ulcera pascunt,  
Tollere, concretosque valebunt solvere callos.

Si vero aut hæc nequidquam tentasse videbis,  
Aut vires, animique valent ad fortia quæque,  
Nec differre cupis, quin te committere acerbis  
Festines, diramque brevi consumere pestem,  
Hinc alia inventa expediam, quæ tristitia quanto  
Sunt magis, hoc tanto citius finire labores,  
Ærumnasque mali poterunt: quippe effera labes  
Inter prima tenax, & multo fomite vivax  
Nedum se haud vinci placidis, & mitibus, at nec

Tractari sinit, & mansuescere dura repugnat.  
 Sunt igitur styracem in primis qui, cinnabarimque,  
 Et ninium, & stymmi agglomerant, & tura minuta,  
 Quorum suffitu pertingunt corpus acerbo,  
 Absumuntque luem miseram, & contagia dira.  
 At vero & partim durum est medicamen, & acre,  
 Partim etiam fallax, quo faucibus angit in ipsis  
 Spiritus, eluctantque animam vix continet ægram.  
 Quo circa totum ad corpus nemo audeat uti  
 Judice me. certis fortasse erit utile membris,  
 Quæ papulæ informes, Chironiaque ulcera pascunt.

Argento melius persolvunt omnia vivo  
 Pars major: miranda etenim vis insita in illo est:  
 Sive quod id natum est subito frigusque caloremque  
 Excipere, unde in se nostrum cito contrahit ignem,  
 Quodque est condensum, humores dissolvit, agitque  
 Fortius, ut candens ferrum flamma acrius urit.  
 Sive acres, unde id constat compagine mira,  
 Particulæ nexuque suo, vinclisque solutæ  
 Introrsum, ut potuere seorsum in corpora ferri,  
 Colliquant concreta, & semina pestis inurunt;  
 Sive aliam vim fata illi, & Natura dedere.  
 Cujus & inventum medicamen munere Divum  
 Digressus referam. quis enim admiranda Deorum  
 Munera prætereat? Syriæ nam forte sub altis  
 Vallibus umbrosi nemora inter glauca salicti,  
 Callirhoë qua fonte sonans decurrit amœno,  
 Fama est cultorem Diis sacri agrestibus horti,  
 Cultorem nemorum, sectatoremque ferarum,  
 Ilcea labe gravem tanta, dum molle cyperum,  
 Et casiam, & silvam late fragrantis amomi  
 Irrigat, hæc orasse Deos, & talia fatum:  
 Dii, quos ipse diu colui, tuque optima tristes,  
 Callirhoë, quæ sancta soles depellere morbos,  
 Cui nuper ramosa ferens ego cornua cervi  
 Aëria victor fixi capita horrida quercu:  
 Dii, mihi crudelem misero si tollere pestem  
 Hanc dabitis, quæ me afflicta noctesque diesque,

Ipse ego purpureas, ipse albas veris, & horti  
Primitias, vobis violas, ego lilia vobis  
Alba legam, primasque rosas, primosque hyacinthos,  
Vestraque odoratis onerabo altaria fertis.  
Gramen erat juxta viridans. Sic fatus, ut æstu  
Fessus erat, viridi defecit graminis herba.  
Hic Dea, vicino quæ sese fonte lavabat,  
Callirhoë liquido ex antro per lubrica musco  
Saxa fluens, juveni dulci blandita susurro,  
Lethæum immisit somnum, sparsitque sopore  
Graminea in ripa, & salicum nemus inter opacum;  
Atque illi visa est sacro se flumine tollens  
In somnis coram esse, pia & sic voce locuta:  
Ilceu, in extremo Diis tandem audite labore,  
Cura mei, tibi nulla salus, quacumque videt Sol,  
Speranda est terram magnam super, hoc tibi pœnæ  
Dat Trivia, & precibus Triviæ exoratus Apollo,  
Ob sacrum jaculo percussum ad flumina cervum,  
Et nostris affixa tibi capita horrida truncis.  
Nam, postquam illa feram exanimem per gramina vidit  
Abscisso capite, & sacro sparsa arva cruore,  
Omnibus ingemuit silvis, dirumque precata est  
Auctori, oranti Latous tanta Sorori  
Affuit, & pestem misero immisere nefandam  
Durus uterque tibi: quin & quacumque videt Sol,  
Interdixit opem: quare tellure sub ima,  
Si qua salus superest, cæca sub nocte petenda est.  
Est specus arboribus tectum, atque horrore verendum  
Vicina sub rupe, Jovis qua plurima silva  
Accubat, & raucum reddit coma cedria murmur.  
Huc, ubi se primis Aurora emittet ab undis,  
Ire para, & nigrantem ipsis in faucibus agnam  
Mactato supplex, atque Ops tibi maxima, dic, hanc,  
Dic, ferio, nigram tum Noctem, umbrasque silentes,  
Umbrarumque Deos, ignotaque numina Nymphas,  
Et thya venerare, atræ & nidore cupressi.  
Hic tibi narranti causam, auxiliumque vocanti  
Haud aberit Dea, quæ cæcæ in penetralia terræ



Deducat te sancta, & opem tibi sedula præstet.  
 Surge age, nec vani speciem tibi concipe somni.  
 Illa ego sum, quæ culta vago per pingua fonte  
 Dilabor, Dea vicinis tibi cognita ab undis.  
 Sic ait, & se cæruleo cita condidit amne.  
 Ille autem, ut placidus cessit sopor, omina lætus  
 Accipit, & Nympham precibus veneratur amicam.  
 O sequor, o quocumque vocas, pulcherrima fontis  
 Vicini Dea, Callirhoë. Tum postera primum  
 Exsurgens Aurora, suos ubi protulit ortus,  
 Monstratum Jovis in silva sub rupibus altis  
 Antrum ingens petit, & nigrantem tergora primo  
 Vestibulo sistit pecudem, magnæque trementem  
 Mactat Opi: tibi que, inquit, ego hâc, Ops maxima, macto.  
 Tum Noctem, Noctisque Deas ignota precatur  
 Numina, jamque simul thyan, atramque cupressum  
 Urebat, quum vox terræ revoluta cavernis  
 Longe audita sacras Nympharum perculit aures:  
 Nympharum, quibus æra solo sunt condita curæ.  
 Extemplo commotæ omnes, ac cœpta reponunt,  
 Sulphureos forte ut latices, & flumina vivi  
 Argenti, mox unde nitens concreveret aurum,  
 Tractabant, gelidoque prementes fonte coquebant.  
 Centum ignis spissi radios, centum ætheris usti,  
 Bis centum concretorum terræque marisque  
 Miscuerat, nostros fugentia semina visus.

At Lipare, Lipare argenti cui semina, & auri  
 Cura data, & sacrum flammis adolere bitumen:  
 Continuo obscuræ latebroso per avia terræ  
 Ilcæa adit, firmanisque animum sic incipit ipsa:

Ilceu (namque tuum nec nomen, nec mihi labes  
 Ignota est, nec quid venias) jam corde timorem  
 Exue. Nequidquam non te huc carissima mittit  
 Callirhoë. Tibi parta salus tellure sub ima est.  
 Tolle animos, & me per opaca silentia terræ  
 Insequere: ipsa adero. & præsentî numine ducam.  
 Sic ait, & se antro gradiens præmittit opaco.  
 Ille subit, magnos terræ miratus hiatus,

Squalientesque situ æterno, & sine lumine vastas  
 Speluncas, terramque meantia flumina subter.  
 Tum Lipare: hoc quodcūque patet, quā maxima terra est,  
 Hunc totum sine luce globum, loca subdita nocti  
 Dii habitant: imas retinet Proserpina sedes,  
 Flumina supremas, quæ sacris concita ab antris  
 In mare per latas abeunt resonantia terras.  
 In medio dites Nymphæ, genera unde metalli,  
 Ærisque, argentique, aurique nitentis origo:  
 Quarum ego nunc ad te miserans ipsa una Sororum  
 Advenio, illa ego, quæ venas per montis hiantes,  
 Callirrhœ haud ignota tuæ, fumantia mitto  
 Sulphura. Sic ibant terra, & caligine testæ.  
 Jamque exaudiri crepitantes sulphure flammæ,  
 Conclusique ignes, stridentiaque æra caminis.  
 Hæc regio est late, variis ubi foeta metallis,  
 Virgo ait, est tellus: quorum vos tanta cupido  
 Exercet, superas cœli qui cernitis auras,  
 Hæc loca mille Deæ cæcis habitamus in antris,  
 Nocte Deæ, & Tellure fatæ, queis munera mille,  
 Mille artes, studium est aliis deducere rivos,  
 Scintillas aliis rimari, & sparsa per omnem  
 Semina tellurem flammarum, ignisque corusci.  
 Materiam miscent aliæ, massamque coërcent  
 Obicibus, multa & gelidarum inspergine aquarum.  
 Non procul eruptis fumantia testæ caminis  
 Ætnæi Cyclopes habent versantque, coquuntque  
 Vulcano stridente, atque æra sonantia cudunt.  
 Lava hæc abstrusum per iter via ducit ad illos.  
 Dexterâ sed sacri fluvii te sistet ad undam,  
 Argento fluitantem undam, vivoque metallo,  
 Unde salus speranda, & jam aurea testæ subibant,  
 Rorantesque domos spoliis, fuligineque atra  
 Speluncas varie obductas, & sulphure glauco.  
 Jamque lacus late undantes, liquidoque fluentes  
 Argento juxta astabant, ripasque tenebant.  
 Hic tibi tantorum requies inventa laborum,  
 Subsequitur Lipare, postquam ter flumine vivo

Perfusus, sacra vitium omne reliqueris unda.  
 Sic fatur, simul argenti ter fonte salubri  
 Perfundit, ter virgineis dat flumina palmis  
 Membra super, juvenem toto ter corpore lustrat  
 Mirantem exuvias turpes, & labe maligna  
 Exutos artus, pestemque sub amne relictam.  
 Ergo age, quum primum cœli te purior aër  
 Accipiet, nitidamque diem, Solemque videbis,  
 Sacra para, & castam supplex venerare Dianam,  
 Ind-genasque Deos & Numina fontis amici.  
 Sic Virgo, & juvenem tanto pro munere grates  
 Solventem e nocte ætherias educit in oras,  
 Dimittitque alacrem, atque optata in lumina reddit.  
 Accepit nova fama fidem, populosque per omnes  
 Prodiit haud fallax medicamen: cœptaque primum  
 Misceri argento fluitanti axungia porcæ.  
 Mox etiam Oniciæ simul adjuncta est terebinthi,  
 Et laticis resina æriæ. Sunt, qui unguen equinum,  
 Ursinumve adhibent, bdelæ, cedrique liquorem.  
 Nonnulli & myrrhæ guttas, & mascula tura  
 Adiciunt, miniumque rubens, & sulphura viva.  
 Haud vero mihi displiceat, componere si quem  
 Trita melampodia, atque arentem juverit irim,  
 Galbanaque, & lassæ grave olens, oleumque salubre  
 Lentisci, atque oleum haud experti sulphuris ignem.  
 His igitur totum oblinere, atque obducere corpus  
 Ne obscœnum, ne turpe puta; per talia morbus  
 Tollitur, & nihil esse potest obscœnius ipso.  
 Parce tamen capiti, & præcordia mollia vita.  
 Tum super & vittas astringe, & stuppea nocte  
 Vellera; dein stratis tegmento imponere multo,  
 Dum sudæ, stædæque fluant per corpora guttæ.  
 Hæc tibi bis quinis fatis est iterasse diebus.  
 Durum erit: at, quidquid tulerit res ipsa, ferendum est.  
 Aude animis; tibi certa salus stans limine in ipso  
 Signa dabit: liquefacta mali excrementa videbis  
 Assidue sputo immundo fluitare per ora,  
 Et largum ante pedes tabi mirabere flumen.

Ora tamen fœda erodens ulcuscula: sed tu  
 Lacte fove & cocto cytini, viridisque ligustri.  
 Tempore non alio generosi pocula Bacchi  
 Annuerim sumenda tibi, purumque Falernum,  
 Et Chia, & pateris spumantia Rhetica largis.

Sed jam age vicinæ victor gratare salutis:  
 Ultima adest tibi cura, eadem & placidissima, corpus  
 Abluere, & lustrare artus, ac membra piare  
 Stœchade, amaracinisque comis, & rore marino,  
 Verbenaque sacra, & bene olentibus heracleis.

*Liber Tertius.*

**S**ed jam me nemora alterius felicia Mundi,  
 Externique vocant saltus: longe aſſonat æquor  
 Herculeas ultra metas, & littora longe  
 Applaudunt semota, mihi nunc magna Deorum  
 Munera, & ignoto deveſta ex Orbe canenda  
 Sancta arbos, quæ ſola modum, requiemque dolori,  
 Et finem dedit ærumnis, age, Diva, beatum,  
 Uranie, venerare nemus, crinesque revinctam  
 Fronde nova juvet in medica procedere palla  
 Per Latium, & ſanctos populis ostendere ramos:  
 Et juvet haud umquam noſtrorum ætate parentum  
 Viſa prius, nullive umquam memorata referre.

Unde aliquis forſan novitatis imagine mira  
 Captus, & heroas, & grandia dicere facta  
 Aſſuetus, canat auſpiciis majoribus auſas  
 Oceani intacti tentare pericula puppes.  
 Necnon & terras varias. & flumina, & urbes,  
 Et varias memoret gentes, & monſtra reperta:  
 Dimenſasque plagas, altoque orientia cœlo  
 Sidera, & inſignem ſtellis majoribus Arcton.  
 Nec taceat nova bella, omnemque illata per orbem  
 Signa novum, & poſitas leges, & nomina noſtra.  
 Et canat (auditum quod vix venientia credant  
 Sæcula) quodcumque Oceani complectitur æquor  
 Ingens, omne una obitum, menſumque carina.



Felix, cui tantum dederit Deus, at mihi vires  
 Arboris unius satis est, usumque referre:  
 Et quo inventa modo fuerit, nostrasque sub auras  
 Advena per tantum pelagi pervenerit æquor.

Oceano in magno, ardenti sub fidere Cancri,  
 Sol ubi se nobis media jam nocte recondit,  
 Hac ignota tenus, tractu jacet insula longo:  
 Hispanam gens inventrix cognomine dixit:  
 Auri terra ferax: sed longe ditior una  
 Arbore: voce vocant patrii sermonis Hyacum.  
 Ipsa teres, ingensque, ingentem vertice ab alto  
 Diffundit semper viridem, semperque comantem  
 Arbuteis silvam foliis: nux parva, sed acris  
 Dependet ramis, & plurima frondibus hæret.  
 Materia indomita est, duro & pæne æmula ferro  
 Robora, quæ resinam sudant incensa tenacem.  
 Dissectæ color haud simplex, in cortice, lauri  
 Exteriore viret lævor, pars altera pallet  
 Buxea: at interior nigro suffusca colore est,  
 Juglandemque, ebumque inter, quod si inde ruberet,  
 Jam poterat variis æquare coloribus Irim.  
 Hanc gens illa colit, studioque educere multo  
 Nititur: hac late colles campique patentes,  
 Hac omnis vestitur ager: nec sanctius illis  
 Est quidquam, aut potiore usu: quippe omnis in illa  
 Spes jacet hanc contra pestem, quæ cœlitus illic  
 Perpetua est. validos abjecto cortice ramos  
 Multa vi tundunt, aut in segmenta minuta  
 Elimant, puroque scobes in fonte reponunt,  
 Dum bibulas noctemque diemque emacerat humor.  
 Inde coquunt: nec non illos ea cura fatigat,  
 Vulcano ne forte furens erumpat aquæ vis,  
 Et superundantem spumam projectet in ignes.  
 Spuma quippe linunt, si quidquam e corpore toto  
 Abscedit, si quidquam ægros depascitur artus.  
 Dimidia absumta, superest quodcūque, reponunt.  
 Divini laticis, quin & segmenta reliqua  
 Rursus, ut ante, coquunt, addentes suaveliquens mel.

Scilicet hunc unum mensis accedere potum  
 Et lex ipsa jubet gentis, mandatque sacerdos.  
 Servatum at laticem, & decocti pocula primi  
 Bina die quaque assument, quum surgit ab ortu  
 Lucifer, & sero egreditur quum Vesper olympo,  
 Nec prius absistunt potu, quam menstrua cursum  
 Luna suum, & totum peragrans perfecit orbem,  
 Fraternalque iterum convenerit æmula bigas.  
 Interea cæcis sese penetralibus abdunt,  
 Quo neque vis venti, non halitus aëris ullus  
 Insinuet sese, & gelidis afflatibus obsit.  
 Quid mirandum æque memorem, super omnia victima  
 Quam tenuem, quam magna sibi jejunia poscant?  
 Quippe solet satis esse, ipsum dum corpus alatur:  
 Dum superet vita, & tantum ne membra fatiscant.  
 Ne tamen ah ne tanta time, sacer ilicet haustus  
 Ille modo ambrosiæ, vires reficitque fovetque,  
 Inque occulta gerit jejunis pabula membris,  
 Nectare ab epoto binas, non amplius, horas  
 Imponunt sese stratis, medicamen ut intro  
 Large eat, & calido sudorem e corpore ducat.  
 Interea vacuas pestis vanescit in auras.  
 Et (dictu mirum) apparet jam pustula nulla:  
 Jamque nomæ cessere omnes, jam fortia liquit  
 Membra dolor, primoque redit cum flore juvenita:  
 Et jam Luna suum remeans nova circuit orbem.

Quis Deus hos illis populis monstraverit usus:  
 Qui demum & nobis casus, aut fata tulere  
 Hos ipsos: unde & sacræ data copia silvæ,  
 Nunc referam. Missæ quæsitum abscondita Nerei  
 Æquora, in occasum, Solisque cubilia, pinus  
 Littoribus longe patriis, Calpeque relictis,  
 Ibant Oceano in magno, pontumque secabant,  
 Ignaræque viæ, & longis erroribus actæ.  
 Quas circum innumeræ properantes gurgite ab omni  
 Ignoti nova monstra maris Nereides udæ  
 Adnabant, celsas miratæ currere puppes,  
 Salsa super pictis volitantes æquora velis,

Nox

Nox erat, & puro fulgebat ab æthere Luna,  
 Lumina diffundens tremuli per marmora ponti,  
 Magnanimus quum tanta heros ad munera satis  
 Delectus, dux errantis per cærula classis,  
 Luna, ait, o pelagi cui regna hæc humida parent,  
 Quæ bis ab aurata curvasti cornua fronte,  
 Curva bis explesti, nobis errantibus ex quo  
 Non ulla apparet tellus, da littora tandem  
 Aspicere, & dudum speratos tangere portus,  
 Noctis honos, cœlique decus, Latonia Virgo.  
 Audiit orantem Phœbe, delapsaque ab alto  
 Æthere, se in faciem mutat, Nereia quali  
 Cymothoë, Clothoque natant, juxtaque carinam  
 Astitit, & summo pariter nans æquore fatur:  
 Ne nostræ dubitate rates: lux crastina terras  
 Ostendet, fidoque dabit succedere portu.  
 Sed vos littoribus primis ne insistite: dudum  
 Ultra fata vocant: medio magna insula ponto  
 Est Ophyre; huc iter est vobis, hic debita sedes  
 Imperiique caput. simul hæc effata, carinam  
 Impulit: illa levi cita dissecat æquora cursu.  
 Aspirant faciles auræ, & jam clarus ab undis  
 Surgebat Titan, humiles quum surgere colles  
 Umbrosi precul, & propior jam terra videri  
 Incipit; acclamant nautæ, terramque salutant,  
 Terram exoptatam; tum portu & littore amice  
 Excepti, Diis vota piis in littore solvunt.  
 Quassatasque rates, defessaque corpora curant.  
 Inde, ubi quarta dies pelago, crepitansque vocavit  
 Vela Notus, remis insurgitur, altaque rursus  
 Corripiunt maria, & læti freta cærula sulcant.  
 Linquitur incerto fluitans Anthylia ponto,  
 Atque Hagia, atque alta Ammerie, exsecrataque tellus  
 Cannibalum, & ripa Gyane nemorosa virenti.  
 Protinus innumeræ panduntur turribus altis  
 Insulæ Oceano in vasto, quas inter opacis  
 Undantem silvis unam, cursuque sonantem  
 Fluminis aspiciunt, magno qui spumeus alveo

In mare fulgentes auro subveſtat arenas.  
 Hujus in ora placet pronas appellere puppes.  
 Invitant nemora, & dulces e flumine lymphæ.  
 Jamque ſolo viridante alacres, ripaque potiſſi-  
 in primis Terram ignotam, Nymphasque ſalutant  
 Indigenas, Geniumque loci, teque aurifer amnis,  
 Quiſquis in ora maris nitida perlaberis unda.  
 Tum duram Cererem, & patrii carcheſia Bacchi  
 Aggere in herboſo expediunt: dein quærere, ſi qui  
 Mortales habitent: pars fulvam fluminis undam  
 Mirari, mixtamque auro diſquirere arenam.  
 Forte per umbroſos ſilvarum plurima ramos  
 Aſſidue volitabat avis, quæ picta nitentes  
 Cæruleo pennas, roſtro variata rubenti  
 Ibat nativo ſecura per avia loco.  
 Has juvenum manus ut ſilvas videre per altas,  
 Continuo cava terrificis horrentia bombis  
 Æra, & flammiferum tormenta imitantia fulmen  
 Corripiunt, Vulcane, tuum, dum Theutonas armas,  
 Inventum, dum tela Jovis mortalibus affers.  
 Nec mora, ſignantes certam ſibi quiſque volucrem,  
 Incluſam, ſalicum cineres, ſulphurque, nitrumque,  
 Materiam accendunt ſervata in reſte favilla.  
 Fomite correpto diſfuſa repente furit vis  
 Ignea circumſepta, ſimulque cita obice rupto  
 Intruſam impellit glandem: volat illa per auras  
 Stridula: & exanimes paſſim per prata jacebant  
 Dejeſtæ volucres: magno micat ignibus ær  
 Cum tonitru, quo ſilva omnis, ripæque recurvæ,  
 Et percuſſa imo ſonuerunt æquora fundo.  
 Pars avium nemus in denſum conterrita, & altos  
 Se recipit ſcopulos: quorum de vertice ſummo  
 Horrendum una canit (diſtu mirabile) & aures  
 Terrificis implet diſtis, ac talibus inſit:

Qui Solis violatis aves, ſacraſque volantes,  
 Heſperii, nunc vos, quæ magnus cantat Apollo,  
 Accipite, & noſtros vobis quæ nunciat ore.  
 Vos, quamquam ignari, longum quæſita, ſecundis

Tan-



Tandem parta Ophyræ tetigistis littora ventis.  
Sed non ante novas dabitur summittere terras,  
Et longa populos in libertate quietos,  
Molirique urbes, ritusque, ac sacra novare,  
Quam vos infandos pelagi, terræque labores  
Perpeffi, diversa hominum post prælia, multi  
Mortua in externa tumuletis corpora terra.  
Navibus amiffis pauci patria arva petetis,  
Frustra alii locios quæretis magna remensî  
Æquora: nec nostro deerunt Cyclopes in orbe.  
Ipfa inter fe se vestras discordia puppes  
In rabiem, ferrumque trahet: nec fera manet vos  
Illa dies, fœdi ignoto quum corpora morbo  
Auxilium silva miseri poscetis ab ista,  
Donec pœniteat scelerum, nec plura loquuta  
Horrendum stridens densis sese abdidit umbris.  
Ollis ossa rigor subitus percurrit, & omnis  
Palluit, ac gelida fugit formidine sanguis.  
Tum vero sacras volucres. Divosque precati,  
In primis Solem, & sanctum servantia lucum  
Numina supplicibus venerantur agrestia votis;  
Pacem orant, rursusque Ophyren, fluviumq; salutant.  
Interea e silvis nigrum genus ora, comasque,  
Ad naves nova turba virûm concurrit inermis,  
Pectora nudi omnes, evincti frondibus omnes  
Paciferis: tanta qui celsas mole carinas  
Mirati, vestesque virûm, fulgentiaque arma,  
Vix satis expleri possunt: & ab æthere missi  
Sive homines, sive heroës sint, sive Deorum  
Numina, adorantum ritu, precibusque salutant:  
Ante alios ipsum Regem; cui munera læta,  
E ripis collectum aurum, & Cerealia dona,  
Et patrios fructus, & mella liquentia portant.  
Vestibus ipsi etiam nostris, & munere multo  
Donati, exceptique mero nova gaudia miscent.  
Non aliter, quam si mensis, dapibusque Deorum  
Mortalis quisquam adscitus, felixque futurus,  
Hauriat æternum, cœlestia pocula, nectar.

Ergo, ubi amicitiae securos foedere utrimque  
 Firmavere animos, habita & commercia gentis,  
 Ipsi inter sese Reges in littore laeti  
 Complexu jungunt dextras, & foedera firmant.  
 Alter gossipio tenui pectusque femurque  
 Praecinctus, viridi limbum pingente smaragdo,  
 Ora niger; jaculo armatur cui dextera acuto,  
 Squamosi spoliū sustentat lava draconis.  
 Alter at intexto laenam circumdatus auro,  
 Quam subter rutila arma micant, capiti aerea cassis  
 Insidet, & pictae volitant in vertice cristae:  
 Fulgenti ex auro torques, cui candida colla  
 Cingunt, atque ensis lateri dependet Iberus.  
 Et jam commixti populi, hospitioque recepti,  
 Hi testis domibusque, altis in navibus illi,  
 Laetitia, ludisque dies per pocula ducunt.

Forte loco lux festa aderat, Solique parabant  
 Ultori facere umbroso sacra annua luco.  
 Hesperiaeque, Ophyræque manus convenerat omnis.  
 Hic convalle cava, ripae viridantis in herba,  
 Selectorum ingens numerus, matresque, virique  
 Confusi, plebs, atque patres, puerique, senesque  
 Astabant, animis tristes, & corpora foedi,  
 Squallentes crustis omnes, taboque fluentes:  
 Quos circumfusus albenti in veste sacerdos  
 Purā lustrat aqua, & ramo frondentis Hyaci.  
 Tum niveum ante aras cedit de more juvencum,  
 Et juxta positum pastorem sanguine caeli  
 Respergit, pateraue rigat: Solique potenti  
 Ad numeros Praena canit: nec cetera turba  
 Non sequitur, mastantque sues, mastantque bidentes  
 Visceribusque veru testis epulantur in herba.

Obstupuit gens Europae rituque sacrorum,  
 Contagemque alio non usquam tempore visam.  
 At Dux multa animo tacitus secum ipse volutans,  
 Illic erat ille. inquit, morbus, (Dii avertite casum)  
 Ignotum interpres Phœbi quem dira canebat.  
 Tum Regem indigenam, (ut sermo fandique facultat

Jam

Jam communis erat) cui sint solemnia Divûm,  
 Scitatur: quid tanta astat convalle sub alta  
 Languentum miseranda manus: quid pastor ad aras  
 Sacra inter, cæsi respersus sanguine tauri.  
 Quem contra, Hesperix o heros fortissime pubis,  
 Rex ait, hi gentis ritus, hæc sacra quotannis  
 Ultori de more Deo celebramus: origo.  
 Antiqua est, veteresque patrum fecere parentes.  
 Quod si externorum mores, hominumque labores  
 Audivisse juvat primæva ab origine causam  
 Sacrorum, & pestis miseræ primordia pandam.  
 Forsitan Atlantis vestras pervenit ad aures  
 Nomen, & ex illo generis longo ordine ducti.  
 Hac & nos, longa serie, de stirpe profecti  
 Dicimur, heu quondam felix, & cara Deûm gens,  
 Dum Cælum colere, & Superis accepta referre  
 Majores fuevere boni, sed, Numina postquam  
 Contemni cœptum est luxu, fastuque nepotum,  
 Ex illo quæ sint miseros, quantæque secutæ  
 Ærumnæ vix fando umquam comprehendere possem.  
 Iniula tum prisca regis de nomine dicta.  
 Ingenti terræ concussa Atlantia motu,  
 Corruit, absorpta Oceano: quem mille carinis  
 Sulcavit toties, terræ regina, marisque.  
 Ex illo & pecudes, & grandia quadrupedantum  
 Corpora, non ullis umquam reparata diebus  
 Æternum periere: externaque victima sacris,  
 Cæditur, externus nostras cruor imbuit aras.  
 Tum quoque & hæc infanda lues, quam nostra videtis  
 Corpora depasci, quam nulli aut denique pauci  
 Vitamus, Divûm offensis, & Apollinis ira  
 De cælo demissa omnes grassatur in urbes.  
 Unde hæc sacra novo primum solemnia ritu  
 Instituire patres, quorum hæc perhibetur origo.  
 Syphilus (ut fama est) ipsa hæc ad flumina pastor  
 Mille boves, niveas mille hæc per pabula regi  
 Alcithoo pascebat oves; & forte sub ipsum  
 Solstitium urebat sitientes Sirius agros:

Urebat nemora: & nullas pastoribus umbras  
 Præbebant silvæ: nullum dabat aura levamen.  
 Ille gregem miseratus, & acri concitus æstu,  
 Sublimem in Solem vultus, & lumina tollens,  
 Nam quid, Sol, te inquit rerum patremque, Deumq;  
 Dicimus, & sacras vulgus rude ponimus aras,  
 Maestroque bove, & pingui veneramur acerra,  
 Si nostri nec cura tibi est, nec regia tangunt  
 Armenta? an potius Superos vos arbitrer uri  
 Invidia? mihi mille nivis candore juvencæ,  
 Mille mihi pascuntur oves: vix est tibi Taurus  
 Unus, vix Aries cœlo (si vera feruntur)  
 Unus, & armenti custos Canis arida tanti.  
 Demens quin potius Regi divina faceffo,  
 Cui tot agri, tot sunt populi, cui lata ministrant  
 Æquora, & est Superis, ac Sole potentia major?  
 Ille dabit, facilesque auras, frigusque virentum  
 Dulce feret nemorum armentis, æstumque levabit.  
 Sic fatus, mora nulla, sacras in montibus aras  
 Instituit regi Alcithoo, & divina faceffit.  
 Hoc manus agrestum, hoc pastorum cetera turba  
 Exsequitur: dant thura focis incensa, litantque  
 Sanguine taurorum, & fumantia viscera torrent.  
 Quæ postquam rex, in folio dum forte sederet  
 Subjectos inter populos, turbamque frequentem,  
 Agnovit, Divûm exhibito gavisus honore,  
 Non ullum tellure coli, se vindice, Numen  
 Imperat, esse nihil terra se majus in ipsa:  
 Cœlo habitare Deos, nec eorum hoc esse, quod infra est.  
 Viderat hæc qui cuncta videt, qui singula lustrat,  
 Sol pater, atque animo secum indignatus, iniquos  
 Intorsit radios, & lumine fullit acerbo.  
 Aspectu quo Terra parens, corruptaque ponti  
 Æquora, quo tactus viro subcanduit aër.  
 Protinus illuvies terris ignota profanis  
 Exoritur, primus, regi qui sanguine fuso  
 Instituit divina, sacraque in montibus aras,  
 Syphilus, ostendit turpes per corpus achores



Insomnes primus noctes, convulsiæque membra  
 Sensit, & a primo traxit cognomina morbus,  
 Syphilidemque ab eo labem dixere coloni.  
 Et mala jam vulgo cunctas diffusa per urbes  
 Pestis erat, regi nec læva pepercerat ipsi.  
 Itur ad Ammericen silva in Cartheside Nympham,  
 Cultricem nemorum Ammericen, quæ maxima luco  
 Interpres Divûm responsa canebat ab alto.  
 Scitantur, quæ causa mali, quæ cura supersit.  
 Illa refert; spreti vos o, vos numina Solis  
 Exercent: nulli fas est se æquare Deorum  
 Mortalem: date tura Deo, & sua ducite sacra,  
 Et Numen placate; iras non proferet ultra.  
 Quam tulit, æterna est, nec jam revocabilis umquam  
 Pestis erit, quicumque solo nascetur in isto,  
 Sentiet, ille lacus Stygios, fatumque severum  
 Juravit, sed enim, si jam medicamina certa  
 Expetitis, niveam magnæ mactate juvencam  
 Junoni, magnæ nigrantem occidite vaccam  
 Telluri: illa dabit felicia femina ab alto:  
 Hæc viridem educet felici e semine silvam:  
 Unde salus; simul obtulit: specus intus, & omne  
 Excussum nemus, & circum stetit horror ubique.  
 Illi obeunt mandata: sua ipsi altaria Soli  
 Instituunt: niveam, Juno, tibi, magna, juvencam,  
 Nigrantem, Tellus, mactant tibi, maxima, vaccam.  
 Mira edam (at Divos juro, & monumenta parentum)  
 Hæc sacra, quam nemore hoc toto vos cernitis, arbor,  
 Ante solo numquam fuerat quæ cognita in isto,  
 Protinus e terra virides emittere frondes  
 Incipit, & magna campis pubescere silva.  
 Annua confestim Soli facienda sacerdos  
 Ultorè nova sacra canit, deducitur ipse  
 Sorte data, qui pro cunctis cadat unus ad aram,  
 Syphilus: & jam farre sacro, vittisque paratis  
 Purpureo stabat tincturus sanguine cultros:  
 Tutatrix vetuit Juno, & jam mitis Apollo,  
 Qui meliorem animam miseri pro morte, juvenum

Supposuere, feroque solum lavere cruore.

Ergo ejus facti æternum ut monumenta manerent,  
Hunc morem antiqui primum statuere quotannis  
Sacrorum, ille tuum testatur, Syphile, crimen,  
Victima vana. sacras deductus pastor ad aras.

Illà omnis, quam cernis, inops, miserandaque turba  
Tacta Deo est, veterumque luit commissa parentum.

Cui votis, precibusque piis, numerisque sacerdos  
Conciliat vates Divos, & Apollinis iras.

Lustrati ingentes ramos, & robora sanctæ  
Arboris advestant testis: libamine cujus  
Vi mira infandæ labis contagia pellunt.

Talibus, atque aliis tempus per multa trahebant  
Diversis populi commixti e partibus orbis.

Interea, Europæ fuerant quæ ad cara remissæ  
Littora, jam rursus puppes freta lata remensæ  
Mira ferunt: late (proh fata occulta Deorum!)

Contagem Europæ cœlo crebrescere eandem,  
Attonitasque urbes nullis agitare medelis.

Quinetiam gravior naves it rumor in omnes,  
Illo eodem classem morbo, juvenumque teneri  
Haud numerum exiguum, & totis tabescere membris.

Ergo haud immemores, diras cecinisse volucres,  
Affore, quum silva auxilium poscatur ab illa,  
Continuo faciles Nymphas Solemque precati,  
Intacti nemoris ramos, & robora ab alto

Convectare parant luco, medicataque sumunt  
Pocula, pro ritu gentis: quo munere tandem  
Contagem pepulere feram, quin dona Deorum,  
Haud patriæ obliti, & felicem ad littora silvam  
Nostra jubent ferri, cœlo si forsitan isto

Assimilem pellant labem, nec fata secundos  
Ipsa negant Zephyros, facilisque aspirat Apollo.  
Munera vos Divûm primi accepistis, Iberi,

Præiens mirati auxilium: nunc cognita Gallis,  
Germanisque, Scythisque, orbe & gavisa Latino  
Jam nunc Europam vecta est Hyacus in omnem.  
Salve, magna Deûm manibus fata semine sacro,

Pul-

Pulchra comis, spectata novis virtutibus arbos :  
 Spes hominum, externi decus, & nova gloria mundi,  
 Fortunata nimis natam si Numina tantum  
 Orbe sub hoc, homines inter, gentemque Deorum  
 Perpetua sacram voluissent crescere silva.  
 Ipsa tamen, si qua nostro te carmine Musæ  
 Ferre per ora virum poterunt, hac tu quoque parte  
 Nosceris, cœloque etiam cantabere nostro ;  
 Si non te Bactra, & tellus extrema sub Arcto,  
 Non Meroë, Libycisque Ammon combustus arenis,  
 At Latium, at viridis Benaci ad flumina ripa  
 Audiet, & molles Athesi labente recessus.  
 Et sat erit, si te Tiberini ad fluminis undam  
 Interdum leget, & referet tua nomina Bembus.

## J O S E P H,

Ad Alexandrum Farnesium Cardinalem Amplissimum.

*Liber Primus.*

**Q**Uæ veterum Heroum, divæ, facta inclita, Musæ,  
 Et monumenta ævi longis obscura tenebris  
 Illustrare novis numeris, & carmine sacro  
 Ferre per ætates omnes, perque ora nepotum  
 Gaudetis, famamque virum proferre sub auras,  
 Nunc, o, nunc populi illius, quem maximus unum  
 Delegit Deus, & generis longo ordine ducti  
 Principe ab Abramo, veteres evolvite fastos :  
 Et juvenem cantate pium, quem magnus Jacob  
 Ifacides genuit: dederat cui nosse futura  
 Per somnos monstrata Deus, vos dicite, quanta  
 Ille tulit, Phariis tandem dum victor in oris  
 Imperium gereret magnum, populumque beatum  
 Conderet, unde salus hominum spes unde futura  
 Vitæ erat, & clausi referandum limen Olympi.  
 Nec minus, Italiæ Juvenis decus (omnia quando,  
 Quæ canimus, tua, Farnesi, sunt maxima jussa)  
 Ipse ades: &, plenum scopulis dum currimus æquor,

Da faciles in vela auras da numine dextro  
 (Namque Deus mihi semper eris) tua grandia vota  
 Posse sequi, pelagique omnes superare labores.  
 En primas fulcantem undas me littora Joppes,  
 Me juga Samariæ, nemorosaque pascua Sichen,  
 Jordanisque vocat: curvis en vallibus Hebron  
 Applaudit, cœloque simul tua nomina tollit,  
 Responsatque Tabor voces, & sidera pulsat.

Noverat infernus Pluton, cui multa futuri est  
 Scire datum, in fatis Abrami e sanguine sacram  
 Progeniem terris promitti, Tartara per quam  
 Evertenda forent, metuenti talia Pastor  
 Rexque idem Sichenus erat suspectus Jacob,  
 Invisusque nimis: tum quod nec sanctius alter  
 Justitiam legemque Dei servaret, & aris  
 Tura daret; tum quod bisseña prole beatus  
 Natorum, populum in sanctum con crescere solus  
 Posse videbatur, quare hanc intentus in unam  
 Progeniem, dabat omnem operam, quo perdere posset;  
 Præsertim egregium puerum, cui sidera fausta  
 Nascenti, & late felix arriserat æther.  
 Qui patre longævo Rachele e conjuge cara  
 Natus, erat patri ante alios dilectus Joseph.  
 Hunc forma insignem Charites studia inter alebant  
 Ingenua, & mores, & avitæ legis amorem.  
 Cui mens alta incrât quædam divina futuri,  
 Atque animus semper summi admirator Olympi,  
 Et pia religio, & puero prudentia major.

Ex his invidiam Dæmon, tacitumque serebat  
 Fratribus in reliquis odium, & mortale venenum.  
 Nec tantis non ipsa malis Fortuna fovendis  
 Affuit, augendisque odiis, nam forte per æstum  
 Quum fraterna cohors pecudes ad pabula nota  
 Lanigeras una silvas duxisset in altas,  
 Illiceaque umbra residerent, primus Joseph  
 In fratres conversus ait; mea somnia, fratres,  
 Audite, illa quidem mira, & nisi me mea fallunt  
 Auguria, haud vani speciem referentia somni.

Nam



Namque, sub Auroram quum se se sidera condunt  
 Casura jam nocte, & solus nunciat ortum  
 Lucifer, ipse meas spicas offerre videbar  
 sacras ante aras pariter vos ponere vestras.  
 Sed nostri cœlum fasces se tollere in altum,  
 Et rutilam insignes late diffundere lucem:  
 Vestri autem obscuri, atque humiles submittere se se  
 Utpote adorantes nostros. Cui grandior annis,  
 Atque odio in puerum non parvo accensus Judas:  
 Vane puer, quid mira vocas tua somnia? numquid  
 Forte, inquit, Deus illa aliquis tibi mittit ab alto?  
 Credo equidem, nam vina Deum dicuntur habere.  
 Augurium quodnam somno tibi fingis ab isto?  
 An forsan Rex noster eris? tibi pone coronam  
 E lauro, noceant regi ne vina futuro.

Talia dicenti fratrum quoque cetera turba  
 Acclamant, regemque novum, dominumque salutant,  
 Et puero illudunt, tum patri hæc somnia narrant.

At senior, cui non aberat Deus, omnia mente  
 Evolvit tacita, atque in nato grande futurum  
 Nescio quid spectans, aliis tamen omnia vultu  
 Dissimulat, puerumque monet nos ludere somnos.

Ille autem, cui fata Deus majora parabat,  
 Post paullo in somnis aliud quid pondere majus  
 Conspexit, nempe in celsa sibi sede locato  
 Sub pedibus Solem, ac Lunam, stellasque minores  
 Undique adorantes divinos reddere honores.  
 Quorum ille interpret (talem nam Numina mentem  
 Indiderant) rursus fraternas omnia ad aures  
 Detulit; illi autem non celavere parenti  
 Somnia, non offensum animum, non pectora amara.  
 Obstupuit primum genitor, puerumque vocatum  
 His, velut interpret somni, duro increpat ore:  
 Tene igitur pater, ac mater, fratresque, ait, & plebs  
 Omnis adorabit? tu sede locabere in alta,  
 Nos infra viles, humilesque precabimur? ah te  
 Si malus hic error tenet & spes impia nutrit,  
 Pone animum hunc, levibusque istis, & inanibus umbris



Tolle fidem, teque his fallacibus eripe monstis:  
 Quæ Dii, si mala sunt, & iniqua, immittere nobis  
 Non fuisse boni, ac potius mala Numina, Manes  
 Inferni exitium in nostrum ludibria fingunt.  
 Sic falsa ex adytis referunt oracula, sic &  
 Auguria ex avibus, dissectis omina ab extis.  
 An tibi non Belus non est tibi notus Anubis,  
 Atque Ops, atque Hecate, non cetera turba Deorum,  
 Quos miseræ Gentes aris, templisque dicatis  
 Ob responsa colunt, lex autem nostra prophanat?  
 Vade age, & hæc nobis posthac ne somnia perfer.  
 Sic ait, & natos alios per dulcia mulcens  
 Dicta pater, jubet in Sichen, saltusque virentes  
 Ducere molle pecus, puerum consistere Joseph  
 Se penes; expediunt juvenes mandata paterna,  
 Felicesque Hebron valles, & amœna vireta  
 Invisunt: sed non virides in vallibus he bæ,  
 Non umbræ nemorum, placidæve e collibus auræ,  
 Non volucrum cantus inimica insomnia possunt  
 Ex animis delere: eadem per singula versant,  
 Exacuuntque odia, atque iris laxantur habenæ,  
 Injunguntque minas: diræ serpentibus atris  
 Eumenides instant; atque hæc per talia jam Sol  
 Condiderat geminos ortus, quum luce sequente  
 Castra movere parant, Dothaique in pascua læta  
 Ducere oves, quo plus patriis ab ovilibus absint,  
 Producantque magis reditum, quæ invisa gerebant.

Ergo aliam atque aliam solito plus forte morati,  
 Quum traherent cum nocte diem, miratus abesse  
 Hos tantum genitor, confestim accersit Joseph:  
 Ique, ait, o mihi care puer, fratresque require  
 In Sichen: patrique refer, quæ causla morandi:  
 Nam timeo, nequid male faustum evenerit illis  
 Aut pecori. Ille viam, nulla est mora, corripit, & jam  
 Advolat in Sichen: sed fratribus, & grege nusquam  
 Compertis, quid agat, dubius huc spectat & illuc,  
 Omnia collustrans oculis: modo nomine fratres  
 Magna voce vocat: tantum nemora alta vocanti

Respondent, vallesque cavæ. Forte ilicis altæ  
 Frondator ramorum aderat, qui, ut vidit anhelum  
 Ancipitemque sui puerum, noto obvius illi:  
 Quid quæris, puer? inquit; oves si forte paternas,  
 Si fratres, ne quære istis in vallibus illos,  
 Quandoquidem audivi dicentes, saltibus ex his  
 In Dothain cedamus: ibi fratresque, pecusque  
 Invenies: dein monstrat iter. qua tramite recto  
 Ocyus inveniat lætissima pabula, namque  
 Plurima pars exusta aret, nec gramina nutrit.  
 Ille datum festinat iter; jamque ultima Sichen  
 Emensus, Dothain lætus propiora tenebat,  
 Quum specula longe venientem vidit ab alta  
 Plena odii fraterna cohors, ac protinus, en Rex  
 Noster, ait, quem Sol, quem Luna, & sidera adorant.  
 Nos famuli viles ad pastoralia nati,  
 Per deserta die rabido sub Sole vagamur:  
 Nocte in speluncis, patulave sub arbore somnos  
 Captamus, recti rude lana, & pellibus hirtis,  
 Decepti, vilique polenta, & flumine pasti.  
 Ille patris mensa virgata in veste recumbens  
 Lactibus hædorum, & lumbo pinguescit ovili,  
 Repleturque mero: tum stertens impia nobis  
 Somniat, huncne igitur, fratres, atque ista feremus  
 Opprobria? anne adeo cæci expectabimus, ut jam  
 Grandior, atque animis fidens, & patris amore  
 Nos premat, & ditionem omnem, & fausta omnia patris  
 Surripiat, sic vera nimis sua somnia reddens?  
 Heu fratrum ignaræ mentes, & pectora cæca.  
 Cur potius, dum testis abest, dumque omnia nobis  
 Dant animos. non hunc capimus? cur protinus istis  
 Confossum gladiis, puteo non condimus illo,  
 Qui prope contegitur dumis, & sentibus atris?  
 Dicemusque fame rabidorum ursive; lupive,  
 Qui multi deserta habitant hæc, dente peremptum.  
 Talia jactabant inter se se effera fratres  
 Consilia, at, cunctis aderat qui major & annis,  
 Et major pietate Ruben: Dii talia nobis

Avertant, ait; ah vestras ne sanguine, fratres,  
Fraterno maculate manus, neve ira Deorum  
Hec velit, ut scelus ob tantum nos, & domus, & grex  
Una omnes pereamus, abest si testis, at ipse  
Est testis Deus; ipse Deus quem nulla latere  
Facta queunt, quique hic & nos nunc spectat, & audit.  
Si tamen est animus vobis secludere prorsus  
Hunc puerum sine cæde ejus, sine sanguine in illum  
Trudite vicinum puteum, & dimittite fatis.  
Hæc vero suadebat, uti jam cæde remota  
Mox ipse ad puteum sera jam nocte rediret,  
Extraheretque illum, & misero sua pignora patri  
Redderet, ac fratrum tandem componeret iras.  
Verba omnes movere, placet sine cæde prehensum  
Proiicere in puteum, & miserum dimittere forti.  
Tum Ruben, a vobis fuerint quæcumque peracta,  
Horum me insontem videat Deus, ac procul inde  
Discessit, silvisque latens se condidit altis,  
Visurus rerum eventum, & jam lætus Joseph  
Festinus aderat: contra fratrum impia turba  
Circumfusa ruit minitans, manibusque revinctis:  
Nunc, inquit, tua vana tibi quid somnia prosint,  
Aspicias: numquid regi parebimus omnes?  
Ille pavens, stupidusque rei novitate precari,  
Talia ne insonti facerent, Superosque vocare  
Nequidquam: quando impatiens magis & magis urget  
Crescens corde furor, facibus furialis Erynnis  
Instat atrox, Dæmonque malus, qui oblistere fatis  
Posse putans, cunctorum aciem vertebat in unum.  
At puer ut nullis precibus, nullisque moveri  
Fratrum corda videt lacrimis, sed jam impete multo  
Compelli in foveam, quod restat, lumina tollens  
In cælum, tales fundebat ad æthera questus:  
Dii Abrahæ, Dii magni Isac, Dii patris Jacob,  
Vos ego si sancte colui, si jussa paterna  
Semper obii, semperque pie, & sine crimine vixi,  
Aspicite: & si fata mihi nunc ultima dant, ut  
Jam moriar, miserum saltem servate parentem.

At vos o, tenere, fratres, quos semper amavi,  
 Majoresque habui, curate, hæc tristitia ad aures  
 Ne patris adveniant, sed me rapuisse latrones  
 Dicite, quo saltem spe se soletur inani  
 Viventis nati, Stygias nec tendat ad umbras  
 Ante diem: deserta ipse intumultus arena  
 Emoriar; lacrimæ dicenti talia fusæ  
 Ex oculis cecidere, simul voxque ipsa repressa est.  
 Et jam etiam fratrum sedari pectus, & ira  
 Cœperat, Ilâchar quum, ne desistite, fratres,  
 Dixit, ab incepto, quin vinctum, & fune ligatum  
 In foveam mittamus: ibi suspensus in imo  
 Sistatur fundo, donec meliora parent Dii  
 Consilia, atque cibum interea capiamus in herba,  
 Quandoquidem jam Sol invitat, & altior hora.  
 Assensere omnes dictis, puerumque revinctum  
 Ad puteum flentem ducunt: hic fune ligata  
 Arboris ad truncum pendentis desuper altæ  
 Demittunt pavitantem intro, fundoque relinquunt  
 Suspensum; ast ipsi circum per gramina fusi  
 Implentur vili Cerere, & carotide pingui.

At Deus, ætherio terras qui spectat ab axe,  
 Infontem aspiciens, illo & miseratus amore,  
 Quo mare, quo terras, quo cœlum condidit altum,  
 Unum ex aligeris, qui circum mille, ministris,  
 Exspectant mandata, vocat: fidissime, & inquit,  
 Vade age, Samariamque tibi notissima dudum  
 Arva pete, & quem scis fatis ad magna vocari  
 Isacidæ puerum, qui cæco pascit ab antro  
 Auxilium, & fraterna odia, & facta impia plorat,  
 Hunc inopem solare; nec est mandare necesse,  
 Quæ referas, cui nota mea est, & aperta voluntas.  
 Sic ait, & nutu placido, quo sidera cursu  
 Perpetuo ducit Juvenem dimittit; at ille  
 Ætherias humeris accingit tenuibus alas,  
 Queis cœlum illæsum penetrat, queis nubila tranat,  
 Prævertitque fuga Zephyros; jamque æthera scindens,  
 Ærios tractus, & inania lata secabat.



Qualis, ubi in liquidis stagnis, aut ardea longe est,  
Aut albus conspectus olor, sacer accipitrum rex  
Post varios gyros sublimis ab æthere lapsus  
Immotis secat alta ruens oculo ocyus alis.  
Impete non alio Volucer cœlestis adibat  
Samarixæ terras; primus quem vertice summo  
Excepit Thabor, insuetum frondescere silvas  
Miratus, terramque nova vestirier herba,  
Et varios præter solitum summittere flores.  
Excepere illum prognatæ monte Napææ,  
Et divina Deo cecinerunt; omnia rupes  
Responsant, ipsa antra Deum, silvæque salutant.  
At sacer Interpres Divorum, ut vertice ab alto  
Lumina deflexit terris, ac gramine fusos,  
Vescentesque videt fratres, ast inde camelos  
Mercatorum Arabum spectat, Jovis omnia facta  
Imperio, hinc animum ad miserum convertit Joseph,  
Descenditque celer: puteique in margine summo  
Ut stetit, extemplo nova lux effulsit in antro  
Miratum & subitus puerum circumstetit horror.  
Quem pius Interpres placida sub imagine, & ipso  
Ore puer puerum dictis solatur amicis:  
Pone metum, Diis care, parrum Deus ille tuorum,  
Qui cœlum regit, huc alto me ex æthere mittit,  
Qui referam mandata tuos solantia luctus.  
Hinc primum mittère foras, sed venditus auro,  
Nomine Mancipii; tum Nili in regna fereris,  
Atque iterum vendère illic, multosque per annos  
Servus eris, tunc ne vetita, atque injusta libido  
Te alliciat, neu Dii alieni, & falsa caveto,  
Numina decipiant; vestrum si semper habebis  
Corde Deum, & ipse aderit semper tibi, te bona semper,  
Quidquid ages, quocumque iëris, fortuna sequetur.  
Quin, magis ut fidas animis, tibi magna parantur  
Imperia, & tempus veniet, quum vera videbis  
Somnia visa tibi, quum te fratresque, paterque  
Supplice adorabunt fletu: misereberis illis,  
Nec miseros patiære fames ut perdat iniqua:

Quin



Quin ipsos, natos & eorum, ipsosque nepotes  
 In partem imperii, atque in tua regna vocabis:  
 Ingens ut tandem populus concreascit, arenæ  
 Instar: quem Deus Ægypti de parte superba  
 Deducet tandem, & pedibus super æquora siccis  
 Pertransisse dabit, mox hæc in regna reducet,  
 Lacte novo quæ regna fluent, & melle perenni.  
 Mox (anni properate) diem felicia sæcla  
 Aspicient, sæcla illa diem, quam tanta futuram  
 Vatum oracula canunt, quum demittatur ab alto  
 Magna Dei Soboles, vestro de sanguine creta,  
 Quæ scelus antiquum tollat, quæ limina Cœli  
 Clausa diu, magnique fores præpandat olympi.  
 Nec plura effatus Cœlum se tollit in altum.

At juvenis, quamquam stupefactus Numine tanto,  
 Restitit, & rerum confusus imagine multa,  
 Lætatur tamen, atque animum per singula versat,  
 Speque futurorum præsentem corde dolorem  
 Discutit, atque oculos in cœlum, & sidera tollens  
 Sic fatur: Rex terrarum, Rex ætheris alti  
 Omnipotens, patrum Deus & tutela meorum,  
 Respice nos, & nostra tuo sub Numine si spes  
 Est omnis, super his primum miserere parentis.  
 De me autem quidquid statuet tua recta voluntas,  
 Seu lætum, seu triste pares, nihil ipse recuso.  
 Unum oro, si Parca mihi vidisse negabit  
 His oculis felicem illam, semperque beatam,  
 Optatamque diem, qua tandem ex æthere summo  
 Descendet tua Progenies, da cernere saltem  
 In speculo, atque umbra monstra mihi, speque, fideq;  
 Noscere da, puroque ejus de fonte lavari.  
 Dixit, & ex imo traxit suspiria corde.

Interea e Madian, staten, bdelaque ferentes,  
 Cinnamaque, & liquidam styracen, & pingua tura  
 Transibant Arabes, qua stabant gramine læto  
 Vescentes juvenes simul, & diversa loquentes.  
 Qui ut primum, videre viros, Deus, inquit Judas,  
 O fratres, meliora parat, quam nostra ferebant

Con-

Consilia: his etenim si mercatoribus ipsum  
 Vendamus puerum, tum lucro, auroque piati  
 Fraternali a morte immunes reddemur, & ad nos  
 Posthac nec fama adveniet, nec nomen Ioseph;  
 Sive Arabes isti Ægyptum, seu barbara regna,  
 Marmaricam, Libyamve petant; ergo unus ad illos  
 Mittatur, qui mancipii sub nomine, merce  
 Proposita pretium statuatur, responsa reportet.  
 Dicta placent, qui pacta ineat, jam mittitur: ipsi  
 Interea speluncam adeunt, funemque ligatum  
 Arboris ad truncum solvunt, & in æthera sursum  
 Suspensum educunt puerum: qui talis in auras,  
 Qualis mane rosa, aut riguo narcissus in horto,  
 Prodiit, & formæ servato vera decore  
 Signa dedit, certumque Dei præsentis amorem.  
 Jamque aderat mercator Arabs, & nuncius una  
 Vile satis pacti pretium, proh Iuppiter! ille,  
 Quem tanta in fatis promissa, & tanta manebant  
 Imperia, argenti bis deno venditur asse,  
 Mancipium infelix; jam curvo terga camelo  
 Excipitur. Nili ignotas jam fertur in oras.  
 At quadrupes, ceu divino sub pondere, vector  
 Insolitos dedit hinnitus, & signa recentis  
 Lætitiæ: jamque & grato facilisque, levisque  
 Sessori tergum, sellamque accommodat aptam,  
 Agglomeransque pedes, retro socia agmina linquit.  
 At fratres. puer ut cessit, mala nuncia patri  
 Quis ferat, & quo infanda tegant facta impia pacto,  
 Ambigui, tandem statuunt præmittere vestem  
 A puero ereptam, caprino sanguine tinctam  
 Qui ferat, inventamque inter nemora avia dicat:  
 Danque placet mandata dari: qui instructus abunde  
 Omnia, longævum non hæc miseranda parentem  
 Exspectantem adit, & monstrato sanguine, & ipsa  
 Veste, ait: hanc nostræ nemora inter devia primæ  
 Invenere canes: cuius sit vestis, & unde  
 Hic cruor, ignari, patrem primum esse monendum  
 Duximus, ut te (si quid agendum est) consule agatur.

At

At pater, ut notam, maculisque & sanguine vestem  
 Conspersam vidit: quis te, carissime Joseph,  
 Quis Divûm, ut tecum morerer, spes una senectæ,  
 Nate, meæ, quis casus, ait, tam durus ademit?  
 Heu mala te silvæ fera sustulit; ite per alta  
 Vos nemora, &, siquid misero de corpore restat,  
 Omne afferte, mihi saltem ut suprema sepulchri  
 D na feram: vel & ipse feris laniandus in altis  
 Proripiar silvas: dabitur natoque patrique  
 Mors eadem; hæc dicens, fœdatos pulvere canos  
 Vellebat, lacerosque sinu exscindebat amictus:  
 Et famuli tandem collapsum in tecta reportant.

Parte alia Ruben, ut ferum se vesper in orbem  
 Intulit, ad caulas pecudes, pecudumque magistri  
 Quum redeunt, saltusque vacant pastoribus omnes,  
 Desertum ad puteum solus redit, atque ibi Joseph  
 Terque quaterque vocat: non respondente vocanti  
 Ullo, sollicitus, puerum ne forte necassent,  
 Rem spectare parat, cæsaque ex ilice conto  
 Scalam aptat, solersque imum se mittit in antrum,  
 Omnia collustrans; verum, postquam omnia dudum  
 Rimatus, puerum quæsitum haud reperit usquam,  
 Ambiguus tandem reliquos perquirere fratres  
 Destinat: ac pecoris vestigia nota secutus  
 Per noctem, demum inventos, de fratre quid actum est,  
 Inter multa rogat, rem totam ex ordine pandunt.  
 At Ruben, ut puerum audivit superesse, nec ullis  
 Affectum damnis, hinc, fratres, inquit, camus  
 Ad miserum genitorem, & ipse viventis, & auras  
 Spirantis gnati saltem (quod nunc datur unum)  
 Solemur, rapuisse Arabes de more, relicta  
 Veste, levi pueri fugientis vulnere tincta:  
 Pastores ita ferre, aliquemque adducere testem  
 Expediet, neque enim deerunt, qui dicere possint  
 Se vidisse Arabes; his ergo rite paratis  
 Patrem adeunt, & quæ possunt, solatia jungunt.  
 Ille autem, quamvis aliqua spe forte levatur,  
 Non tamen æternas lacrimas, planctusque perennes  
 Com-

Comprimere, aut tristi meditari gaudia mente  
Ulla potest, sed vitam ægram noctesque, diesque  
In tenebris, hominum fugiens consortia, ducit.  
Interea puerum lætus deportat Joseph  
Mercator, plenis miratus cedere votis  
Omnia; non illis terræ exarsere diebus;  
Non ventis agitatæ ullæ tolluntur arenæ  
Ex solito: puerum Charites comitantur euntem,  
Et Cœli favor, & faustis Spes dextera pennis.  
Jamque pererratis Judææ finibus altæ  
Incipiunt turres, & mœnia Osyridis urbis  
Apparere procul, campis ubi fusa Juventus  
Munera militiæ exercent: hi vincere cursu  
Contendunt pedibus, hi fulvo in pulvere sudant  
Luctantes, alii duro sub pondere cestus.  
Pars volucres exercet equos, cursuque fatigat,  
Aut inferre hosti versas post terga sagittas  
Discit equo currente, aut hastam tollere campo.  
Ergo Arabes postquam accessere, & pulcher Joseph,  
Mirati pugnas placidi, & præludia Martis,  
Consistunt, oculisque intenti, & pectore toto  
Vix satis expleri possunt; quos forte magister  
Militiæ, Eunuchus Regis, cui summa potestas  
Et duri data erant Mavortia munera belli,  
Ut vidit, confestim ad sese accedere iussos  
Compellat; geritisne ullas, quas vendere, merces,  
Optetis? quædam, dixere, & aromata, & istum  
Gestamus puerum, domino qui si placet, ultro  
Munus habe: aut emptum si mavis, pro indole tanta  
Da quodvis: pretium est magnum tua gratia nobis.  
Ille autem, haud umquam ingratum, mercator, habebis  
Fetifarum: accipiam puerum, at tu munere largo,  
Speque tua majore, mihi donabere multo.  
His dictis recipit puerum, quem veste decora  
Induit, & sagulum donat, quo purpura limbo  
Fulva nitet, tum donat equum; lætissimus ille  
Altior it juvenes inter pulcherrimus omnes.  
Quem custode dato lætus præmittit ad urbem



Fetifar, & caræ uxori commendat habendum.  
Interea feras invexerat Hesperus horas,  
Et juvenum campis cedens manus omnis apertis  
Ibat ovans comitata ducem, ac jam pulcher Joseph  
Ut dominam invisit, thalami & cognovit herilis  
Officia, ipse humilis fervorum se agmine miscens  
Obvius it domino, media se qualis arena  
Monstrat gemma nitens, radiisve micantibus aurum,  
Talis & ipse puer multis in millibus ibat.  
Quem matres, populusque omnis mirantur, ut ipso  
Incessu, gravis ore, pedes non dimovet usquam  
A duce, non oculos, sed semper totus in illo est.  
Nec minus, intra ædes ut ventum, epulæque paratæ,  
Ipse ulli deest officio, seu corpore opus sit,  
Seu celeri ingenio; sed enim super omnia mira est  
Grataque sedulitas, apta & prudentia cana.  
Quo factum est parvo post tempore, Fetifar illum  
Non thalamo ut tantum ipse suo præfecerit unum,  
Sed domui, & rerum ei summam commiserit omnem.  
Scilicet auspiciis & Dii cuncta ire secundis  
Fetifaro sint visa, agri producere fruges  
Uberius, sobolem armentum, sibi crescere honores.  
Omnia quæ, ostento quodam permotus, Joseph  
Attribuit puero, vatumque oracula suadent.  
Arbor erat Persæa, Deo sacrata Camesi,  
Ædibus in mediis, quam vectam e Perside fertur  
Orbe pererrato monumentum insigne futurum  
Ipsa suis manibus plantasse nepotibus Isis.  
Hanc apis externis veniens insedit ab oris,  
Insignis fulgore, & versicoloribus alis  
Pulcher apis: quem mox examen grande securum  
Pendentem ramo longum traxere racemum.  
Protinus ostentum ad vates defertur; at ipsi  
Venturum externis aliquem portendere ab oris  
Declarant, ingens populus quem deinde sequatur  
Ipsam qui fortunæ opibus super æthera tollat.  
Fetifarum, largosque simul promittat honores.  
Ergo his auguriis tantis censetur Joseph



Monstrari, hinc majore illum dignatur honore  
Fetifar, hinc omnes adamant: sed maxime Jempfar  
Pulchra ducis conjux præ cunctis diligit unum,  
Nescia adhuc, quanto jam sit devota furori,  
Quis Deus insideat miseram, suspiria nondum  
Emittit, nondum lacrimas: sunt omnia læta,  
Dulciaque, & nondum quidquam persentit amari  
Quæ malus, infernas sedes, Cocytia regno,  
Qui regit, humani generis turbator, & hostis  
Ut vidit Pluton, semenque accrescere felix  
Isacidum, invisam sobolem, vocat ocysus unum  
Servorum, quibus insidiæ, fraudesque, dolique  
Sunt animo, queis mille artesque viæque nocendi,  
Ique, ait, & pulchram circum insinuatus Jempfar  
Falle dolo, & primas escas, quas sensit amoris,  
Tū flabris accende, imis illum ossibus ignem,  
Illam immitte facem, quam nec vis ulla Deorum,  
Non hominum exstinguat: mox ipsum accendere Joseph  
Si possis, omni arte stude. Quod vincere si qua  
Non dabitur, tu perge tamen, pete rursus Jempfar,  
Acrius ure, furorem adde, inspiraue venenum:  
Queis monstris agitata domum permisceat omnem,  
Inque odium, furiasque omnem convertat amorem.  
I celer, & nihil inde doli, scelerisque relinque.  
Ille hilaris, promptusque malis sumtame Styge lympham  
Miscet Acidalio latici, tum ex anguibus unum  
Tisiphones capit, atque sinu mala semina condit.  
Fetifari dein recta petens, nutricis Jempfar  
Induit Iphicles formam, dominamque salutans  
Audi, ait, o mihi cara, miser quis casus Joseph  
Torquet ad extremum vitæ: vidi ipsa gementem  
Nuper, & optantem supremæ munera vitæ.  
O mater, ne quære, inquit, nam, sive tacebo,  
Sive edam, omnino moriar; præstatque tacendo  
Et vitam, & nostri causam finire doloris.  
Cui ego: non sic, o fili, nam vulnera sæpe  
Auxilium patefacta, & opem invenere salubrem.  
Dic audacter, amasne? hæc si tibi causa doloris,

Spera, & fide, puer, namque ipsum vel tibi amorem  
 Eripiam magicis, vel tu potiere cupito.  
 Erubuit: tum dixit, amo. Dii sunt mihi testes,  
 Hunc quantum eluctans cœpi, quam invitus amorem,  
 Infidum in dominum qui me facit; at mihi sit mors  
 Exopranda magis, fidum periisse juvabit.  
 Sic ait, & fufis lacrimis pulchra ora rigabat.  
 Ut video, puer hic dominam te deperit: & ni  
 Opportune adsis, nimio moriturus amore est.  
 Cui virgo, o nutrix, quam dura & tristitia narras?  
 Namque & amo hunc puerum, & vellem succurrere  
 posse

Sed me jura Deum, sed vincla jugalia primum  
 Obstant: tum me tanto male sana periclo  
 Obiciam, & duri haud formidem conjugis arma?  
 Et nutrix, o nata, ipsorum crimina amantum  
 Dii ridere solent: solvendi jura mariti  
 Causa potes & iusta tibi est depellere mortem  
 A puero, qui nec culpam commiserit umquam,  
 Culpa nisi est vel amare nimis, vel amore perire.  
 Audendum est in amore, pericla nec ulla timenda  
 Prudenti, Dii deinde ipsos tutantur amantes,  
 Queis amor, & pietas est prima & maxima cura.  
 Est mihi aqua in dubiis rebus quæ assumpta videre  
 Vera facit, dubiique omnis pars utra legenda est.  
 Hanc dabo, si hac in re ancipiti stat cernere verum.  
 Ac Stygiam demonstrat aquam, medicataque fonte  
 Pocula Acidalio, placet, o carissima nutrix,  
 Virgo, inquit, totumque manu capit ipsa venenum  
 Intrepida, atque uno craterem absorbit haustu.  
 His actis puerum Iphicle se vertit ad ipsum,  
 Et gressu ad thalamum illius contendit anili:  
 Qui laudes Superum Regi & divina legebat.  
 Ut vero in thalami mentitus limine Dæmon  
 Constitit, & puero cœlestem assistere Joseph  
 Custodem vidit minitantem, ensisque coruscum  
 Vibrantem extemplo subita formidine captus  
 Horruit, & retro gressusque, animumque reduxit,

Aufugitque celer : nocturnæque alitis otî  
Effigiem capit, & tecto se sistit in alto.

*Liber Secundus.*

**A**T misera, ut Stygios latices desumlit Jempsar,  
Solaque permanlit, totis ardere medullis  
Visa sibi est, tota in subitum convertier ignem:  
Suspiransque, gemenisque, unum deposcit Joseph.  
Et modo se imponit stratis, paullumque morata  
Assurgit, modo mutat & hunc, modo mutat & illum,  
Fastiditque locum infelix, nec se capit usquam.  
Non secus ac solet ille, acris præcordia casus  
Cui torret, vel quem diptas calcata momordit.  
Tandem ait, heu quidnam est, quod me tam sæviter urit?  
Est ne amor, an sumti latices? nempe est amor iste,  
Quo moriar, nisi formosus succurrat Joseph.  
Tu mihi nunc succurre, puer, succurrere namque  
Ipsa etiam tibi constituo, moriemur amando  
Infantes ambo. Dii tanti criminis haud me  
Auctorem videant, non hæc Ægyptia tellus.  
Dum licuit, potuique, tori concordia jura  
Servavi, nunc major agit me visque, Deusque,  
Imperioque premit; sic sit mihi Numen amicum,  
Ut nosco, experiorque Deum, quem femina non est  
Contra stare potens. Deus hic custodiet ambos:  
Quin &, suetus amare, teget solatia nostra.  
Dixerat, impatiensque moræ vocat ocyus Efren,  
Unam ex ancillis dominæ, quæ fida solebat  
Ferre vigil mandata, vigil responsa referre.  
Vade, ait, & puero dic, huc accedat Joseph,  
Si vacat, & domini si nulla negotia nostri  
Impediunt; abit illa cita, & mandata faceffit.  
Nec longe post jussus adest formosus Joseph.  
Quem solum admissum virgo mutata colore  
Juxta astare facit: tum corde, & voce tremente  
Care inquit, puer, atque oculis mihi gratior ipsis,  
Verane tu dominæ dices, quæcumque rogabit?

Vera equidem (an fallam dominos?) ait ille, fatebor.  
 Tu quodvis pete, & illa: Puer, te perditte amare  
 Audio: si verum est, debent me nulla latere,  
 Nec si ego sim, quam perditte amas, nam (vera fatebor)  
 Ipsa etiam te perditte amo; tu nec mihi amanti,  
 Nec tibi ego crudelis ero: da jungere dextram;  
 Qualis eris, quantoque a me donaberis auro!  
 Sic ait, & summis puero dedit oscula labris.  
 Ille pudore rubens, & secum mente revolvens,  
 Quæ Divûm Interpres puero mandaverat olim,  
 Dii ne alieni illum, aut prava, aut injusta libido  
 Alliceret, taciteque Deum sibi adesse precatus:  
 Hæc tandem responsa dedit: quod perditte amare  
 Audis me, domina. illicitum si forsitan amorem  
 Audis, non ullam fateor me perditte amare:  
 Nec sic ipse etiam a quoquam peramarier opto,  
 Præcipue a domina, scis rebus me omnibus unum  
 Præfecisse ducem, seclusa conjuge tantum.  
 Anne igitur legisque meæ, dominique mei sim  
 Proditor? ah Stygias potius detrudar ad umbras,  
 Esca vel alitibus, media intumulatus arena,  
 Mittar: & hæc dicens dominam, thalamumque reliquit.  
 Illa autem, ut se se illulam, & spe funditus omni  
 Dejectam vidit, tamquam qui fulminis ictu  
 Percutitur, primum stupefacta, immotaque paullum  
 Constitit, inde imo ducens suspiria corde,  
 Astringensque manus, se se resupina cubili  
 Stravit inops animi, desertaque sanguine pallens.  
 At malus hæc summo testî de culmine Dæmon  
 Aspiciens, ave deposita, convertit anum se  
 Rursus in Iphiclen, miseramque revisit Jempsar,  
 Atque ait, o, quinam casus te, nata, malignus  
 Insequitur? quid cor cecidit? quid pallor in ore est?  
 Ah ne animis cade, ne te ipsam desere, nata.  
 En præsto tibi sum nutrix tua, pone timorem.  
 Respice me, audito nutricis nomine paullum  
 Erexit se se in cubitum, tum lumina torquens,  
 O nutrix, quondam nutrix, nunc dira noverca,



Occidisti, inquit, miseram me, nec puer ille  
 Perditæ amat, nec se (quod longe est pejus) amari  
 Sustinet, aut ullis precibus, donisve movetur.  
 Projeci memet, genus, & decus omne pudore  
 Fœdavi amisso, fractæ spes, fœdera rupi  
 Conjugii: tu causâ mali, tu criminis hujus  
 Principium; quid restat ad hæc, nisi cetera ferro  
 Conficere, & meritam hanc animam demittere ad Orcū?  
 Cui dictis falsa Iphicle respondet amaris:  
 Hæu, mulier rerum ignara, & male conscia amorum,  
 Quid mirum, puer insuetus, plenusque pudore,  
 Ceu virgo intacta, ad primos si expavit amoris  
 Aggressus, de te dubius, metuensque pericli?  
 Non ita res tractanda fuit, nec tu tamen omnem  
 Spem depone, rudem puerum nam rursus adibo,  
 Arguam, & ignarum, quæ sint facienda, docebo.  
 Tu tantum triduo expecta, lux quarta benignum  
 Sidus habet, miseros sidus quod spectat amantes  
 Conjungitque; sub hoc Hymenæus sidere primum  
 Natus, & ipse puer Venere enitente Cupido.  
 His dictis se se paullum solatur Jempsar,  
 Erexitque cadentem animum; meliora ferant Dii,  
 Vade, ait; interea sacras venerabimur aras,  
 Fundemusque preces, & amica vocabimus astra.

Ergo, ubi luce nova rutilum Sol aureus orbem  
 Implevit, visura Deos se se ornat Jempsar,  
 Pulchra auro, spectanda ostro, spectanda pyropo,  
 Sed forma spectanda magis, proprioque decore.  
 Quam matrum numerosa cohors comitatur euntem,  
 Nec non & famulis præses formosus Joseph  
 Lumina dejectus, dominæque suique misertus  
 It comes; ipse tamen sanctas procedere ad aras  
 Patronam putat, ut commissi criminis oret,  
 Exposcatque Deos veniam, & deponat amorem.  
 Contra autem illa rogat Divosque, & sidera cuncta,  
 Ut faveant votis, & sint in amore secundi.  
 Hæc eadem celebrat demens, & luce sequenti,  
 Atque alia, donisque etiam majoribus aras



Accumulans, pecudum fibras rimatur & exta.  
 Verum, ubi quarta dies rediit, Solque igneus orbi  
 Illuxit, lux sancta, inquit, lux optima salve,  
 Sidera vos, salvete, quibus conjungere amantes  
 Est amor, & sobolem mundo servare perennem.  
 Tum puerum acciri carum jubet; ocyus ille  
 Nil metuens, & jam dominæ securus amorum  
 Advenit; illa itidem sperans fore prospera cuncta,  
 Nutricis decepta Jolis, ut vidit amatum  
 In manibus puerum, meus es, meus, inquit, & ipsa  
 Sum tua: quid prohibet, ne nos jungamur amantes?  
 Iste torus communis erit: ne gaudia differ,  
 Neu sortem contemne tuam; tum pallia captat,  
 Et trahit ad sese puerum; stupet ille pudorem  
 In domina amissum, tandemque his vocibus infit:  
 Qui furor, aut quænam mala mens, olim inclita conjux  
 Fetifari, nunc hæc adigit te talia posse  
 Moliri? certe Eumenidum nunc te una sororum  
 Exagitat, nam (quam reris) non est tua nutrix  
 Iphicle, sed de Stygiis emissâ tenebris  
 Dirarum una, Jolis quæ te decepit, & astu  
 Illa eadem me aggressa malis conatibus ausa est,  
 Sed vetuit tentare Deus; vidi ipse retrorsum  
 Cedentem, & formam mentitam, & fumida novi  
 Sulphura, nidoremque atrum post terga relictum.  
 Talia dictabat puer; at post ostia Dæmon  
 Qui stabat, clausos magno conamine postes  
 Impulit, intravitque ferox, & lumine torvus  
 Tartaream effudit vocem, qua terruit omnes.  
 En ego mentita Iphicle, en ego sum una sororum  
 Eumenidum; una e Stygiis emissâ tenebris?  
 Nunc faxo, experire; sinuque cita eripit anguem  
 Pestiferum, qui secreta sub veste latebat,  
 In puerumque jacet. Custos cœlestis at illum  
 Reppulit, atque omnes conatus fecit inanes.  
 At coluber, sibi ut in puerum sublata potestas,  
 In miseram insidias omnes molitur Jempsar,  
 Perque solum tacite repens, ventremque retorquens

Lubricus in vestem insinuans se illabitur: inde  
 Interiora petens, & viscera cuncta pererrans,  
 Tartareum virus jaculatur ad intima cordis.  
 His monstris puer interea pavefactus, amictus  
 Immemor aufugit, seque in sua testa recepit.  
 Quem virgo ut fugisse videt, utque acre venenum  
 Sensit, in insanum subito conversa furorem,  
 Clamorem immensum tollit, quo ipsa atria, & omnis  
 Intremuit domus, & timuit vicinia tota.  
 Non secus, ac si Vulcanus penetralia cuncta  
 Involvat, cœloque furens incendia jactet.  
 Currite io, matres, scelus atque audite nefandum  
 Mancipii Hebræi, qui nunc, proh Juppiter, ausus  
 Fetifari est magni sacrum violare cubile,  
 Vimque inferre mihi, nisi nutrix tempore in ipso  
 Prompta tulisset opem, & sceleratum veste relicta  
 Ejecisset: io fugitivum apprehendite, servi,  
 Ite citi, properate, viarum claudite cuncta  
 Effugia, & domini scelus hoc afferte sub aures.  
 Talia vociferans misera effundebat Jempsar.  
 Omnia quæ falsa Iphicle confirmat, & auget,  
 Dignum morte fore, hoc sceleris qui admittere tantum  
 Audeat: exacuitque animos, clam deinde recedit  
 Nulli visa, & avi similis se immiscuit atris  
 Nubibus, & Stygias sedes, atque impia Diris  
 Regna petit, lætoque refert crudelia facta.  
 Interea miser a servis comprehensus Joseph  
 Ducitur, & nemo est, qui dicere multa volentem  
 Auscultare velit miserum, non Fetifar ipse,  
 Quem jam res audita acri compleverat ira:  
 Non tamen ut morti damnet, sed turre sub ima,  
 Carceris esse locus miseris ubi sueverat, illum  
 Intrudi jubet, & vigili custode teneri,  
 Tantum olyra vili, limoso & flumine pasci.

At juveni cœlestis erat custodia major  
 Aliger ætherius, summo qui missus ab axe  
 Carceris intrarat portas, ubi proxima terras  
 Nox omnes cæcis tenebris obduxit & umbra:

Ergo

Ergo alias puero notus, solatur amico  
 Ore illum, firmatque animum, tollitque timorem  
 Luce nova, excussa noctisque, & carceris umbra.  
 Omnia quæ postquam custos Ægyptius alta  
 Prospexit de turre, Deus, Deus, inquit, in illa  
 Luce viget, nosco splendorem, & verba notavi:  
 Nec Deus est illic, nisi & hujus criminis insons  
 Est puer, insonstem servabit Juppiter æquus.  
 Ex illo custos juvenem veneratur Joseph,  
 Et pascit meliore cibo, quam dura jubeant  
 Fetisari mandata, & duri carceris omne  
 Tollit onus, ferrumque pedum, visitque frequenter,  
 Solaturque, & sæpe in cælum educit apertum.  
 Jamque quater binos Phœbe compleverat orbes,  
 Quum duo, quorum alter pincerna Pharaonis, alter  
 Pistor erat Regis, præ suspitione veneni  
 In Cerere inventi, conclusi carcere eodem  
 Cum puero Ifacide fuerant, hi tempore parvo  
 Post, utrique una viderunt somnia nocte,  
 Somnia, quæ mox mane novo dum mutua versant,  
 Ignari, quid portendant, monstrentve futurum,  
 Sollicitis nutant animis, quod pulcher Joseph  
 Conspectuens, quidnam, juvenes, tam pectore tristes  
 Vos hoc Sole novo video? Nos somnia facta  
 Nocte hac sollicitos reddunt, quæ exponere, nemo est,  
 Qui sciat hic, dixere: quibus sic pulcher Joseph;  
 Somnia vos narrate, Deus dignoscere forsan  
 Illa dabit. Dicemus, ait, pincerna, priorque  
 Ipse sedam; nam Vitis erat pulcherrima ternis  
 Lætâ propaginibus, gemmas turgescere primum  
 Palmitibus; mox & flores exire videbam,  
 Post flores gravidis uvas pendere racemis:  
 Quos jam maturos manibus premere ipse videbar,  
 Vinaque diffundens pateris spumantia plenis  
 Regi larga dabam, solito Rex more bibebat.  
 Cui puer interpres. Quidnam tua somnia monstrent,  
 Expediam; vitam illa tuam pulcherrima Vitis  
 Ostendit: gemmæ, flores, uvæque secutæ,

Sunt

Sunt fructus, quos tu peperisti temporis hujus  
 Curriculo: dabitur merces, & honoribus ipse  
 Restituere tuis, & pristina pocula Regi  
 Consuetudo de more dabis: terna illa propago  
 Tres luces, quibus hæc veniant tibi prospera, monstrat.  
 Tu vero, quum te carum, gratumque Pharaon  
 Accipiet, nostri (si qua hujus gratia facti est)  
 Sis memor, immeritumque isto dic carcere claudi.  
 Tum pistor simul ac vidit dicta omnia recte  
 Congruere, ipse etiam, dixit, mea somnia pandam.  
 Nam capiti imposita ipse meo tria plena canistra  
 Spectabam, duo farinæ inferiora, supremum  
 Omni opere plenum, omni illo pistoria quod scit  
 Ars facere, & nostrum ingenium, sed cuncta volucres  
 Exesse, & secum latas deferre per auras.  
 Cui bonus interpret: Divum est novisse futura,  
 Falli hominum est; dicam, quidnam tamen augurer ipse  
 His super; illa, quibus vidisti plena canistra,  
 Sunt opera, & vitæ fructus: duo prima, ubi simplex  
 Farina est, vitæ monstrant duo tempora prima,  
 In quibus & simplex vita, & sincera peracta est:  
 Summum opere infido plenum est, & fraude, dolisque  
 Omnibus, ingenium quæ, aut ars pistoris iniqui  
 Extrudisse valet, quæ sunt jam cognita Regi.  
 At merces horum meritorum, & præmia, fœdæ  
 Sunt volucres, corvi immundi, milvique rapaces.  
 Vulturique, caput qui effossaque lumina pascent  
 In cruce suspensio: tribus hæc ventura diebus  
 Terna canistra notant: tamen hæc me fallere possunt,  
 Si tu animo possis mutari, nam & Deus ipse  
 Sæpe solet mutare mala, & convertere fata.  
 Talia tractabant juvenes. & tertia jam lux  
 Orbi investita aderat, quum custos carcere aperto  
 Pincernam insonrem, noxa pœnaque solutum  
 Declarat, miserum Regis decreta severi  
 Pistorem damnare cruci; de carcere uterque  
 Ducitur haud æqua sorte, & longè impare fato.  
 Hic ad tigna, ille ad Regem stipatus ovantum.



Et latus clamore virum, & clangore tubarum.  
 Vertitur; interea ter Solis cursus in alta  
 Solstitia, atque novum mundo portaverat annum:  
 Forteque Rex dulcem prona jam nocte quietem  
 Ducebat, Deus ex alto quum somnia in illum  
 Immisit, miranda adeo, ut cedente sopore  
 Attonitus Rex magnum aliquid portendere visa  
 Crederet; ergo omnes jubet e regione vocari  
 Chaldaea, Aegyptoque, quibus cognoscere cursus,  
 Metirique vias coeli, & momenta minuta  
 Astrorum, casusque hominum, & praenosse futura est  
 Cura audax, necnon magicis qui incumbere sacris  
 Consuevere, & qui ex adytis oracula Divum  
 Consulere, & caesarum oviumque, boumque per exta  
 Rimari secreta solent, qui noscere flammæ,  
 Qui fluitantis aquæ motus, qui jungere arenæ  
 Fatalem numerum, & cognoscere fulminis iras,  
 Quique vias servare avium, & dignoscere cantus,  
 Denique, divini rerum quicumque vocantur.  
 Quorum ingens numerus magni plena atria Regis  
 Intrarant, alii longis capita alta tiaris  
 Induti, aut alii spectandi cornibus hirtis,  
 Auratis alii strophis: longissima mento  
 Cunctis pendet barba, ipso stat pallor in ore.  
 Quos simulac ad se Rex alta a sede vocavit,  
 Somnia visa docet primum, dein munera larga  
 Promittit, largosque illis proponit honores,  
 Somni qui interpret fuerit; noctemque diemque  
 Responso tempus statuit; sed noxque diesque  
 Venerat, & nemo apparet, qui somnia Regi  
 Enodare queat, nulli sua sidera, nulli  
 Ars magica, aut quaesita aris oracula profunt:  
 Non artes aliæ, non barbæ, aliæque tiaræ.  
 Ergo hinc irasci, & tristis mœrere Pharaon,  
 Nec quemquam audire, ac solo in conclave latere.  
 Hic Regis pincerna, memor, quæ in carcere Joseph  
 Fecit, & ipsorum quam verus somnia vates  
 Exposuit, subito Regem petit, atque ita fatur:



Peccavi, Rex magne, tibi, quæ in carcere vidi,  
 Non referens; nam scis, ut mecum pistor iniquus  
 Carcere damnatus fuerit sub turre magistri  
 Militiæ, eunuchi; forte illo carcere eodem  
 Fetifari puer Hebræus, puto crimine falso  
 Missus erat; duo nos (ita suavi) somnia quædam  
 Nocte habita a nobis, juveni narramus; at ille  
 Divino quodam afflatu visa omnia nobis  
 Exponens, mihi, te, dixit, lux tertia ab isto  
 Carcere deducet, multis & honoribus auctum  
 Restituet primo officio: te, pistor inique,  
 Lux eadem in cruce constituet, te immunda volucrum  
 Agmina depascent, corvi, milvique rapaces,  
 Vulturiique, nisi ipse animum convertere possis  
 In melius, sic namque Deus mutatur & ipse.  
 Omnia quæ evenisse vides; tua somnia certe  
 Hic puer exponet, magnum nam Numen in illo est.  
 Auditis Rex lætus ait, vade ocyus ergo,  
 Duc puerum, & nostro jussu de carcere solve.  
 Ille celer mandata facit, puerumque parumper  
 Ornat, detondetque comas, vestemque ministrat;  
 Tum Regi adducit timidum. Rex omnia iustrat  
 In puero, sibi cuncta placent, sic denique fatur:  
 Te, puer, hi dicunt exponere somnia, numquid  
 Vera ferunt? ast ille: Deus, Rex optime, solus  
 Somnia nosse potest, & si cui maximus ille  
 Hoc dederit; potero ipse meo pro Rege precari,  
 Atque orare Deum: forsan dabit, omnia quando,  
 Quæ Regum sunt, ipse solet curare Deum Rex,  
 Atque hominum; dein paullum animoque, & mente  
 moratus,

Nunc inquit, Rex magne, mihi tua somnia pando.

Fluminis ad ripas Nili stare ipse videbar,  
 Rex ait & septem ecce boves e flumine pulchræ  
 Exire, & late errantes per littora pasci  
 Florentes herbas, loton medamque virentem,  
 Et suavem mynianta, quibus pinguescere, quantum  
 Plena solet, sacras quæ ducitur hostia ad aras.

Vix

Vix oculos verti, ecce aliæ per littora septem  
 Deformes, ægræque, quibus vix pellis adhæret  
 Ossibus, apparere boves, quæ carice summa  
 Vix pastæ, & dura paliuro, & sentibus hirtis  
 Corpora macra, suis nervis vix ducta, trahebant.  
 Obstupui, nam dira fames, atque ardor edendi  
 Improbus exegit tantum has, ut pingua septem  
 Corpora prima boum congressæ tota vorarent.  
 Mox iterum dulcis me habuit sopor alter, & ecce  
 Rursus septem uno spicæ consurgere culmo,  
 Pulchræque, gravidæque, & onustæ pondere multo.  
 Mox septem prodire aliæ tenuisque, & inanes  
 Exili e stipula, scabraque urigine tostæ,  
 Quæ succum, & decus omne aliarum absumere visæ  
 Sunt mihi, miratus postquam sopor ille recessit,  
 Somnia proposui multis, sed dicere nemo  
 Scit sensum, & portenta horum: te si manet ista  
 Gloria, si te unum e tantis hæc somnia poscunt,  
 Toto animo lætare puer; te fama sequetur  
 Perpetua, & tantis a me ditabere donis,  
 Ut te non videat maiorem Ægyptia tellus.  
 Cui juvenis: Rex magne, Deus te diligit ipse est,  
 Somnia qui immisit, nec, quæ illa intelligat, esse ars  
 Ulla potest quæ auctore Deo non utitur: unde  
 Nec vates potuere tui, quibus omnibus est ars  
 Absque Deo. Primum septem felicibus annis  
 Largius undantem solito, majoreque Nilum  
 Flumine rumpentem ripas, secumque trahentem  
 Felicem limum, fœcundæque æquora arenæ  
 Fortunata nimis tellus Ægyptia cernet.  
 His annis tantum messis, tantum uberis illa  
 Colliget, ut non sufficiant solita horrea messi  
 Ubertatem istam pingues nimiumque nitentes  
 Monstravere boves septem, quæ e flumine Nili  
 Exivere, herbas pingues per littora pastæ.  
 Hanc etiam & spicæ septem, quas pondere onustas  
 Lætæque plenæque uno consurgere culmo  
 Vidisti, pariter monstrant: nam somnia visa

Non duore, sed idem ostendunt, nunc porrigere mentem  
Optime Rex: nam septem annos, qui deinde sequentur  
Infelix steriles, duosque Ægyptus habebit.  
Ipse intra ripas demisso flumine Nilus  
Curret iners, supraque caput limumque feracem  
Non tollet: sicca arebunt arva omnia, sicca  
Solstitia, & nulli descendant montibus amnes  
Consueti pluviarum amnes sub sidere Cancri:  
Æthiopum populis nec hiems æstiva redibit.  
Agricola infelix nullo versabit aratro  
Arva, nec arenti mandabit semina terræ,  
Sed miseros edet annona cogente juvencos.  
Hæc septem docuere boves per littora sicca,  
Deformes, macraque; quibus vix ossibus hærens  
Pellis erat; hæc septem ille rubigine tostæ,  
Squallentesque situ spicæ, & sine pondere turpes  
Ostendunt: duplici exemplo te commonet ipse;  
Qui novit ventura, Deus, quo tu quoque solers  
Commovere magis, damnoque occurrere possis.  
Quod facere ut valeas, si me fortasse requiris,  
Sic habeas, majora para primum horrea, & omne,  
Quod superat segetum his septem felicibus annis,  
Coge illic, servaque vigil; dein multa talenta  
Aurique, argentique in fruges undique emendas  
Impende, annorum quantum penuria septem  
Exposcet ventura fami, campisque ferendis.  
Talia narrabat juvenis, quæ singula mente  
Rex volvit tacita; tandem & sic voce profatur:  
Hoc certe Deus in puero, nec talia dici  
Absque Deo potuere, nec illi Ægyptia tellus,  
Aut Chaldæa videt similem; tum amplectitur illum  
Læticia illacrimans; post me tota ista secundum  
Te aspiciet regio, servatoremque vocabit.  
Sic ait, & chlamydem gemmis, ostroque nitentem  
Ferre dat, atque auri torquem circumdare collo.  
Mos erat, ut gemma cælata, insignis & auro  
Annulus, antiquo regum de more vocatus  
Regius, a nullo, nisi Rege Pharaone, posset

Gestari, aut si quis foret ipso ab Rege secundus:  
 Hunc sibi Rex digito detractum imponit Joseph,  
 Quo populus post regem illum sciat esse secundum.  
 Præterea, qua se solemnibus ipse diebus  
 Invectum multa populis urbiq̃ue iolebat  
 Ceu quemdam monstrare Deum, sic mandat & ipsum  
 Urbe vehi, mulaque eadem procedere Joseph,  
 Præclamante tuba, Regi inclinate secundo  
 Quisque caput, sanctoque novos conspergite flores  
 Servatori hominum, solus qui somnia Regis  
 Exposuit, qui plena Deo præcordia gestat.  
 Talibus ornatus donis, & honoribus auctus  
 Isacides juvenis, cuncto acclamante senatu,  
 Præficitur toti Ægypto. Qui sedulus omni  
 Ingenio, curaque in primis horrea ubique  
 Magna parat, mox frugum ingentibus undique acervis  
 Collectis, partim terra Memphitide natis,  
 Partim emptis aliunde implet, stipatque, nec ullum  
 Dat rebus spatium: regionem lustrat, equorum  
 Imminuit numerum, atque hominum: Dii cuncta se-  
 cundant.

Urbs erat Helipolis, Solis de nomine dicta,  
 Cujus Rex, idem & templi Phœbique sacerdos  
 Supremus natam formæ, & virtutis habebat  
 Insignis, quam sæpe Deus consultus Apollo  
 Dixerat haud ulli indigenæ thalamo esse locandam:  
 Conjugium externum fato majore parari,  
 Quo genus, & clari tollantur in astra nepotes.  
 Ergo istæc juvenem monstrare oracula Joseph  
 Censet & antistes templi, & Rex ipse Pharaon.  
 Quo circa, quum jam septem felicibus annis  
 Ægypto in tota ubertas, atque omnia ubique  
 Læta forent, placuit Regi dignis hymenæis  
 Et thalamo Isacidem juvenem sociare jugali;  
 Lætitiâque augere, diesque inducere festos.  
 Ergo hæc per ludos, & per convivia læta  
 Dum fiunt septem sæcundi messibus anni  
 Jam finem, ubertasque omnis jam copia habebat

Jam.



Jamque pererratis Geminis per sidera Cancri  
 Sol altos agitabat equos, Ægyptia quum gens  
 Miratur Nili nulla incrementa videri,  
 Sed purum & nulla permixtum flumen arena  
 Ipsum inter ripas tristi procedere cursu  
 Jam tellus fœcunda prius, nunc aret, hiatque  
 Usta siti, nec spes Cereris promittitur ulla.  
 Semina si qua etiam lætis sparguntur in arvis,  
 Aut nullos edunt fœtus, aut protinus omne  
 Enatum fœdæ vitio rubiginis aret,  
 Aut abit in lolium infelix, fluidumve papaver.  
 Vivitur ex annis lapsis, retroque coaëto  
 Fœnore, quod primo sterili vix sufficit anno.  
 Verum, ubi dira fames homines se vertere ad herbas,  
 Et pecus immeritum, atque immunda animalia adegit,  
 Regem urbes, & rura adeunt, subsidia poscunt.  
 Rex ad Præfectum cunctos dimittit Joseph,  
 Servatorem hominum; populis hinc horrea aperta,  
 Et iustum indictum pretium: gaza undique, & omnes  
 Congestæ portantur opes; æraria Regis  
 Complentur: nec adhuc quartus se verterat annus.  
 Quid facerent miseræ gentes? sola arva supersunt,  
 Quæ vendant, si emptorem habeant, nam solus Joseph  
 Esse potest pro Rege emptor; ergo ille rogatur,  
 Arva emat, & miseris det opem, nec pacta recuset.  
 Reddituum cujusque agri quintam dare Regi  
 Promittunt, sic pacta ineunt, sic fœdera firmant.

Interea, externas quoniam penuria terras  
 Hæc eadem affligit, populos it fama per omnes,  
 Ægyptum sat frumenti, quod vendat, habere.  
 Ergo & Sichenus natos affatur Jacob:  
 Cur non Ægyptum, nati, cur regna beata  
 Non petitis, cur non nobis alimenta paratis?  
 Num perimat nos ista fames? mandata capessunt  
 Natorum deni; fratrum natu ultimus astat.

Ut vero Ægyptum petiere, & Osyrida terram  
 Frumentis Præfectum adeunt, & supplice cultu  
 Ære dato frumenta rogant; cognovit Joseph



Germanos, statuente Deo, non cognitus illis.  
 Præteritique memor, quamvis injuria multum  
 Facta potest, tamen & patris, fratrisque misertus  
 Benjamin, his etiam parcit, tum fatur ad illos:  
 Unde & quinquam hominum ad nostras, acceditis oras;  
 Illi autem: e terra Canaan, de sanguine Jacob  
 Venimus huc cogente fame, quæ plurima perdit  
 Samariam; domus est nobis plenissima, primus  
 Est pater, undecim nati, parvique nepotes,  
 Pastorumque manus, vernerum est plurima turba.  
 Venimus ergo ad te, nobis alimenta rogantes,  
 Ne pereat gens tanta: tibi justa æra dabuntur.  
 Nec nos immemores erimus; pater optimus urbem  
 Ipse regit Sichem, pastor, cui millia multa  
 Sunt pecudum: quovis pretio da vivere tantum.  
 His verbis quamquam frater commotus, & ægre  
 Abstenuit lacrimis, ficto tamen omnia vultu  
 Dissimulans, quid verba mihi datis, inquit? an ipse  
 Eludar? nisi me os fallit vultusque loquentum,  
 Exploratores puto; cur mandata paternæ  
 Non geritis? cur nec frater huc venit & alter?  
 Ast illi: minime, tales ne rere, precamur.  
 Per patrem, patrisque Deum juramus, adire  
 Nos jussit, nos dira fames: natu ultimus unus  
 Cum patre Benjamin adolescens restitit, & spes,  
 Solamenque senis: nos, qui sufferre laborem  
 Possumus, atque moras longarum auferre viarum;  
 Venimus orantes vitam, mandata putantes  
 Nulla opus esse istic ferri: miserere precantem,  
 Et miserere patris, pueri miserere relictæ,  
 Parvorumque (potest pietas si in te ulla) nepotum.  
 Hic lacrimas vix continuit, convertit & ora,  
 Toto animo, & vultu multum commotus Joseph.  
 Inde ait: est mihi firma, viri, sententia menti,  
 Frater ut huc alius veniat: vestrum hic erit unus  
 Obses, vos alii ad patrem frumenta feretis  
 Interea: haud aliter (per Regem & Numina juro)  
 Ulla potest vobis abeundi hinc esse potestas,

Neu faciem spectare meam, aut audire loquentem.  
 Consulite, & ternis dentur responsa diebus.  
 Sic ait, & custode dato, victuque remittit.  
 Illi, inter sese postquam diversa locuti  
 Viderunt Præfetti animum, præstare putarunt  
 Ferri multa domum frumenta, loco obsidis unum  
 Dimitti, properare alios, iterumque reverti  
 Emptum alias fruges, alium & conducere fratrem.  
 Ergo nominibus scriptis fors ducitur, obses  
 Extrahitur Simeon, & jam lux tertia mundo  
 Clara aderat responsa petit Præfectus, at ipsi  
 Enarrant decreta: igitur frumenta parari  
 Imperat accepto pretio: clam deinde ministros  
 Admonet, ut summis faccis æra omnia ponant,  
 Quod fuerit cuiusque datum, custodibus obses  
 Traditur: at fratres oneratis tergora asellis  
 Ægyptum, & multo fratrem mœrore relinquunt,  
 Samariamque petunt: quo postquam denique ventum est.  
 Atque unum pater e natis sibi vidit abesse,  
 Clamat, ubi Simeon meus est? cur cernere natum  
 Non datur? est ne æger? minime, pater, inquit Judas,  
 Sed valet, Ægypti est obses tellure relictus,  
 Dum rursus redeamus, & hinc ducamus & istum  
 Benjamin, nam qui frumentum vendidit, ut nos  
 Vidit vir magnus, & ab ipso Rege secundus,  
 Quæsiuit multa a nobis, numquid pater esset,  
 An frater nobis alius: quæ quum omnia recte  
 Dixemus, vos has certe venistis ad oras  
 Exploratores, inquit, mandata paterna  
 Cur non huc geritis? cur non alium quoque fratrem  
 Huc duxistis? ad hæc respondimus omnia: tandem  
 Summa fuit frumenta dari, nos deinde reverti,  
 Adduci puerum, interea obses detur & unus  
 E nobis maneat: per Regem & Numina Cœli  
 Juro, inquit, nec vos aliter frumenta feretis  
 Posthac, nec me audire umquam aut spectare licebit  
 At pater, hæc postquã audivit, proh summe Deum Rex,  
 Estne adeo infelix alius pater? occidit unus

Natorum, obses & est alius, subducitur alter  
Cum reliquis, simul ut cuncti moriantur, & ipse  
Exspectem, ferat hæc nostras crudelis ad aures  
Nuncius; o prius hanc miseram, Dii, demite vitam.  
Talia fundebat lacrimans; circum undique nati  
Solantur, tam adversa bonos non Numina habere.  
Mox, ubi depositis solverunt vincula faccis,  
In summis æs omne datum, pretiumque repostum  
Inveniunt: stupuere omnes, sed tristis Jacob  
Hoc deerat, nati, hoc, inquit, quod funditus omnem  
Spem raperet, nam si vobis Ægyptia ad arva  
Sit reditus, quis vos primum vir maximus ille  
Exploratores dixit, nunc nomina furum  
Imponet, causam inquirens, qua perdere possit.  
Nempe ego Benjamin puerum, spem patris, & unum  
Solamen, non huic tradam, fidamque periclo.  
Vos alii, si fata urgent, Divumque voluntas,  
Ite, rei fidei promissæ; ego, quidquid apud me est,  
Aurique, argentique dabo, quo vos redimatis  
Et fratrem, &, si fors aderit, frumenta feratis.  
Quem contra illacrimans juvenis sic fatur Judas:  
Care pater, nos primum audi, dein consule nobis,  
Atque tibi; nam quo pacto continget adire  
Illum hominem, qui juravit, per regia sceptrâ,  
Per Superos, nisi Benjamin duxerimus ipsum,  
Ille quidem nec nos, nec, qui est in carcere, fratrem  
Dimittet, faciemve ejus spectare licebit?  
Verum, ut de nobis sint dura, & tristia quæque,  
Vos miseri quonam pacto viveris, & unde  
Tanta domus? capiti, quæso, pater optime, tandem  
Fide meo, puer iste omnes servabit, & ipsum  
Te patrem, mihi præterea duo pignora cara  
Sunt, nati, tu illos (concedo) interfice, si quid  
Adversi puero eveniat: depone timorem,  
Atque omnem defende domum, quod pondera faccis  
Sint æris posita in nostris, jussisse ministris  
Id dominum certum est, incertum, fraude, dolove,  
An pietate magis; nos certe audivimus illum

Insignem virtute omni, nos vidimus illum  
 Nobiscum flevisse famem, atque incommoda nostra,  
 Dum teque, & parvum fratrem, parvosque nepotes  
 Commemoramus, age, o genitor, ne tempora differ,  
 Neu plures inneſte moras: & talia dicens  
 Adjecit lacrimas; victus pater: Ibitis ergo,  
 Tandem ait, & puerum, & regionis dona feretis,  
 Staſtenque, & lacrimas terebinthi, & roſcida mella  
 Et gummi, & liquidam ſtyracen, & amygdala amara.  
 Inſuper & duplex pretium portabitis, & quod  
 Inventum fuit in ſaccis, & quod data poſcent  
 Frumenta; interea faciemus ſacra parentum  
 Noſtrorum noſtrique Deo, quo cuncta ſecundus  
 Dirigat, & ſervos cœlo proſpiciet ab alto.

Poſtera Phœbeos currus Aurora vehebat,  
 Quum pater, & nati ſacris de more peractis  
 Cuncta viæ opportuna parant, & munera, & ipſum  
 Benjamin: quem jam genitor complexus euntem,  
 Et lacrimans, I, care puer, felicibus, inquit,  
 Auspiciis: ſi te rediturum fata reſervant,  
 Vitam oro. lacrimæ vetuerunt dicere plura.  
 Tum ſimul & reliquos natos complectitur omnes,  
 Commendatque Deo, aſt illi bona verba precati  
 Durum iter, & longum capiunt, camposque relinquunt  
 Samariæ, Solymenque ſacram: jam conſita Idumes  
 Prætereunt palmeta, Gerar, & Tartara vaſta  
 Syrbotis, tandemque vident Ægyptia regna,  
 Optatamque petunt Memphim; quos lætus Joſeph  
 Suſcipit: atque una fratrem de carcere ſolvit.  
 Ut vero admiſſis coram data copia ſandi,  
 Sic Ruben: hinc poſtquam diſceſſimus, optime Princeps,  
 Venimus ad genitorem, illi tua maxima juſſa  
 Narramus, fratrem duci te velle minorem  
 Benjamin hunc iſtum: tum ſaccis ordine apertis,  
 Res mira, in ſummis pretium, atque æs omne, quod ante  
 Exhibitum fuerat, ſe offert: quis miſerit, & cur.  
 Ignotum eſt, Deus eſt teſtis, verum, ut pater iſtæc  
 Audivit, viditque, imo ſuſpiria corde



Traxit, & heu, nati, dixit, male Numen amicum  
 Nos aliquod nunc insequitur, fortuna recessit  
 Illa bona, e bis sex natis amissimus unum:  
 In vinclis alius longinquis exfulat oris:  
 Nunc spes, & miseræ solamen dulce fenestæ,  
 Benjamin abduci petitur: vos rursus abitis,  
 Nescio quo, & vereor, furum ne nomine eati,  
 Omnes ut tandem fato pereatis ab uno.

Nos contra miserum solari: fide parentum,  
 Nostro & fide Deo, genitor: justissimus ille,  
 Ille vir est, regio quem tota Ægyptia dicit  
 Servatorem hominum, sanctumque, piumque fatetur,  
 Et colit: hinc nihil adversum, durumque timendum est.  
 His victus cessit tandem: Vos ibitis ergo,  
 Et ducetis, ait, puerum, atque hæc parva feretis  
 Munera, quæ regio fert hæc, statem, & terebinthi  
 Resinam, & liquidam styracen, & amygdala amara,  
 Mellaque: dein duplex pretium portabitis, & quod  
 Impositum fuerat faccis, & quod data poscent  
 Frumenta: & demum iusto natumque, patremque  
 Commendate illi, pueri miserescat & hujus,  
 Atque senis natos nimium miserescat amantis.  
 Talia dictabat juvenis, quum lumina Princeps  
 Vix lacrimis cohibens tali est sic ore locutus:  
 Este bonis animis, juvenes, ego munera grata  
 Accipio regionis, & hunc, qui adductus ab omni  
 Suspicionem puer, vos omni a fraude piabit.  
 Ite, & fessa via, fœda & sudore lavate  
 Membra, viri; mox luce bona discumbite mecum.

Hæc Princeps; famulorum alii in conclave lavacrum,  
 Vasa alii, mensasque parant; hæc inter Joseph  
 Multa super regno, & populis disponit alendis;  
 Dein redit ad fratres, magnamque educit in aulam,  
 Regales ubi monstrat opes, vasa aurea signis  
 Cælata, argentumque abacis, stratosque tapetas,  
 Necnon parietibus circum pendentia longis  
 Aulæ, intextis auro, & bombyce figuris,  
 Quas dicas spirare; illic divina secutus



Jussa Abraham, puerum in silvas ducebat Isaac  
 Maestandum: puer ilignis onerabat asellum  
 Fascibus, ipse pyram genitor, vittasque parabat.  
 Ille idem dextram vicina in parte levabat,  
 Crudelemque enssem: demissus lumina Isaac  
 Et flexis genibus ferituro colla parenti  
 Præbebat: cœli demissus ab axe vetabat  
 Nuncius, & dextram sublatam, enssemque tenebat.

Parte alia fratrem fugiens tendebat Jacob  
 In patris antiquas sedes, cognataque regna,  
 Euphratem. Tygrimque inter: patruelibus inde  
 Virginibus hauribat aquas: tum pastor ad undas  
 Euphratis dum pascit oves per littora Laban,  
 Rachelem vocat, & dulces decantat amores.

Talia dum læti spectant Israël nati,  
 Spemque aliquam sibi promittunt, tum magnus Joseph,  
 Jam genio libemus, ait: date flumina palmis,  
 Vos famuli: tum sede altus discumbit eburna.

*Morte præventus, hoc item, quod sero inceperat, absol-  
 vere non potuit.*

## ALCON,

*Sive de cura Canum Venaticorum.*

**A**ssiduis nuper fessus venatibus Alcon,  
 Falleret æstivi ut fastidia longa diei.  
 Corvini qua se nemora excelssissima cœlo  
 Extollunt, viridi dum captat frigus in umbra,  
 Dicitur ad juvenem senior sic fatus Acastum:  
 Me segnes artus, defectaque viribus ætas,  
 Et superare jura. & latis discurrere campis,  
 Et torquere leves hastas, & ferre pharetram,  
 Nate, verant, densaque indagine cingere silvas.  
 Sed te pulvereum cursu transmittere campum,  
 Ferre æstum, frigusque leves agitare Molossos,  
 Et pinguem silvis ad tecta avertere prædam

Nunc

Nunc decet, ac validam pro me exercere juventam.  
En arcum, pharetramque tibi, jaculumque relinquo:  
Ne tamen usque adeo plenæ confide pharetræ,  
Ut postrema canum interea tibi cura putetur:  
Quorum ope veloces poteris prævertere cervos,  
Aut aprum ingentem, aut fulvum superare leonem.  
Ergo age, & hæc tecum semper mandata reserva.  
Principio ut generosa canum tibi copia numquam  
Desit, quæ certam valeat promittere prædam,  
Elige degeneri nequaquam semine natos,  
Sed quos assidue silvis exercuit altis  
Et labor indomitus, sævarum & præda ferarum.  
Nec vero parvi formamque, genusque putaris:  
Nam neque sunt animi, neque mores omnibus iidem:  
Et variæ diversa canum dant semina gentes.  
Nam rabidas si forte feras te cura tenebit  
Venari, & variis caput objectare periclis,  
Spartana de stirpe tibi, de stirpe Molossa  
Quære canes, Libycos illis, acresque Britannos.  
Pannoniosque truces, & amantes prælia Celtas  
Adde, nec Hircanos, nec Seras sperne feroces.  
Si vero parvos lepores, capreasque fugaces  
Malueris, timidofque sequi per devia cervos,  
Delige Pæonios agiles, volucresque Sicambros.  
Quod tibi si latebras, abstrusaque lustra ferarum  
Rimari certa catulorum indagine cordi est,  
Hunc usum implebit Perses, & Saxogelonus.  
At genere ex omni præsertim delige quæ nec  
Corpore sit gracili, nec densis aspera villis,  
Sed sublime caput, vivacia lumina, & amplam  
Ostendet frontem, atque ingentes oris hiatus;  
Cui rectæ surgant aures, cui pingua terga  
Dividat in caudam descendens spina reflexam:  
Sint armi lati, sint æque pectora lata:  
Lata alvus, quæ sic costis adjungitur imis,  
Ut tamen in spatium sensim se colligat arctum:  
Ut cava diductis succedant ilia costis,  
Excipiant siccis quas fortia crura lacertis,

Ima pedum parva signent vestigia planta.  
 Huic similem conjunge marem, quum vere tepenti  
 Tangit amor genus omne avium, genus omne ferarum,  
 Bis quinos tamen ante dies accensus uterque  
 In venerem, venere abstineant: sic plena libido  
 Acrius exstimulat, viresque ad semina præbet.  
 Hinc major soboles, atque inde valentior exit.  
 Quæ simulac se se numeroſo protulit ortu,  
 Selige de multis quos jam præſtare videbis  
 Pondere: vel ſtipulæ flammis include ſonoris  
 Ingentem turbam: prolis nam mora periculo  
 Egregiam sobolem, melioraque pignora mater  
 Ocyus eripiet flammis, & inertia linquet.  
 Illi igitur plenis ubi nondum viribus ætas  
 Accessit, parvum cursu conſcendere collem,  
 Et molli aſſueſcant ſe ſe dimittere clivo.  
 Hinc tenerum leporem, vel crura infirma trahentem  
 Seſtari capream, & facilem percurrere campum  
 Incipiat, verbisque viri parere vocantis.  
 Nulla mora eſt, iſſis creſcant cum viribus anni,  
 Jam potes hos tuto denſis committere ſilvis:  
 Perque altos montes, per luſtra agitare ferarum:  
 Nec minus aut apro, aut fulvo objectare leoni,  
 Si modo vel capreas, vel dedignabere cervos.  
 Immodicis tum parce cibus, tum curſibus illos  
 Exerce aſſiduis: ac mox ad teſta reverti,  
 Vincla pati diſcant: ita demum libera colla,  
 Quum res ipſa, uſuſque vocat, majore feruntur  
 Impete, nec curſum remoratur pigra ſagina.  
 Haſtenus in ſilvis catulos eduximus altis:  
 Nunc quæ morboſis ſit cura adhibenda, docebo.  
 Inſomnes quum forte canes occulta ſatigat,  
 Vimque adimit febris, putrem tunc ore cruorem  
 Ferro emitte levi; dein Eacſtica dona roſarum  
 Miſce oleo, & rapidis ſmul omnia concoque flammis,  
 Terque die inſerto demitte in guttura cornu.  
 Si vero nimio venandi langueat æſtu,  
 Butyro lapathi ſuccos, Siculique Lyxi

Pocula, contusumque piper simul omnia miscens  
Profubige: ut certi simulac commixta liquoris  
Prætulerint speciem cupido canis hauriat ore.  
Immodicam sed forte sitim dum subleuat atro  
Fonte canis, lymphæ mala si successit hirudo,  
Cimiceo suffire canem nidore licebit:  
Aut oleo prisanam, & spumanti melle subactam  
Incoquere, offensoque cani præbere vorandam.  
Aut quum terra lues (clavos dixere) palatum  
Afficiet misere, silvestria sesama, necnon  
Bacchi acidos latices, & chartam fume perustam,  
Acque Ammoniæ frustum: dein singula in unum  
Confundens, terræ caussam superilline pestis.  
Tum vero, ardentes oculos inimica perurit  
Quum tabes, crebræque fluunt a lumine guttæ,  
Jam frondes sacræ myrti, silvestris & uvæ,  
Arentesque rosas diluto concoque Baccho,  
Hisque affecta levi citus ablue lumina dextra,  
Inde oleum, atque ovi niveos immitte liquores.  
Quod si nativo stimulatur coxa dolore,  
Lemiulum lapidem (Meditem nomine dicunt)  
Urina semel atque iterum demerge recenti;  
Cui Bacchi dulces, acidosque adjunge liquores,  
Quaque latet pestis sumta circumline penna.  
Ast ubi rupta novo manabit sanguine vena,  
Tum murem geminum, ac telam pendentis Arachnes  
Ure foco, cineremque undanti impone cruori:  
Proderit & ferro candenti tangere vulnus.  
Obstructo vero lotii quum forte meatu  
Vexari aspicias catulum, Cerealia dona  
Obiice, lacte prius sime perfusa capellæ.  
At contra venis si quando sanguis apertis,  
Pro facili urina, terram madefecerit atram,  
Conveniet lente ferventi lactis ahenæ  
Mollire, & tenues coriandri immittere succos,  
Infractumque piper, laticemque undantis olivi,  
Inferoque cani paullatim infundere cornu.  
Quid? taceam nimio quum decidit ungula cursu?



Frangere namque juvat pallentis grana cumini  
 Dentibus, admotaque pedem lenire saliva:  
 Incipientque novi subcrescere protinus ungues.  
 Fit quoque ut immundo catulus juguletur ab æstro,  
 At tu silvestrem crepitantibus urere rutam  
 Ignibus, & fumo pariter mulcere salubri  
 Disce: dehinc acri perfundere vulnus aceto.  
 Quin aures etiam muscarum turba molesta  
 Impetit usque adeo, mutilatum appareat alte  
 Ut caput: ipse autem venienti occurre periclo,  
 Et prius has nucibus, viridique putamine tinge.  
 Quid quum dura canes inter se prœlia miscent,  
 Alter ut alterius percussus dente laboret?  
 Tunc etenim cervi flammæ subiecta voraci  
 Ossa teres, oleo subigens frondentis olivæ  
 Unguinis in morem, ac vulnus lethale perungens:  
 Quamquam etiam possis ramenta inducere ferri.  
 Namque venenifero serpentis saucius ictu  
 Quo valeat, scit sponte sua reperire salubre  
 Gramen, & ipse sibi nullo auxiliante mederi.  
 Senferit at rabidos ubi morsus, protinus ipse  
 Idæam rutæ foliis, acrique Lyæo  
 Junge picem, læsæque adhibe hæc medicamina parti.  
 At mala quum scabies miseros depascitur artus  
 Latrantum, & fæde miserabile corpus adurit,  
 Cérussam, abdomenque bovis, resinamque tenacem,  
 Butyrumque recens viridantibus incoque sensim  
 Lentisci foliis, infectaque membra perunge.  
 Sed tunc præcipue solerti mente cavendum est,  
 Quum rabie accensus nunc hos, nunc impetit illos;  
 Ipsi insensus hero, datque insanabile vulnus.  
 Ergo illum primo valida compesce catena:  
 Inde rosæ agrestis radicem pondere saxi  
 Contusam vivi fontis consperge liquore,  
 Ut potus speciem lino colata nigranti  
 Præferat; hac sumta, revocari ad pristina tradunt  
 Sensa canem, ac posita rabie mirescere rursus.  
 Sunt qui silvestres ficus, adipemque vetustum

Contundant: ederas alii ferventibus undis  
 Emollire jubent, donec pars una superfit  
 E tribus, atque ipsis foliis, tepidoque liquore  
 Paicere quadrupedem, Aurora surgente furentem.  
 Nil tandem usque adeo prodest, ac prima sub ipsum  
 Principium morbi rescindere semina ferro.  
 Nam qua parte imo conjungi lingua palato  
 Cernitur. & fauces, nativo concolor auro  
 Occupat, in rabiemque feros agit usque Molossos  
 Vulnificus vermis, suffunditque ora veneno.  
 Quem si quis potuit ferro refecare, potentem  
 Is tanti abstulerit caussam, stimulumque furoris.  
 Quæ superant, olim: nunc prædam ad testa jacentem  
 Ferre monet præsens fugientis temporis hora:  
 Quandoquidem calamos posuit Coridallus acutos,  
 Et jam sublustris investat Luna tenebras.

*In obitum M. Antonii Turriani Veronensis, ad Joannem  
 Baptistam Turrianum fratrem.*

Etsi egomet tanti casu percussus amici  
 Solamen nostris discuperem lacrimis,  
 Ne mea perpetuo manarent lumina fletu,  
 Pergeret aut tantos urere corda dolor,  
 Attamen, ut mi animi valuit concedere amaror,  
 Istæc mæsta tibi carmina persolui:  
 Quo fortasse meis consolarere Camœnis,  
 Si miseros quidquam Musa levare potest:  
 Ac ne tu in lacrimas paullatim totus abires,  
 Liquitur ut pluvio tacta pruina Noto.  
 Quandoquidem cari fato te fratris acerbo est  
 Rumor in extrema vivere tristitia,  
 Nec jam posse quietis habere, aut commoda somni,  
 Sed cedente die, sed redeunte queri:  
 Mœrentemque, vagumque, & turpem fletibus ora  
 Amissum totis quærere littoribus.  
 Fortur ut Eridani ripas errasse per omnes  
 Anxia fraterno funere Lampetic.

Septem quam perhibent somni sine munere noctes,  
 Jejunam septem continuasse dies.  
 Et, quoties longo defessa errore viarum  
 Umbrosi in ripa concidit Eridani:  
 Reddite vos Phaëtona mihi, clamabat ad undas,  
 O quaecumque sub hoc flumine Nympha latet.  
 Te tamen, ullius si cuiquam morte dolendum est,  
 Iusta quidem tanti causa doloris habet.  
 Quandoquidem immatura morte tibi omnia frater  
 Commoda, teque ipsum perdidit, atque tuos:  
 Perdidit hei misero carus tibi frater ademptus,  
 Quo tibi non ullus carior alter erat.  
 Ille amor, ille tuæ solamen dulce juventæ,  
 Ille tuæ fuerat spes, columenque domus:  
 Quicum versari semper, quicum esse solebas,  
 Atque animi arcana dicere consilia:  
 Unum mirari, atque unum præponere cunctis:  
 Ambrosiæ e cujus effluere ore lepos.  
 O nimium miseri nos, & genus ærurnosum,  
 Deterius quorum est conditione nihil.  
 In nos sævitum est bello, quo durius umquam  
 Vidit nulla ætas, nec feret ulla dies.  
 Servitium tulimus crudele, & barbara iussa,  
 Parsque domos caras liquimus, & patriam.  
 Reliquas, miserosque absumsit tabida cives,  
 Pestis, & huc illuc sævit Erinny's adhuc.  
 Nec sat erat: miseri crudelia funera Cottæ  
 Flevimus, o indigna, Cottæ, peremte nece.  
 O Cottæ infelix, quæ te fata impia nobis  
 Tam subito ante tuos abripuere dies?  
 Jam neque finierant gemitus, & lumina siccis  
 Non bene cessarant tristitia flere genis,  
 Quum tu, Marce, cadis, quum nos tot tristibus actos  
 Deferis, heu falsos credulitate tui.  
 Non hoc vivida nos tua jam sperare iuventa,  
 Hoc tua non virtus, non benefacta dabant,  
 Exanimem ut nos te juvenem, nec jam ulla loquentem  
 Externa miseri contegeremus humo:

Sed fore, quem fama virtus æquaret olympo,  
Unus qui multos instrueres populos.  
Qualis ab aërio decurrens monte jugi fons  
Communes multis sufficit unus aquas.  
Nam quid ego aut laudes memoræ, aut tua maxima laudū  
Præmia? quam humano profueris generi;  
Aut quam sæpe animas positas jam sedibus Orci  
Ad sua Apollinea membra vocaris ope?  
Vos testes, Ticine, & qui inter pascua læta,  
Medoace, antiquos abluis Euganeos:  
Illo quos fama est naturæ arcana docente,  
Sæpe inter Nymphas obstupuisse suas.  
At nunc amisso turbatis fletu sub undis,  
Inque mare assuetas non habuisse vias.  
Non tamen aut soli, nec vos magis omnibus, amnes,  
Indoluistis acerbo illius interitu.  
Illum etiam Grajæ, & Nymphæ flevete Latinæ,  
Illum etiam Tuscis Calliopea modis.  
Quin etiam silvæ, & montes genuisse feruntur,  
Et vos extremi fletis Hyperborei.  
Sed mage Benacusque senex, & Sarca, sepulti  
Qui prope vicinum prætereunt tumulum.  
Sed magis ipse Athesis, olim qui corpus humandum  
Condendum caram perferet in patriam,  
Ne extra cognatos cineres, atque ossa parentum  
Illum perpetuo terra aliena regat.  
Tunc vos o patrio prognatæ Najades amne  
Spargite odoratis plena sepulchra rosis.  
Tempus erit, quum posteritas mirata nepotum,  
Quantum isti, dicent, ah tribuere Dei!  
Atque aliquis monumenta legens, & scripta jacentis  
Devota ad mutos ferta feret cineres.  
Interea, o vos Benaco centum patre Nymphæ,  
Sarcaque ab Alpinis edite verticibus,  
Et vos o Naci rupes, & saxa Briani,  
Et nemora umbrosis densa cacuminibus,  
Ferte aliqua, o nunc ferte meo solatia Batto,  
Et tantam ex animo demitte tristitiam.

Quem



Quem neque sancta potest Sophie complexa levare,  
Musa nec assuetis sedula carminibus.  
Ecce, tamen vates, longum ut quæssisset ademptam,  
Et longum fleffet Thracius Eurydicen,  
Nullo solatus, blando quam carmine, curas,  
Nullo, quam Sophia, dicitur esse magis.  
Illi, seu Rhodopes silvis erraret in altis,  
Sive in deserti Strymonis aggeribus,  
Semper Musa comes, semper pendebat eburna  
Ex humero numeris docta sonare lyra.  
Ille orbem immensum semper spectabat, & orbis  
Ornatum, puris fidera luminibus,  
Et maria, & montes vastos, atque irrequieta  
Flumina, tum quidquid denique terra parit.  
Quorum animadvertens certa sub lege tenorem,  
Paullatim caram senserat Eurydicen  
Deleri, & tristem mutari in gaudia mentem;  
Tantum animos rerum forma levare potest.  
Aspice lucentem Lunæ Titanidis orbem,  
Et cum Sole suo quæ super astra micant.  
Omnia sunt æterna, & vitæ juncta perenni;  
Quæ loca felices Diique, animæque colunt.  
Inferior Lethi regio est, sedesque malorum,  
In qua est, quod felix intueare, nihil.  
Quippe solū hoc ventique, imbresque, & cuncta fatigant,  
Quæcumque aëria de regione cadunt,  
Adde æstusque, hiemesque, & morborum genus omne,  
Tum natura aliqua est indiga semper ope.  
Nos porro desideriiis mala plurima nostris  
Junximus, o præceps in sua damna genus.  
Hinc odia, & timor, & lites, & bella cruenta,  
Et via non uni plurima aperta neci.  
Attamen in tantis ærumnis est animi spes  
Unica, quem melior vita beare potest.  
Quippe, ubi præfulgens ulla virtute reliquit  
Corporeum, sedes advolat ætherias,  
Semideūque domos, & Divūm morte carentum,  
Hic, ubi non æstas, nec fera sævit hiems:

Nec dolor, aut desideria infelicia nostri,  
Nec fors partem aliquam, nec rude vulgus habet:  
At sancti heroes habitant, gens inclita bello,  
Ingenuique, novem qui coluere Deas:  
Quique pii, justique, Deum præcepta secuti,  
Et sancta insignes qui fuerunt Sophia.  
Quos inter tuus ipse recens a funere frater  
Miratur cælum, Cœlicolũmque domos,  
Æternamque diem, & felicem ex ordine gentem:  
Inter quos gaudet se quoque dinumerans.  
Quem circum illustres animæ, proavique, paterque  
Intentos oculos ore nepotis habent,  
Et pulchram effigiem agnoscunt: miratur & ipse  
Egregiam stirpem, magnanimumque genus:  
Agnoscitque suos, & facta, & nomina discit:  
Tum quantum sit adhuc terra habitanda tibi.  
O fortunatum nimium, tristem ante senectam  
Carpere iter cœli cui potuisse datum est.  
Quas syrtes, quos & scopulos post terga relinquis,  
Marce! tibi a quanto est salva carina mari!  
Fortunate iterum; tu non incommoda vitæ  
Passus adhuc, non quæ plurima habet senium:  
Sed dulces inter Musas, & Apollinis artes  
Fortunata nimis vita peracta tibi est.  
I, decus Ausoniæ juvenis, numeroque Deorum  
Te immisce: culta est jam tibi terra satis.  
Illa tuum, dum sidera erunt, dum flumina current,  
Nomen in astra memor, & benefacta feret.

*Ad Joannem Baptistam Turrianum Veronensem.*

Batte, animos quando tristes, curasque levare  
Musa potest, ego nunc sortem, casusque supremos  
Ipse meos tristi solabor carmine tecum.  
Et tecum dulces natos, quos funus acerbum  
Abstulit, æterna & pariter caligine texit,  
Conquerar: ut saltem tenebris, & nocte perenni,  
Quantum opis est nostræ, miserorum, nomina demam.

Quæ

Quæ potui, dum vita illos, auræque fovebant,  
 Exhibui genitorque, gubernatorque duorum  
 Infelix, primas alter vix fingere voces,  
 Alter adhuc teneris jam tum decerpere ab annis  
 Prima rudimenta, atque omen præbere parenti.  
 Quos ego (sed Zephyri spes portavere paternas)  
 Censueram, si fata darent, quum posceret ætas  
 Fortior, ad dulces tecum traducere Musas  
 Assiduos, citharamque humeris suspendere eburnam.  
 Inde, ubi jam cælum, ac Solem, fulgentiaque astra,  
 Terramque, & liquidos ignes, æquorque profundum  
 Mirari inciperent, latisque animalia campis,  
 Te monstrante viam, te rerum arcana docente,  
 Mens fuerat dulces Sophiæ deducere ad hortos,  
 Hortos, quos ver perpetuum, quos aura Favonii  
 Semper alit, semper cœlesti nectare pascit.  
 Hic tremulo, & longa confecte ætate parenti  
 Purpureos legerent flores: seniique levamen,  
 Threïcia canerent cithara, quæ plurima quondam  
 Audissent te populea meditante sub umbra,  
 Divino mirantem Athesim dum carmine mulces,  
 Et rerum canis, & teneri primordia mundi.

Fortunate senex, si natorum ore referri  
 Fata sinant, ut nata chaos antiquissima rerum  
 Materies visi correpta cupidine pulchri  
 Arserit, atque Deum thalamo complexa, jugarit  
 Corpora prima: quibus discordia nata hymenæis,  
 Et divisa locis, suprema petiverit ignis  
 Purior, & nitidis vicinus sederit astris:  
 Quem juxta per inane amplum se fuderit aër:  
 Ima autem tellus vasto circum obruta ponto  
 Constitit: quam dudum hinc inde agitantibus undis  
 Substerni late campi, deformiaque arva  
 Paullatim apparere supra, & concreescere mentes  
 Cœperunt, procul & nudas ostendere cautes,  
 Mox nemora, & virides undis mirantibus ornos,  
 Montanis tum speluncis, & rupibus altis  
 Exfluere udæ formoso corpore Nymphæ,

In viridi flavos siccantes littore crines.

O fortunatum nimium, si Numina tantum  
Hæc mihi servassent, si non casura dedissent.  
Verum aliter Lachesi visum est, quo tempore primum  
Natorum cœpit producere fila duorum.  
Quippe auram miseris, & dulcem noscere vitam,  
Spemque sui dederat præbere: alia omnia ventis  
Tradita, nocte atra & tenebris involverat Orci.  
Non licuit firmos annis, viridesque juvenia  
Inspicere, & caræ ad metam deducere vitæ.  
Nec potui votis, nec ope adjuvisse paterna  
Clamantes, frustra que patris suprema petentes  
Auxilia: & nota nequidquam voce vocantes.  
Heu mortem invisam: quis te mihi, Paulle, Deorum  
Arripit, & miserum complexibus abstrahit istis?  
Tu prior immiti correptus morte, parentem  
Deferis, & dulces auras, & lumina linquis.  
Quod te si tali dederant sub lege futurum  
Fata mihi, non jam fuerat mœroris abunde?  
Non gemitus? quid me e tam multis patribus unum,  
Cœlicolæ, lacrimisque novis, & morte recenti  
Opprimitis, caroque etiam spoliatis Julo?  
Heu, miserande puer, quanto plena omnia luctu  
Liquisti abscedens! quem non vesana Deorum  
Incusavit inops, quum te complexa jacentem  
Aspiceret laniata comas & pectora mater?  
Ah misera, ah male fausta parens, quid Numina fletu  
Sollicitas? jacet ille, velut succisus aratro  
Flos tener, & frustra non audit tanta gementem.  
Ah misera, ah quid sublatum complexa moraris?  
Ille tuus non jam est. Vos illam in funere, matres,  
Collapsam accipite, exanimemque reponite testis.

At vos, infantes animæ, carissima nuper  
Pignora (quod misero superest optare parenti)  
Semper avete mei, ut licuit, semperque valere.  
Seu dulce Elysium functos, umbræque tenebunt  
Sanctorum nemorum, puro seu sidera cœlo,  
Ipse ego vos semper lacrimis, vos carmine tristi



Prosequar, & vestris persolvam iusta sepulchris:  
 Donec me vobis tenuem conjunxerit umbram  
 Summa dies, natis æquat quæ sola parentes.

Interea curas numeris, Musaque levemus,  
 Batte, animos: quando rerum mortalis origo est,  
 Quando etiam vitæ norunt vasta æquora finem.  
 Scilicet & quondam veniet labentibus annis  
 Illa dies, quum jam curvo sub vomere taurus  
 Desudet, terramque gravis proscindat arator,  
 Nunc ubi cæruleæ rostris spumantibus undæ  
 Sulcantur, verruntque citæ freta longa carinæ.  
 Nec vos, o liquidi fontes. æterna manebunt  
 Sæcula, se tanto quamvis pater efferat amne  
 Eridanus, tumidusque fluat tot cornibus Hister.  
 Quin etiam ærii montes, mirabile dictu,  
 Taygetus, Syphilusque, jugo & Cymbotus opaco  
 Innumeras post æstates, ac sæcula longa,  
 Senserunt seniumque suum, supremæque fata;  
 Ex quo materies thalamos, primosque hymenæos,  
 Atque elementa novus sensit discordia mundus.

*Ad Danielelem Rhainerium Veronæ Præfectum,  
 Senatorem amplissimum.*

Rhaineri venerande, uno quo sospite, nondum  
 Justitia, & virtus terris antiqua recessit,  
 Multa quidem monumenta tuis sub fascibus Urbis,  
 Multa cadunt antiqua piorum & templa Deorum,  
 Et Bromii vites, & amicæ Pacis olivæ.  
 Verum hæc ex Urbis re dilabuntur, & ipsi  
 Ultro etiam sua testæ volunt procumbere Divi.  
 Ah, saltem antiquo medicorum parcere ritu  
 Fasque, & fuerus amor pietatis. & inclita virtus  
 Magna tui valeant: valeant hoc more vetusto,  
 Quo nostri vixere atavi, vixere parentes,  
 Te duce venturi longum superare nepotes.  
 Sanctior hic templis, hic Divûm est sanctior aris;  
 Quem

Quem neque tempus edax potuit, nec sæcula tot jam;  
 Non belli rabies, non ipsum infringere ferrum,  
 Tantum est iustitiam violari, & fœdera rumpi.  
 Scilicet & sacra est medicina, vetusque Deorum  
 Inventum, & sacri medici, quibus auctor Apollo:  
 Qui revocare animas jam caligantibus Orci  
 Faucibus impositas ad caræ munera vitæ,  
 Arteriosque haustus, & dulcia lumina possunt:  
 Qui genus innocuum, vitæque ad publica nati  
 Commoda divinas tantum didicere per artes  
 Exercere ævum, atque humanæ præesse salutis.  
 Hos æquum est te præcipue, longeque tueri,  
 Rhaineri, ante alios, idem cui cessit Apollo  
 Ipse suas artes, & munera nobilis otii:  
 Quemque domos Divûm docuit, perque omnia duxit  
 Sidera. quem Grajo insignem Latioque cothurno  
 Secretas dedit Aonidum percurrere silvas,  
 Et calamos, citharamque humeris suspendit eburnam.  
 Idem te dulces Sophiæ deduxit ad hortos,  
 Hortos, quos ver perpetuum, quos aura Favonii  
 Semper alit, semper cœlesti nectare pascit.  
 Salve, magne parens, qui tot virtutibus auctus  
 Urbem iustitia & Divis in pace secundis  
 Egregiam moderare, Athesis qua flumine pulchro  
 Labitur, & placido secat arva virentia cursu.  
 Tu quoque, magna virûm genitrix, urbs inclita, salve  
 Cura Deûm, Verona: tui cessere labores,  
 Æbrumnæque graves, atque horrida Martis imago,  
 Sanguinis & vesana sitis, & tristis Erinnyis.  
 Barbara jam cessit rabies, & in Alpibus atrox  
 Sævitiæ miles, gelidumque exercet ad Albim.  
 Jam duros nimium servitus, & fera iussa  
 Desuemus perferre, ullos non jam urbe Tyrannos  
 Conspicimus, sed te, Rhaineri maxime, sed te,  
 Magne pater, uno tandem quo sospite, nobis  
 Jam bona Libertas rediit, Pacemque per agros  
 Læta Ceres, Bacchique chorus comitantur ovantes.  
 Gaudete o quicumque boni speratis agrestes,

Quorum amor est sobolis, studiumque nepotibus arva  
 Incolere, & parvas ulmis attollere vites.  
 Tempus io, nunc tempus adest, quo sæcula Parcæ  
 Aurea nent, tandem quæ nunc te Præsidente læta  
 Incipiunt: sed erunt nobis tunc maxima, quum te  
 Insignem sceptro Venetum, sanctaque tiara  
 Regna salutabunt terris diffusa, tuumque,  
 Qua Sol exorians visit, qua deserit orbem  
 Occiduus, late clarum feret Hadria nomen.

*Ad Joannem Mattheum Gibertum, Episcopum  
 Veronensem.*

Ille tuus, Giberte, sacras qui in montibus aras  
 Mellineis tibi constituit, qui teque, tuumque  
 Per nemus omne canit, perque omnia littora nomen,  
 Hæc enata suis mittit tibi poma sub hortis  
 Aurea, quæ quondam Medorum e finibus Atlas  
 Transtulit, & magno servabat tuta Dracone:  
 Mox victor sacra expolians pomaria Perseus,  
 Dum levibus nostrum talaribus aëra tranat,  
 Donavit Charitæ Benaci ad flumina Nymphæ.  
 Insuper hos, Giberte, ubi dat munera pisces  
 Qui quondam Etrusci nautæ, nostraque fuere  
 Effigie, nunc Benaci sub gurgite nantes  
 Cærule converrunt sinuatis æquora caudis.  
 Quod si forte juvat tanti miracula facti,  
 Atque hominum quondam versas audire figuras,  
 Ipse edam, Saloi quæ quondam ad littora Battus,  
 Battus amor Dryadum cecinit, mihi rettulit Ægon.  
 Forte senex Cretæ patriis Saturnus ab oris  
 Ab Jove depulsus, regnum; sedesque quietas  
 Quærebat Latio in magno, fataliaque arva:  
 Jamque diem medio Sol inclinabat ab axe,  
 Quum fessus, longaue via siccatus, & æstu,  
 Ad vada Benaci viridi prospectat in herba  
 Vescentes nautas, & puri grandia Bacchi  
 Pocula miscentes: placido quos ore salutans,

Ecquis, ait, vestrum, pueri, succurrit egenti,  
Defessoque seni? quis pocula parva ministrat,  
Exstinguitque sitim? poscenti illudere nautæ,  
Et ridere senem, quis enim presentibus undis  
Possit habere sitim? en flumine largius illo  
Ebiberis, gelidaque æstus solabere lympa.  
Illusus Deus immixtis in flumina palmis  
Haurit aquas, pronusque bibit: tum versus ad illos,  
Quo tamen e pretio, pueri, ducetis ad illas  
Remigio cautes, quæ fluctibus undique circum  
Clauduntur, mediisque jacet parva insula in undis;  
Ostenditque locum: pretium gens impia iniquum  
Postulat, at pactus senior tamen omnia firmat,  
Adjuratque Deos testes, scanditque phaselum.  
Illi autem, dum nave cita liquida æquora fulcant,  
Ignari, quisnam sedeat Deus, Eja age nobis  
Fare, senex, quonam latebras pro crimine quæris?  
Anne fugam subrepto auro, dominoque relicto  
In loca tuta paras? sed te tua fata sequuntur,  
Demens, quem nullæ poterunt servare latebræ.  
Nomine Carpus erat, qui tam temeraria verba  
Dixerat, ingeminant comites, aurumque repossunt,  
Proferri subreptum aurum: ni proferat, omne  
Vi rapiant, pulsumque rate in media æquora turbent  
Quos placidus dictis senior demulcet amicis.  
Etrusci nautæ, quæ nunc mens impia suadet  
Nec servare fidem vos, nec meminisse Deorum?  
Dicenti jam vis, jam dextra inferitur. At ille,  
Qui tandem agnosci posset Deus, Impia, dixit,  
Gens inimica Deum, dabitur, quod poscitis, aurum,  
Hoc imo sub fonte aurum pascetis avari.  
Dixerat. Ast illis veniam poscentibus, & vox  
Deficit, & jam se cernunt mutescere, & ora  
In rictum late patulum producta dehiscunt:  
In pinnas abiere manus, vestisque rigescit  
In squammas, caudamque pedes sinuantur in imam.  
Qui fuerat subita obductus formidine, mansit  
Pallidus ore color, quamquam livoris iniqui



Indicium suffusa nigris sint corpora guttis.  
 Carpus aquas, primus Numen qui læsit, in amplas  
 Se primus dedit, & fundo sub condidit imo.  
 Inde alii celeri sese in media æquora saltu  
 Præcipitant, vacuamque ratem, & sine remige linquunt.  
 Jamque Deus super unus erat: subit ipse magistri  
 Munus, & adductis pelagi petit ultima ripis.  
 Expositus ripa placidas conversus ad undas,  
 Ecquid io, Nymphæ Benacides, ista superfit  
 Navis, & hunc amnem sacrum male fausta carina,  
 Et vestras sulcabit aquas? en certe ita & hujus  
 Criminis hoc scopulo semper monumenta manebunt.  
 Dixit, & in partem rupis conversa pependit  
 Cum remis ratis ipsa, suis ubi cernere conchas  
 Nunc etiam licet, externo quas littore nautæ  
 Collectas miseri media imposuere carina.  
 Ex illo nunc Benaci per littora nantes,  
 Atque auri venas fundo pascuntur in imo,  
 Nunc etiam a primo retinentes nomina Carpo.

*Ad Margaritam Valesiam Navarræ Reginam.  
 Cæsaris Fregosii nomine.*

Dum me Cenomanos inter tenet Itala tellus  
 Zefredique arces, mens autem nescia claudi  
 Libera trans gelidas Alpes Rhodanumque vagatur,  
 Trans Ararim, cælumque beatum, & Gallica semper  
 Regna videt, Regemque suum, tecumque moratur  
 Assidue, versatque tuas sub pectore laudes;  
 Ecce mihi cœlata auro gemmaque nitenti  
 Armipotens, galeaque ferox & Gorgone Pallas  
 Oblata est, seu fors tulerit, seu fata dedere.  
 Continuo visa ante oculos effulgere imago  
 Magna tui, inque ipsa micuerunt Pallade vultus,  
 Virtutesque tuæ, moresque, & facta, decusque.  
 Quippe illam e cunctis sic tu mortalibus una  
 Assimilas, sic una refers, in Pallade ut & tu  
 Noscare, & Pallas in te, sive illa Minerva,

Seu dici Bellona velit, consensus utrimque  
Est idem, ora, animi, genius, cognataque virtus.  
Jure igitur tibi debetur, tibi convenit uni  
Gemma, aurum, effigiesque Deæ; sive est Polycleti,  
Sive Myronis opus placeat tibi munus: imago  
Est tua; sit gratus cum munere, muneris auctor.

Quod si digressus paullum, & provectus amore  
Pierio, dum me dulces per grandia Musæ  
Facta tua, & dum per monumenta heroica ducunt,  
Ipse tuas memorem laudes, quibus æthera ad altum  
Scandis, & illa simul referam, per quæ una Minervam  
Usque adeo assimilas, juvet auscultare canentem,  
Si vacat, & solitæ sunt te oblectare Camœnæ.

Illā parente Deo Jove magno, fratre superbit  
Gradivo, tum forte acres in bella phalanges  
Si quando exacuit, late timor occupat urbes,  
Turbati tremuere hostes, ac terga dedere.  
Ipsa hastam quatit, atque horrenti Gorgone sævit.  
Ante Deam diræ effigies, Terrorque, Minæque  
Sanguineæ, & dans terga Pavor, Visque impia, & Iræ,  
Vinclaque, Vindictæque astant, & Mortis imago.

At vero positis armis, atque ægide dira,  
Mollius humanas si demittatur ad artes,  
Mansuetosque usus, tum dulcia carmina cantat,  
Et facilem exercet Musam, aut heroica gesta  
Describit, numerisve orbes metitur & astra.  
Sin autem imperiis, & majestatis honore  
Gaudeat, æternæ ramis insignis olivæ  
Aut justas sancit leges, aut jura ministrat,  
Aut arces struit, aut medias regina per urbes  
Incedit, matresque super longe eminent omnes:  
Condensi agglomerant se altis clamoribus Afri,  
Spectatumque ruunt, arasque, & publica ponunt  
Templa Deæ: plausu resonat Tritonia ripa.  
Tu pariter magno Gallorum Rege Deoque,  
Ac Jove nata simul, Germano Marte superbis.  
Nam Martem quisnam esse neget, seu fortia nudus  
Brachia, prævalidosque artus, atque Herculis armos

Ostendit, taurumque uno prostraverit ictu :  
 Sive acrem, pictisque armis spectandus & auro,  
 Pressit equum, struxitve acies, & victor in hostes,  
 Ceu torrens, signa atque viros sternitque fugatque:  
 Fulmineove Jovis tonitrus imitatus, & arma,  
 Tormento, muros & magnas diruit urbes?  
 Te quoque tantorum comitem, partemque secundam  
 Bellorum, si quando acies, atque arma movenda  
 Percussæ tremuere urbes, horrorque, pavorque  
 It campis, Mars germanam comitatur ovantem:  
 Attoniti spectant populi, gaudentque tueri  
 Nunc primum, nunc & medium, nunc agmen obire  
 Postremum, nunc pellere equum, nunc tendere in hostē,  
 Turbantem cuneos, & abactis agmina signis.  
 Assistunt comites circum Solertia, & Astus,  
 Et magna audentes Animi. & Tolerantia dura,  
 Curaque, Sedulitasque vigil, Spesque alta, Laborque,  
 Et Divûm Favor, & ventis Fortuna secundis:  
 Pone sequens magno graditur Victoria plausu.  
 Nec minus horrenti a bello, partisque triumphis  
 Si juvat ingenii, pacisque incumbere in artes,  
 Nunc lauto redimita comas, imitata sorores  
 Castalias, plectis numeros, & carmina dictas,  
 Carmina nec rerum fato subiecta, nec ævo:  
 Nunc magnos dimensa orbes in templa Deorum  
 Attollis animos, patrioque assuescis Olympo:  
 Nunc tua describis vel regum gesta tuorum,  
 Aut eadem depingis acu, stant curribus altis  
 Et pater, & proavus, cunctique ex ordine Reges,  
 Captivosque hostes, & victos cella Tyrannos  
 Ante rotas longis ducunt in templa triumphis:  
 Ipsa opus, & textum stupet immortale Minerva.  
 Quam vero, o quam te dicam, quum legibus æquis  
 Justitiaque feros populos frenasque, regisque,  
 Et divina doces jura, & civilia ferre:  
 Aut arces tollis, aut propugnacula condis:  
 Aut matres inter medias, populosque frequentes  
 Incedis, Regina. Favor comitatur euntem,

Majestasque. Pudorque, tamen qui Pallada possit  
Armata, & Martis gradientem in bella decere.  
It dextra Pax læta manu, & prætendit olivam.  
Applaudunt Sequani, floresque & lilia passim  
Effundunt, gaudentque tuas attollere laudes,  
Reginamque, Deamque, salutiferamque salutant,  
Et pace insignem, & bello ferroque potentem.  
Fortunata nimis, magnus quam Cæsar, & omnis  
Suspicit admirans orbis, cui lumine tellus  
Felici arridet, totus cui militat æther.  
Diis quamquam visum aspectu tibi debita regna  
Paullisper privare tuo, seu crimine cives  
Id meruere aliquo, seu te tua fata reservant  
Ad majora, viamque tuis virtutibus amplam  
Expediunt, panduntque. Etenim jam tempora læta  
Illa istant, quum post lacrimas, post publica vota  
Te tandem tua regna novis decorata Trophæis  
Accipiant, & iusta tibi solennia solvant.  
Jam ludi, festique dies, jam sacra parantur:  
Jam placidus ripa gaudet Meniascus amœna:  
In templis pueri impubes, mixtæque puellæ  
Sacra canet, ortusque tuos ad sidera tollent:  
Ut nascentem ulnis primæ excepere Camœnæ,  
Melleque, & aonio tetigerunt ora liquore:  
Ut Charites fovere Deæ, & decus omne dedere:  
Ut parva in numerum pedibus cunabula Dive  
Pellentes, manibus nentes fatalia pensa  
Grandia concordēs cecinerunt fata Sorores.  
Stabunt ingentes sublati molibus arcus  
Cœlati gestisque tuis, factisque tuorum.  
Supra omnes humeris exstans altaque corona  
Frater erit, senosque ferox ex hoste triumphos  
Ducet ovans, mox fortuna congressus iniqua,  
Cum dura bellare Dea, & decernere dure  
Cogetur; longe illa Euris in bella vocatis  
Obiicere adversos, & toto nubila cœlo,  
Et casus, & monstra modis minitantiâ miris  
Cernetur: Rex contra animis, & fortibus ausis,

Et



Et virtute nova tandem superare cadentem,  
 Tendentemque manus: tum ferro & compede vincam  
 Protrahere, & campo captivam ducere aperto:  
 Nubila diffugere, & turpi deformia monstra  
 Victa fuga, vario bello consumpta, fameque,  
 In cæcas latebras obscuraque Tartara condi.  
 O, mihi si tantum juvenili in corpore vitæ,  
 Et tantum det Parca mihi, hæc ventura superstes  
 Ut videam, comiterque tuos, Regina, triumphos:  
 Mox etiam spectare queam, & majora parari.  
 En crit, en umquam illa dies, quum Gallica signa  
 Attolli, & Sequanos compleri milite campos  
 Cōspiciā, fremere arma Rhemos, fremere arma Cadurcos,  
 Aulercosque, Heduosque, & pictis Lingonas hastis?  
 In mediis Regem secum cataphracta trahentem  
 Agmina, sublimem sanctas procedere ad aras,  
 Per caput & sacram Regum de more coronam  
 Jurantem, & Solymas repetentem debita sceptris  
 Regna suis: te parte alia fortes Ituriscos,  
 Andelos, Biturasque feros in bella moventem;  
 Confiliis, tantoque operi comitemque, ducemque  
 Ascitam: nec non tanto sub Rege coactam  
 In ferrum ruere Italiam, & socia arma trahentem  
 Signa sequi, mox o liceat Cæloque secundo,  
 Et præsentem Deo, tot se se addentibus una  
 Prospicere immensum consterni puppibus æquor,  
 Carmelique procul rupes, & littora Joppes  
 Læta Dei classem, & victricia vela vocare,  
 Et trepidum Euphratem, & magni tremere ostia Nili.  
 Tunc ego non alium Martem mihi, Pallada poscam  
 Non aliam mihi: Rex Mavors, tu maxima Pallas  
 Sola eris, o ego tunc gemino sub Numine tutus  
 Per medios hostes videor, densosque maniplos  
 Victor agi, videorque mea sub cuspide fractos  
 Munera magna tibi captivos ducere reges:  
 Nec non & spolia ampla tuis addenda triumphis  
 Jungere, barbaricas vestes, regumque tiaras,  
 Armaque, Mydoniosque arcus, Lyciasque pharetras  
 Cer-

Cernere & exanimem fuso cum milite portas  
 Caucaſeas, atque Hircanos inquirere ſaltus  
 Maumethem, & ſe ſe extremis occludere Baſtris.  
 Hæc precor, hæc propere eveniant felicibus aſtris,  
 Si qua fata dabunt, votis ſi Juppiter adſit.  
 Interea, ſive hæc te cura, & gloria tangit,  
 Seu pacem Europæ miſeræ moliris, & arma  
 In Superûm ſævos hoſtes avertere tentas,  
 Magnanimo aſſiſtente tuis conatibus Anna,  
 Anna ſpectato meritis, cui ſumma poteſtas  
 Tradita, quo rerum moles oneroſa recumbit,  
 Quidquid agis ſi quando animum convertis ad ipſam  
 Italiam (neque enim teneat non hæc quoque cura)  
 Tunc dicas, Cœlo ante alios mihi fidus in illo eſt,  
 Qui niſi pro Rege invigilans nocteſque dieſque  
 Illic res Italas, & regia munera tractet,  
 Gallica ſuſpiret regna, & tabeſcat abeſſe.

Præterea. Dea bellipotens, quæ munera Cæſar  
 Fregofus, parva illa quidem, ſed congrua mitto,  
 Haud ingrata tibi Latiis accedat ab oris,  
 Una eadem, facieſque tui, facieſque Minervæ.  
 Quinetiam, quoties Divam ſpectare juvabit,  
 Te toties ſpectare puta. Sed me quoque tanti  
 Si facies, ſi me tali dignabere honore,  
 Quum memor ipſa mei fueris, tum nomine noſtro  
 Longævamque diem, & felicia cuncta precata,  
 Diva, tuum ſalvere jube ſuper omnia Martem.

*Ad M. Antonium Flaminium, & Galeatium  
 Florimontium.*

Dum vos fatidicos vates, arcanaque ſenſa  
 Volvitis, atque animum cœleſti neſtare alentes,  
 Alloquiis, magnoque Dei conſueſcitis ori  
 Felices duce Giberto, Campenſe magiſtro:  
 Quid dicam miſerum me agere, & quam ducere vitam  
 Irrequietum animi, & quærentem indagine vana  
 Naturam ſemper fugientem; quæ ſe ubi paulum  
 Oſten-

Ostendit mihi, mox facies in mille repente,  
Ceus Proteus, conversa sequentem eludit, & angit  
Mœrentem senique horas, cassumque laborem?

Nuper enim tenues species, simulacraque rerum  
Quæ fluere ex ipsis dicuntur, perque meare  
Omnia, dum sector meditans, tacitusque requiro  
Avia silvarum, & secreta silentia solus,  
Cognovi tamen his spectris illudier ipsis:  
Ut sensus feriant nostros, semperque laceessant,  
Perque fores, causasque animæ ludantque, meentque,  
Ac remeent, ipsamque nec inter somnia linquant.

Ergo hoc elusum studio, fessumque labore  
Tandem ne miserata suos abduxit in hortos  
Musa memor, tetricumque animum somno, atque quiete  
Curavit, numerisque & blando carmine fovit.  
Tum mihi: Quo tandem, o semper mortalia quærens,  
Hanc colere usque voles terram? numquamne relinques  
Has tenebras, numquamne in lucem lumina tolles?  
An nescis, quæcumque hic sunt, quæ hac nocte teguntur,  
Omnia res prorsus veras non esse, sed umbras,  
Aut specula, unde ad nos aliena elucet imago?  
Terra quidem, & maria alta, atque his circumfluus aër,  
Et quæ consistunt ex iis, hæc omnia tenues  
Sunt umbræ, humanos quæ tamquam somnia quædam  
Pertingunt animos, fallaci & imagine ludunt,  
Numquam eadem, fluxu semper variata perenni  
Sol autem, Lunæque globus, fulgentiaque astra  
Cetera, sint quamvis meliori prædita vita,  
Et donata ævo immortalis, hæc ipsa tamen sunt  
Æterni specula, in quæ animus, qui est inde profectus,  
Inspiciens, patriæ quodam quasi tactus amore,  
Ardescit; sed enim, quoniam hic non perstat, & ultra  
Nescio quid sequitur secum, tacitusque requirit,  
Nosse licet circum hæc ipsum consistere verum,  
Non finem: verum esse aliud quid, cujus imago  
Splendet in iis, quod per se ipsum est, & principium esse  
Omnibus æternum, ante omnem numerumque, diemque.  
In quo alium Solem, atque aliam splendescere Lunam  
Aspi-

Aspicias, aliosque orbes, alia astra manere,  
Terramque, fluviisque alios, atque aëra, & ignem,  
Et nemora, atque aliis errare animalia silvis:  
Denique cuncta alia cernâs vegetantia vita.

Ergo, umbras quum jam satis, & specula illa, superq;  
Spectaris, longa jamdudum in nocte pererrans,  
Fas tandem lucem, atque ipsum perquirere verum.  
Quod quoniam longe sejunctum est corpore ab omni,  
Nec nexus habet, aut affinem sensibus ullis  
Naturam, scito esse animum tibi dislociandum  
Corpore, purgandumque omni contagio recepta,  
Terrena labe, & mortalis luminis haustu:  
Quærendæque aliæ silvæ, callesque tenendi  
Sunt alii, meliorque, Deum quæ semita monstrat.  
Hæc Musa, o si te comitem dent rura beata  
Bardolena mihi, o quis nos propter amœnum  
Benacum viridi silvis in littore sistat:  
Atque olea, lauroque tegat, detque abdita vatum  
Sensa, & utramque Dei præcepta evolvere legem.

Rura, oro, Giberte, tuo Benacea vati  
Da, viridesve oleas, & multa protege lauro.  
Ille tuas laudes primum canet, & tua facta  
Inclita Mæoniis numeris ad sidera tollet.  
Ut puerum mirata sacro cum Tibride Roma  
Ante annos meritis titulis & honoribus auxit.  
Ut res Romana, & sacrorum tradita jussu  
Pontificum tibi summa in te uno sæpe resedit:  
Ut septem fremuere novis applausibus arces,  
Maeste animis, maeste ingenio, tu traicis æquor  
Barbaricum, & ferro reges in bella ruentes  
Alloquiis frenas, & cæptos ore tumultus,  
Armaque, & hostiles animos, & prælia sedas:  
Fœdera, amicitiasque feris, pacemque reportas  
Italiæ, populisque Dei; nec te tamen ingens  
Terra capit, toto juvenem tot plausibus Orbe  
Exceptum, tua te pietas, tua maxima virtus  
In cœlum vehit, & terræ dat spernere honores:  
Dat contemnere opes, unique incumbere olympo.



Ac solis Divorum epulis, & nectare pasci.

Hæc ubi perpetuo cantavit carmine, & omnes  
Respondent late rupes: tunc concitus æstro  
Fastidico, plenusque Deo, Dav dica vates  
Ipse etiam pater interpret oracula solvit,  
Dignus, qui aate omnes citharam pertractet eburnam,  
Quam quondam Solymæ stupuere, arcesque Sionis.

*Ad Franciscum Turrianum Veronensem.*

Turri, si aut mihi villa & lar sit lætior, aut tu  
Ferre domum tenuem possis, parvosque penates  
Urbe procul ruri sese abscondentis amici,  
Quantum ego te his mecum Caphis in montibus optem  
Montibus his, ubi, si querulæ nemora alta Cicadæ  
Non rumpant, equidem vix norim æstatis adesse  
Tempora, tam leni mitescit Julius aura!  
Sed quid, si est angusta domus, dum pulvere & omni  
Munda situ: dum sit nullo turbata tumultu,  
Nescia curarum, nullius conscia culpæ:  
Alta ubi per totum sit pax, & amica Camœnis  
Otia, & integri per magna silentia somni?  
Quid refert, alius minio laquearia rubra  
Si inspicere, ipse velim fuligine nigra videre?  
Si non dejectum cœlo Jovis igne Typhoëa,  
Terrigenasque alios, spirantia signa, videbis  
Admirans opus æterni memorabile Juli;  
At bona Libertas aderit, quæ rura beata  
Præcipue insequitur, simplexque incedit & exlex.  
Hic tibi, si paullo digitus sit inunctior, aut si  
Potanti insonuit cyathus, vel si pede utroque  
Non steteris, nemo obiiciet, nemoque sedentem  
Arguet. hoc illi si fors super incubuit crus.  
Stare, sedere, esse ex libito, & potare licebit.  
Forſitan & mihi quid vitæ, quid sit studiorum,  
Nosſe optas, quo vel damnes, vel ſingula laudes.  
Mane venit, juvat Auroram Solemque videre  
Nascentem, qui non alio conſurgit Eoo

Pulchrior unde nova lætantur singula luce,  
Et silvæ, scopulique, & pictis nubibus aër.  
Parte alia Benacum alto de colle saluto,  
Centum cui virides invergunt flumina Nymphæ:  
Ipse sinu magno Genitor magno excipit amne.  
Tum juvat aut spectare boves mugitibus alta  
Complentes nemora, aut pulsas in pascua capras.  
Præ caper it, cui barba jubat, cui cornua pendent  
Intorta, & grandes olido de corpore setæ.  
Pone gregem reliquum compellit arundine virgo  
Upilio, multo armantur cui blatea fuso.  
Interea natos discentes rustica amare  
Numina, vicina nemoris gelidam voco in umbram,  
Qui libros, qui secum horæ solatia portent.  
Hic legitur, viridique toro, saxove sedetur  
Glandifera sub fago, aut castanea hirsuta.  
At variæ circum silvis, & frondibus altis  
Assuetæ ludunt volucres, atque æthera mulcent.  
Tum densum nemus, atque umbræ per gramina læta  
Jejunas nos invitant spatiarier horas.  
At fessi hæc inter pueri sitiuntque, dolentque  
Plus æquo retineri, & jam Musasque, librosque,  
Et Pana, & gelidi pinus odere Lycæi.  
Ergo præcurrere, & aquas, & vina pararunt  
Lucenti in vitro, & flores sparsere nitentes.  
Advenio; primas atro lita mora crûore,  
Aut grossi mensas ineunt, cors cetera, & hortus  
Sufficit. Interea crebro sonat area pulsu,  
Increpitat seges, & duri sub Sole coloni  
Alternis terram feriunt, & adorea flagris.  
Fit clamor, resonat tellus rupeſque propinque,  
Et palææ sursum strepitu jactantur inanes:  
Læta Ceres alto ridens despectat olympo.  
Umbra diem reliquum, somnus, librique, viæque  
Producunt, dum siccam æstu Canis excoquit urbem.  
Verum, ubi cæruleis serus se se extulit undis  
Vesper, & in cœlum surgentia sidera vexit,  
Vicina e specula, magni admirator olympi,

Alta rupe sedens natis astra omnia monstro :  
 Accendoque animos patriæ cœlestis amore.  
 Illi admirari, & cognoscere sidera discunt  
 Cepheaque, Arctonque, & servantem plaustra Bootem.  
 Hæc ergo præferre urbi, & contemnere magna  
 Si possis, quid te teneat, ne tu ocyus ad nos  
 Accurras? etiam has sedes, hæc limina magnus  
 Naugerus subiit, nec dedignatus adire est  
 Battus amor Musarum, ipsum quo tempore primus  
 Pana, atque antiquos cecinit Telluris amores.  
 Hic me etiam desueta Deæ, medicumque, senemque  
 Carmina iusserunt canere, & ridere beato  
 Illudentem urbem, & male sani murmura vulgi.  
 Verum, hæc Gibertus ne viderit ipse, caveto;  
 Ni forsan Bubulone animum, curasque relaxans  
 Propter aquam viridi lætus confederit herba,  
 Qua placidus leni descendit Tartarus amne.  
 Scilicet hic numeros non aspernatur, & audit  
 Nos etiam, & nostram, quamvis sit rustica, Musam.  
 Verum, ubi se sibi restituit, mentemque recepit  
 Illam alto intentam cœlo, seu sacra sacerdos  
 Munera obit, totum seu contemplatur Olympum,  
 Tum supra & musas, & ruris Numina supra est,  
 Vitam agitans Divûm, Dii se cœlestibus æquans.

*In Mortem Aliprandi Madrutii.*

Impositum quum te pheretro, miserande Madruti,  
 Cerneret illacrimans Cæsar, circumque videret  
 Et spolia, & victis erepta ex hostibus arma,  
 Et modo victrices juxta mœrere phalanges,  
 Quantum, inquit, tua Mors nostris inimica triumphis  
 Lætitæ, decorisque adimit! spēs quanta futuri  
 Tecum, Aliprande, cadit: sed non tua vivida virtus,  
 Ut te hunc aspicerem, tua non promiserat ætas:  
 Sed fore, qui Solymis mecum, atque Oriente subacto,  
 Barbaricis regum spoliis & mille trophæis  
 Olim magna tui decorares templa Tridenti.

Invidit Mors tanta tibi. Vos nobile corpus  
 Ferte Ducis vestri, juvenes, & reddite matri :  
 Exanimi : sed hæc miseræ solaria ferte,  
 Tantum ipsam peperisse virum ; qui Cæsaris usque  
 Et comes, & bene gestarum pars maxima rerum,  
 Cæsaris ex animo nullo delebitur ævo.

*Ad Alexandrum Farnesium Cardinalem  
 amplissimum.*

Priscæ virtutis, Romani & sanguinis hæres,  
 Farnesi, quoniam nec Dii munuscula læta  
 Despiciunt, hominum spicas, ac ferta rosarum,  
 Libaque, & exigui devotum turis honorem :  
 Tu quoque ( si mores imitari, ac facta Deorum  
 Præcipue Heroum est ) non dedignabere parva  
 Frastori quæ dona tui natusque, paterque,  
 Perpetui affectus monumenta, ac pignora mittunt,  
 Hos tibi patre Lyco, Seylla genitrice gemellos  
 Dat natus sua dona canes. Scyllæ inclita origo  
 A Nilo est : Lycus a magno descendit Araxe.  
 Qui quondam Euganeas transmissi munus ad oras  
 Præstabant cunctis, sive aprum figere morsu  
 Esset opus, rapidum cursu seu vincere cervum.  
 Horum igitur sobolem natus tibi ab ubere matris  
 Nutriit ablatam, & nostris exercuit arvis  
 Venatu assiduo, & vires durante labore,  
 Nostrorum famam nemorum, geminumque ferarum  
 Terrorem, nunc ille tibi quam mittit habendam,  
 Romanis eadem in campis si forte sequetur  
 Gloria, & ignota fors in regione juvabit.  
 At genitor, nati cum munere, carmina mittit  
 Hæc tibi : quæ quamquam tristi fugiente senecta  
 Lætities, cantusque, tamen voluere Camœnæ  
 In te unum, dominæque mei, nimiumque potentes,  
 Ut canerem, Musaque canes comitarer amica.  
 Ergo tot rerum curis, ac pondere tanto,  
 Quo premeris, dum rem Romanam, ac publica curas,



Si quando defessum animum, mentemque remittes  
 Liber, & ad dulces poteris te vertere Musas,  
 Hæc quoque nostra leges: ea si dignabere tanti,  
 Inter Romanas ut cant spectanda Camœnas.  
 Quod si etiam recreare animum, corpusque juvabit  
 Venatu, & latos saltus, ac densa ferarum  
 Lultra fatigare, & capreas agitare fugaces,  
 Tum canibus miscere tuis, tecumque vocare  
 Ne pigeat nato missos, hirsutior ille  
 Cuncta niger, tantum pedibus, & gutture canus,  
 Non invitus herum Tiberonis voce sequetur.  
 Ast Athiso (namque hoc alter de flumine nostro  
 Nomen habet) nec cursu impar, nec dente minaci  
 Segnior, anguineo suffusus terga colore,  
 Frontem albo pictus discrimine, pictus & albo  
 Cervicem caudamque imam, pectusque, pedesque,  
 Addictus lateri numquam discedet herili:  
 Tantus amor domini: nisi forte cupidine prædæ  
 Conspectæ impatiens etiam retinacula rumpat.  
 Hic tu, vel pulchro Calai, vel Tyndaridi alto  
 Polluci similis, silvas latratibus omnes  
 Complebis, rupesque hominum clamoribus altas,  
 Vectus equo Hæmonio, & fulgenti clarus in ostro  
 Attonitæ visu discent nemora inter amare  
 Rusticæ Hamadryades, discetis amare, Dianæ  
 Infuetæ Comites: volucris sed concitus ille  
 Fertur equo, vestrosque alio deportat amores,  
 Insequiturque feras, ah, ne illum accensa cupido  
 Venandi, excitos silvis impellat in urfos:  
 Ne in sævos impellat apros: tibi cura, Dione  
 Æneadum genitrix, sit custodire nepotem,  
 Et juvenem ilicea defessum sistere in umbra.  
 Sat silvis animoque datum est: illum sua Roma  
 Poscit, & expectat lati res publica Mundi.  
 I, spes magna Urbis, rebusque vocantibus adsis.  
 Interea, quando mihi Divus habere semper,  
 Ipse tibi Caphiis sacras in montibus aras  
 Instituum, qua se summo de vertice collis

Tollit, & æquatum Benaci prospicit æquor,  
Et virides olea ripas, Patriamque Catulli.  
Hic sibi solemnemque diem, & renovanda quotannis  
Sacra, tuo statuam semper de nomine dicta.  
Tunc rosa, tunc violæ, tunc purpurei hyacinthi,  
Verbenæque senem deceant, tunc texere flores,  
Et virides cano capiti imposuisse coronam,  
Lætitiæque diem, & multo producere Baccho,  
Fallentem senium, & curas de corde fugantem.  
Forſitan & Muſarum aliqua, & tibi fautor Apollo  
Pleſtra mihi, citharamque dabit: Deus ipſe canentem  
Perque tuos annos, perque acta illuſtria ducet.  
Infanti ut prima impellens cunabula Pallas  
Accinuit cantu Grajo, cantuque Latino.  
Scilicet & fari lingua aſſuefecit utraque.  
Ut puerum Aonio perſuſum labra liquore,  
Per dulces Muſarum hortos, & amœna vireta  
Perduxit, nunc Uranie, nunc Calliopea,  
Nunc Clio monſtrante viam. nullaque Sororum  
Non donante roſas, & ſerta virentia lauro.  
Tum mores, animumque dedit, ſenſumque ſenilem,  
Atque Urbem regere, ac ſacro ſplendere galero.  
Nec jam Roma capit, ſed lata in regna vocatum  
Ad pacem Europæ, non te maria alta fatigant,  
Non juga, non toties ſuperatis nubibus Alpes.  
Te Pœninæ arces, celerem te Norica ſaxa  
Spectarunt rapido montana per ardua curſu,  
Quantum Sol cœli, tantum telluris obire  
Matre Dea comitante, & iter monſtrante Nepoti.  
Nec ſatis hæc: majora urgent Germania nuper  
Grata Deo, nunc ingeniis elata ſuperbis  
Detrectare jugum Imperii, & ſe opponere Patrum  
Sanctorum placitis, & ſacris legibus audet:  
Nec jam Pontificum, nec jam ullos Cæſaris audit  
Infelix monitus, ſed lævo numine Divûm  
Arma parat: ſocium Cæſar te poſcit in hoſtes,  
Pro ſceptro Imperii, pro relligione Deorum.  
Tunc primum attonitæ gentes videre Latinæ

Te, fratremque tuum patria virtute, animisque  
 Inviſtis paciter, res duri, & munera belli  
 Traſtantes: gemini quales duxiſſe feruntur  
 Tyndaridæ pulchri Grajas in bella cohortes.  
 Tunc primum Romana acies, antiquaque virtus  
 Viſa fuit: Ducibus tantis Mavortia pubes  
 Magnanimi Æneadæ, memores virtutis avitæ  
 Bella cient: Italo pleni jam milite campi  
 Denſantur: jam procedunt longo ordine ſigna  
 Sublata in ventos, lateque inimica minantur.  
 Nec mora, jam ſummis Romanus miles, & arma  
 Alpibus apparent: concuſſæ motibus illæ  
 Fuderunt gemitus: longe vagus audiit Oenus,  
 Obrigitque gelu: riguerunt flumina Rhæni,  
 Et pavidus fluxit demiffis cornibus Iſter.  
 Romanum ad nomen planxerunt peſtora matres,  
 Caraque in Hercynias traxerunt pignora ſilvas.  
 Sed quo me rapitis, Muſæ? quid facta revolvo  
 Farnēſi? Mijora animo jam concipe, teque  
 Impavidum, inviſtumque, aliis accinge triumphis.

*Ad eundem Alexandrum Farnēſium Cardinalem,  
 cui Libros de Contagione dedicaviſi.*

Hæc ego flores Sophiæ digreſſus in hortos,  
 Italiæ decus o Juvenis, Farnēſia proles,  
 Condebam, læſtaſque tibi de more ſacrabam  
 Primitias, dum tu magni inter Cæſaris arma,  
 Gallorumque acies, recti paciſque ſequeſter  
 Res miſeræ Europæ fractas componis, & omne  
 Robur, & arma Dei Maumethem vertis in hoſtem,  
 Percuſſiſque omnem, veluti Sol aureus, Orbem.

Fortunate nimis, quem cunctæ applauſibus urbes  
 Excipiunt, paciſque vocant Patremque, Deumque,  
 Inque caput, ſacroſque ſinus, humeroſque, manuſque  
 Et nigras violas, & candida lilia jaſtant.  
 Cui magna Italia, & terrarum maxima Roma  
 Aſſurgit, feſtoſque dies, & ſacra nepoti,



Solemnesque agitat pompas, densi undique circum  
Stant populi, & studio ingenti, & clamore secundo  
Farnesum genus omne, alto de sanguine ductum  
Æneadum longa serie, super æthera tollunt  
Patres, atque Duces, & partos mille triumphos:  
Assensu resonat Tiberis, & Tyrrhena resultant  
Littora: septeni responsant gaudia colles.

O nimium dilecta Deo, prælataque longe  
Progenies, sive imperiis & Marte regenda  
Sint res Romanæ, seu Relligionis habenis.  
Atque equidem e fracto Imperio, Romaque cadente  
Servatam hanc stirpem fato, statuentibus & Diis  
Crediderim, quo Romanum per sæcula nomen  
Staret, & ara Dei, quæ primum maxima magnis  
Auspiciis fundata fuit, sit maxima semper.  
Quo me, Paulle, rapis, quò tuque neposque vocatis  
Laudibus heroum insuetum? tu maximus ille es,  
Uni cui regni triplicis capite alta tiara  
Consurgit, cui summa uni terna illa potestas  
Terrarum, Cœlique data est, vastique profundi,  
Illorumque aperire fores, & claudere posse,  
Qui Petri, Christique ratem turbante procella  
Ventorum varia, & remorum parte revulsa,  
Tempestatem omnem, atque adversos discuris Euros.  
Nec sanctam sine honore finis, sine remige certo  
Fluctibus in tantis agitari turbine cymbam,  
Maeste animo Romano, & maeste ingentibus ausis.

At tibi quas, Juvenis fortunatissime, dignas  
Attribuam laudes, generis spes altera tanti,  
Inclite Alexander, puerum quem plurima virtus,  
Canaque consurgens teneris prudentia in armis,  
Et spondens majora astris felicibus æther  
Ad summos meritum ante annos evexit honores,  
Et sacri gestare dedit decora alta galeri?  
En quantum de te sacri sibi Pastor ovilis  
Spondet avus tuus ille, animo quæ gaudia versat.  
Forsitan & proprio non tam gavissus honore,  
Quam spe sublatus, tanti & virtute nepotis,



Nescio quid majus præfaga mente volutat:  
 Scilicet & gnarus fatorum, & præscius ævi  
 Venturi, illa videt felicia tempora, quum tu  
 Sede sua, folioque Dei, Diis proximus ipsis  
 Confideas, quum Pontifici tibi maximus Orbis  
 Grateretur, supplexque tuis ferat oscula plantis.

O mihi postremæ tantum dent Numina vitæ,  
 Ipse etiam ut tum te tremulus, confectus & annis  
 Aspiciam, sanctosque pedes prostratus adorem.  
 O & si possim canere, & tua dicere facta,  
 Et ventura novo tecum sæcla aurea Mundo.  
 Nam video sub te victum, longeque fugatum  
 Maumethem se Caucasæis includere portis:  
 At Pacem viridi redimitam tempora oliva  
 Ire per Europam magnam, atque invisere terras:  
 Quam pia Relligio, & junctis Concordia dextris,  
 Et Probitas, & Amor recti comitentur euntem.

Salve, magne Tibri. Salve & tu, maxima rerum  
 Roma parens, salvete arces, collesque Latini;  
 Aurea qui primi longo meministis ab ævo  
 Sæcula, quum nulli variarent jugera fulci,  
 Sponte sua sed terra ferax daret omnia, & ipsæ  
 Præberent dulci victum de robore glandes;  
 Et nunc venturis eadem speretis ab annis.

*Ad Julium III. Pont. Max.*

Maxime Divini Pastor gregis, inclite Juli,  
 In terris cui summa uni est concessa potestas,  
 Sceptra, vicesque Dei gerere, & regna infera Ditis,  
 Cœlorumque fores aperire, & claudere posse:  
 Si tu, dum magnæ Italiæ, dum prospicis omni  
 Europæ, & vasta Mundi sub mole laboras,  
 Paullisper potes a tantis secedere curis,  
 Et potes agrestes pastorum audire Camœnas,  
 Nunc aures adhibe placidas mihi: namque ego, quæ Pan,  
 Pan magnus cecinit nostros ventura sub annos,  
 Nunc referam, tua, Magne Pater, pars maxima quorū est,  
 Cu-

Cujus ab auspiciis Parcae nova sæcula volvunt.  
Nec te pœniteat pastorem audire canentem,  
Quando etiam Admeti tauros formosus Apollo  
Pavit ad Amphrysi ripas, tenuique cicuta  
Non puduit cantare Deum sub tegmine acerno:  
Et Veneri dilectus oves duxit Adonis.  
Scilicet & tu etiam post grandia nomina Pastor  
Diceris, atque hoc in primis cognomine gaudes,  
Et pecudes curare soles, pecudumque magistros.  
Forte ego, dum medio terras Sol excoquit æstu,  
Ipse Sueffant<sup>r</sup> pastor puer incola campi  
Ducebam pastas viridi de valle capellas  
In nemorum secreta, umbras, & frigora quærens,  
Qua placidus cursu descendit in æquora Lyris.  
Est lucus, prisca quem sacravere Latini  
Silvano: in cujus medio densa ilice cinctum  
Est pratum, agrestes ubi Dii persæpe videri  
Audiri que solent: hic capripedes Satyriscos  
Pastorumque manum junctis per mutua palmis  
In gyrum canere, & lætas agitare choreas  
Invenio admirans; medius Pan magnus ovantem  
Ad calamos, cantusque regit ducitque coronam.  
Dumque Deus canit ipse, filet tum cetera pubes.  
Dum filet ille, alii thiasos, cantusque, sequentes  
Instaurant, repetuntque Dei postrema canentis.  
Ingeminat postrema nemus, respondet & Echo.  
Tum me respiciens; mihi sanguine proximus Anthus,  
Anthus, Aquinatis pastor gregis, huc, puer, inquit,  
Huc ades, o Neore, & te his adjuuge choreis:  
Aut, spectare magis si te juvat, aggere ab illo  
Prospice, dum saturæ sua ducant otia capræ.  
Cui ego: quin potius juvet hoc de cespite vestros  
Spectantem lusus, molli requiescere in herba.  
Et tum forte Deus buccas sandyce rubentes  
Inflans, & picea frontem præcinctus acuta,  
Ad calamos circumfiliens, hæc carmina cantu  
Fatidico insanus latas fundebat ad auras:  
Dicite io, Satyrisci, & io geminate, coloni;

Aurea felici nascuntur sæcula Mundo.

Excipiunt juvenes, iterat nemus, assonat Echo:

Aurea felici nascuntur sæcula Mundo.

Tum sequitur Deus; ante tamen Rex magnus olympi

Bellumque, horribilemque famem, diramque flagellis.

Armatam Aleſto e tenebris, & faucibus Orci

Immittet terris, genus ut mortale coërcens

Castiget, fraudesque hominum, fastusque superbos,

Et luxus, & spes miseras, & gaudia vana:

Dum tandem se se, atque Deos cognoscere discant.

Mox tantum exspectatum illud, quod carmine sacro

Tot Vates cecinere prius, felicibus astris

Adveniet tempus, quo Mons ille arduus, ille

Mons ingens, sublime caput super omnia tollat

Culmina, sidereum qui vertice tangat olympum:

Quo neque vis ventorum adeat non fulminis ignes.

Dicite io, Satyrisci, & io geminate, coloni;

Aurea felici nascentur sæcula Mundo.

Hoc in monte Dei pecudes pascuntur & agni,

Graminis æterni pingues, & velleris aurei.

Exsiliunt & aquæ vivæ, quibus ubera capræ

Grandia distendant, distendant ubera vaccæ.

Non malus hic serpens, non noxia creverit herba,

Non fentes, sterilisve filix, non frigida taxus,

Sed bis lecta leges, sed bis gravis uva racemis:

Corticibusque cavæ sudabunt balsama pinus.

Hinc magnis præstantem animis, & fortibus ausis

Fortunata nimis Pastorem hæc sæcula habebunt,

Qui virtute regat populos, & legibus æqui,

Divinas qui pascat oves, & pascua late

Extendat, pecudesque ipsas, & ovilia servet.

Hic primum diram Aleſto, & Cocytia monstra

Caucaſea ærata religabit rupe catena.

Inde famem miseram e Latio, populisque Deorum

Pellet in hostiles gentes, & barbara regna.

Tum læta Ubertas, segetumque onerata manipulis

Alma Ceres Italas spicis venerabitur aras:

Quam circum pueri salient, & rustica pubes,

Rident

Ridentefque jocos, incomtaque carmina dicent.

At noti Musis Damones & Alpheſibæi

Vota Patri magno, laudeſque, & ſacra canentes

Æternis illum numeris ad ſidera tollent,

Heroëmque, Deumque, ſalutiferumque vocabunt,

Dicite io, Satyriſci, & io geminate, coloni;

Aurea felici naſcuntur ſæcula Mundo.

Ille animum mox ad pacem, & diſcordia regum

Pectora convertet, ſanctiſque hortatibus iras.

Atque odia, & cæcos regnorum, & laudis amores,

Horrendaſque ſitim cædis, fuſique cruoris

Sedabit, pelletque feri mala ſemina belli.

Tum Pax alma ferens ramos felicis olivæ,

Atque Amor, & junctis pariter Concordia dextris,

Et Genius comitum, & generis Hymenæus amator

Inviſent late populos, Latiiſque per arva

Lætitiam, riſuſque ferent: tum juſta cupido

Bellorum, piaeque arma, Dei vertentur in hoſtes.

Jam video auguſtis late plena æquora velis

Fervere, jam trepidare vagi ſeptem oſtia Nili,

Euphratemque, Tygrimque ſuo ſe condere in amne,

Jam nec Baſtra ipſum capiunt, nec India tota

Maumethem fugientem, ipſum non Caucasus ingens,

Non qui tot ſilvas, jura tot comprehendit Imavus.

Dicite io, Satyriſci, & io geminate, coloni;

Aurea felici naſcuntur ſæcula Mundo.

Quænam, quæ properant tantæ per cærula puppes

Devotæ ad Tiberim, magnæque ad mœnia Romæ,

Ceu denſæ ad nidos latum per inane columbæ?

Agnosco gentem innocuam, numerumque beatum,

Felices animas, fatis ab origine prima

Dilectas, quæ cœlo olim, Diviſque fruantur.

En jam ſanctam Urbem, jam ſeptem in collibus aras

Impoſitas, ſummiſque pedes Paſtoris adorant.

Hos inter, video, & noſtri longa æquora ſulcant

Arcades, Italiamque petunt, fataliaque arva

Arcades; o ſoli quondam cantare periti

Paſtores, quos juſtitia e tellure recedens



Postremos liquit, nunc rursus læta revisit.  
 O sancti, properate; vocat Deus æthere ab alto:  
 Vos alius jam grex, aliudque exspectat ovile.  
 Quin venit illa dies, quum nos quoque Mœnala nostra,  
 Arcadiamque omnem, qua immani a gente repulsi  
 Fugimus in Latium, longo post tempore tandem  
 Visamus, dulcemque auram: o placidissime Peneu,  
 O Ladon, vos o gelidi pœneta Lycæi,  
 Quando ego per vestros meditabor carmina lucos?  
 Mœnaliis quando recinet mea tibia versus?  
 Mœnalus auritas, dantesque oracula quercus  
 Semper habet, semper doctas ille audit avenas.  
 Concipe Mœnaliis, mea tibia, concipe versus.

Talia cantabat memorans Pan magnus; at Anthus  
 Hæc referes, puer, inquit, & hoc tibi munus habeto  
 Nunc parvum: ventura dies majora reservat.  
 Tum mihi fuscillam dono dedit optimus Anthus,  
 Dicere & occasus astrorum, dicere & ortus,  
 Et quid quæque ferat tellus, quæ commoda Baccho,  
 Quæ Cereri, quidnam ventos, quid nunciet imbres,  
 Quæ tempestatum, cœli quæ signa sereni;  
 Denique quæ cunctis natura sit indita rebus.  
 Virtutem in primis, & honestum, quemque docere,  
 Ac vitii ipse expers, aliena notare paratus.  
 Et jam tempus erat pastum deducere capras.

*Incidens.*

Battus amor Dryadum defunctum pastor Jolam  
 Flebat; cum fontes, Alpinaque Numina circum,  
 Sarcaque, pumiceoque sedens Benacus ab antro  
 Mœrentem lacrimis consolabantur obortis:  
 Ille autem nulla accipiens solamina, tantum  
 Deserta sub rupe, in littoribus Benaci,  
 Talia nequidquam surdas jactabat ad undas:  
 Immites Divi, & crudeles vos quoque Parcæ,  
 Crudeles nimium Parcæ; vos ibitis amnes,  
 Aëriæ stabunt rupes: nusquam amplius ipse

His

His terris, numquam hoc cœlo agnoscetur Jolas,  
 Ut cecidit? semel in pratis ut purpureus flos,  
 Quem tetigit vel hiems, vel iniquo Sirius astro.  
 Currite jam, fluviorum undæ, & producite vitam,  
 Et, rupes, durate; tamen non alter Jolas  
 Hos pecus in montes, non hæc ad flumina ducet.

*Incidens, ad Joannem Baptistam Turrianum  
 Veronensem.*

Illa colum exercens saxo consedit aprico,  
 Læta tepore novo, & liquefacta Sole pruina;  
 At juxta nemore in magno grex pascitur omnis.

*Hiems, ad Eundem.*

Frigidus at silvis Aquilo si increverit, aut si  
 Hiberni pluviis descendunt nubibus imbres,  
 Nos habeat domus, & multo lar luceat igne.  
 Upilio ingentem aut fagum, vel sciissile robur  
 Sufficiat, tum vos, claro quando igne soletis,  
 Juniperi, suaves circum diffundere odores,  
 Et vos, Palladiæ, flammis imponat, olivæ.  
 Ante focum tibi parvus erit, qui ludat, Julius,  
 Blanditias ferat, & nondum constantia verba.  
 Ipse legam magni tecum monumenta Maronis.  
 O fortunatos nimium, si fata, quod ævi  
 Nos manet, hanc una dederint producere vitam.

*Ver ad eundem.*

Jam veniet Ver purpuerum, juvenisque revertens  
 Annus aget Zephyros, & cœlo desuper alto  
 Deducet pleno genitalia semina cornu:  
 Unde hominum genus, & pecudum, vitæque natantum,  
 Et pictæ volucres, & amantes roscida plantæ  
 In Venerem cæco æterni rapiuntur amore.  
 Gaudete, o quicumque bonum speratis, agrestes,  
 Quo.

Quorum amor est sobolis, studiumque nepotibus arva  
 Incolere, & parvas ulmis attollere vites;  
 Annus io, novus annus adest: mutatur & ætas,  
 Et meliora novo nascuntur sæcula Mundo.  
 Bella pater procul, & diras Saturnus Erinnes  
 Arcebit caro e Latino, ac sub Tartara mittet.  
 Tum lethum, & cæcus furor, & vesana cupido  
 Perpetuis extra terras religata catenis  
 Perfolvent pœnas scelerum: at Pax alta per omnem  
 Italiam magno populos sub Cæsare viset.  
 Ille autem insignis spoliis, & mille trophæis  
 Instituet festos alta ad Capitolia ludos.  
 Stabit onusta ingens, Tarpeii ad limina templi  
 Quercus honore sacra, & prænuncia temporis aurei.  
 Tum vescæ glandes, tum terra sponte ferente  
 Omnia comparibus disjunget colla juvencis  
 Agricola, & rudibus mirabitur hordea sulcis  
 Sponte adolere sua, & nullo frumenta colono  
 Undantem lætis segetem flavescere campis.  
 Noctibus in silvas, & mollia prata serenis  
 Ætherio dulcem commixtum nectare rorem  
 Sudabit cælum; tenera qui lectus ab herba  
 Mortales saturet mensa dapibusque Deorum.  
 Salve, magnæ Tybri, & vos, natæ Tybride Nymphæ,  
 Tuque, senex pater Eridane, & qui flumine Tusco,  
 Penace, in nostro placidus perlaberis agro.  
 Tuque, Athesis, cunctique amnes salvete Latini,  
 Diique omnes magnæ Hesperix, qui sæcula soli  
 Aurea Saturni primo meministis ab ævo:  
 Quum sepes vel limes adhuc communibus agris  
 Non foret, aut ulli variarent jugera sulci;  
 Sponte sua sed terra ferax daret omnia, & ipsæ  
 Præberent dulci victum de robore glandes.

*Incidens ad eundem.*

Quarum pars brumæ impatiens, & condita terræ,  
 Expectat ver egelidum, flatusque Favonii:

**Pars**

Pars passura hiemem, læta ab radice virescit,  
 Emitteritque comam, siculumque atque altera beta,  
 Atque ari virides, & odoriferæ calaminthæ,  
 Atque olus, atque rumex, & falsi gramina crithmi.  
 Quas inter suaves, mollesque aspirat odores  
 Nunc decus hortorum, menta; at, si vera loquuntur  
 Nympharum quondam pulcherrima Grajugenarum.  
 Tum juvat & frondes apii, & sisymbria læta,  
 Intubaque, & toto florentes frigore sonchos  
 Incolere, atque hortis Aquilonem arcere nocentem.

*Aliud.*

Nox venit, & pastæ redeunt ad testa capellæ.  
 Præ caper it, cui barba jubat, cui cornua pendent  
 Intorta, & grandes olido de corpore setæ.  
 Pone gregem reliquum compellit arundine virgo  
 Upilio, multo armantur cui baltea fuso,  
 At mater longæva, igni dum brassica fervet,  
 Mulctra effert, gravidoque recens lac ubere mulget.  
 Rusticus interea pinguis collector olivæ,  
 Interea & validus prima de nocte bubulcus  
 Advenere domum: congesta tûm focus orno  
 Ingenti, aut fago, vel fragmine roboris, ardet.  
 Tolluntur lætæ flammæ, lateque relucet.

*Aliud Incidens ad eundem.*

At nemora, & liquidis manantia fontibus arva,  
 Et placidus myrteta inter, laurosque virentes  
 Vicinus nitido Benacus labitur amne.  
 At focus, & circum pueri, vernæque canentes,  
 Dum cæna undanti coquitur silvestris aheno,  
 Grandiaque exurunt crepitantes robora flammæ,  
 Suspensæ e summis pendent laquearibus uvæ,  
 Malaque, castaneæque, & passo fistula ventre.  
 Hiberna de nocte, boum stabula alta petuntur.  
 Una omnes matresque, virique, omnisque juvenus

In-



Infomnem exercent noctem: pars pensa fatigat:  
 Pars texit teneros Amerino vimine qualos:  
 Atque anus hic aliqua interea, dum vellera carpit,  
 Et teretem tremulo propellit pollice fufum,  
 Languentes oculos fabella fallit inani.

*Aliud.*

Mane domi validos pluvia ut conclusit agrestes,  
 Cæditur iliceo distenta fagimine porca.  
 Læta domus, tum sollicita in farcimine mater,  
 Pingue suis niveum, & disiecti frustra cerebri,  
 Et niveum lac purpureo cum sanguine miscet.  
 Tum semen marathri, atque arentis gramina thymbra  
 Adiicit, & coli insperso sale concava complet.

*In Natalem Diem Jani Fregosii, Cæsaris F.*

Sacrorum si plena Deo sunt pectora vatum,  
 Si norunt triplices fata futura Deæ:  
 Fortunate infans, verus tibi gloria vates,  
 Grandia concordēs concinere Deæ.  
 Ecce tuo felix nasci novus annus ab ortu  
 Incipit, atque omen nomine habere tuo.  
 Cresce cito, magnique Patris mirarier acta  
 Incipe, & invicti Cæsaris arma sequi.  
 Tempus erit, tibi quum partis jam mille trophæis,  
 Et fessi rebus compositis Latii,  
 Barbaricis captis opibus, ducibusque subactis  
 Multa tibi circum tempora laurus eat.  
 Tum læta ante tuum stabit victoria templum,  
 Claudet & ærata limina athena fera.

*De Partu Victoria Farnesæ, Guidi Ubaldi Feretrii,  
 Urbini Ducis, Conjugis.*

Lucinæ Junonis opem Victoria supplex  
 Quum peteret, placido sic ait ore Dea:

Sis

Sis licet Æneadum, & Veneris de sanguine avito  
 Nata, puella, tamen digna favore meo es.  
 Quam Charites tanto junctæ comitantur honore,  
 Grandia quam Parcæ fata manere canunt.  
 Quippe ubi Junonis flos, & Saturnia quercus  
 Jungantur, faustis currere Isauron aquis,  
 Promittique tibi sobolem, qua pristina virtus  
 Italiæ, & priscus restituatur honos.  
 Nascere, magne puer, patremque imitatus, avosque,  
 Magna aude, non vos Umbria magna capit.  
 Et jam infans sanctasque manus, Divamque secutus  
 Optati in lumen ætheris exierat.  
 Ergo & quod potuit, risu agnovitque parentem,  
 Præsentisque dedit nuncia signa Deæ.

*Tumulus Francisci Marii Molsæ  
 Mutinensis.*

Quod Molsæ fuerat mortale, hac conditur urna,  
 Extruxere suis quam Aonides manibus  
 Cœtibus at Superûm fruitur nitidissimus almīs,  
 Itque comes magno spiritus Hippolyto,  
 Quem Medica de gente fatum pulcherrima Virtus  
 Extulit, & cœli templa tenere dedit.  
 Quemque unum ante omnes coluit dum fata sinebant,  
 Atque oculis Vates prætulit ipse suis.

*Ad Joannem Lipomanum, ex Veronensi Pratura  
 decedentem.*

Hadriacum, Lipomane, Athesis dum curret in æquor,  
 Dum meritis reddetur honos, & gratia, semper  
 Prætori tibi debebit Verona, patrique  
 Linquenti monumenta annos mansura per omnes.  
 Illa tibi semper divinos solvet honores,  
 Et condet tua perpetuis annalibus acta.  
 I spes o Venetûm, & quem jam moderamina parva  
 Non capiunt, i, te majoribus inferre sceptris:

Et

Et lacrimas, & vota, quibus comitamur euntem  
Accipe, discessusque tui dona ultima porta.

*In mortem Joannis Baptiste Montani,  
Medici Veronensis.*

Dum medica, Montane, doces ope vincere fata,  
Et Lachesi invita vivere posse diu,  
Lethæo indignans pressit te Parca sopore,  
Et secuit vitæ grandia fila tuæ.  
Sic animas & tu, Asclepi, dum subtrahis Orco,  
Te quoque sævorum perdidit ira Deum.

*Ad Joannem Matthæum Gibertum Episcopum  
Veronensem.*

Mellinæ rupes, subjectaque littora Tusci  
Quæ suprema sonans alluis unda lacus.  
Annuite: agrestem dum, votum pauperis, aram  
E vivo Thyrsis cespite tollit humo.  
Nunc herba struit, atque hederis & floribus ornat.  
Et, Giberte, tibi rustica sacra facit.  
Ast olim auratam niveus tibi taurus ad aram  
Cornibus auratis victima magna cadet.

*Ad eundem.*

Najades hoc, Giberte, tibi Benacides antrum,  
Et qui muscoso fons cadit e lapide,  
Sacravere; tibi sit cura & fontis, & antri:  
Et quandoque Deus ad tua sacra veni.  
Et sacer est, & habet spirantes suaviter auras.  
Hortus: & est nullo gratior umbra loco:  
Et nusquam est longæva mage, & felicior arbor,  
Pulcher Adoni, tua; pulcher Apollo, tua.  
Hic canere, & tenuem posse exercere Camœnam  
Ille dedit: sanctus qui mihi semper erit.

His

Hic herbas, succosque tuos, artemque relinquo,  
Phœbe : soles Musas tu quoque amare magis.

*Ad eundem.*

Ipsa tibi, Giberte Deus, lego lychnida Leuce  
Melsineis Leuce cognita littoribus.  
Et pulchram cyanum, & canentia lilia necto:  
Illa colore magis, hæc & odore placent.  
Roma caput sacro decoret tibi magna galero:  
Non tamen & Leuce non sua ferta dabit.

*Ad eundem.*

Et laurum, & citrum hanc teneram de matre revulsam  
Giberto sacram Thyrsis utramque serit.  
Hanc, Venus, ast illam Juveni servabis, Apollo,  
Ne noceant æstus, ne noceatve gelu.  
Tu quoque Benaci vicino Nais, ab amne  
Clam gelidas teneris frondibus affer aquas:  
Dumque feres, dic: Sancte, humili tibi nunc Dea rivo,  
Quum venies, toto serviet amne tibi.

*De Marsango Flaviolo, prope Villam Joannis  
Baptiste Rhamnusi, in Agro Patavino.*

Qui te populea cingit, Marsange, corona,  
Dulce ut in umbrosis cornibus aura sonet:  
Ac ne umquam inficiat lutulenti fordida plaustrî  
Te rota, sub firmo dat tibi ponte viam,  
Vicinæ cultor villæ, Rhamnusus, horti,  
Agrique, & dominus ripæ utriusque rogat;  
Lenis vere flue; atque nivali providus undæ  
Arida in æstivi sidera parce Canis.  
Sic tibi grata Nape geminabit ferta quotannis,  
Et tua par magnis amnibus ibit aqua.



*De eodem.*

(gens

Qui modo fons, Marfagne, humilis, modo cornibus in-  
Per salicum rapido laberis amne nemus.

Vere novo, Marfagne, mihi flue lenior undis;

Uberior, sitiens quum coquit arva Canis.

Frigentes æstate tibi Rhamnusus umbras

Sparget, & ad gelidas ipse sedebit aquas.

Vere rosam, violasque feret: pictasque corollas

Pulchra tibi hinc Nais, hinc Galatea dabit.

## FRANCISCI FRANCHINI

## COSENTINI.

*Ad Leuciam.*

**N**Umquid adhuc rabida præstas immanis in ira?  
Et juvat Hyrcanæ pergere more feræ?

Horribilis niveo feritas in pectore turpis,

Turpis formoso torvus in ore furor.

Nec semper tygris, nec semper sævit hyena;

Sæpe lupæ mites, sæpe leæna pia est:

Et quid erit turbasse comas, rupisse capillum?

Meque oras tunicæ dissoluisse tuæ?

Nonne potis tibi sum tunicas, & tradere pallam,

Quales ferre omnis culta puella solet?

Ad tua qua veni secreta cubilia nocte,

Quaque velim claudos nocte habuisse pedes,

Ædibus ex ipsis mecum nova jurgia traxi,

Quin & mentis egens, & malè sanus eram:

Tuque minis fatui gravibus commota mariti,

Opposita trudis corpora nostra manu.

*Cum.*

Cūque ego, quæ nova res? quid nā facis improba clamo?  
Quæ clamore novo non maledicta jadis?  
Sed non ulla meam poterit divertere mentem  
Rixa, nec ex imis vellere visceribus:  
Quin te semper amem grato devinctus amoris  
Vulnere, quin placido tactus ab igne sequar.  
Jurgia concordēs gigni juvat inter amantes,  
Pectora ut amborum fortius urat amor.  
Jurgia sunt blandi non parva alimenta caloris,  
Utque diu, faciunt jurgia, duret amor.  
Hæc stimulos tardis, hæc frena furentibus addunt:  
Hæc querulo frangunt aspera corda sono.  
Jurgia quin viduos vidi conjungere amantes,  
Pacem perpetuis & peperisse toris.  
Finge ab amore minas, litesque, irasque, metusque  
Esse procul; terris non erit ullus amor.  
Me miserum, si facta velim, si dicta referre,  
Quæ fuerim regnis passus amara tuis!  
Sæpius & crines, & vultus ungue recisos  
Sæpius, heu nulli probra ferenda tuli.  
Libera lingua tibi semper fuit, & manus, & dens,  
Multa ego; tu solum hoc, ferrea, ferre nequis.  
Quid facis o decus, & Romanæ gloria formæ,  
Nonne viri spectas gaudia summa tui?  
Nunc tacitis quidquid votis optaverat olim,  
Victor habet, dum nos bella fovere videt.  
Nostro, age, sic hosti nunc assentire precanti,  
Perpetuum nobis Leucia dissidium:  
Forstā & de me narrat tibi multa, vocatque  
Insidum, atque odii semina mille jactit.  
Quæque hominis quondam contemnere dicta solebas,  
Nunc facili vereor ne satis aure bibas.  
Atque odium crudele reor te pectore duro  
Exercere diu, pulsus ut excrucier.  
Jam non posse diem sine te me vivere, nosti,  
Me nosti imperio succubuisse tuo.  
Uror amore, tui (fateor mea Leucia) amore  
Maceror, & toto pectore discrucior.

Non aliter quam tu nostram cum sæpe subibas  
 Sola domum ignaro, nocte silente, viro,  
 Sub mediumque diem mutata veste petebas  
 Cum me sollicito semirecincta pede:  
 Mutuus est, & erit nobis dum vita manebit,  
 Infitus amborum mentibus unus amor;  
 Nec contra pugnare licet, nec tollere vis est,  
 Quo premimur, cui sunt subdita colla iugo.  
 En mitis, rediensque tuum complectere amantem,  
 Quaque soles hilari suscipe fronte, Dea.  
 Quas ego delicias video cum pace perenni,  
 Quæ video æterna fœdera juncta fide!

*Ad Leuciam.*

Quo magis insidias placidi vitamur Amoris,  
 Hoc magis insidiis nos petit acer Amor:  
 Ille tuis latitet cum, Leucia, blandus ocellis,  
 In me mille jacit spicula, mille faces.  
 Ah vicit, lætorque dolis delusus optitis  
 Magna tua est facti gloria, nulla Dei.

*Ad Leuciam.*

Floribus intextam variis tibi mitto corollam,  
 Quos avida legi picta per arva manu:  
 Sunt nigræ violæ, sunt lilia candida, sunt &  
 Purpureæ gelido non sine rore rosæ:  
 Sperne tamen cuncta hæc, mea Leucia, scinde coronam:  
 Lilia tu terris, tu rosa, tu viola es.

*De Amore, ad Janum Vitalem.*

Me jaculis pete, me flammis, me, Jane, sagittis;  
 Et me præcipitem mitte, vel in pelagus.  
 Ante suo, quam sævus Amor me vulneret arcu;  
 Illo, Jane, nihil sævius esse potest.

*De Leuciâ.*

Pulchra manus Hebe, Juno ulnas, Cynthia ocellos,  
 Ora Venus, pectus vertice nata Jovis:  
 Ut faciem videre meæ, formamque puellæ,  
 Qua non in terris altera pulchra magis,  
 Hebe optat digitos, pectus sibi Pallas, ocellos  
 Cynthia, Juno ulnas, illius ora Venus.

*In statuam Veneris,*

Unde decus tantum saxo? quis nam indidit ipsam  
 Saxo animam? e cœlo quis tulit huc Venerem  
 Praxitelis fecere manus, illustris olympus  
 Ater erit, terras si colet alma Venus.

*Aliud.*

Egregiam pulchræ Veneris formam adspice; dices  
 Laudo equidem sani judicium Paridis.

*Aliud.*

Marmoream adspiciens Venerem Venus: & tamen auso  
 Sunt certamen (ait) mecum iniisse duæ?

*Aliud.*

Te, Venus, ut Juno, & Pallas videre; querentes  
 De Paride, exclamant, immerito querimur.

*De seipso.*

Me sine Romulides Nymphæ duxere choreas;  
 Nam nescire choros ducere fastus eram.  
 Sed qui non duxi choreas, suspiria duxi,  
 Et quem non duxit tibia, duxit amor.

*Ad Leuciam.*

Quod dederim tibi canâ hyeme violasque, rosasque;  
 Res nova res mira est, Leucia, visa tibi.



Define mirari; Latio violæque, rosæque  
 Sævæ etiam brumæ tempore proveniunt:  
 Res nova res mira est hac tempestate, virescunt  
 Quod tot in ore tuo lilia mista rosis.

*Ad Gyrenem.*

Ornatas auro geris aures, blanda Gyrene,  
 Pulchrior ante alias ut videre procis.  
 Improba, blanditiis præstas, auro allicis aurum.  
 Et componis opes artibus auriferis.  
 At nostrum allicias ne voce, & inauribus aurum,  
 Auribus obducam cerea claustra meis.

*Ad Leuciam.*

Leucia, scis quoties fuerint mihi prælia tecum:  
 Pax quoties: & quam nos agitarit amor:  
 Sæpe fui victor, sum victus; sæpe dedisti  
 Et mihi sæpe manus, & tibi sæpe dedi.  
 Verum posthabitis cum me delegeris unum  
 Omnibus, æternum tu mihi Numen eris.

*De Leucia.*

Jane, coronatæ venêre ad templa Calendis  
 Et mea, & Æmilii cara puella tuis:  
 Tabuit extemplo quam fronte corona gerebat  
 Nævia, turpis erat cui coma, turpe caput:  
 Quâ vero cinxit sua tempora, pulchrior auro  
 Leucia, visa fuit flore nitere novo.  
 Leucia, tu viridi jucunda corona coronæ es:  
 Hinc vigor usque tuis perstat, honosque rosis.

*De Lyfæ gemmâ, dono data Aloysio Gonzaga.*

Hæc ego crediderim formosæ lumina Lyfæ?  
 An vulgo artificis munere facta putem?

Tam

Tam similes oculis oculi sunt illius istis,  
 Quam nitidis cœli sidera sideribus.  
 Sic fulgere mihi sic arridere videntur;  
 Talis inest illis gratia, tantus honos.  
 Ah fallor, sic uno ardent, sic torva tuentur,  
 Tantus in his rigor est, tale supercilium,  
 Hi dominæ sunt veri oculi, nil verius ipsis:  
 Ipsi adeo nec flent, me neque flere vident.  
 Quam bene de lapide hæc misit mihi lumina; cum sint  
 Lumina & ipsa mihi dura magis lapide!

*De eadem re.*

Non aliter Perseus, postquam abscidit ora Medusæ,  
 Major & in lato clarior orbe fuit:  
 Quam tu nunc, Gonzaga, geris qui lumina Lysæ,  
 Quæ pulchrâ est ipsâ Gorgone pulchra magis:  
 Quin plus laudis habes: somno namque ille sepultæ  
 Abstulit auxilio Palladis ense caput.  
 Hæc virtute tua, & præstanti pectore capta:  
 Meque meosque oculos tu tibi, dixit, habe.

*De Leuciâ.*

Nox erat & mihi cum dominâ prope Tibridis undas;  
 Rixa erat & terris lumina Luna dabat.  
 Quid facis exclamat Tibris pater? adspice Lunam,  
 Pulchra magis Lunâ Leucia, stulte, tua est.

*Ad Hieronymum Theodulum.*

Quò malefane fugis, tendisque, Theodule? Romæ  
 Tempore quo sævus Sirius ardet abis?  
 Verte fugam, caræ linquis si mœnia Romæ,  
 Non tua sollicitus pectora linquet amor:  
 Non, si etiam Gades, tua regna per humida adibis  
 Æquora, possessum deserit ille latus:  
 Quin serò quamvis redeuntem, fortius uret  
 Improbus: & dicet, sic tibi turba levis?

I pete nunc Latium, & latebras, Amor acer amœno  
In Latio, in latebris, & latet in latere,

*Ad Leuciam.*

Quâ nocte fulgent lucida sidera,  
Et Luna vultu splendida candido  
Terram, & plagas cœli serenat,  
Leucia, Luna, meumque sidus,  
Vobis voluptas non minima est, leves  
Audire cantus, sub Jove frigido  
Quos ore facundo usque amantes  
Non sine dant fidibus canoris.  
En profer altâ de speculâ caput,  
Aureſque pronas arrige; senties  
Quæ pruriant, quæ sint faceto  
Sparſa joco, & tenero lepôre.  
Armatus ad te cum citharâ & lyrâ  
Et barbito, & cum carminibus novis,  
Me conſero: Ciſſa inuidebit:  
Anna premet tacitum dolorem,  
Quas comparari ſe tibi non pudet:  
Eja Lycota, Lide, Dinotete,  
Dum Leuciam cantô, huc adeſte,  
Voſque ſonora movete pleſtra.

*Ad eandem.*

Mobilitas animi ſumma eſt tibi, Leucia, verum  
Nobilitas formæ, Leucia, ſumma tibi eſt:  
Dicam igitur, ſed pace tuâ; te, Leucia, non eſt  
Altera nobilior, altera mobilior.

*De Leuciâ, ad Julium Landum.*

Quid faciem, formamque meæ, laudeſque puellæ,  
Ut lepido celebrem carmine, Lande, mones?  
Forſitan invenies bene qui mortalia laudet,  
Sed bene qui cantet Numina, nullus erit.

*De Leucia agrotante.*

Febre laborabat mea Leucia, febris anhelam  
 Cogebat gelidi poscere fontis aquas.  
 Has ego, ne miseræ officerent, dare posse negavi,  
 Grataque ferventi pocula nulla dabam:  
 Sed lacrimis suffusa genas cùm sæpius amnes  
 Posceret impatiens lassæ puella sitis:  
 Hei flens ipse: petis dixi quid fluminis undas?  
 Has bibe quas largo lumine do lacrimas.

*De obitu Leucia.*

Quem tumulum spectas humilem ne sperne viator,  
 Exigui non est Numinis hic tumulus.  
 Huc ades, & manibus violas, & lilia plenis  
 Da tumulo, tumulis munera danda sacris.  
 Hic una integitur Charitum, si credere durum est;  
 Adspice, namque duæ sunt reliquæ in lacrimis.

*De eodem.*

Morte tua doleo tantum, mea Leucia, quantum  
 Non dolet ipsa parens, non dolet ipsa soror.  
 Namque parens natam deflet, germana sororem:  
 Nata, sororque mihi, tu mihi mater eras.

*Aliud.*

Quas tibi sæpe fero inferias, quæ dona quotannis  
 Leucia, pallentes sunt violæ, & lacrimæ.  
 Delitiis violas spargo pro mollibus, & cùm  
 Reddere non possim gaudia, do lacrimas.

*In Statuam Veneris dormientis. Ad Rodulphum  
 Pium Carpens.*

Aura veni, Venus alma dedit per membra quietem;  
 Dum Venerem somnus detinet, aura veni.  
 Ne sine, quod Venerem præter quæ labitur unda,  
 Forte tuo currat murmure blanda magis.

Quin



Quin prospera, flatus Veneris quæ spirat ab ore,  
Plus tibi suavis erit; quam tuus aura Deæ

*Aliud.*

In te hominum quod tantus amor, Rodulphe, Deumq; est,  
Non jam caussa latet; scimus: habes Venerem.

*In effigiem Cypræ puella.*

Ut Cypriam vidit pictam, nomenque tabellæ  
Inscriptum, dixit Diva repente Venus:  
Picturæ quid pictor opus fuit addere nomen?  
Non mea me notum sola facit facies?

*Aliud.*

(sum:  
Quid tibi Mars mecum est? non sum Venus, adspice non  
Nomen ego, & formam tantum habeo Veneris.

*De Himerâ.*

Intentata mihi via cum non ulla fuisset,  
Qua possem dominæ vincere duriciem;  
Nec precibus nec mista minis me dona juvarent:  
Effudi lacrimas illius ante pedes.  
Fregcrunt lacrimæ duræ fera pectora Himeræ,  
Et cessit lacrimis victa puella meis.  
In solis igitur lacrimis spem ponite amantes:  
In lacrimis ingens visque salusque latet.

*De connubio Victoriæ Farnesiæ.*

Quam Roma ante alias gaudet peperisse puellas,  
Virgo datur regi, magne Metaure, tuo.  
Romanumque tenet nomen Victoriæ, vincit  
Quæ forma Venerem, Pallada consilio.  
Ille igitur felix conjunx, Victoriæ semper  
Cui favet, & semper quem Dea magna fovet.

*Ad Himeram.*

Ut surgens Aurora favet mortalibus ægris,  
Sic mihi fulsit amor primus, Himera, tuus:  
Utque die torret medio Sol igneus orbem,  
Sic mea nunc sævus pectora torret amor:  
Ut demum extinguit rapidos nox atra calores,  
Sic fera mors ignes auferet una meos.

*De discessu Livie ab urbe.*

Quæritis unde cadant alieno tempore nimbi,  
Unde tot effusis Roma redundet aquis?  
Livia discessit, collesque superba Quirini  
Liquit, amatorum cura nec ulla subit:  
Hinc lacrimæ & luctus miserorum, & fletus amantium  
Demergunt toties Urbis utrumque forum.  
Quin ego perpetuam timeo per sæcula noctem;  
Secum etenim currus Livia Solis habet.

*De Polluce.*

Immensas tolerare moras, Valleja virgo,  
Cum non posset amans, fugit ab urbe, tuus:  
Verum ubi per nemora, & valles, & littora, & amnes  
Errantem numquam deseruisset amor:  
Auræ, ait, ô volucres ferte hæc suspiria Romam,  
Et miserum in dura dicite valle mori.

*De Himeræ.*

Pectora nuda meæ postquam conspexit Himeræ  
Cum Junone Jovis vertice nata Dea:  
Ne videamur, ait, Paridis sententia nota est,  
Vinci rursus, erit turpius opprobrium.

*Ad Himeram.*

Quacumque incedis passim pulcherrima, Himerâ,  
 In te oculos hominum vertis, & ora Deûm.  
 Ille hominum vero, & lætissimus ille Deorum est,  
 Tu semel in quo oculos figis Himerâ tuos.

*De Liviâ Columnâ, oculis captâ.*

Gestabat sine luce faces, fractasque sagittas,  
 Mœstus Amor: cur hoc? obvia mater ait:  
 Cui puer: alma parens, mihi cum de more libebat,  
 Urere mortales, urere Cœlicolas;  
 Unius ex oculis accendere utrasque solebam  
 Lampadas, & certâ tendere tela manu:  
 Nunc quoniam capta est oculis mea Liviâ, vis est  
 Ignibus, & calamis omnis adempta meis.

*De eadem.*

Ardentes animæ, quæ castra Erycina tenetis,  
 Lugete, & madidos imbre rigate sinus.  
 Quis teneat lacrimas? oculis nunc Liviâ capta est,  
 Queis homines, & queis ceperat illa Deos.

*Ad eandem.*

Ut nox nube cavâ texit tua lumina, ducens  
 Ex imo gemitum pectore, dixit Amor:  
 Sola meæ vires, mea gloria Liviâ pulchris  
 Pulchra oculis orba est, orbus & orbis erit.

*De eadem.*

Flebat Amor, stabatque Venus, lacrimasque ciebant;  
 Cum, quæ sit luctus causa Minerva rogat:  
 Tu quoque fle mecum soror, & vos flete Camonæ,  
 Et cultæ Charites, aurea Cypris ait:

Quæ

Quæ nostrum decus in terris, quæ nostra manebat  
Gloria, nunc capta est Livia luminibus.

*Adhuc.*

Ante alias formâ pulcherrima Livia Nymphas,  
Ipsa est in terris insidiosa Venus:  
Quod sit capta oculis caveat sibi quisque Cupido  
Cæcus erat tantum, nunc quoque cæca Venus.

*Ad Didacum.*

Mos duci canibus cæcos per strata viarum est,  
Cumque oculis nuper Livia capta foret:  
Est data languenti Melitæa catella puellæ,  
Omne quæ tristi tacta repente refert:  
Quam bene conveniunt nostræ tua munera vitæ,  
Jam cane cæcæ opus est, Didace, grata canis.

*Ad eandem.*

Ter tibi dum venas ferit, ægra Columna, Machaon,  
Sanguinis & rivi fluminis instar eunt:  
Quid facis exclamat vultu pallente Cupido?  
Siste manum; non est Iphigenia, Dea est.

*De luce ejusdem oculis restituta.*

Læta erat ut sensit tua lumina mater Eoi  
Memnonis obscurâ, Livia, nocte premi:  
Non tulit invidiâ flagrantem Phæbus, ocellis  
Non medicâ lucem reddidit artè tuis:  
Atque ait: una diem mihi Livia nunciet, una  
Qua sit iter, nostris Livia monstret equis.

*Ad Amorem.*

Improbe Amor, tu lucis egens orbasse putabas  
Ipsam etiam matrem? falleris, ecce videt.

*Ad*



*Ad Liviam Columnnam.*

Quidquid tibi, tuisque ocellis vidimus  
 Mali accidisse, ne Deorum aut ætheris  
 Irâ fuisse suspicari te velim,  
 Columna, nostri sæculi clarum decus.  
 Te curva Pronome, edentula, & procax male  
 Ventana vetula fascinavit, ut genas  
 Tuas, tuæque frontis adspexit jubar,  
 Ipsaque formâ te anteire Naiades.  
 Quin saga, ut oculos habuit in suis tuos  
 Cæli quidem sideribus aureis pares,  
 Repente reddidit hebetes venefica.  
 Quod nube nunc abeunte, lumen lumina  
 Suum resumant, effici scito meâ  
 Prorsus opera, nam pessimæ ni fascinum  
 Horrenda ni mox destruet cantamina,  
 Interminatus cum securibus feris,  
 Falcesque, fustesque, horridamque sum necem  
 Hinc me daturum protinus te sospite  
 Pollicitus equidem aranda ad ejus viscera,  
 Suffarcinata sum pedale fascinum.  
 Scelestâ turpi cum cachinno tussiens,  
 Eredit ad verba tremulum statim caput,  
 Et spem futuræ lucis annuens dedit.

*De Himera.*

Spectatum innumeri adcurrunt decus oris Himera,  
 Seu sacra templa subit, seu redit illa domum;  
 Hæc ovat, & curru fertur laudata superbo,  
 Nec me, nec magnos æstimat asse Deos:  
 Hei mihi, me perdit populi concursus; Himera,  
 Vive domi; & tu gens siste proterva pedem.



*Ad Felicem Urfinam.*

Quod formâ, quod sis opibus, quod sanguine felix,  
 Jure datum Felix hoc tibi nomen habes:  
 Jure etiam ante alios vir felicissimus ille est,  
 Cui fas felici conjuge posse frui.

*De Himerâ.*

Sive sedet, sive incedit, seu fatur Himera;  
 Quidquid agit, Veneres secum habet, & Charites,  
 Sed cum dat tremulos lætanti pectore risus;  
 Ridet & alma Charis, ridet & alma Venus.

*In laudem Jo: Bapt. Salviati.*

Corporis egregii formam, vultusque nitentis,  
 Ut videre decus, Diique Deæque tuum:  
 Exarsere omnes; calet hic, illa æstuat; adsunt  
 Blanditiæ, dantur munera, fervet amor:  
 Felix Jane, potes tua si bona noscere magnum est  
 Jus tibi; te poscunt Numina, terra colit.

*De eodem.*

Atticus ille puer dulcis fuit ore venusto,  
 Cujus in os liquidum mel vaga fudit apis;  
 Jane puer, puero longe tu dulcior illo es:  
 Sedula ab ore tuo mel sibi sumit apis.

*Ad eundem.*

Ut vidit te, Jane, Venus, mirata leporem,  
 Et magis in roseo quod nitet ore decus:  
 Quis puer hic, inquit, nostrum qui præstat Adonin?  
 Absit Adonis; ades tu mihi, Adonis eris.

*Eidem*

*Aliud.*

Ardebat te, Jane, Venus, sed amore Lupillæ  
 Audiit ut captum te Dea, tristis ait:  
 Tu victrix, tuus est Janus: tibi cedo Lupilla,  
 Romuleâ præstant semper in urbe lupæ.

*Ad Liviam Columnam.*

Spina pedem Veneri pupugit, tibi Livia dextram:  
 Effususque cruor tinxit uterque solum.  
 Ex albâ rubram ille rosam: tuus iste, Columna,  
 Purpurea e niveis lilia tacta facit.  
 Jure igitur tam tu Veneris me judice præstas,  
 Quam præstant pulchris lilia pulchra rosis.

*De Himera.*

Sole comas, ut sæpe solet, siccabat Himera,  
 Sol fulgore comæ tactus, & oris, ait:  
 Conde comas, averte oculos, pulcherrima Himera,  
 Spicula sunt oculi, retia torta comæ.

*In nævum Himera.*

Non procul a mento niveum pulcherrima Himera  
 Nævum habet, & pulchro nævus in ore decet,  
 Nec macula est, piceâ insignis nigredine nævus,  
 Sed lumen, tamquam sidus in arce Jovis:  
 Lucifer est igitur merito mihi nævus Himera:  
 Tuque Aurora mihi, tu mihi Himera Dea es.

*In eundem.*

Nescio quis de plebe hominum damnavit, Himera,  
 Quem pulchrum nævum vidit in ore tuum.  
 Irridens, talis esse nihil, nihil esse leporis  
 In facie nævo quæ caret, inquit amor.

*De eodem.*

Iste tuus quàm sit tibi nævus, Himera, decori,  
 Accipe: sponte sua nævus in ore tuo est:  
 Ut similem vero nævum ferat, omnis adurit  
 Igne sibi, & ferro culta puella genas:  
 Cumque labore gravi curant decus addere formæ.  
 Quæ specie vera non nitet, arte nitet.

*Ad Himeram.*

Quod vitio est aliis, tibi, candida Himera, decori,  
 In nævo Charis est, & Venus alma tuo.

*Eidem.*

Qui nævum mendam esse tuo contendit in ore,  
 Fallitur, & nævi nescit, Himera, decus.  
 In se tuo, cum vult magnis dare vulnera Divis,  
 Quo latet, e nævo spicula torquet Amor.

*De eadem.*

Obvius in terris cùm sese ferret Himeræ  
 Blandus Amor, matrem credidit esse suam:  
 Cùm tamen e nævo quo matris forma carebat,  
 Non matrem, matri sed vidit esse parem:  
 Ore mœæ, mœrens exclamat, Himera, parentis,  
 Nescio quid facies hæc tua majus habet.

*Aliud.*

Tarpeji sacra templa Jovis mea Himera petebat,  
 Illius e cœlo Cynthius ora videt.  
 Incessum & formam miratus, & ora puellæ,  
 Æstuat, atque novo carpitur igne Deus.  
 Palladaque & Venerem & Junonem convenit, utque his  
 Mortali ostendit, quod decus ore nitet,  
 Cedite, ait, facie, nævoque insignis Himeræ,  
 Cedite, tres superat pulchrior una Deas.



*De Euphemiâ Jozola.*

Dum movet insignis dulces Euphemiâ cantus,  
 Integrat & molli carmina culta sono;  
 Sistit equos Phœbus, medioque e vertice olympi,  
 Miratus liquidæ flumina vocis, ait:  
 Cedat olor, cedat philomela, huic cedite Musæ;  
 Vincit aves, vincit docta puella Deas.

*Gauro.*

Tres nati sunt, Gaure tibi; mas, femina, neutrum,  
 Gratulor; est soboles congrua Grammatico.

*Tullo.*

Numquam visa tibi nubit tibi, Tulle, puella,  
 Cui sub nube cavâ nupta datur, miser est.

*Ad Paullum III. P. M.*

Paulle moves justa hibernis dum mensibus arma,  
 Nascuntur molles læta per arva rosæ.  
 Quam cito victor eris, clarum dat Juppiter omen:  
 Cum tibi ver blandum floreat ante diem.

*Ad eundem.*

Do tibi, Paulle, rosas alieno tempore natas;  
 Quo rigido spirat frigida bruma gelu.  
 Quam tua regna, pater, sint florida. noscere fas est,  
 Quando hyeme in mediâ dat tibi Roma rosas.

*Lidya Eridano.*

Eridane, ingenti rapidarum flumine aquarum,  
 Qui petis Hadriaci littora rauca maris;  
 Redde mihi Fabium incolumem, fluvioque secundo  
 Duc puerum: fidei creditus ille tuæ.

Crimen majus erit Fabium cecidisse sub undis,  
 Quam Phaëtona tuis occubuisse vadis.  
 Hic placidus, rex magne; puer fuit ille protervus;  
 Nec tam pulcher erat, quam Fabius Phaëton.

*De Margareta Austria.*

Dicam equidem tibi, qui nescis, cur mane tenebræ,  
 Cur medio regnent lumina clara die.  
 Aurato invehitur curru, roseisque quadrigis  
 Austria, quæ magni Martis in urbe Dea est.  
 Invidet huic Aurora, latetque, pudetque videri;  
 Pulcher Apollo oculos pascit amore novo.

*Livia Columnæ.*

Quid gemis extinctam, generosa Columna, catellam?  
 Desine; damna tibi non dabit ulla canis.  
 Quid tibi cum canibus? sat dira, & dura fuere  
 Fata tibi: rabidi sat nocuere canes.  
 Sume animum: te certa manet Venus aurea posthac,  
 Damnosæ postquam procubuere canes,

*Paullo III. Pont. Max.*

E Libiâ advenit Romanas victor ad arces  
 Cæsar, & in niveis aureus ivit equis.  
 Ille triumphavit, sed tu plus, Paulle, triumphas;  
 Victor namque tuis oscula dat pedibus.

*In obitum Ascanii.*

Non obiit puer Ascanius, sed ab alite raptus  
 Ille Jovis; miscet pocula grata Jovi.  
 Par Superis, non dignus erat tellure morari:  
 Sedibus ætheriis, & Jovæ dignus erat.

*De Margareta Austria.*

Austria habet Veneris formam, mentemque Minervæ:  
 Non habet hæc, Juno, regna minora tuis.  
 Cede igitur; cedat Venus, & tu cede Minerva:  
 Austria sola, tribus quæ tria dantur, habet.

*De Himera.*

Sponte sua aurato nuper donavit Himera  
 Me calamo, & jussit scire, quid ille velit.  
 Aureus, & pulcher calamus quid poscat, Himera,  
 Scimus; & utemur, quam petit ille, manu.  
 Non ego describam hoc laudes regumque ducumque;  
 Describam laudes, aurea Himera, tuas.

*Ad Mariam Mendociam.*

Jure nites niveo, Mendocia, flore juventæ,  
 Perpetuoque vires tempore; namque Dea es.

*De Hernando Cortesio.*

Corniger Eoos devicit Bacchus ut Indos,  
 Jussa dedit victis, ut sibi thura darent.  
 Hernandus contra poni sibi noluit aras,  
 Altera ubi est armis India victa suis.  
 Est igitur Baccho major Cortesius, hic se  
 Noluit esse Deum: vi fuit ille Deus.

*De Carpentio Margareta Austria.*

Invehitur Juno pavonibus; alma columbis  
 Cypria; verum aquilis Austria præpetibus.  
 Utque aquilæ cedit pavo, ceduntque columbæ,  
 Austria, sic cedunt Juno, Venusque tibi.

*De eodem.*

Axem aquilæ moderantur. equi capita alta ferentes  
 Tenionem currus, Austria magna, tui,  
 Ergo cum libeat latis decurrere campis,  
 Cum libeat cursum tollere ad astra, tuum est.

*De*

*De eodem.*

Austria, qui teneros depinxit pictor Amores,  
 Et qui carpento florida ferta tuo;  
 Stultus erat: nam tecum una vestantur Amores,  
 Erumpuntque rosæ quæ, Dea, carpis iter.

*De partu ejusdem.*

Qua nurus Augusti natum gravis edidit hora,  
 In medio cœli vertice Phœbus erat:  
 Et subito adcurrit puerum studiosa videndi  
 Nascentem, placido cum Jove diva Venus.  
 Ille igitur felix, uno cui tempore, ab ortu  
 Certatim adfulgent Numina magna Deûm.

*De eodem.*

Cæsaris ut gravidâ natum nurus edidit alvo,  
 Emoritur, partus victa dolore sui.  
 Improba Mors! verum magnis sine funere matrum  
 Non datur in lucem surgere Cæsaribus.

*De Octavio Farnesio.*

Romanus Romanum habitum Farnesius heros  
 Sumpserat, & Trojam luserat acer equis.  
 Cum nitidum attollens undis caput amnis Iberus,  
 Romanos olim qui bene norat, ait:  
 Octavi, veterum vestemque, & nomen avorum  
 Non modo, verum animos, & benefacta refers.

*De Lucretia.*

Edita præclaro Lucretia sanguine, quondam  
 Vi temerata, suâ concidit usa manu.  
 Altera nunc humilis, turpique exorta parente;  
 Ut mœchum fugeret tetra venena bibit.



Castâ est utrâ magis? raptô cadit illa pudore :  
 Servatô hæc statuit malle pudore mori.

*De geminis Farnesiis.*

Ut geminos genuit natos gravis Austria, Tiberis  
 Adfurgens placido sic ait ore pater :  
 Roma olim auspiciis geminorum condita, terris  
 Jura dedit; victis vi tamen illa dedit.  
 Nunc vero auspiciis horum majoribus aucta,  
 Sponte suâ leges Orbis ab Urbe petet.

*In obitum Victoriæ Columnæ.*

Te licet innumeræ ornarint, Victoriâ, laudes,  
 Attamen ante alias clarior una fuit.  
 Talia condebas nam carmina, qualia condunt  
 Ad sacra Permessi flumina Pierides.  
 Quin Dea, Musarum mater, mirata leporem,  
 Hanc etiam, dixit, me peperisse velim.

*In obitum Horatii Farnesii.*

Occubuit dignis horrendus Horatius armis,  
 Belli fulmen erat; fulmine raptus obit.

*In Victoriæ Columnæ partum.*

Omnibus optatum votis Victoriâ natum  
 Tegmine sub magni roboris ediderat:  
 Cùm se se Hadriacis tollens Neptunus ab undis,  
 Sic canit ad ripas, flave Pisaure, tuas :  
 Felix ille puer, cujus Victoriâ mater,  
 Et tegit a cunis quærna corona caput!

*Ad Liviam Columnam.*

Spina tuâ fuso violarat sanguine dextram,  
 Livia, cùm matrem te ratus, inquit Amor:

Quæ


Quæ cunctorum agitas spinosis pectora curis,  
Læsit spina pedes, & tibi jure manus.


*De Achille.*

Impiger argenti pondus quod debet Achilles;  
Sponte suâ nobis solvit, & ante diem.  
Quid mihi cum magno, expertique timoris Achille,  
Cum Larissæo quid mihi, Homere, tuo?  
Partus adest alter fortem qui præstet Achillem:  
Ille fuit pedibus nam celer, hic manibus.

*De Pompejo ruri occiso.*

Conjuge cum carâ Pompejus fugerat urbem,  
Ducebatque suis otia lætus agris.  
Sacrilegi irrumpunt aditus, amboque trucidant;  
Dum somnos placido carpit uterque thorô.  
Dii Superi! quæ tuta bonis domus; acribus urbes  
Si curis, ferro prædia nos perimunt?





# TARQUINII FRANGIPANIS

VENETI.



*Adventans senectus.*

**J**Am nix, alba comas tegit,  
 Et rugas facies contrahit aspera :  
**J**am verba ore pigro hæsitant,  
 Cristalli auxilio luminaque indigent.  
**J**am aures tardiùs hauriunt  
 Emissæ sonitum vocis, & in dies  
 Sensus quilibet interit,  
 Annorum jam humeri pondere maxime  
 Curvantur: pedibus ferunt  
 Infirmis baculo subsidium manus,  
 Vires corporis aridi  
 Sensim deficiunt, & vigor igneus  
 Sic absumitur, ut brevi  
 Extinguar spatio: languida sicuti :  
 Lampas, cum viridis liquor  
 Defecit, tremula luce caret statim.  
**Sed** quid? Nunc pereat licet  
 Paulatim gelidis flamma sub artubus  
 Vitalis, tamen undique  
 Me sanctis adeo concremat ignibus  
 Divorum pater optimus,  
 Ut jam non homo sim, fervor at æstuans,  
 Ignis, flammaque torrida,  
 Alterque Ætna. Precor, te precor omnium

Re-

Rerum ingens opifex, dies  
 Seu terras nitido lumine, seu nigro  
 Nox velamine conteget,  
 Quod vitæ superest da igne tuo ardeam,  
 In quo purificer nitens  
 Auro lucidior, sæpius in lævi  
 Quod flamma bonus artifex  
 Excudens facili nobile opus manu  
 Atris sordibus exuit:  
 Ut, cum mors rapidas intulerit manus,  
 Flammas è mediis velut  
 Phoenix exorians protinus explicem  
 Alas, & patrium cito  
 Vestus remigio pervolem ad æthera:

## LAURENTII FRIZOLII

20 02

*In Lauret. adem.*

O Grata regi Cœlicolum domus,  
 In Nazaræis condita finibus  
 Quondam! volucres te ministri  
 Illyricas sine labe ad oras  
 Vexere: terras rursus & æquora  
 Supra ferentes, te placidum Adriæ  
 Ad littus, in Laureti opacâ  
 Innocuam potuere silvâ.  
 Votivo ut auro, vestibus ut sacris,  
 Gemmisque fulges! quæ te humilem ambitu  
 Lætè tuetur ducta circum  
 Marmoreo, ferit astra moles.  
 Sanctam potentum te Aufonidum piæ  
 Visunt cohortes: te Rhodani accola,  
 Tagique potor, te Liburni

Te



Te Armenii celebrant frequentes.  
Audit precantes hinc propius Dei  
Mater, periculisque eripit: hinc levat  
Morbis laborantes, acerbi  
Limine me quoque lethi ab atro  
Raptum paternæ restituit preci.  
Huc solve vinclis ingrediens pedes;  
Huc tende palmas: huc inertes  
Tende oculos: domus hæc patentis  
Reginam olympi continuit sinu  
Augusta parvo: hac nuntius explicans  
Cœlestis alas fulsit: orbi  
Attulit hæc misero salutem  
Proles supremi numinis (ô stupor!)  
Concepta in alvo virginis integræ.  
Tunc munerum ubertas ab alto  
Axe pluens humilem, brevemque  
Ditavit aulam: Flaminis imbuat  
Hanc aura sancti: filius hoc Dei  
Plantis pavementumque premit,  
Hos manibus tetigitque muros.  
Quâ diva mater parte frequentius  
Sedit? quo amarum flevit in angulo  
Nati innocentis quæsta mortem?  
Limite quo thalami & sepulchro  
Natus resurgens constitit? o ubi  
Sopore lethi lumina condidit  
Annosa virgo? intaminatæ  
Corpus ubi jacuit parentis?  
Christi peractis quâ socii sacris  
Duxere funus? sanctior an locus  
Est hic, an ille? an omnia æque  
Sancta putem, venererque sancta?  
Impressa saxi quâ quibus oscula  
Figam? quid o quid mentem agitat novam,  
Quod corda numen pungit æstro  
Æthereo? procul hinc profanæ  
Abeste curæ: nil ego, nil amem

Mortale posthac; immemor omnium;  
 Mei que vos complexu in uno;  
 Nate, colam, genitrixque virgo.

*In Nubes.*

Neptuni genus humidæ

Nubes, quæ volucris curritis agmine,

Quæ cæci rapiunt Noti,

E vestro gremio, cum sonitu horrida

Mittit fulmina Juppiter;

Si quando in superos gens fera verticem

Tollit, si veteres manu

Lucos sacrilega polluit: hinc tonat

Arx cæli; hinc micat ignibus

Crebris: vos placidæ frugiferos agris

Imbres mittitis, & fata

Lætâ humore alitis. Vos sitientibus

Succos vitibus additis,

Mox libanda novis munera poculis.

Vos largas pluviæ nisi

Effundatis opes, gramina non humus,

Non flores dabit, arida:

Arescent viduæ frondibus arbores.

Vestri languida corpora

En desiderio, vix animas suo

Languentes retinent sinu.

Vos o pinifero vertice seu tenet

Atlas, seu Scythiæ latus,

Seu vasto Oceani luditis æquore,

Nunc ceu vellera candida;

Hunc sparsæ maculis corpora fumidis,

Fœtus imbriferos date;

Rores in gremium spargite torridæ

Matris, munera, roscidæ

Nubes, vestra Pio fundite maximo.

Quamquam gentibus imperat,

Non hæc vestra Pius munera negliget.

O tandem requiem date  
Fessis irriguo rore animantibus.

*In Aquam.*

Quicumque divum magna læsit numina ,  
Aut patriæ ignes intulit ;  
Quicumque dirus impiam tinxit manum  
Fratris cruore, aut hospitis :  
Aquam venenis expiandus ebibat  
Nocentiorum Colchius ,  
Quæ non ferendis pestis heu doloribus  
Inflata torquet ilia ,  
Heu , quæ inquietis , qua pererrat spiritus ,  
Immurmurat præcordiis ,  
Ut horrido bacchantium Æoli in specu  
Turbata ventorum cohors .  
O Dii , supremis in malis si vestrum opem  
Est ferre , si vixi integer  
Unquam , innocensque , pestilentem cur meis  
Hanc potionem a faucibus  
Non in malas aufertis oras , tetraque  
Non in Scytharum pocula ?  
Scyphos propinent hos in Alpium jugis  
Inhospitales incolæ ,  
Ferrique fessor hæc Iberus apparet  
Inempta mensis gaudia ,  
Facturus hac Erinnibus tristis caput ,  
Et spargat aras lugubres .  
Hic nonus ægrum pura lecto flumina  
Dies bibentem me tenet .  
Jam spes , manusque , & ipsa languet in cavis  
Amata ocellis pupula :  
Torpetque lingua , nec valet diras preces  
Ore imprecari libero .  
Thebane vates , parce , parce ; nunc scio ,  
Est unda rerum pessima .  
Huic humidæ natura mater intulit  
Cognata morti frigora

Hac alma tellus, hac putrescit aëris  
 Morbos ferentis ambitus.  
 Hæc monstra gignit, seque in atram congelat  
 Infesta Baccho grandinem.  
 Vires refringit, atque amoris igneas  
 Extinguit ardentis faces.  
 Curas levantis hæc soporis eripit  
 Fessis quietem mentibus.  
 Dicam? an silebo? pessima humanum genus,  
 Feraque, avesque perdidit,  
 Fluctu minaci cum super cacumina  
 Ascendit alta montium.  
 Et quispiam medentium te prædicet  
 Nostro salubrem corpori?  
 Seu Phœbus ille, seu sit Æsculapius,  
 Impune non umquam ferat,  
 Sed te salubrem tussi anhela percitus  
 Ad usque funus sorbeat,  
 Post insepultum, ne te amicam deferat,  
 Tibrim cadaver innatet.

*Ad Quercum.*

O quondam mihi cognita  
 Quercus, parva manu consita rustici  
 Damætæ viridi in solo:  
 Lascivum quoties a teneris pecus  
 Virgultis ego depuli?  
 Te nunc per vacuum grandia brachia  
 Pandentem aspicio, tibi  
 Ignotus; liquidum cernere quam juvat  
 Cælum hoc! tegmine quam juvat  
 Messlem post decimam glandifero æstibus  
 Me defendere ab igneis;  
 Et captare nigris frigora sub comis!  
 Quid suaves Ptolemei  
 Fratres, quercus, agunt, dic age? quid meus  
 Rerum dulcis eques gerit?  
 Huic, si quando tui viset amabilem



Umbram, dic (rogo te) o mea

Quercus; fronde sub hac, solibus, arida &  
Exustus iacuit siçi

Laurens ille tuus, qui puerilibus  
Annis, auspicio tuo

Hausit Castaliis pocula fontibus,

Qui tecum modo obambulans

Sub celfo Herculeæ vertice populi,

Qui in læto modo gramine

Stratus, qua Eridanus præteriens fluit,

Et qua proxima semita

Herboso ad celebrem tramite villulam

Tendit, se comitem tuo

Addebat lateri semper, & Atticis

Chartis illita carmina

Cantabat: Latæ sæpe lyræ aureas

Tecum una tetigit fides:

Quis (dixit) referet dulcia tempora?

O quis purpureum genis

Ætatis teneræ restituet decus?

Ævi cur celerem illius

Cursum præcipitis sistere non datur?

Sat felix propriis recens

Ætas illa opibus, tantum amat in sinu

Dulcis ludere Gratia:

Pubentesque sequi Pieridum choros.

Illam non agitat lucri

Detestata fames, non malus ambitus.

Mox, ceu Caucasæ alites,

Mordaces animos sollicitudines

Rimantur variæ, neque

Nostris vivere nos arbitriis sinunt.

Hæc illi referes, mea

O quercus; tua sic alta cacumina

Spissis ditet honoribus,

Qui te dexter alit numine Juppiter,

Nec sit Chaonio in iugo

Quercus, nec viridi pulchrior Algido.

*In obitum Michaelis Sophiani.*

In morem rapidi fluminis irruens  
 Gentes præcipiti Mors rapit impetu;  
 Sic est; nec Sophiano  
 Diras abstinuit manus.

Eheu terra parens ingeminat Chios:  
 Omnisque in lacrimas Græcia liquitur,  
 Et quicumque benigni  
 Grajorum ingeniis favent,

Qui Graiis Sophiæ Cecropiæ haud luto  
 Turbatos latices fontibus hauriunt;  
 Puros quique liquores  
 Aëtæi eloqui bibunt;

Qui Pindi peragrant umbriferum nemus:  
 Omnes interitu solliciti tuo  
 Te deslent Sophiane,  
 Te frustra exanimem vocant.

Vivis post obitum tu tamen, & tibi  
 Gaudes: nomen enim Mnemosyne tuum  
 Immutabilis ævi in  
 Templo consecrat aureo.

*In Thomam Aldobrandinum.*

Jam me, quod fateor, pocula vitreis  
 Juvit Castaliæ tingere fontibus,  
 Atque haurire liquores,  
 Vatum se quibus imbuunt

Mentes, atque furore intus amabili  
 Lymphantur, cupide carmina nunc lyra;  
 Hunc (quæ cuique voluptas)  
 Leni dicere tibia.

Formæ rerum animo mille volant, velut  
 Lauru examen apum frondifera: sonat  
 Blandis aura susurris,  
 Et mel Pierium fluit;

Aures

Aures suaviloqui quo sapientium  
Vates dulce linunt. Hi celebres Deum  
Et laudes meditari  
Audent, atque potentium  
Altos regum apices tangere. Quem virum  
Doctis musa beat carminibus, fugit  
Ille obliviam Lethes,  
Fama vectus ad æthera.  
Vates ipse etiam vivit, & omnium  
Linguis pervolat, qua vaga sidera  
Fulgent, qua exoritur Sol,  
Præceps qua Oceano cadit.  
Huc vitæ innumeros dulcis amor rapit:  
P ucos Melpomene sed recipit ænu,  
Pauci, quos Dea felix  
Tantis auget honoribus.  
Arrisit puero Musa Jovis genus,  
Thoma, mox alio lumina contulit;  
Et rivos mihi clausit  
Parnassi, & gelidum nemus.  
Non me falsa juvat fingere: sat scio  
Ex illo numeros tempore durius  
Defluxisse canenti,  
Et vocem liquidam minus.  
Expertus doleo; sæpe etenim mihi  
Te, Etruscumque genus dicere mens fuit,  
Qualis sit tua virtus,  
Quam sis eloquio potens.  
Tu pueros latices fontibus Atticis  
Hauris; tu ingenuas doctus in intimo  
Artes pectore condis,  
Teque ornat patrium decus.  
Musarum hæc quoties tollere flamine  
Cæpi! sed vetuit Melpomene, levi &  
Sensim diva volatu  
Mollem misit inertiam.  
Invita quis amet linquere humum Dea?  
Ales fulva Jovis nubila transvolat;

Cornix vix movet alas,  
Et radit pedibus solum.

*In necem Francisci Ghisii Ducis.*

Quo nos ferrea sæcula  
Servastis mihi? quæ dabitur quies  
Fessis? quo satiabitur  
Tandem supplicio mens superum gravi?  
Inclementia siderum  
Ecquando meritis mittere desinet  
Terris diluviem, vago  
Urbes præcipites quæ rapit impetu;  
Ædes diruit & sacras,  
Divumque effigies, & cineres pios  
Vasto gurgite dissipat?  
Heu crudele nefas, heu scelus impium!  
Cladi Mars comes additur,  
Diris qui populos seditionibus  
Miscet, & miserabilem  
Involvit vario funere Galliam:  
Et nunc exitiis  
Incensus furiis, perdere Regiam  
Mœstam cogitat, & genus  
Regale e patriis pellere sedibus.  
Extincto duce Ghisio:  
Unus pro patria qui opposuit feris  
Pectus fortiter hostibus:  
Unus consilio, quique manu agmina  
Forti barbara diruit:  
Qui rem restituit, sanguine regium  
Hostili redimens decus.  
O si ingenrem animam victor in horrida  
Fudisses acie, neque  
Oppressus subitis oppeteres dolis,  
Majorem tumulo ducem  
Non texisset ager Laomedontius,  
Aut pingue Æmathiæ solum.  
Sed non fata sinunt querere gloriam



Mortales superis parem.

Tu felix satis es, qui recipis tuæ

Mortis præmia in arduo

Cum consanguineis regibus æthere:

Quos dulci a patria procul

In campos Solymûm, Christi amor impulit,

Agmen trans mare ducere,

Bellantefque mori; scilicet hoc fuit

Genti præcipuum tuæ,

Pro Christo impavidum, proque focis caput

Objectare periculis,

Et per pulchra necem quærere vulnera.

Quid restat tibi Gallia?

Quis te religio sancta tuebitur,

Custos si tuus occidit?

Nunc in templa faces lætitia ebrius

Hostis barbarus inferet:

Nunc matres jugulans cum pueris, pio

Aras sanguine polluet

Extincto sceleris vindice Ghilio.

Dii tandem miserefcite;

Pœnarum satis est, quod dedimus; satis


Fudit Gallia sanguinis.

Quod si culpa latens illam agit, aut furor


Exercet miseram impius,

Ah saltem immerito parcite Carolo.





# PUBLII FULVII



## *De Victoriâ Naupacticâ.*

**H**umani generis rector servator, & auctor  
 Christe potens, canimus dum tua dona, fave.  
 Austriacâ dux gente satus, quo fratre Philippus  
 Rex gaudet, Grajo victor ab orbe redit.  
 Mœoniâ res digna tubâ, geniove Maronis  
 Compositos tenui perferet arte modos.  
 Inter Achæorum terras, & Echinadas, amnis  
 Eveni Nereus excipit altus aquas.  
 Huc classes cœiere pares non viribus æquis:  
 Frangit, & attollit pectora caussa ducum.  
 Altera tercentum rostris, turmisque tumebat  
 Innumeris, fidens robore Marte, Noto.  
 Altera freta plis armis, votisque secundis,  
 Cœlestique potens alta secabat ope.  
 Jam propè constiterant acies, atque obvia signis  
 Signa minabantur, perfida Luna Cruci.  
 Parte Ligur dextrâ ductor, lævaque regebat  
 Adriacus lectis agmina densa viris.  
 Regius ast heros accendens voce cohortes,  
 Et classem lustrans, Carolus alter erat:  
 Postquàm aciem redit ad mediam, dominamq; carinam  
 Concinnare extemplo classica sœva jubet.  
 Tartareos imitata sonos dant tympana signum,  
 Et rauco clangens increpat ære tuba.  
 Hic spes arrestæ feriunt clamoribus astra,  
 Displolisque globis æthra fragore tonat.

Spumant convulsæ remis stridentibus undæ;  
 Concurrunt celeres per vada salsa rates.  
 In ferrum sine more ruunt, & cominus instant:  
 Martius & cuneos miscet utrosque furor.  
 Ære micant fluctus, fumo subtexitur ær:  
 Ingentem referunt littora pulsa sonum.  
 Jam laxos arcus, pharetras jam sentit inanes  
 Barbarus: & jaculis, glandibus, ense perit.  
 Hostiles cecidere duces, cecidere phalanges;  
 Captaque victrici Turcica rostra manu.  
 Nereidas stupuisse ferunt tot stragis acervos,  
 Et tantâ Jonios cæde rubere sinus.  
 Miratusque pater Nereus, fluitantia vasto  
 Gurgite cum vidit corpora, & arma virum;  
 Invisum pondus siccis projecit arenis,  
 Lætatusque sua est regna vacare metu.  
 Quin ausis etiam ducis, & felicibus orsis  
 Arridens, tales edidit ore sonos:  
 I nunc Turca nocens; oras populare; quietas  
 Irrita gentes; frange Tyranne fidem.  
 Instaura classes armisque, virisque superbas;  
 Præda Aquilæ rursus, præda Leonis eris.  
 Instructis latos campos legionibus imple;  
 Magnanimi vires experire ducis.  
 Excierat nuper quem Bætica terra, tumultum  
 Compressit quanta prosperitate puer?  
 Acer & ingenio, ferus & certamine Maurus  
 Contulit adverso signa nefanda Deo.  
 Tu quoque terrarum, & pelagi prædator, & hostis  
 Impius infenso Numine bella geres.  
 Hæc ait, atque oculis puppes comitatur oyantes;  
 Imperat & Nymphis concelebrare diem.  
 Lætitiæ nunc ergo novæ dant æquora motus,  
 Quæ prius infestas sustinuerunt rates.  
 Spectator pugnæ majori lumine lustrat  
 Cynthius Hesperias, exhilaratque polum.  
 Culmina collucent lætis, & compita flammis:  
 Alta coronatis turribus æra sonant.

Fulmina conigeminant arces, tremunt arduus æther;  
 Lætifico plausu testæ, viæque fremunt.  
 Casta sacerdotum imprimis manus, omnis & ordo  
 Mollibus actutum profluere thoris.  
 Sacra citi delubra adeunt, gratesque per aras  
 Votaque persolvunt, & pia dona ferunt.  
 Cunctorum est vox una; Deus, qui temperat orbem,  
 Non surda iustas accipit aure preces.  
 Hunc tandem afflictis juvenem succurrere rebus,  
 Ultorem & statuit nominis esse sui.  
 Prælia consilium testantur prima Tonantis,  
 Prælia palmatæ digna decore togæ.  
 Quanta gerendarum sunt hæc primordia rerum?  
 Maxima vis pueri est, quantâ futura viri?  
 Carolus ipse pater modo si reddatur ab alto;  
 Gratur nati gloriæ, an invidet?  
 Perge igitur, cœptum, dux inclite, perfice munus,  
 Quodque fidem superet posteritatis, opus.  
 Te Deus ad majora vocat, ne sperne vocantem:  
 Ille tuo subdet colla superbâ iugo.  
 Te Pœni, Tracesque timent, & Isauricæ tellus;  
 Pontica gens horret te, Gnidos, Hermus, Halys,  
 Te sanctis Judæa locis, te fertilis agris  
 Syria, & Armeniæ regna vetusta manent.  
 Te vocat Epirus, cupiunt Pharsalia Tempe;  
 Te Macedum fines, te Danaumque volunt.  
 Te vagus Eridanus, Tuscus te Tiberis honorat,  
 Te Tagus observat, Bætis, Iberus, Ana.  
 Te Messana libens fruitur, te læta tuetur  
 Trinacria, & Rhenus te colit, Ister amat.  
 Austriaci generis lux, Régis cura potentis,  
 Es patriæ vindex, Urbis, & Orbis amor.  
 Aeternis mandent vates tua nomina chartis;  
 Prætereant laudes pagina nulla tuas.  
 Regales niveo spirent in marmore vultus;  
 Effingatque novo te novus ære Myron.  
 Jamque dies aderit Superum sperata favore,  
 Cum reducem videat post pia bella Pius.



Roma triumphales arcus, ludosque novabit;  
 Eriget & mediis pegmata cella foris.  
 Atque ades extremis optatus, dicet, ab aris:  
 Non minor Augustus quam pater ante, venis  
 Ingredere o felix, Pie, Maxime, Victor; honoris  
 Nomina sunt meritis inferiora tuis.  
 Tunc ope barbarico, spoliisque insignis Eois,  
 Et procerum medius conspiciendus eris.  
 Cernentur vinctique duces, gentesque subactæ,  
 Oppidaque, & variis rapta trophæa plagis.  
 Insolita admirans Tiberis spectacula; credet  
 Sæcula cum ducibus prisca redire suis.  
 Vestu laurigero ad Divum tunc limina curru,  
 Suspendes pectus hostica signa tholis.  
 Inde Pius pater accipiet te fronte serenâ;  
 Et dabit amplectens oscula blanda senex:  
 Luminaque, ac geminas tendens ad sidera palmas,  
 Cœlitibus gratas fundet ab ore preces,  
 Hic magnis majora tuis accedere factis;  
 Teque frui gestis tempora longa, petet.  
 Audiet has Christus voces, & vota precantis:  
 Audiet; & vates sic ego verus ero.

*De eadem.*

Cum lento nuper Leo forte sopore jaceret,  
 Extrema huic cauda est dente resecta Canis.  
 Evigilans fera terribiles exardet in iras,  
 Et lacerat sævo protinus ore Canem.  
 I nunc audaci Canis improbe, dente Leonem  
 Irrita, ut fias nobilis esca feræ.

*In Claram Corneliam.*

Cum generi, pariterque trium Cornelia clara  
 Natorum audisset funera pro patria:  
 Quid lamenter? ait constanti pectore mater:  
 Et cœlo, & patriæ me genuisse juvat.

Invideam potius natis, qui sanguine vitam  
 Æternam in superis promeruerunt choris.  
 O Veneras inter clarissima femina matres,  
 Inviſtos animi robore vincis avos.  
 Ergo polo tua te virtus jam clarius aſtris  
 Deſtinat, ut natis digna fruare parens.


*In Auguſtinum Barbadicum.*

Et meritis gravior dum Barbadicus, & annis  
 Turcica navali prælia Marte gerit:  
 Dumque pharetratas acies, puppesque nefandas  
 Urget, & Jonias cæde colorat aquas;  
 Threiciâ lævum tranſfixus arundine lumen,  
 Et properante necem vulnere, lætus ait.  
 Æquo animo terris jam cedimus, otia quando  
 Auſoniæ noſtro parta cruore domus.  
 Quamque brevi natura parat finire ſenectam,  
 Exigat hanc patriæ religionis amor.  
 Dixit; & ætheream penetravit ſpiritus aulam,  
 Summaque virtutis præmia victor habet.  
 Huic ergo geminam peperit cum funere vitam,  
 Eminus hoſtili miſſa ſagitta manu.  
 Namque animus cœlo fruitur, ſemperque triumphat;  
 Nominis in terris fama perennis erit.

*De Fœdere in Turcos.*

Finge novos, Pie Quinte, orbes: nam fœdere junctis  
 Unum jam ducibus vix ſatis eſſe puto.  
 Tu quoque, Turca, novas artes extunde, vel arma.  
 Quid pharetra? aut arcus? quidve machæra juvat?





# ANDRÆ FULVII

20 02

Ad LEONEM X. Pont. Max.

*Interlocutores Pyramus, & Corydon Pastores disputantes  
de ortu Servatoris; mox certiores facti per  
Angelum eadem hora, qua natus est.*

**Pyr.** Nescio quid Cœlum, intempesta nocte minatur?  
Ecce coruscantes video sub luce serena  
Intonuisse polos, nec non & ovilia circum  
Pervigiles latrasse canes. Eja ocyus, eja  
Surgite, pastores, quid dormitatis inertes?  
Sed quid te Corydon tecum garrere jacentem  
Præfusi? & tacitæ stertentem somnia noctis?

**Cor.** En ubi sunt? Quis oves latronum incursus abegit?  
Vidi ego tela faces, Arabum nocturna que furta,  
Præterea sensisse sonos & carmina visum est  
Æthere sublimi (grato dum pressa sopore  
Membra solo recubant) resonare recentibus hymnis;  
Illuxisse diem tam clara luce putabam.  
Nunc certe [nisi fallor] adest, quod sæpius ante  
Barbatos memorare senes audivimus, ævum.  
Nox ut clara dies nitida cum luce micabit;  
Aureus orbis erit; saturnia sæcla redibunt,  
Mellaque de quercu stillabunt, balsama pinu,  
Nectar & ambrosiam tellus feret omnis ubique  
Lacte, meroque novi fontes, & flumina current.

**Pyr.** Jam tandem memini, si rite audita recordor,  
Hoc etiam Hebræos quondam prædicere vates

Pesto.

Pectore fatidico, divinoque ore locutos,  
 Quippe Deum & regem venturum ex æthere summo  
 Stirpe prophetarum genitum, summumq; prophetam,  
 Quo duce, quo domino totus renovabitur orbis,  
 Quin pater ille Jacob, generis clarissimus auctor,  
 Judææque parens sobolis fecundior, inquit,  
 Desinet haud sceptrum, nec dux de semine Judæ,  
 Donec jam veniat, qui demittendus olympo est  
 Gentibus, & populo nimis expectatus Hebræo.

*Cor.* Nonne fuit custos ovium dux inclitus ille,  
 Quem colimus, Moses, latorem legis Hebrææ?  
 Ex ardente rubo cœli qui numina vidit,  
 Ex quo illi quondam (pecore admirante) locutus  
 Clara luce Deus, tonitru qui concutit orbem,  
 Cui dedit & binas supremo in monte tabellas  
 Marmoreas, foci pecudes dum pasceret olim;  
 Qui pastorali virga Pharaonis inanis  
 Prostravit vires, & regis numina vicit.

Quem post devictum submersit in æquore rubro  
 Nos insectantem, magna comitante caterva  
 In deserta Arabum deductis, roreque pastis  
 Æthereo, tandem nobis sitientibus, ingens  
 Uberibus fecundus aquis fons marmore fluxit,  
 Et baculi tactu, per quem prius æquor apertum est,  
 Nos, unde huc Mosis successor duxit, & ultra  
 Jordanem vitreum trajecit, & omnia nobis  
 Hæc tam culta dedit liquidis cum fontibus arva,  
 Ejectis priscis, qui possedere, colonis.

*Pyr.* Hoc itidem rex ille David cytharædus, & ingens  
 Vates psallebat, cui vox demissa per auras:  
 Sin' ex te geniti (dicens) tua postera proles,  
 Quæ præcepta dedi, servabunt rite sequentes,  
 Sede super, solioque tuo de germine cretos  
 Constituam, firmans, quæ dixerat omnia, nutu.  
 Quo mare concutitur, cœlumque, & terra tremiscunt  
 Pastor & ille ovium puer ad regalia raptus  
 Sceptræ, Philistæum qui fundæ cæde Goliam  
 Et puer armatum stravit (res mira,) gigantem.



Cujus enim torvum caput e cervice revulsum  
 Rettulit, exultans Hebræa in castra, fugatis  
 Hostibus, & patriam solus servavit inermis.  
 Quid sapiens Salomon non vaticinatus? & omnes  
 Post ipsum vates, post quos Baptista supremus  
 Sylvarum cultor, sanctissimus indice vates  
 Auræa venturi prædixit sæcula regis?

Quin & fatidicæ pariter cecinere Sybillæ  
 Assertorem orbis nasci de virgine Hebræa,  
 Regem magnanimum, cœlesti semine cretum.  
 Urbe hac in nostra, divina ut scripta fatentur;  
 Paupere sub tecto, modico lare, paupere matre  
 Vagitus primos fæno præsepis agentem.

*Cor.* Dic mihi, cur ovium potius custodibus adsunt  
 Numina? cur istis apparent sæpius oris?

*Py.* His quoniam terris quondam, & præpinguibus arvis  
 Confedisse ajunt auctorem sanguinis Abram,  
 Ac nostri generis patria Babylone relicta.  
 Cui numen Cœli (ut perhibent) apparuit olim;  
 Et sub glandiferæ frondentibus Illicis umbris:  
 Omnes ille tuo, dicens, in semine gentes  
 Optatam accipient post sæcula longa salutem.  
 Tempora post aliquot jubet illi in vertice montis  
 Sacra sibi offerri cari de sanguine nati:

Pro quo tunc aries, mutata sorte, litatus  
 De grege non alio quam ovium, nam victima grata  
 Hæc superis, qui nos, & oves, & septa tuentur.  
 Sed quid adhuc dubitas pastorum incredula turba;  
 Nonne omnes uno ore Deum cecinere prophetæ  
 Venturum in terram, & de virgine paupere nasci?  
 Afferre in medium possem nunc plurima vatum  
 Dicta, sed hoc tantum referam de pluribus unum.  
 Regia concipiet cœlesti semine virgo,  
 Et pariet Cœli regem, mirabile dictu.

Qui rex Emmanuel, magnusque vocabitur; & qui  
 Butyron, & mellis comedet rorem, ut sciat apte  
 Et reprobare malum, bona quæ sunt eligere. Ecquis  
 Illius egregium genus enarrabit? & ecce

Lux iterum radians nos circumfulget, ut ante.  
 Audis? mellifluis concentibus æthera totum  
 Jam resonare audis, ubi Gloria dulcibus hymnis,  
 Gloria summa Deo canitur, discrimine vocum  
 Magnum aliquid terris resonans portendit olympus;  
 Accidit ut quondam (quem dicunt vivere) vati,  
 Qui candente fuit sublati in æthera curru.

*Ang.* Surgite pastores, vigilem deducite noctem  
 Hanc, & vestra novos moduletur fistula cantus.  
 Nuncius e cœlo veniens, nova gaudia vobis  
 Nuncio, nunc natum regem de virgine matre  
 Infantem, positum modico præsepis in antro.  
 Ite videte Deum Cœli, terræque potentem;  
 Et quæ vidistis, pastoribus inde referte  
 Omnia vos aliis, per rura, per antra, per agros,  
 Perque Palestinos saltus, Hiericusique arva,  
 Et per Idumææ palmeta virentia terræ,  
 Per juga Carmeli, Jordanem, & flumen Adonis.

*Pyr.* Ergo agite, & Betleem jam jam properemus in urbem,  
 Acceleremus iter, pecori custode relicto;  
 Mystica cernamus pueri mysteria nati.

Quisque genuflexo jam se prosternat adorans  
 Supplex, pronus humi fundens pia vota, precesque

*Cor.* & Alme puer, rerumque decus, divinaque proles,

*Pyr.* Rex, & venturi speciosi pastor ovilis  
 Dexter ades nobis, ovibusque & fœtibus adsis;  
 Crescat ut in magnum numerum pecus omne, piique  
 Pastores gregis incolumes servantur, & agri  
 Gramine perpetuo, saltusque & rura virecant.  
 Ipsa, quibus versamus oves, sint flumina pura,  
 Et vitreis niteant, currantque salubribus undis.  
 Mox te provectum, cum jam maturior ætas  
 Viderit; ista tuas cantabit fistula laudes.

### *Ad Libellum.*

Vade salutatum telluris, & ætheris ingens  
 Numen, deposito, parve libelle, metu.

Et

Et domino rerum me commendare memento,  
Qui Codros, Flaccos, Virgilioſque facit.

*Sanctiſſimo Patri Leoni X. Pont. Max.  
Panegyricus.*

Salve, dive Pater, cœleſtis janitor aulæ,  
Maxime Pontificum: rerum cui ſumma poteſtas  
Clavibus æthereis, & numine dives olympi;  
Mente relaxata placidas da laudibus aures  
Quæſo tuis: adſiſque mihi tua geſta canenti,  
Nulla licet tantis ſit laudibus æqua Poëſis.  
Sulcipe me placido, quo pectore ſuſcipis omnes.  
Sunt tibi cum ſummo communia regna tonante,  
Namque tibi cœlum, tellus, & Tæſtara parent,  
Unde triplex capiti diadematis ordo coruſcat;  
Unica lux terris, velut inter ſidera Phœbus.  
Dux, via, præſidium, portuſque ad limina vitæ:  
Sydus Amyclæum fulcantibus æquora nautis;  
Romulæ princeps. & Præful. maximus Urbis.  
Patria quem genuit Tÿrrhenæ gloria gentis;  
Ingenio pollens, & acumine Dædala rerum,  
Unde genus clarum, generoſaque ſanguine Tuſco  
Regia progenies tua, clementiſſime Præful.  
Clarus avis, atavis, clariſque parentibus ortus;  
Stemmata præclaro Medices e gente vetuſta.  
Quid referam caſtos vitæ ſine crimine mores?  
Ingeniumque capax divinæ mentis, & altæ?  
Religionē Numam ſuperas, gravitate Catonem.  
Juſtus Ariſtides, & clementiſſimus alter  
Cæſar; munificus veluti Cornelius alter  
Sulla: pares animos ſuperis bonitate, fideque  
Ac probitate geris; nulli pietate ſecundus.  
Quid gravis eloquii, & Muſarum munera narrem?  
Virtuteſque alias, quæ te ad ſublimā rerum  
Culmina vexerunt, & claves ætheris alti?  
Tu ſiquidem Angelicus divino numine Paſtor  
Promiſſus toties, nuper demiſſus olympo.

Per quem sublatis, renovantur sæcula, probris;  
Per quem triticeas glandes mutantur in elcas.  
Per te, summe Parens, Ecclesia sancta resurgit,  
Justitiæ, pacisque decus, sæcundaque rerum  
Copia, & æterno concordia regna tenore.  
Cum Deus omnipotens ubi nam sibi ponere posset,  
Prospiceret sedem in terris post astra secundam,  
Huc illuc vertens oculos, delixus in unam,  
Hanc tandem elegit sæcundam fascibus urbem.  
Sed regna auspiciis, sacrisque addicta Deorum,  
Hisque repurgandis sanctorum sanguine fuso,  
Pontifices summos Romana in sede locavit;  
Qui jam bis centum viginti quinque fuerunt,  
Pontifice a summo, primoque antistite Petro,  
Sedis Apostolicæ primus qui munere functus;  
Inter quos merito ascitus, Sanctissime Præsul,  
Nuper Apostolica Petri jam sede vacante,  
Quæritur interea quis tantæ pondera molis  
Sustineat residens inter collegia patrum;  
Cum discussa tibi patrum suffragia cedunt,  
Citra omnes, quas blanda fovet largitio fraudes  
Electus, cœlique bonis divinitus astris:  
Inde coronatus, magna spectante cæterva;  
Plausibus altisonis Roma geminante Leonem.  
Quod delegisti nomen, tibi convenit apte;  
Nam leo magnanimus, sollers, astutus, & acer,  
Supplicibus clemens, pravisque acerrimus hostis.  
Mox Lateranensem de more profectus ad ædem  
More triumphantis pompa comitatus opima  
Heroum, & magno, qui convenit, ordine rerum,  
Hinc atque inde hominum cuneis astantibus amplis,  
Argentum passim per compita fundis, & aurum,  
Ut cicer ædiles, & densa tragemata quondam,  
Grata theatriali spargebant munera turbæ.  
Qualem te gentes exoptavere futurum  
Pacis amatorem; talem te compote voto  
Rex superum terris demisit ab æthere summo.  
Parta quies orbis; nunc aurea conditur ætas.



Mars filet, & positis belli Tritonia signis  
 Exercet calamos, sopitaque tempore longo  
 Excitat ingenia ad certamina docta sororum.  
 Grata repromittens Augusti tempora, & illas  
 Mœcenatis opes, & præmia vatibus ampla,  
 Principe jam rerum frenos moderante Leone.  
 Unde triumphales titulis insignibus arcus  
 Tot tibi præclari Musarum munere surgunt;  
 Atque poëtarum resonantia carmina passim.  
 Subdita regna tibi cum regibus omnia mundi,  
 Dive Leo, ut forti bruta inferiora leoni  
 Jamque Oratores aderunt tibi dona ferentes  
 Undique, ut Augusto quondam Garamantes, & Indi;  
 Grata tuis pedibus figentes oscula sacris.  
 Servitiiq; jugum placida cervice gerentes.  
 Ipse quibus gratis graviora tributa remittis,  
 Ære levans inopes, & paupertate gravatos:  
 Omne fugaturus bellum a cervicibus Urbis,  
 Barbaricasque acies, æterna pace per orbem  
 Jam parta, clausoque intra sua limina Jano.

*Ejusdem Endecasyllabon.*

Latrator Cynicus, tumens Palæmon,  
 Nasutissimus omnis hinc abesto.  
 Adsit, Dive, tua aura; fluctuantem  
 Vastum per mare dirigens carinam;  
 Urbis reliquias vetustiores  
 Novis dum volo suscitare chartis:  
 Et delere situm, & graves ruinas.  
 Sed quis tam bona, si qua sunt, probabit?  
 Quantum derrahet invidus silendo?  
 Est nam difficile omnibus placere.

*Ad Leonem X. Pont. Max. de Antiquitatibus  
 Urbis Libellus.*

Qui modo Romuleos colitis pia numina colles,  
 Urbis opes veteres, & res mihi pandite prisca.

Et quis in antiquo Latio regnaverit ante?  
Et reges urbem qui fundavere vetustam?  
Sed quia difficile est adeo confusa ruinis  
Scire loca, & signis vestigia nosse locorum,  
His permixta magis placuit sacra templa notare,  
Quam quæ sæpe suos dominos confinia mutant.  
Primus Dictæis venit Saturnus ab oris,  
Et vetus incoluit Latium tutissimus exul  
Falcifer, hospitio susceptus ab hospite Jano;  
Multa rudes populos docuit: Deus unde putatus,  
Sæcula constituit felicibus aurea regnis,  
A quo jam pridem Saturnia nomine tellus;  
Et mons Tarpejus dictus Saturnius ante.  
Mox e Parrhasiis venit Tegeaticus oris  
Evander, matris monitis, & Apollinis actus:  
Atque Palatinum montem rex occupat; hospes  
Herculis invicti, cui maxima conditur ara  
Ob bene res gestas. Post quem Citherejus heros  
Venit, quem contra Rutulos in fœdera junxit,  
Quorum jam victor Latia tellure potitur,  
Unde genus vetus Albanorum, & regia proles.  
Romulus unde satus, Romanæ conditor urbis;  
Quam post augurium curvo designat aratro;  
Atque bonis avibus quadrangula mœnia condit,  
Cui Carmentalis, Mugoniaque addita porta est,  
Et Pandana urbi fossis, atque aggere cinctæ.  
Romulus hanc posuit primæ lanuginis annis,  
Coelicolum auspiciis, illorumque omine fausto  
In regione poli, quo justæ sidera libræ  
Flava verecundæ contingunt virginis ora,  
Mense Cytheriaco, bisdena atque altera surgens,  
Cornua dum lustrat Tauri Titania lampas  
Luce sacra positam, sacrisque Palilibus urbem.  
Romulus ipse suo dixit de nomine Romam,  
Armifonoque patri, quo vinceret auspice, sacram.  
Roma decus rerum, superis gratissima sedes,  
Magna Deum genitrix, veluti Berecynthia quondam  
Fertur multiplici partu fœcunda suorum

Sanguinis Iliaci vetus, & generosa propago:  
 Regia Dîs genita ad summorum culmina rerum,  
 Primaque terrarum: caput orbis, alumnaque morum:  
 Jus bene vivendi, normamque datura beata,  
 Omnibus ac rebus pollens; rerumque magistra:  
 Humanas supra vires ad sidera culmen  
 Justitia extollens, pietate infans, & armis;  
 Militia, patriaque toga, densisque trophæis,  
 Eloquentiaque potens, & Palladis artibus ingens:  
 Religione Deum, & divino numine pollens:  
 Consiliis animus liberrimus, atque voluntas:  
 Imperiumque foris justum, pietasque subactis:  
 Intemerata fides: & gloria parta triumphis.  
 Ipsa quibus totum superavit moribus orbem.  
 Nam si quærat, Roma una est prima, caputque  
 Terrarum, cœlique vices sortita potentes:  
 Imperium sine fine datum, sine fine futurum.  
 Jus tantum sceptri mutatum sæpius Urbis,  
 Quæ fuit, est, & erit semper celeberrima rerum,  
 Nunc ubi divina fundata Ecclesia nutu,  
 Majestatis adhuc retinet vestigia prisca;  
 Summi ubi Pontifices, Romanaque curia florent,  
 Divini cultus præcepta datura per orbem.  
 Cui clarum, semperque nitens per sæcula nomen:  
 Summa ubi regnorum, rerumque æterna potestas;  
 Omnibus in terris Romana potentia fulgens,  
 Delitiis, opibus, gemmis prædives, & auro,  
 Dives agris, nemorumque jugis, & saltibus amplis:  
 Cum Cerere, & Baccho certans uberrima nutrix:  
 Terra boum, pecorisque ferax, & graminis alti  
 Uberrate virens, & aquarum uligine pinguis:  
 Et rerum, quas fundit humus diversa sub astris.  
 Sed pia virtutum genitrix, & alumna virorum,  
 Quos claros gignit, peregrinisve allicit oris.  
 Quæ populis mores, leges, & jura ministrans,  
 Qua patet undanti pelago circumflua Tethys,  
 Protulit imperium terris, & nomen olympo.  
 Romulus Iliades, superum Mavortia proles,

Eductus nutrice lupa, & pastoribus infans :  
 Cognitus inde, prior Romanam condidit urbem ;  
 His ubi nutritus Tyberinis saltibus ante :  
 Rex inde augurio factus, trabeaque decorus,  
 Corpus militibus stipat, sellaque curuli  
 Usus ; & ipse suis (non aspernatus euntes)  
 Jura dedit populis ; primus quam condidit urbem  
 Incoluit ; profugisque sacrum patefecit asylum .  
 Cum sibi rex prudens connubia deesse videret,  
 Finitimas ergo legatos mittit ad urbes .  
 Cumque negarentur ; ludos de nomine Consi  
 Sacra Dei simulat certamina compote voto,  
 Virginibus raptis, fera bella exorta, Sabinis .  
 Stravit & Acronem regem rex Romulus, unde  
 Prima Jovi spolia insignitus opima Feretro  
 Rettulit ? hinc Tatio renovantur prœlia rege,  
 Virgine Tarpeja turmas ducente Sabinas,  
 In Capitolinam spe pacti pignoris arcem  
 Pugnatur ; venit in medium, bellumque diremit  
 Turba Sabinarum perculso fœdere, pacem  
 Conciliant ; centumque patres de plebe creantur,  
 Hique Senatores dicti, mixtique Quirites .  
 Regnatur paribus sceptris cum forte recenset  
 Romulus ipse aciem, orta tempestate, repente  
 Raptus, apud Capream, nec visus deinde . paludem,  
 Conspectu e medio tenues migravit in auras .  
 Indigitem hunc dixere Deum, Cœloque relatum  
 Inter Cœlicolas, Proculo testante, Quirinum .  
 Quæsiwere diu patres de rege creando,  
 Martia corda virum qui tum revocaret ab armis  
 Divinum ad cultum, regis post fata Quirini .  
 Jam tandem curibus parvis accitus in urbem,  
 Lectus & augurio, ceu Romulus ante, creatur  
 Rex Numa Pompilius, longo qui Marte feroces  
 Relligione domans animos, ad sacra redegit,  
 Namque is Pythagoræ callebat dicta magistri .  
 Inde sacerdotum collegia, templaque condit,  
 Intentusque sacris, divæ penerralia Vestæ,



Vestalesque creat sacras, primusque dialem,  
Atque Quirinalem, Salioque elegit, & horum  
Præsul erat primus, delapsa ancilia cælo  
Curat, & his tantum præbet gestanda per urbem.  
Pontificem creat ex patribus, qui maximus esset,  
Ac summus tota, cognomine Martius, urbe.  
Jusque parentandi primus decrevit avernis  
Manibus; & fieri sacra Februa mense secundo.  
Is Janum geminum Argiletò erexit in imo,  
Qui pacis, bellicque foret justissimus index;  
Occlusus pacem, bellumque notaret apertus.  
Idcirco nullus regi Martem intulit hostis.  
Utque fides rebus, quas rex impune gerebat,  
Major haberetur, sine vindice cuncta gerenti,  
Conjugis Egeriæ congressus nocte petebat.  
Hic ubi lucus erat, speluncaque frigida luo,  
Fons e spelunca vitreis spectabilis undis,  
Spargens rore sacro, multaque aspergine lucum,  
Rex Numa quem fontem sacraverat ante Camœnis.  
Hic annum ad lunæ cursum, solisque redegit  
Signa, dies idem fastos creat, atque nefastos;  
Numinibus statuens & farre, & thure litandum.  
Jam tandem, senioque gravis, morboque solutus  
Rex in Janiculo, quo Janus conditus, ante est  
Tullus ad arma togas, desuetaque corda perurget,  
Postquam tergemini magno certamine fratres  
Albanos superant, ac jam Mavorte soluto,  
Albanum sibi Dictatorem in fœdera jungit.  
Quem mox perjurum, raptum in diversa quadrigis  
Dissecat; Albam omnem Romam deducit, eoque  
Augentur cives: mons Celius additur urbi.  
Hic ubi magnificis habitavit in ædibus, ante  
Tullus enim coluit modicas Hostilius ædes,  
Parte Palatini montis, quæ Velia dicta est.  
Legit & in patres primos de civibus Albæ.  
Patribus aucta ædes, hostilia curia primum  
Dicta: decem turmas equitum delegit ab Alba;  
Inde novas scripsit legiones, atque vetustas

Explevit , pugnans exorto Matte , Sabinos  
Vicit ; in Albano faxis pluit ; unde dierum  
Sacra novem vulgo fuscepra , ex voce monentis  
Auguris , evolvens rex ipse volumina quædam  
More Numæ , cupiens solemnia sacra referre  
Elicio curanda Jovi sese abdidit ictus  
Fulmine cum tota ipse domo flagrante crematur ,  
Cum sacra aggressus nesciret rite referre .  
Fortior Iliade . sumptisque ferocior armis  
Hic fuit , & bello fortunatissimus omni  
Martius a populo , patribusque ad se ptra vocatur ,  
Pompilique nepos ex nata regis , & illi  
Par pietate fuit , similisque ad bella Quirino .  
Auspicis Anci deducta colonia regis  
Ostia , Tyrrheni , prope Tybrim , ad littora ponti .  
Primus ad augendos census tractare salinas  
Cœpit : ab hoc media constructus carcer in urbe est ,  
Summa in parte fori , ad terrorem , & vincula plebis .  
Hic primus nexus rex induxisse putatur .  
Jus per legatos repetendi primus ab ipsis  
Transtulit Æquicolis , raptas ad res repetendas ;  
Atque ideo ad Circum metam statuere Quirites ;  
Ad quam finitimis lex congruit hostibus utrum  
Bellum , vel pacem legerent , dum mittitur hasta .  
Hic silvas ratibus fabricandis publicat : idem  
Æquor adusque novum regnum rex protulit Ancus .  
Fertur ab hoc ædes Jovis amplificata Feretri .  
Hic & Aventinum collem , montemque Palati .  
Ac mox Janiculum rex Martius addidit urbi .  
Ne quandoque foret velut arx mons hostibus ille ,  
Hic primus Tyberim , transmissio ponte , revinxit ,  
Nomine sublitio , trabe qui compactus , & absque  
Clavis , aut ulla ferri compage ligatus  
Insolitum præbebat iter pro tempore , donec  
Jam Coclite a tergo Tuscos remorante , solutus .  
Hic summa , sacraque via consedit in urbe  
Rex ; nec se talem , qualem promiserat esse ,  
Monstrare evaluit , præventus funere acerbo .

Natorum, curam parvorum, & sceptrâ relinquens  
Tarquinio Prisco, Romam qui nuper in urbem  
Venerat, & regis sibi conciliarat amorem.  
Tarquinius urbem, de qua cognomen adeptus,  
Factio Tarquinium Priscum immatura coëgit  
Adventare prius, migrantem ex urbe Corintho,  
Rursum Tarquiniis, fortuna hortante, relictis,  
Atque Tanaquilidis suatu migravit in urbem  
Romuleam; felix venienti contigit omen:  
Cui Jovis æthereus prædo de vertice tegmen  
Subtulit in cœlum, rursusque reponit eidem.  
His sibi portendi regnum intellexit in urbe  
Grajus adulator, qui mox infantibus Anci  
Rege jubente datur regis post funera tutor.  
Ipse quibus regnum sceptro interceptit iniquo.  
Primus Hetruscorum regum est insignibus usus:  
Primus equis albis evectus in urbe triumphans.  
Hic primus Circum, cui nomen maximus, egit;  
In quo Circenses Romano nomine ludi,  
Et magni, ac celebres sollempni more, frequenti  
Confessu, impensis exercebantur opimis:  
Et loca distinxit rex spectatoribus, unde  
Ludrica conspicerent. Bello surgente Sabinos,  
Instructis equitum turmis, certamine vicit.  
Mœnibus hic urbem circumdedit, atque cloacas  
In Tyberim magnas duxit tellure sub alta,  
Ac restagnantes valles siccavit: & ædem  
Condidit ipse Jovi Tarpejo in monte supremo.  
Isque nova, summaque via confedit in urbe,  
Juxta Romulæ Mugonia limina portæ  
Parte Palatini, capita ultra bubula, montis,  
Nam locus is fuerat quondam clarissimus urbis.  
Interea a natis Anci mittuntur adultis  
Pastores gemini, qui conto, & verbere regem  
Cæde necant dura; sopito rege Tanaquil  
Edicto parere jubet Tulli, mandataque servet  
Anxia plebs rerum semper studiosa novarum.  
Servius e serva perhibetur Corniculana

Illustri genere exortus, nutritus & inter  
Tarquinii natos; species cui lucida flammæ  
Amplexata caput, Tanaquil portendere regnum  
Prædicit puero, nec mentitura fatetur.  
Hic prior invito populo, jussuque Senatus  
Regnavit, firmo munitus robore rerum.  
Filius hic olim servi cognomine Tulli,  
Volscorum regis, patria sed in urbe perempti;  
Ejus ubi in bello prægnans capta uxor, in urbem  
Inter captivas ducta, & servire coacta.  
Cecilia hanc Tanaquil vetuit servire, sed ipsa  
Liberiore modo usa est, alternantia fata,  
Et rerum miserata vices, sortemque malignam.  
Ex cinere hæc Tullum genitali credita regem  
Concepisse, caput quod protinus ignibus arsit.  
Hic primus censum instituit, montemque Quirini;  
Viminique jugum Rex providus addidit urbi,  
Ne locus ille olim facilem daret hostibus ansam  
Expugnandi urbem, velut arx munita, propinquam.  
Auxit & Exquilias, & eas habitavit, & urbem  
Aggeribus, fossis, & magnis mœnibus ambit,  
Incoluitque locum, & pomeria protulit urbi.  
Nam magni proceres, ubi mœnia magna, vel ædes  
Condebant aliquas, illic habitare solebant.  
Mox regnum repetens, uxore hortante, paternum  
Tarquinius, Tullum grandævum aggressus inermem  
Ense gener focerum regem obruncavit acuto.  
Tullia nata super patris deforme cadaver  
Carpentum immisit, resperfa cruore paterno,  
(Unde locus Vicus Sceleratus nomine dictus)  
Læta forum petiit properans, ea prima superbum  
Victorem, regemque salutatura maritum.  
Regem Tarquinium ob mores, & facta Superbum  
Accepisse ajunt diro cognomina fato.  
Funere quod focerum privaverit, & peregrinas  
Rex sibi concilians mentes, his fretus inhæret.  
Moxque dolo Gabios per Sextum cœpit, & idem  
Maxima quod fieret curavit in urbe cloaca,



Romano suscepta foro sub monte Palati,  
 Omnia concipiens expurgamenta vetustæ  
 Urbis, in hanc reliquæ rapido torrente fluebant,  
 Atque foros idem in Circo curavit agendos.  
 Is cum Chalcidicas sortes, & fata timeret  
 Post se nam veritus quis scepora capefferet urbis,  
 Aruntem, atque Titum natos ad Delphica mittit  
 Limina sacra, quibus Brutus comes additur una,  
 Brutus ab ingenio longe diversior illo,  
 Quod per bis denos tacitus simulaverat annos.  
 Hunc ex germana rex ipse sorore nepotem,  
 Ludibrii causa, atque viæ solamine misit.  
 Et tandem solus nodosa oracula Phœbi  
 Emissa ex adytis penetralibus impiger hausit;  
 Namque is sambuco infusum donaverat aurum.  
 Ille (inquit Phœbus) regnabit, discite recte  
 Romulidæ juvenes, qui Pythia poscitis antra,  
 Callida qui matri rediens prius oscula figet.  
 Lapsus humi Brutus terræ dedit oscula matri;  
 Et primus consul post regna creatus in urbe est,  
 Tarquinius Danaes dum castris obsidet urbem;  
 Sexte, pudicitiam dum polluis, auspice Bruto  
 Tarquiniorum omnis proles, domus exul ab urbe est.  
 Brutus nam populum contra hos armavit, & enses  
 De matronali porrexit cæde cruentum,  
 Brutus Romanæ dux libertatis, & auctor.  
 Post urbe ejectos reges, stirpemque superbam,  
 Regnare pari duo majestate potentes,  
 Qui consultandis & summis rebus agendis  
 Consularent: Bruto cum consule Collatinus  
 Consul; namque ambo jure, atque insignia regum  
 Primi habuere pares, citra diademata, reges,  
 Atque ex fantonico duodenos vimine fasces.  
 Lictores totidem, totidem velut ante secures,  
 Ad compescendos, regni novitate, tumultus.  
 Sed cautum, fasces ne consul haberet uterque.  
 Hisque magistratus permittitur annuus æquo  
 Jure; sed in magnis rebus quandoque creatus

Dictator, regis qui functus jure, peracto  
Marte; magistratu se largius abdicat ultro;  
Et Dictaturam decreto tempore ponit.  
Quam cum deposuit, ridetur Sylla; sed ipse  
Quo deridetur deponere noluit unquam,  
Donec se fecit de Dictatore tyrannum.  
Sic tandem unanimes, & libertate potentes  
Regnare diu patres; sed sæpius ipsa  
Libertas trahit in vitium concordia regna.  
Idcirco placuit leges spectare Solonis.  
Sic porro denos designavere Tribunos.  
Legatos mittunt ad divæ Palladis urbem,  
Qui referant docti legum decreta Solonis.  
Legati redeunt denis cum legibus, hisque  
Adjungere duas; atque hic stetit ordo tabellis,  
Et duodenæ actæ tabularum nomine leges;  
Mox & in æs fixæ, quibus effusissimus omnis  
Crevit in immensum numerus, decretaque legum.  
Rursus in antiquas placuit remigrare secures;  
Et sub consulibus regnatum est tempore longo,  
Divite sub regno, donec civilia bella  
Sunt exorta iterum, atque iterum discordibus armis.  
Donec se faciens ex Dictatore tyrannum  
Occupat imperium Cæsar, rerumque potitur.  
Hinc sub Cæsaribus regnatum est, non sine magna  
Urbis, & Imperii jactura, & strage cruenta.  
Postquam Bizanti, post tempora longa, ruinis  
Dux Constantinus Constantinopolin egit,  
Divisum imperium geminam concessit in urbem.  
Omnia barbaricis direpta furoribus. Unde  
Res ad Pontifices summos Romana redacta est.  
Qui regnaverunt, stabuntque diutius illis,  
Quos modo narraui, variis rectoribus urbis,  
Nam Deus hanc statuit divino numine sedem;  
Et sibi perpetuo mansuram tradidit ævo,  
Ætheris, & terræ mysteria sacra gerenda,  
Unde est Imperium fortita perennius urbis,  
Ex quo Romulei fuit inclinatio regni;

Justitiæ, ac pacis studio, quod creverat ante,  
 Dum sancti, & veteres rem protexere Quirites;  
 In luxum donec res est conversa fluentem;  
 Donec marmoribus privata. & publica testâ,  
 Strata pavimentis priscum excedentia morem,  
 Marmoribus sectis, pictoque emblemate passim  
 Externo lapidum splendore exculta fuerunt.  
 Stabat flavus onyx, vitrea fulgore coruscans;  
 Et specularis arabs, maculisque insignis ophites,  
 Sinadicus, thaliusque lapis, viridisque lacænus,  
 Purpureusque silex, & quem saxosa Caristos  
 Fert & inexhaustæ mittunt de rupibus altis  
 Cyclades, & quidquid lapidum elucescit in orbe.  
 Picta pavimenta & testoria quæque superba;  
 Artificumque manus, & splendida quæque per artem:  
 Intra, extraque urbem, cujus surgentia quondam  
 Mœnia, vel turres, vel propugnacula longum est  
 Dicere: cum numerum fugiant, carmenque refellant.  
 Cum sint, qui scribant viginti millia passum  
 Urbis circuitum sese extendisse verustæ.  
 Sicut Roma fuit populis, & mœnibus ingens;  
 Sic plures habuit præclaro limine portas.  
 Unde viæ exhibant diversas orbis in oras.  
 Omnis porta vias (ut Publius inquit) habebat;  
 Quas modo cum portis sum descripturus; ubi nunc  
 Mœnia non eadem, quæ prisca, nec ambitus idem,  
 Nec veteres extant in eodem limine portæ;  
 A quibus auspiciū scribendæ cœpimus urbis.  
 Hic ubi diva parens populi cognomine surgit,  
 Flumentana subest refluenti a flumine porta,  
 Ut via Flamminio superest a Consule dicta,  
 Strataque, qui Ligures devicit Marte secundo,  
 Consule cum Marco Lepido, consorte triumphi.  
 Alter ut Æmiliam, sic alter tramite longo  
 Stravit Flamminiam lepidi collega per agros  
 Herruscos, Umbrosque viam, quam rura secantem  
 Æmiliæ regionis Ariminum ad usque peregit,  
 Pincia nunc, olim quæ Collatina vocata est,

Ad Collatinos mittebar porta penates,  
Stabat Tarquinius qua Collatinus in urbe,  
Immeritæque neci Lucretia debita conjux  
Vim passa a sexto, consanguinitate propinquo;  
Unde sibi mortem conscivit, & ulta tyrannos  
Diffimulatoris versuto pectore Bruti.  
Proxina Collina est, quæ porta a colle propinquo  
Dicta Quirinali; prope quam Sidonia castra  
Hannibal expugnans urbem quandoque locavit.  
Hic ubi surgebant Ericinæ limina matris,  
Circenses ubi fiebant pro tempore ludi,  
Flamminius quoties innabat flumine Circus;  
Hinc & Agonensis nonnunquam porta vocata est;  
Unde via egreditur, quæ dicta Salaria, priscum  
De sale nomen habens, qua prisci ex urbe Sabini  
In montana salem portabant oppida quondam.  
Nomentana subit, quod Nomentana propinqua  
Porta viatores in mœnia ducat ab urbe,  
Hæc & Vimina, & Figlensis nomine dicta,  
Quod prope Figlinæ fuerint in colle tabernæ  
Hanc extra portam stadii discrimine templum est  
Ad levam surgens vetus, & memorabile Bacchi;  
Picta ubi adhuc extant veteri testudine plura  
Gesta Dei Bromii: stant circumquaque columnæ  
Jam sustentantes delubri immane cacumen.  
Hic ubi Sacrophagus rubro de marmore surgit,  
Quo Constantini Constantia filia magni  
Virgo sacra jacet. Cui mox hanc condidit ædem  
Quartus Alexander, mutato numine primo.  
Illic nam prudens virgo collegia casta,  
Virginibusque sacris Vestales condidit ædes,  
Virginis Agnetis titulo, & solemnibus aris.  
Cujus adhuc ædes extat tellure profunda,  
Est ubi marmoreus gradibus descensus ad imas,  
Quæ stant ære, fores, & lato limine postes.  
Cautibus interior peregrinis discolor ædes.  
Statque decor lapidum, distinctaque marmora circum;  
Oebalius lapis, & Marpesius undique candor;



Strataque purpureis speciosa emblemata venis,  
 Rupibus ex altis humore nitentia lento.  
 Lapsus ubi e cœlo fuit annulus ille sacratus,  
 Quo rex Agnetem sibi desponsavit olympi.  
 Porta fuit quondam celebrata sub aggere Tulli,  
 Quæ nunc clausa silet priscæ sub mœnibus urbis.  
 Hic ubi surgebat quondam custodia castrî,  
 Cujus adhuc extat quadratæ forma figuræ.  
 Taurinam, Exquiliam, Tiburtinamque vocamus  
 A tauri capite, Exquiliis, & Tibure portam.  
 Est ubi aquæductus fornix, divisus ab ipsis  
 Mœnibus ad lævam, quare non porta, sed arcus  
 Dicitur a multis, epigramma ut monstrat ibidem.  
 Protinus ad dextram via Prænestina notatur,  
 Unde Labicana assurgit discrimine parvo,  
 Ut Strabo testatur, scribitque volumine quinto.  
 Hinc capit auspicium via Tiburtina, sinistro  
 Tramite, quem juxta Laurentius inclyta testa  
 Monstat, Oliverij patris de gente Carapha  
 Munere, qui templum testæ decoravit, & auro.  
 Statque pavimentum nitidis insigne lapillis:  
 Quos Memphis quos Sparta creat felicibus oris,  
 Et quas immanes oneraria cymba columnas  
 Orbe peregrino spumiosa per æquora vexit.  
 Est ubi Laurentis, Stephanique insigne sepulchrum  
 Marmoreum ferri munitum crate, sub antro;  
 Et qua combustus, craticula condita, Laurens.  
 Porta Labicana, & quæ Nevia nomine dicta est,  
 Nunc autem major, si non est arcus, ut illic  
 Antiqua ostendunt mensura scripta pedali.  
 Ad dextram, lævamque vetus stat ductus aquarum,  
 Cælica dorso petit dexter, sublatus ad auras;  
 Levus humi repens, binas discurret in undas;  
 Mœnibus hic labens Taurinæ præterit arcum,  
 Maximiani adiens confuso fornice thermas.  
 Occupat hunc alium sublimis Martia, labens  
 Antiquam juxta Bibianæ virginis ædem;  
 Donec consurgens deflectitur abside curva

Ad Caii Marii decurrit lapsa trophæa,  
 Quæ mutilata patent ipatio distantia parvo.  
 Sub Lateranensi delubro in margine montis  
 Porta subest, olim concursu nota frequenti:  
 Cœlius hanc collis gemino de nomine complet.  
 Hæc eadem a multis Asinaria porta vocatur.  
 At via Campana est, per quam Campania quondam  
 Prisca petebatur; nunc ingredientibus urbem  
 Janua Campanis divulgatum irrogat omen.  
 Stat prope Metrodii jam pridem janua clausa,  
 Qua nunc ingreditur Marianus rivulus urbem.  
 Curvus ubi obliquat se mœnibus angulus, inter  
 Quæ modo commemorans Asinaria limina portæ  
 Scripsi, & quæ scribam surgentia claustra latine  
 Hic ubi Joannes bina veneratur in æde,  
 Cui divina olim patefacta arcana fuerunt.  
 Porta Latina, viæ veteri præfixa Latinæ,  
 Nomen idem retinet; nam porta recentior illa est.  
 Hac muliebri via Fortunæ immobile signum  
 Stabat, quod solæ poterant contingere nuptæ.  
 Dividit & campos hæc semita prisca Latinos,  
 In longos porrecta sinus, & pervia curvos  
 Ducta per anfractus, cui nobilis Appia tandem  
 Obvia miscetur Capuæ præpinguibus arvis.  
 Porta Capena subest, priscos quæ vergit in agros  
 Sola Capenates, & eodem nomine gentes.  
 Prima urbis regio cognomine dicta Capena est.  
 Extat aquæ ductus nunc intra limina portæ,  
 Quam prope Marcellus Virtutis condidit ædem.  
 Hinc celebrata vetus via concipit Appia nomen:  
 Appius hanc stravit cognomine Claudius, usque  
 ( Ut Strabo fert ) Capuam: Trajanus deinde vetustum  
 Instauravit iter; produxit & usque superbum  
 Brundisium, effodiens juga summa, & viscera terræ,  
 Collibus æquiparans depressas fornice valles.  
 Clara triumphorum pompa, & regina viarum  
 Hæc erat: & procerum monumentis clara vetustis.  
 Christus ubi occurrit fugienti e carcere Petro;

Retractumque fuga, Romam remeare coëgit.  
 Bina ubi signa pedum, vestigia sacra reliquit,  
 Marmore pressa cavo, quæ nunc affixa videntur  
 Martyris in templo, qui corpore saucius omni  
 Imbre sagittarum fertur confossus acuto.  
 Ejus ubi corpus, compluraque sacra quiescunt  
 Corpora sanctorum longis tumulata cavernis,  
 Pontificis primi cura, ac pietate Calisti.  
 Proxima Tergemina est de nomine Tergeminorum;  
 Unde via inceptat, cui præbuit Ostia nomen.  
 Juxta quam Pauli Tarsensis regia surgit,  
 Absidibus celsis, & summis ardua testis,  
 Exornata notis lapidum, quos Cyclades olim,  
 Quos sacer Euroras misit, quos advena Nilus,  
 Et quos ambiguis leviter disternat undis  
 Macra fluens, quas Luna dedit de monte columnas  
 Classibus advectas. Cineres ubi mixtaque Pauli  
 Reliquiis Petri, Timotheique ossa quiescunt,  
 Infantum & cineres, quos rex occidit Hebræus.  
 Hac regione viæ tenuis delabitur Almon,  
 Qua Tiberinus aquas senior deflectit cuntes,  
 Et sinuat flexus penitus sub rupe sinistra.  
 Qua Divum matris simulacrum immane per undas  
 Navigio advectum Tyberino substitit anni,  
 Viribus haud ullis humanis inde movendum.  
 Claudia quinta manu, parvo conamine duxit,  
 Virgineas victas Vestalis sponte secutum,  
 Spargendum Almonis simulacrum rore quotannis.  
 Incertum ne via? an ne viæ de nomine porta est  
 Dicta? Tybris ripæ quæ condita margine surgit,  
 Dicta vel a portu, quem Claudius æquore Tusco  
 Jecit, arenosis, & restagnantibus undis,  
 Atque incomperta submersit mole triremem;  
 Qua super injecit portus vestigia prima;  
 Erexitque Pharon, qua lumina luce perenni  
 Nocte coruscarent, nautis signantia portus.  
 Janua Janiculo, quæ prominet ardua colli,  
 Nomine ab Aureli sortita Aurelia nomen.

Respi-

Respicit a tergo Tyberina per arva refusam  
Urbem, a fronte via est Aurelia nomine dicta,  
Inter aquæductus veteres sinuata propinquos.  
Hanc dux Trajanus de se quandoque vocavit.  
Quam prope Pancratii pueri stat martyris ædes,  
Quam Sardus præsul fabricavit Symmachus; in qua  
Marmore purpureo speculâri luce tabellæ,  
Oppositas reddunt verâ sub imagine formas.  
Janua Janiculi ad radices condita surgit  
Septimiana ducis de nomine dicta Severi;  
Qui celebres thermas hac in regione locavit,  
Erexitque foro titulis illustribus arcum,  
Et septizoni præcelso culmine molem.  
Sextus Alexander sublimi fornice portam  
Hanc instauravit, spatiosis mœnibus augens.  
Latior unde via, & longo rectissima tractu,  
Littoribus Tyberis protenditur, auspice Julo  
Pontifice, immensas moles qui cœpit in urbe.  
Nunc ubi magnificas erexit Chesus ædes  
Augustinus, opes ostentans divitis Hermi,  
Lydorum & vires, illi genus unde verustum:  
Hinc Jacobe tibi surgit venerabilis ædes  
Tybridis in ripa; qua sanctus Spiritus inde  
Ædibus excolitur: quibus olim admota patebat  
Porta vetus, nuper quæ diruta; mœnibus iisdem  
Altera facta nova est, pro tempore, rupe sub alta;  
Altera prisca fuit Tyberinæ condita ripæ,  
Porta olim celebris, quæ Vaticana vocata est,  
Sive triumphalis, quidam ut sentire videntur:  
Nunc ubi curva sinu Tyberina reflectitur unda,  
Pontis ubi apparent confraçti signa verusti,  
Juxta Cœnobium, & præcelsis mœnibus ædes,  
Quas unus comitum de patribus edidit ante;  
Quas Sixtus quartus nuper renovavit, & auxit.  
Hic ubi concepti vulgo exponuntur alumni,  
Saxia cui nomen, Saxonum a gente vetusta,  
Illic quæ fuerat, ne fusciperetur in urbem.  
In Vaticanæ convallis vertice quondam



Fontibus a densis cognomine porta patebat,  
 Quæ nunc pertusa est; hinc Turrea nomine porta est  
 In Vaticano, tepidos quæ vergit ad Austros.  
 Cedit Posterulæ viridaria janua portæ.  
 Una est cunctarum longe pulcherrima, juxta  
 Tybrin, Alexandro jam pridem condita sexto.  
 Hæ Vaticanum circumdant undique campum;  
 Quem Leo jam quartus conclusit mœnibus omnem,  
 Atque Leoninam jubet appellari urbem;  
 Quam dedit & Corsis habitandam extorribus ante  
 Regia sacra Petri secessu condita longo,  
 Barbarico toties ne diriperetur ab hoste.  
 Has & Alexander portas renovaverat omnes:  
 Atque viam stadio currendam stravit aperto,  
 A Vaticano molem usque ad principis Heli,  
 Qua Transpontinæ Genitricis limina surgunt.  
 Sunt portæ, quarum nunc nomina sola supersunt,  
 Ut Carmentalis, Gabjusa, Ruduscula quondam,  
 Atque Lavernalis, Catularia, Querquetulana.  
 Intra urbemque viæ celebres: Nova, Sacra, Suburra,  
 Lata, Labicana: & quæ semita dicitur Alta.  
 Extra urbem reliquæ, Cornelia, Cassia, Galli-  
 Cana: triumphalis Tyberina: & Quintia duræ:  
 Claudia: & Æmilii, Valeri, Ciminique jugosæ,  
 Et Laurentinæ Setina propinqua verustæ;  
 Et via contiguum, cui præbuit Ardea nomen;  
 Juxta quam Pauli caput a cervice revulsum,  
 Tres numero effudit roseo de sanguine fontes,  
 Nunc appellatos ad aquas a plebe Salinas.  
 Hic ubi Anastasii stat martyr is ara beati,  
 Quam præsul struxit Campanus Honorius ædem.  
 Nec procul hinc scalæ surgunt ad limina Cœli,  
 Per quas sublatis scandunt ad sidera manes.  
 Varro togatorum doctissimus omnia prisca  
 Romulæ loca rite urbis scrutatus, & illa  
 Cuncta fide scribens oculata, rite notavit;  
 Et montes, ubi Roma fuit, quorum ordine primus  
 Nomine Saturni Saturnius ante vocatus;

Mox

Mox a Tarpeja, Vestali virgine, dictus  
Tarpejus vertex, a Cajo principe quondam  
Ponte, Palatino Colli conjunctus (ut ajunt)  
Monsque triumphalis, spoliisque insignis opimis,  
Atque inter reliquos semper primarius urbis  
Numinibus, templis, & majestate Deorum.  
Verticibus binis, Parnasi more, bicornis,  
In Capitolinum collem confurgit, & arcem,  
Quam quondam a Gallis servavit pervigil anser:  
Quos inde ingenti Dictator strage Camillus  
A tergo aggrediens superavit ab arce repullos,  
Cœlicolis quondam sacra, summoque Tonanti:  
In qua cunctorum divum simulacra fuerunt.  
Stabat ubi Superum rex Juppiter optimus, atque  
Maximus, & custos fidissimus arcis, & urbis,  
Et spoliis locuples ex hoste Feretrius actio,  
Et Capitolini venerabilis ara Tonantis,  
Quam prior Augustus præstrictus fulmine vovit,  
Area qua Manlii custodis in arce superbi.  
Hic ubi nunc ædes stat virginis, araque cœli,  
Numine divino, donisque illustris olympi,  
Et lapidum decorata notis, quas inclyta tellus  
Explicat Ægyptus, Lacedæmon Cyclades, Ilva:  
Ex qua longa graves subvexit cymba columnas.  
Arce sub antiqua, clivo qui vergit ad Eûros,  
Palladis astat, Junonis & ara Monetæ,  
Qua domus Oebalii Tatii fuit ardua rupe.  
Cum Capitolinis ex sedibus omnia divum  
Numina diffugerent olim, duo numina tantum  
Terminus æde sacra imperterritus, atque Juventa  
Immoti, nudo mansere sub ætheris axe,  
Romanum imperium sine meta, & sine notantes.  
Urbe prius tota Capitolia bina fuerunt:  
Colle Quirinali, & Tarpejo in monte quod extat  
A capite humano dictum, regnante superbo,  
In fundamentis effossum apparuit ædis  
Tum Capitolinæ, idcirco consultus aruspex,  
Portendi imperium terrarum dixit, & orbis

Sedibus his, quoniam pars corporis altior illa est.  
 Hoc in colle nihil nunc est memorabile, præter  
 Nomen, & antiquæ quondam ramalia quercus;  
 In qua victorum suspendebantur opima  
 Prisca ducum spolia, & sacrata trophæa Feretro,  
 Et Capitolinum præpto vertice saxum.  
 Stat nunc præcipiti parvum sub rupe sacellum  
 Ad Libyn afficiens, cui dant æraria nomen:  
 Hic ubi Saturni, ac Opis delubra fuerunt:  
 Divitis & populi Romani æraria quondam,  
 In quibus ex omni fulgebant orbe tumentes  
 Thesauri, sene falcifero custode sub uno.  
 Qua Capitolinum collem pater inter, & arcem  
 Pendula planities, & topho strata platea est;  
 Conditor urbis ibi templum inviolabile primus  
 Romulus instituit, sacrum cui nomen Asylo,  
 Et locus intactus se proripientibus illuc  
 Omnibus, ex toto quocumque ex orbe profectis;  
 Lucus ubi sacer, & latè frondentibus umbris.  
 Alta ubi nunc extant, & clara palatia, lautis,  
 Magnificisque viris Conservatoribus urbis  
 Culta, magistratus tantum sortita togatos.  
 Quorum vestibulo, & qua porticus ardua surgit,  
 Stat caput ære tumens, quod ahenea forma Colossi  
 Substulit, atque pilam, ejusdem manus ænea torquens  
 Eminent ante fores, primoque in limine portæ  
 Ærea forma lupæ, flexa cervice gemellis  
 Sedula Martigenis infantibus ubera præbens.  
 Limina prima patent custode sub Hercule tuta;  
 Æneus ad dextram qui marmore prominet alto:  
 Cujus clava canes olfactu territat omnes.  
 Stantque sub impluvio magni fragmenta colossi  
 Marmorei, caput atque pedes, gradibusque sinistris  
 Sphynge adhuc recubant nigro de marmore binæ.  
 Surgit ubi ascensus suprema ad limina ducens,  
 Qua patet ingressu primo spectabilis aula,  
 In qua picta nitent priscorum gesta Quiritum;  
 Bina ubi cernuntur simulacra ex ære vetusto

Pubertate pares juvenes, alterque togatus,  
 Atque peroranti similis, sublatuſ ad auras.  
 Altera forma ſedens ſeſe curvantis ephēbi  
 Ærea, nuda, oculis intentā, & pectore prono,  
 Viſa pedis labem, & contagia quærere, ſicut  
 Paſtor acu ſpinā contracto crure revellit.  
 Nec procul inde forum ſtat judiciale togatæ  
 Urbis: ubi prætor, domus & prætoria ſurgit.  
 Hic ubi clamorofos in Stentoras Æacus ardens  
 Clamat; ubi rabulæ pretio Minoa ſubornant,  
 Dum Rhadamantheas formidat transfuga leges;  
 Mars ubi judicii reus exandefcit, & horret  
 Conſcius ipſe ſui decreta aſperrima Pagi.  
 Heu quoties incenſa gravi Capitolia flamma,  
 Pauca quidem retinent veterum veſtigia rerum!  
 Præter adhuc ſtantes a tergo in monte columnas,  
 Martyre cum Baccho colitur qua Sergius æde.  
 Inde Palatinus Pallantis nomine collis  
 Dictus, ſive ovium quondam a balatibus extat;  
 Sive Reatini mons dictus ab arce Palati.  
 Hunc Aboriginibus ſic appellantibus olim.  
 Arcades hunc primi montem coluere, ſubinde  
 Romulus auſpiciis bene ſuccedentibus, urbis  
 Fundamenta loca prima incunabula Romæ;  
 Quæ tam parva habuit primordia Romula tellus,  
 Tam diſfuſa orbi porrexit ſceptra ſubacto.  
 Scilicet & rerum facta eſt pulcherrima Roma;  
 Romuleoque recens horrebat Regia culmo,  
 Ædituis ſacris multos ſervata per annos  
 Ne rueret; ficus ne unquam exareſceret illa  
 Romula, tanta fuit trabæ reverentia primæ;  
 Romulæque Lupæ fuit hoc in monte Lupercal.  
 Unde Lupercales nutricis nomine dicti,  
 Sacra Sacerdotes referentes priſca Lycei.  
 Mons natura humilis, ſed mœnibus æditus altis,  
 Atque cavernoſus mons intra viſcera, totus  
 Penſilis, immodicis quibus eminet arduus antris.  
 Stat fundamentis totus ſolidatus opertis,



Undique & in medio moles operosa minatur  
 Semisepultarum nunc, & sine nomine rerum.  
 Hoc Stator antiquas in vertice Juppiter aras  
 Incoluit, Zephyr, qua spirant parte tepentes.  
 Cum bellum ingrueret Tatio duce, jamque fugatas  
 Milite Romuleas acies agitante Sabino,  
 Romulus hic trepidans; Stator audi Juppiter, inquit,  
 Palantes quocumque meos mihi limite listes;  
 Sacra Palatino statuam tibi limina colle.  
 Substitit hic acies, & rex hic templa dicavit.  
 Mox ubi Tarquinius Priscus sua regia tecta  
 Condidit, & Cicero Latiae lux unica linguae,  
 Nunc ubi sunt aedes, & magni vinea Phædri;  
 Hoc reges in monte domos, hoc vertice sacri  
 Protinus Augusti proprios posuere penates,  
 Relligione loci, vel majestate Quirini,  
 Urbis ob imperium, & Latii primordia regni.  
 Quin ab aruspiciibus priscis quandoque relatum,  
 Romula dum sedes habitari desinet omnis,  
 Desinet imperium submissis fascibus urbis.  
 Nunc nec tecta quidem superant in monte; nec aedes,  
 Sacrave relligio, aut ulli velut ante coloni;  
 Hic ubi templa Deum, tot sacra palatia quondam  
 Clara Palatino delubra in monte fuerunt.  
 A claris, summisque Quiritibus edita quondam.  
 Advectam Matrem Phrygia tellure Deorum,  
 Altra Palatino cœpit Victoria templo,  
 Auspiciis magni quondam fundata Catonis.  
 Mox ubi sacra Deæ Berecynthia limina Brutus  
 Erexit, lapidum diverso strata nitore,  
 Pulchra pavimentis, & cellis fulta columnis,  
 Ampla ubi verticibus surgebat porticus altis.  
 Quin etiam Brutus sacram cum dedicat ædem,  
 Tum magnos celebrat, Megalesia nomine, ludos.  
 Stabat ab augusto sublimis Apollinis ædes  
 Structa Palatini. vicinaque porticus ingens,  
 Clara voluminibus variis ubi, magnaue vati  
 Bibliotheca Deo, Musisque dicata patebat,

Exposita ingeniis virtute nitentibus ipsa.  
 Mons hic exiguus spatio, sed mœnibus ingens,  
 Mille patet circum per valles undique passus.  
 Constat Aventinus vario de nomine dictus;  
 Mons, vel ab adventu gentis quandoque Latinae;  
 Vel quod Aventinus rex Albæ in monte sepultus;  
 Aut avium a pastu, aut cymba adventantibus illuc;  
 Picus ubi, & Faunus responsa referre solebant  
 Fontibus e gelidis, silvisque; ubi cæde cruenta,  
 Ossibus, & tabo squalens sub rupibus altis  
 Stabat semiferi spelunca asperrima Caci;  
 Quem clavæ nodis domuit Tirynthius heros.  
 Servius hic Tullus templum sublime Dianæ,  
 Emporiumque jubet simul hoc in monte locari,  
 Romæ, & finitimis populis commune Latinis.  
 Ut Diana Ephesi fuit urbibus una propinquis,  
 Et populis Asiæ cultu celeberrima sacro.  
 Bos enormis agro fuit enutrita Sabino.  
 Hæc in Aventinum Triviæ mactanda Dianæ  
 Ducitur a quodam (vetus est ut fama) Latino;  
 Cujus eam cives mactassent urbis, eisdem  
 Fata repromitti terrarum sceptrâ futura;  
 Hospite decepto specie pietatis iniquæ  
 Ne prius admonitus rem sacram illotus obiret,  
 Quam se loturus Tyberis descendat in undas,  
 Quod facit: interea solemnibus immolat aris.  
 Romanus vaccam, & voti sit compos haruspex,  
 Resque fidem sequitur socero regnante Superbi.  
 Laurea sylva Jovi quondam hoc in monte virebat,  
 Libertatis ubi templum fuit, auspice Graccho;  
 Atrique, & Lunæ spectabilis ora bicornis,  
 Atque Bonæ delubra Deæ, quæ Claudia quinta  
 Vestalis posuit, collapsaque protinus ævo  
 Dives honoratis reparavit Livia testis.  
 Hic ubi Junonis captivo ex ære Camillus  
 Delubrum posuit, Veiis Mavorte subactis;  
 Notus apex, templis positus per culmina montis.  
 Surgit ubi ingenue matronæ in monte Sabinae.

Templum marmoribus, densisque insigne columnis,  
 Quod Petrus Illyricus quidam ditissimus egit.  
 Stat lare sub patrio, nec notus Alexius ulli,  
 Pauper, inops, algens, modica, vilique profeucha,  
 Sub gradibus latitans, ubi plurima passus iniqua est.  
 Stat quoque diva parens extremo in margine surgens  
 Montis Aventini, templo minitante ruinam.  
 Surgit ad Auroram Priscæ sacra virginis ædes,  
 Hic ubi aquæductus vestigia magna videntur  
 Thermarum, Decius quas Cæsar condidit amplas.  
 Statque pater Sabas locuples, pauperrimus ante.  
 Stat quoque Balbinæ Romanæ virginis ædes  
 Supra Piscinam quæ quondam publica dicta est.  
 Imminet hic Tyberi collis porrectus ad usque  
 Tergeminam portam, vicinaque mœnia Romæ.  
 At latere ex alio, Circo, qui maximus extat,  
 Hæret, & ad portam protenditur usque Capenam  
 Cœlius, a Tusco duce dictus Cele Vibenno,  
 A quo præsidium contra duceis arma Latini  
 Romulus accepit, cujus pars maxima Romæ  
 Substitit, incoluit quod protinus Alba cacumen,  
 Tuscaque gens pariter, quam secum Porfena duxit  
 Rex, dum Janiculo contra urbem castra locavit,  
 Regnum Tarquiniis ut redderet Urbis ademptum:  
 Hinc vicus Tuscus de nomine mansit Etrusco.  
 Vallibus, atque viis mons hic concluditur omnis  
 Undique diffusis, partim quoque mœnibus urbis,  
 Hic ubi parvus apex, & colle remotus ab omni,  
 Nomine Cæliolus, porta in quo monte Latina est.  
 Hic ubi Joannes olei ferventis aheno  
 Principis edicto, ac toto spectante senatu,  
 Obrutus incolumis, sospesque evasit ab illo.  
 Sed redeo ad Cœlj, cujus pars maxima, montem  
 Sanctorum templis passim manifesta liquefcit.  
 Post Lâteranensis præcella palatia sedis,  
 Qua via porrigitur de nomine dicta Labici,  
 Surgit ad Odrysios axes in valle facellum,  
 Hic ubi cum Petro stat Marcellinus in æde,

Auspiciis Helenæ magni Constantis alumnae  
Martyribus posita; nec longius inde patefcit,  
In laribus patriis, & avitis ædibus ara  
Cœlica Clementis; primus, qui e gente togata  
Sponte sua victus sacrum baptismum recepit.  
Collis in extrema surgens in rupe propinqua  
Una Coronatos suscepit quattuor ædes,  
Martyribus posuit quam primus Honorius illic.  
Hinc jam digrediens ad Seprizonia ducor;  
Et Scauri Clivum summi e regione Palatj;  
Hic ubi Gregorii magni sublimia surgunt  
Limina, conspicuis & in ædibus ara paternis  
Surgere verticibus mons Cœlius incipit altis  
In dextros apices Lateranum culmen ad usque,  
Instar Achæmenii sese fastigiat arcus.  
Nec vos prætereo, fratres, germana propago,  
Martyres egregii, cum Paulo dive Joannes;  
Pulchra quibus posita est titulis communibus ædes.  
Quondam ubi consiliis Hostilia Curia regis,  
Sacraque magnanimi surgebat Regia Tulli.  
Nec procul hinc olim Græcostasis illa patebat,  
In qua legatis externa e gente dabatur  
Temporibus certis solito de more Senatus;  
Namque ibi magna exstant veterum vestigia rerum.  
Stant ubi ad dextram Thermarum in colle cavernæ,  
Cujus nam fuerint non extat nomen in albo.  
Hic ubi aquæductus Caii damnosa vetustas  
Ad Boream deflectit iter Pallantis in arcem,  
Tecta Nosocomii captivorum hospita surgit,  
Quos e barbarica redimebat compede Thomas,  
Dum melior cultus mortalia corda fovebat.  
Stat prope Virgo parens veteri spectabilis æde.  
Ante fores cujus de marmore cymbula surget,  
Cujus tecta ædis jam collabentia longe  
Splendidiora novo reparas, potioreque cultu,  
Dive pater Leo, delubrorum maxime rector.  
Martyris hinc Stephani stat sphærica forma facello,  
Cornipedi Fauno quod dicitur ante dicatum,



Quod post Simplicius Stephano sacrauit, & indo  
 Nicoleos quintus pictis laquearibus ædem  
 Totam exornavit renovans, ut marmore testum est.  
 Hac regione viæ, ductus qua surgit aquarum,  
 Protinus ad dextram surgentia testâ videntur,  
 Plura ubi languentum ægrotantia corpora longo  
 Ordine dispositis recubant a fronte grabatis,  
 Grandibu impensis ubi procurantur & omni  
 Si qua ex Pæoniis petitur curatio succis,  
 Nil pietate magis, Romano & nomine dignum,  
 Quæ pia testâ prior fundavit diva Columna,  
 Post alii magni proceres auxere Quirites,  
 Et spatio testâ, atque locum proventibus amplis.  
 Hoc in monte domus Cornelia nobilis olim,  
 Et Lateranorum patuere palatia gentis,  
 Et Constantini generosi principis aula.  
 Hic ubi constituit sacratio fonte lavacrum  
 Argento radians, & eodem ex ære figuras,  
 Fundentesque undam simulacra argentea cervos.  
 Stant & adhuc ibi Baptisteria sacra, rubræque  
 Ex porphyriaca præcisâ rupe columnæ  
 Erectæ circum; stant circumquaque sacella  
 Antiquata situ. Stat Principis aulula parva,  
 Sola patens maribus. muliebribus invia votis.  
 Stat Laterana ædes, & regia sacra sub auras,  
 Regia prima Deo quæ consecratur in urbe,  
 Relligionis apex, Ecclesia prima sub astris,  
 Quam Constantinus fundavit magnus, & illam  
 Muneribus multis argenti ornavit, & auri,  
 Et quam Sylvester sacrauit episcopus Urbis  
 Supremo vatum, qui protulit indice Christum;  
 Cujus enim nutu, templo præfectus, & ingens  
 Præsul, & antistes, magni vice functus Olympi,  
 Summe pater rerum, & commissi Pastor ovilis.  
 Nil ibi nunc extat præter vestigia templi  
 Conspicui quondam generosi marmoris arte.  
 Statque columnarum seges intercisâ cremati  
 Marmoris, & templi facies excussa vetusti.

Extat adhuc Apsis sublimi emblemate fulgens;  
 Extat ubi in medio nova Servatoris imago,  
 Visa prior populo divinitus illa rogato.  
 Stat sublimis apex majorem desuper aram,  
 Marmore compactus, nodisque arctatus ahenis,  
 Quo Petri, Paulique caput sacraria condunt  
 Alta, sub Herce:s adytis, ferrique rigore,  
 Nec procul alter inest ubi plurima condita sacra  
 Christiparæ matris, natique; sed omnia longum est  
 Dicere sanctorum quæ concluduntur ibidem.  
 Nec circumcisi præcisa caruncula Christi,  
 Nec te mensa quidem tacito sermone silebo,  
 Qua cum discipulis cœnaverat ante magister,  
 Quam Judæ insidiis venundatus esset Hebræis:  
 Hic ubi conspicitur divini fœderis arca,  
 Virgaque, qua quondam utebatur maximus Aron,  
 Statque pavimenti, & lapidum structura, decorque  
 Purpureus, viridisque silex, magnæque columnæ  
 Ignibus exustæ quondam, quos barbarus hostis  
 Impius admovit, templumque incendit opimum.  
 Stant & Sarcophagi jam circumquaque vetusti.  
 Statque Columnensis Martini ex ære sepulchrum,  
 Qui pictura ædem decoravit. & inclyta templo  
 Strata pavimentis asarota instravit opinis.  
 Nec vos transferim navali ex ære columnæ,  
 Quas quondam Augustus post bella exhausta triumphans  
 Ac Pelusiæ Pellæa ex urbe trophæis  
 Conflavit, rediens Capitolia vexit in alta,  
 Quo prius erectæ fuerant in monte columnæ.  
 Æde sub hac extat de tot, nunc una tabella  
 Ærea, adhuc ubi plebiscita antiqua videntur.  
 Nec procul extra ædem, Boreæ spirantis ad axes  
 Inter aquæductus, Lateranaque mœnia surgit  
 Ærea de statuis priscis, & equestribus una,  
 Cæsaris Aureli Antonini erecta sub auras  
 Munere Pontificis Sixti cognomine quarti,  
 Æthere sub nudo, quæ marmore prominet alto;  
 Pacantis forma signante silentia dextra,

Symmetria vultus, & majestate decori.  
 Haud procul inde frequens ascensus dexter aditur  
 Marmoreis gradibus, solidi qui ex ordine surgunt,  
 Attriti genibus cuneatæ plebis, & usu,  
 Per quos Pilati conscendit in atria Christus.  
 Stant ex ære pares æquo discrimine portæ,  
 Tres numero ad dextram, lævamque, ubi porticus ingens  
 Surgit ad æstivas si uosis flexibus umbras.  
 Juxta summorum deserta palatia patrum,  
 Quæ tu, Dive Leo, collapsa, incultaque multo  
 Nunc, & operta situ, reparas, habitandaque præbes.  
 Hic ubi Pontifices hac tempestate recentes  
 Pernoctare solent, primum Laterana petentes  
 Testa, quod auspiciis felicibus, auspice cœlo,  
 Munus obire paras triviis reboantibus urbis,  
 Quondam ut Cæsareis plaudebat Roma triumphis,  
 Nec tu parva ædes niveo decorata nitore,  
 Prætereunda meis numeris Laterana manebis,  
 Sancta ubi sanctorum penetralibus abdita sacris;  
 Gratia ubi pleno cœlestis clausa locello est,  
 Ædicula insignis, tota illustrata tabellis  
 Undique marmoreis, & picto fornice toto,  
 Atque pavimento variis radiante lapillis,  
 Nicolet cura, Ursinorum e gente peractum  
 A fundamentis opus, & spectabilis aula;  
 Quod summotâ procul non intrat femina limen.  
 Sacra illic quoniam stat servatoris imago  
 Prima Urbis, gemmis, argento insignis, & auro.  
 Quæ circumfertur populo stipante quotannis  
 More triumphanti Tarpejas usque sub arces,  
 Perque vices ea subcollantibus, inde movetur,  
 Annua jam repetens genitricis limina divæ,  
 Cujus in Exquiliis extat venerabilis ædes,  
 Magno ubi suscipitur Romanæ plebis honore,  
 Quæ subit, & manibus nutantia fercula gestat,  
 Artificum quoque præcedentibus, agmine denso,  
 Pegmatibus pictis, & festo lumine tædis,  
 Sacrorum, pompæque subit longissimus ordo,

Donec

Donec ad excubias vigilanda locetur imago,  
 Pernoctanda sacris ubi lectisternia fiunt.  
 Hinc primas reperit sedes jam luce propinqua  
 Unde amota prius Laterana insignis imago.  
 Hinc mons Esquilus cunctis spatiosior unus  
 In plures apices velut hydra attollitur altos.  
 Dictus ab ex-cubiis, vel ab exculteribus olim  
 Regibus antiquis. Tullo, generoque superbo.  
 Gallorum a Bustis paulatim assurgit in auras,  
 Curva carinarum species ubi, magnaue moles  
 Thermarum diffusa Titi, per culmina montis,  
 Sacra ubi nunc ædes, nodosaque vincula Petri,  
 Et celebrata suis Sextilibus ara Calendis,  
 Et mutata dies de tempore veris in æstus:  
 Luce hac Augustus rediit nam victor in urbem.  
 Nec procul hinc extat Martini præsulis ædes,  
 Jam prope collabens senio confecta vetusto.  
 Cernitur hinc divæ Prædix nobile fanum,  
 Marmore diverso fulgens, ubi parva columna est  
 Ædiculæ latebris, qua dicitur esse revinctus,  
 Atque flagellatus Pilato præside Christus.  
 Namque Columnensi tulit hanc de gente Joannes  
 Cardineus præsul, Judææ missus in oras:  
 Unde locus sexum muliebrem eliminat omnem.  
 Stabat in Exquilis, ut Varro Terentius inquit,  
 Quondam Lucinæ Junonis lucus, opaca  
 Ex fago surgens, prægnans ubi languida partu  
 Implorabat opem mulier clamoribus altis,  
 Nunc ubi diva parens virgo cognomine major  
 In lucem partu emisso, parientibus affert  
 Auxilium lassis, exoptatamque salutem,  
 Atque puerperiis dat Virgo Puerpera vitam.  
 Namque ibi Christiparæ genitrici Regia surgit,  
 Indicio nivium templum signante futurum,  
 Arva Cleonæo graviter dum sidere fervent:  
 Dum serit ardentes latrator Sirius æstus;  
 Dum sitiunt herbæ tellusque caloribus hifcit,  
 Divitis auspiciis ædes fabricata Joannis



Nomine Patritii; præul quam dedicat Urbi.  
 Liberius, primus qui fundamenta locavit,  
 Tertius aut Sixtus, quidam ut sentire videntur  
 Strata pavementis ædes, & fulta columnis  
 Diverso lapidum tota exornata nitore,  
 Quales purpurea mittit de rupe Syene:  
 Quales Oebalia mittit de caute virentes  
 Laurifer Eurotas, & quæ Berecynthius Atrys  
 Saucius infecit rutilantia saxa cruore.  
 Quidquid & in thermis lapidum fuit ante decoris.  
 Stat pictus fornix. vitro decoratus, & auro;  
 Christus ubi exornat sacro diademate matrem,  
 Nicolci quarti pulchrum, & memorabile munus.  
 Sextus Alexander nuper laquearibus aureis  
 Tecta exornavit longo radiantia tractu.  
 Stant diversa locis complura recondita sacra,  
 Statque sub altari corpus maiore Mathiæ.  
 Stat dexter, stat lævus apex de marmore totus.  
 Virginis hoc magnæ fulget genitricis imago,  
 Nobilis Assyrius quam designavit Apelles  
 Scriba Dei Lucas. Grajo sermone peritus.  
 Plura latent alio sanctorum fornice sacra,  
 Dicere quæ longum est, dum singula dicere tento,  
 Virginis ætheræ vestes ubi, zona, capilli,  
 Et lac, & infantis sacra incunabula Christi.  
 Stat prope Hjeronymi venerabilis ara beati,  
 Qua latet & corpus, juxta penetrabile facellum  
 Præsepis, sanctosque lares, ubi virgine natus  
 Primos in fœno vagitus edidit infans;  
 Namque ibi natalis tellus advecta recumbit  
 Femineos gressus non admissura profanos.  
 Stat quæ Pontifici instauravit imago Leoni,  
 Quam sibi præcidi dextram præceperat ante.  
 Stat porphyriaco tumulus e marmore celsus,  
 In quo Patritius stat templi conditus auctor.  
 Hinc mox digressis ad lævam cernitur ædes,  
 Supplicibus votis, & cœli numine dives.  
 Hic ubi promissa stat barba Antonius horrens.

Ex anachoritis senior celeberrimus unus.  
Extat ubi a tergo variis distincta figuris  
Ex lapidum crustis Andree annosior ædes,  
Edita Simplicio Tiburte, ut carmina monstrant.  
Haud procul hinc Viti stat Martyris, atque Modesti  
Instaurata ædes a Sixto præfule quarto;  
Hic ubi pars urbis cognomine dicta Macellum  
Stat Libyæ quondam Sanctorum a strage cruenta.  
Stat prope, qui gladio jugulavit utrumque parentem  
Inscius, annosa, modicaque excultus in æde.  
Stant ubi nunc Marii Arpinatis bina trophæa  
Disiecta a Sylla, instaurata a Cæsare rursus,  
Nunc mutilata tamen, capitumque carentia forma:  
Hic ubi aquæductus confraeto fornice surgit,  
Lapsa fatigatis ubi Martia desinit undis.  
Nec procul a tergo Bibianæ cernitur ædes,  
Corpus ubi, & sanctæ requiescunt virginis ossa,  
Olim Simplicius quam Papa erexerat ædem.  
Quam prope, & a tergo moles ad sidera surgit,  
Atque ruinosæ culmen testudinis amplum.  
Porticus hæc ingens, & regia sacra putatur,  
Quas Augustus avus, Caii, Lucique nepotum  
Condidit in laudem, monumentum, & pignus amoris,  
Ut Tranquillus ait: post Pantheon altera recta.  
Quamvis esse putent thermas ea mœnia quidam,  
Illorum vulgo corrupto nomine dictas.  
Hinc senis Eusebii trahor ad spectabile templum,  
A tergo cujus longo discrimine, Cauros  
Versus Hyperboreos, inter vineta videntur  
Signa vetustatis vitio temerata caducæ,  
Quæ plerique domos, ejusdem & principis altas  
Esse putant thermas, cujus fuit inclytus arcus  
Ille triumphalis spoliis & onustus opimis  
Altius effossus dudum a radicibus imis;  
Campus ubi Exquilius patet, inter limina portæ  
Appositæ Aggeribus, quæ nunc est clausa, vetustis.  
At qui nunc campus Vivari nomine dictus,  
Brutorum quod ibi fuerunt vivaria quondam.

Stabat in Exquiliis sublimis Regia Tulli,  
Regis mox ubi detestabilis aula Superbi,  
Cujus in hoc agro vestigia multa supersunt  
Antiquorum operum. Tellus ubi pinguis adustis  
Facta cadaveribus, defunctorumque sepulchris.  
Mox ubi Mæcenas excultos condidit hortos.  
Sic tandem Exquiliis mutata sorte salubres  
Reddidit, & cælo longe meliore colendas.  
Cum prius inficeret jam totam fætidus urbem  
Exhalatus odor bustorum, & nausea vehemens;  
Tabifici cineres, ustrinarumque favillæ.  
Hic ubi Virgilii vatis domus illa Maronis  
Exitit, ingenio, doctisque ornata Camœnis.  
Quis tibi rite potest jam dignas dicere laudes  
Musarum splendor Latiarum, & gloria vatuni?  
Imminet Exquiliis prope thermas Maximiani  
Mons cælo assurgens, cunctorum altissimus urbis,  
Mæcenatis ubi fuit illa altissima turris,  
Ex qua Roma omnis prospectabatur, & omnis  
Undique quantus erat spectabilis ambitus urbis;  
Qui mons nunc vulgo super Aggere dicitur, unde  
Impius ipse Nero Trojana incendia lætus  
Scenica decantans spectavit in urbe Quirini;  
Nam dirus princeps offensus flexibus urbis,  
Exosusque situs, veterumque angusta viarum,  
Urbem omnem incendi jussit spirantibus Austris,  
Omnem reiiciens in Christi dogmata culpam,  
Persuadens populo Romam incendisse latenter.  
Mons hic Exquilius reliquis cum montibus urbis  
Præter Aventinum finitur vallibus imis;  
Nam quota pars urbis pomœria tangit ad Euros.  
Inde Quirinalis sequitur mons nomine dictus,  
Vel quod ibi templum fuerit quandoque Quirini,  
Vel quod eum montem prisce coluere Quirites,  
Cum Duce qui Tatio Romana ad bella profecti.  
Rex ubi Pompilius consedit, Regia donec  
Laomedontæ fieret prope limina Vestræ,  
Sub gelido quondam nemorosi monte Palati.

Ipse Quirinalis gelidos porrectus ad axes  
 Plurimus ad lævam Mavertis prominēt agro:  
 Hic ubi nunc Roma est campo diffusa patenti,  
 Hinc per radices, & per pomœria prisca  
 Urbis habet metas, & lævis mœnibus urbis,  
 Viminæoque jugo, thermisque in colle propinquis.  
 Inde Quirinalem vallem, Vitalis & ædem  
 Præterit, atque Agathæ templum sublime beatæ  
 Virginis Ætnæ: secessu gratus amœno,  
 Ante tibi locus a curis, sanctissime præsul.  
 Inde per antiquæ vestigia prisca Suburræ  
 Ad fora deducor quondam pulcherrima Nervæ.  
 Turris ubi assurgit Comitum sublimis ad auras,  
 Quas modo distantes modico discrimine tures,  
 Pontifices summi Comitum de gente Latina  
 Fundavere ambas, decus, & monumenta suorum.  
 Altera, quæ major Comitum cognomine dicta est:  
 Altera Militiæ, quæ surgit ad æthera, turris,  
 Dicta a militibus qui illic quandoque fuerunt  
 In statione, fori Trajani in parte suprema:  
 Hic ubi nunc Comitum interclusa sub ædibus extat  
 Forma theatralis cavæ, parvique theatri,  
 Fornicibus densis ab humo surgentibus ima,  
 Ipsa quibus Comitum curvata palatia surgunt,  
 Haud procul hinc magni surgebant balnea Pauli,  
 Jam quoque corruptum vulgo servantia nomen.  
 Mox Constantini thermarum in parte sinistra,  
 Hic ubi Pontificis Silvestri Ecclesia surgit,  
 Exiguus spatium collis consurgit ad auras,  
 Cujus in extrema sublimis margine turris  
 Prominet ad Zephyros, semesa, & discolor altis  
 Rupibus assurgens, & mœnibus addita magnis,  
 Quæ Constantini thermarum extrema fuere,  
 Pars nunc altus apex magnæ super alta columna  
 Tecta, celebrato generosæ stirpis, & alto  
 Assaraci genere exortæ, Martique dicatæ.  
 Hortus ubi ad lævam Samiis Gargeticus herbis,  
 Arva Fori signat cognomine prisca Suarj:

Hic



Hic ubi Roma suæ mercarier ante solebat,  
 Extat ibi templum porcorum a nomine dictum.  
 Montis in hoc clivo stat Saturninus opaco  
 In luco latitans. nec longe in vertice montis  
 Tres Constantini statux de marmore surgunt.  
 Stant ubi marmorei, geminique in monte Caballi,  
 Quos gemini aurigæ nudi moderantur, & illud  
 Par opus artificum geminorum, & gloria cœli,  
 Usque ab Armenia quæ munera missa Neroni.  
 Haud procul ingentes immani mole recumbunt,  
 Marmorei, geminique senex Achelous, & Ister,  
 In quorum manibus pleno stat Copia cornu.  
 Nec longe mons Clatræ, & Apollinis eminet altus,  
 Testa Dicarchæ stant in quo picta Caraphæ  
 Gentis, Oliveri patris fastigia sacri,  
 Qui montem excoluit totum, & pomaria fecit.  
 Post apicem Clatræ, collis consurgit ad auras,  
 Quo Capitolini Jovis antiquissima quondam  
 Arx erat, ad pilam, quæ Tiburtina vocatur,  
 Vatis ubi nascuta domus, lascivaque Marci.  
 Concava vallis ubi clamosi more theatri,  
 In quo lascivo Floralia rustica motu  
 Scorta celebrabant populo spectante togato,  
 Scorta verecundum trepidantia nuda Catonem.  
 Herculis in dextro surgebat vertice fanum,  
 In lævo quondam templum sublime Quirini;  
 Marmorei unde gradus cœli visuntur ad aram,  
 Prætoris jussu, cujusdam Insubris Othonis.  
 Stabat & a Fabio, monte hoc depicta Salutis  
 Ædes, & Pharii Memphisica templa Serapis.  
 Hoc via per dorsum directo vertice montis  
 Protendebatur, quæ Semita dicitur alta.  
 Hic ubi Dalmaticæ stat virginis ara Sofannæ,  
 Vicus ubi, & statux quondam liventis imago,  
 Plumbea Mamurii, qui scuta simillima fecit  
 Cœlesti clypeo qui lapsus ab æthere summo est.  
 Hinc versus Boream, & Collinæ limina portæ,  
 Imma subest vallis, tractuque angusta profundo,

Mœnibus ex omni parte interclusa vetustis ;  
Crispus ubi irriguos habuit Sallustius hortos,  
Uberibus lymphis, & fontibus undique densis,  
Artificum ingenio, e terra manantibus ultro.  
Nec procul inde Forum secessu erexit amœno,  
In quo magnarum rerum monumenta locavit ;  
Nanique rapax dudum præter spoliaverat Afros.  
Stat prope Collinam portam locus editus, alto  
Aggere, qui campus Sceleratus dicitur, in quo  
Antrum erat obscurum camerato fornice quondam ;  
Desuper exiguum tenebrosa luce foramen,  
Per quod Vestalis stupro deprehensa nefando  
Viva subibat humum populo spectante frequenti,  
Qui vestalem alta terra condebat in antro.  
Ac ne forte fame periisse inclusa tenebris  
Illa videretur, speluncæ in parte, fenestra  
Extabat, qua lactis aquæ, mellisque liquores  
Stabant, & parvæ caligantesque lucernæ.  
Donec paulatim spelunca occlusa sileret,  
Mæstaque plebs omnis, lacrimansque recederet inde :  
Hæc erat atra dies, & luctus publicus urbis.  
Inde subit collis lento de vimine dictus,  
Aut quod Viminii stererit Jovis ante sacellum.  
Hoc in monte tuum fuit, Agrippina, lavacrum,  
Perniciem humani generis connixa Neronem.  
Quod mox collabens reparavit denique princeps  
Helius instaurans, cui summo in vertice pinus  
Grandis erat, circum ramorum brachia fundens ;  
Uberibus fecundus aquis, ubi fonte perenni  
Rivus erat, tubulis circumfundentibus undas ;  
Qui locus a vulgo nunc Panisperna vocatur,  
Martyr ubi veteri colitur Laurentius æde.  
Stat quoque Patritio veneranda Pudentia clivo,  
Quod Pius extruxit primus, rogitante sorore  
Praxede, in collis templum radicibus imis.  
Hic ubi Olympiadis, thermæque fuere Novati.  
Hoc in monte domos celebres habuere Quirites,  
Marcus ut ille aquilæ furvum cognomen adeptus,  
Qui

Qui de fraude, doloque malo legem intulit ante.  
 Marcus item Catulus Marii collega triumpho  
 Cimbrorum, Marcumque orator Crassus ibidem  
 Tecta habuit quondam: tum læva in valle Quirini  
 Incoluit sanctas Pomponius Atticus ædes;  
 Hic ubi Vitalis stat martiris ara beati.  
 Julius ante diem Proculus qua valle Quirinum  
 Obvius offendit scandentem limen Olympi,  
 Quem videt humana majorem incedere forma,  
 Romanosque suos jus custodire monentem,  
 Nomine mutato appellari deinde Quirinum,  
 Inter Cœlicolas numero crescente relatum.  
 Hac in valle Probæ puteus fuit altus, & ingens  
 More fluentis aquæ vitreis sanissimus undis.  
 Parvo ubi dividitur discrimine collis uterque  
 Usque ad Viminiam directo limite portam.  
 Parte alia Exquiliis mons hic absolvitur omnis,  
 Quamvis scriptores dictum de vimine collem,  
 Atque Quirinalem confuso nomine ponant  
 Ambos Exquilias inter, collesque vetustos.  
 Roma sibi montes, quibus edita surgeret ante,  
 Elegit tantum velut arcis culmina septem;  
 Nam reliqui montes excludebantur ab urbe;  
 Collis ut hortorum dictus cognomine Pinci;  
 Inde senatoris, qui illic habitaverat olim,  
 Cujus in extremo, celsoque ca.umine surgit,  
 Dimidiata ædes, gravibus collapsa ruinis;  
 Magna prius moles, quam sphæricus ambiit orbis  
 Bardocucullati prope quam nova dogmata Galli  
 Stant anachoritæ jejunia crebra domantes,  
 Regibus a Gallis domus illic edita nuper,  
 Antiquam juxta Felicis martyris ædem.  
 Colleque in hoc cineres, & principis ossa Neronis  
 Condita, qui mortem sibimet conscivit acerbam.  
 Gentis ubi ipsius monumentum in colle vetustum,  
 Et circumtextum Thasio de marmore totum,  
 E Martis campo quod cernebatur aperte.  
 Colle sub hoc ædes celeberrima Virginis almæ

Ad Flumentanæ confurgit limina portæ,  
 Quam Sixtus quartus quondam instauravit, & auxit  
 Mœnibus & forma, Populi cognomine dictam.  
 Plurimus hic collis Mavortis prominet agro,  
 Unde patres niveis induti vestibus ibant  
 In Martis campum, Romanaque Septa Quirites,  
 Empta magistratus dum per suffragia quondam  
 Corruptis peterent blando custodibus auro.  
 Hic ubi mons parvus surgit tellure regeſta  
 E fundamentis vicinæ Cochlidis imis,  
 Atque obeliscorum qui sunt tellure sub alta  
 Nunc ibi ſubmerſi, mons Acceptorius ipſe,  
 Sive Citatorum corrupto nomine dictus  
 Tres numero ſimiles terreno ex aggere montes  
 Nunc ubi Roma eſt, exiſtunt, hic unus & alter,  
 Parvus item collis cognomine Cincius, inter  
 Labentem Tyberim, Judæorumque plateam.  
 Protinus Urlinæ gentis clariffimus ille  
 Mons Jordanus, ubi claros poſuere penates  
 Urſini proceres, belloque, ac pacē potentes.  
 Inclita progenies diffuſa prole per omnem  
 Auſoniam, magniſque viris heroibus Urbis.  
 Unde genus ducis maternum, maxim. Præſul.  
 A quo jam veterēs leges, & priſtina jura,  
 Muneraque & longe majora, & plura recepit  
 Reddita Roma ſibi Romani præſulis aura.  
 Stat modicus ſpatio, ſed ſania, ac nomine magnus  
 Vaticanus apex, Phœbo ſacratus, ubi olim  
 Auguria Etrurſci vates captare ſolebant  
 Illic ſub gemina, condentes fata, vicesque,  
 Ac mundi ſortes; ubi nunc ſublime cacumen  
 Sedis Apoſtolicæ, quæ præminet omnibus una.  
 Per quam terrarum, & cœleſtia quæque geruntur  
 Munera, fatidicas ubi Vaticanus Apollo  
 Reddebat ſortes altā celeberrimus æde.  
 Hic ubi piſcator de piſcatore ſupremus  
 Præſul honeſtatus cœleſti numine Petrus,  
 (In quo ſumma extans Romana Eccleſia ſurgit)



Vaticana jugo meruit sibi templa locari.  
 Hæc est illa frequens, & patribus incluta summis  
 Regia terrarum, totum celebrata per orbem,  
 Clavibus æthereis, & cœli numine, sedes,  
 Religionis habens, & tuta piacula viræ.  
 Quam sibi Pontifices sedem elegere supremi.  
 Ipse quibus faustis successibus, optime Præsul,  
 Dive Leo, nuper Roma plaudente locatus  
 Sede sedens sacra succedis, vestus in ædem  
 Clavigeri magnique senis, sublimequo templum,  
 In quo sanctorum tot condita sacra, tot urnæ,  
 Totque ex ære fores, tot densa sacella, tot aræ,  
 Totque Jugurthinis, Libycisque excisa metallis  
 Saxa, rubensque silex punctis interlitus albis,  
 Et Lacedæmonii de rupe virente Lycurgi,  
 Atque tot insignes peregrina, ex caute columnæ  
 Ingentes, parvæque, & marmoris arte decoræ.  
 Arbor uti myrrhæ surgentes stipite curvo,  
 E quibus una omnes lymphatos liberat, in qua  
 Innixum perhibent Christum Salomonis ad ædem,  
 Dum nova differeret Judæis dogmata duris.  
 Stat lapidum exquisitus honos ex omnibus oris,  
 Quem Tibur, quem Luna creat, Liguresque propinqui,  
 Quem ferri, ac lapidum spectabilis Ilva metallis,  
 Et quem Cycladibus mittit Neptunus ab altis;  
 Quorum nunc lapidum vestigia rara supersunt.  
 Vestibulum ante ipsum, primoque in limine templi,  
 Atria lata patent, ingens ubi pinea surgit  
 Forma, Perilleo circumspectabilis ære,  
 Idæos Phrygiæ sacros imitata tumores.  
 Porticus hinc surgit, spatiosaque limina templi,  
 In quibus ære fores nunc, & ferrugine nigra,  
 Argento quondam radiabant postibus altis.  
 Ad dextram templi, qua Porta est sancta, locellus  
 Marmore consurgit, vinclis arctatus ahenis,  
 Vera Dei facies ubi servatoris imago  
 Sudore ex atro, squaliente nigerrima vultu,  
 Sacra catenatis penetralibus eminet altis;

Qualem candidulo mulier sanctissima velo  
 Excepit magno Berenice exterrita signo.  
 Stat caput Andreæ delubri in parte sinistra,  
 Gregorii magni qua molliter ossa quiescunt,  
 Quod Constantini deVectum ex urbe Secundus  
 Papa Pius capiens in fornice condidit alto.  
 Statque una Judæ, & corpus Simonis in urna,  
 Inter sublimes, ubi prominet ara, columnas.  
 Stant diversa locis, & clavibus inclita sacris  
 Ærea Pontificis simulacra sedentia Petri.  
 Stat Sixto quarto monumenti maxima moles  
 Ære ex Calliaco fulgens, cœloque Myronis;  
 Circumspecta sacris, doctisque ornata Camœnis.  
 Stat quoque qui Sixto successit in ordine patri,  
 Janua quem genuit, simili conflata metallo:  
 Altera forma sedens, læva cui ferrea cuspis;  
 Nam regnante illo vecta est ea cuspis in urbem,  
 Qua latus effossum crudeli vulnere Christi.  
 Stat penetrale Sacrum templi majore sub ara,  
 Quam Constantinus sacratæ conditor ædis,  
 Argento, & cupro, gemmisque ornavit, & auro,  
 Muneraque ejusdem largitus plura metalli.  
 Hic ubi Clavigeri Petri, commixtaque Pauli  
 Ossa simul recubant, communi tecta locello.  
 Petre, decus mundi, cœlestis claviger aulæ,  
 Dexter ades vati surgentia templa canenti  
 Hæc tua, quæ Julius de Robore Papa Secundus  
 Incepit, Sixtique nepos ex ordine Quarti,  
 Italus exortu, patria Ligur, urbe Saona,  
 Quam tu perficies, Præful sanctissime, molem:  
 Sic erat, alme Pater, superis decreta voluntas.  
 Stat moles duplicis spatium complexa theatri,  
 Brachia diffundens huc illuc undique longa,  
 Quæ distincta patent Megarensi condita norma,  
 Cecropio moderante fabro nova tecta Bramante.  
 Nec te transferim Juli cognomine Lena,  
 Ingenio pollens Latio, & virtute togata,  
 Antiquos superans Musarum munere fabros.

Desine mirari spectator Pantheon ingens,  
Quisquis es, & veterum delubra antiqua Deorum;  
Atque huc verte oculos, & suspice fornicis altas  
Absidas, atque lacus convexo in fornice pictos,  
Et caligantem curvæ testudinis orbem.  
Aspice Tartareo nova fundamenta profundo  
Jacta, fatigatis operum tot millibus: ergo.  
Hoc opus immensum, cui mons non sufficit unus,  
Unica nec rupes, nec cæmentarius unus,  
Praxiteles unus, Couis non unus Apelles,  
Ac Thrason unus satis est, vel Dædalus unius,  
Una Syracosii vel dimensionis amissis.  
Forma vetus templi penitus discussa recessit,  
Et nova concepta est species, ex arte recenti,  
Priscorum superans moles, Ephesique Dianam,  
De qua se toties Ephesus jactare solebat.  
Mœnia quid referam, quid testâ, quid atria narrem?  
Quæ Vaticano fundata in monte videntur.  
Symmachus hæc primus vicina palatia Petro  
Condidit, hinc alii longo post tempore Patres,  
Ædificaverunt, coluereque protinus ædes:  
Hic ubi Conclavis radiat sublime sacellum,  
Legis ubi antiquæ atque novæ pictura renidet,  
Quam Sixtus Quartus cœpit, perfecit Julius;  
Qui Vaticanas ædes ornavit, & auxit.  
Hæc loca tuta parum, primus munita reliquit  
Nicoleos Quintus, qui mœnibus ambiit altis,  
Struxit, & ornavit pictis laquearibus aulas:  
Binaque, ubi fieret res sacra, sacella perexit:  
Multa quoque incipiens, eadem imperfecta reliquit.  
Prosequiturque Pius, Paulusque, & Sixtus, & Inno-  
centius octavus, qui dextro in vertice montis  
In Vaticano secessu condidit altas,  
Conspicuasque ædes gelidos Aquilonis ad axes,  
Pulchri Conspectus merito cognomine dictas,  
Solibus æstivis Cœnacula grata sub umbra,  
Strata pavimento, & pictis decorata figuris.  
Quæ loca porticibus longis, ceu pontibus altis,

Ædibus antiquis opifex conjunxit Julius;  
 Collis utrumque jugum superata valle coæquans:  
 Pensilibusque viis stat pervius additus usus.  
 Sextus Alexander postremo in vertice turrem  
 Addidit antiquis, quæ præminet ædibus, altam:  
 Cui testudineum perfecit Julius orbem:  
 Indequè suggestum, quod cœperat ante supremum  
 Nicoleos quintus structura marmoris auxit:  
 Hic ubi Pontifices elatæ numine dextræ,  
 Astantis populi commissa piacula solvunt.  
 Idem secreto deducens tramite cautus,  
 Penile fecit iter per mœnia summa coactum,  
 A Vaticano ad molem Ælij principis usque.  
 Julius his longe majora exordia rebus  
 Cœperat æternis, invidit livida Clotho,  
 Stamina sacra senis præduro pollice rumpens.  
 Nec te, transgrediar, fons Vaticane, nec illa,  
 Quæ nunc spectantur simulacra nitentia circum,  
 Fons ubi Juleus salebroso e murice surgit;  
 Dulcibus æquorei ludunt delphines in undis.  
 Stat Cleopatra super, cubito subnixâ gravato,  
 Serpentis spira, quo concidit ipsa, revincto.  
 Statque coronatus, glauca projectus in alga,  
 Incumbensque lupæ tergo Tyberinus, at illa  
 Admoveret ut nutrix infantibus ubera parvis,  
 Marte satis, quos ipse Deus Tyberinus ab undis  
 Servavit, parcens dominos violare futuros.  
 Haud procul arcitenens, formaque decorus Apollo,  
 Atque pharetratus, cornu qui spicula torquet.  
 Stat prope Laocoon, innexus membra colubris,  
 Qui nec opem sibi, nec natis clamantibus ullam  
 Ferre potest miseris, moribundus, squallidus ore.  
 Stat quoque cum puero Citherea Cupidine parvo,  
 Quæ nuda aligero blandis arridet ocellis,  
 Hesperidum fervans pomaria sacra sororum.  
 Sub Vaticano jam Quintia prata fuerunt,  
 Paupertate potens, quæ Cincinnatus arabat.  
 Hinc mons Janiculi confurgit vertice longo,



Regia celsa senis fuit in quo culmine Jani,  
 Qui moriens etiam fuit hoc in monte sepultus.  
 Rex ubi Pompilius, longo post conditus ævo.  
 Hic ubi cum libris referata est arca vetustis  
 Secula post aliquot sub vulnere vomeris unci,  
 Arcaque cum libris combusta jubente Senatu,  
 Sacra quod his essent inscripta levissima quædam.  
 Mons hic præcipiti clivo se attollit in auras,  
 Tybridis a ripis in lævam porctus, ubi nunc  
 Crinibus horrescens modica stat Honofrius æde,  
 Arboribus densis, lucoque umbratus opaco.  
 Pars illa editior circumdata mœnibus altis  
 Protinus hostilis belli formidine clausa est,  
 Ne foret interdum Tyrrhenis hostibus instar  
 Arcis, & altus apex, & inexpugnabile culmen.  
 Nunc ubi confurgens Aurelia porta videtur  
 In dorso montis, qui dicitur Aureus, in quo  
 Supplicio Petrus Crucis est affectus, in altum  
 Elatis pedibus, versa cervice deorsum.  
 Rex Alfonsus ubi de stemmate gentis Iberæ,  
 Montis adæquato instauravit vertice templum,  
 E regione Aræ longo discrimine Cœli.  
 Transtyberina subest regio cui plurima colli,  
 Urbisque Ravennatum quandoque vocata, quod illic  
 Castrorum legio conedit ab urbe Ravenna.  
 Transtyberina Parens ubi Virgo ingentia testâ  
 Strata pavimentis habet, & suffulta columnis,  
 Munere Pontificis primi fundata Calisti.  
 Qua prius extiterat meritoria parva taberna;  
 In qua fons olei tellure erupit ab alta,  
 Perque diem solidum Tyberim defluxit ad usque.  
 Stat quoque Chrysogoni Romani martyris ædes:  
 Sacraque Cæciliæ Romanæ virginis ara,  
 Atque ubi casta Deo fundebat vota, profeucha.  
 Inter confusas veterum vestigia Thermas  
 Quadraginta una coguntur martyres æde  
 Statque cucullatus sacra Franciscus in æde,  
 Pauper, inops, modico contentus, & omnia pauper,  
 Quæ

Quæ vult, solus habet, tanta est in paupere virtus.  
 Qua Judæus ager, recutitaque busta videntur,  
 Æthere sub nudo, pede conculcata frequenti.

*De antiquitatibus Urbis Liber secundus.*

Urbis apud veteres regionum multa fuere  
 Nomina cum rebus, præter quas scribo, vetustis;  
 Carmine quæ nequeunt proferri, & dicere longum  
 Effet, in his vicos, stationes, castra, cohortes,  
 Atria, vestibulum, delubra, sacella, plateas:  
 Quæ fuerint ædes, collegia, Vicomagistri,  
 Armi, & Lustra urbis, pastrina, macella, tabernæ,  
 Stagna, lavacra, lacus. piscinæ, balnea, fontes,  
 Insulæ, & Euripi, nymphaea, & compita, ludi,  
 Et Curatores, habuit quos Roma, locorum:  
 Strata pavimenta, & pictis asarota lapillis,  
 Et quæ confusis latitant adoperta ruinis,  
 Plurima signa, aurum, lapides, & vascula, gemmæ,  
 Multaque præterea simulacra ingentia, parva,  
 Dimidiata Deum, atque hominum, complura ferarum,  
 Aurea, marmorea, exornata, inculta per urbem:  
 Intus, & exterius passim diffusa videntur.  
 Et quæ porticibus, delubris, fontibus, hortis,  
 Ædibus, impluviis, stratisque adnota viarum  
 Labra, lavacra patent mutilata, vel integra passim.  
 Temporibus præcis, nisi lintribus Albula parvis  
 Pervius amnis erat Latiis cultoribus olim;  
 Qui Latium a Tuscis labens determinat agris,  
 Ex Apennino, quo vertice nascitur Arnus,  
 Nascitur & Tyberis, qui longo flumine lapsus  
 Quadraginta in se diversos suscipit amnes.  
 Naris aqua, Fabarisque tumens, Arrienis & unda;  
 Quem dictum constat Tyberini ex nomine regis,  
 Illic submersi, latroneve nomine Tybri,  
 Amnis apud ripas quondam exercente rapinas.  
 Rex Tybris, & dominus fluviorum Aquilonis ab axe,  
 Ingreditur, dirimensque urbem decedit ad Austros.

Nec prius artatus sub pontibus exitit amnis  
Collis Aventinus, quam mœnibus additur urbis.

Primus Sublicius pons est, compactus ab Anco,  
Sublicibus longis nulla compage revinctis  
Clavorum, aut ferri, positis pro tempore lignis.  
Ut posset subita novitate urgente revelli.

Mox interruptus pons est a Coclite primum,  
Tuscorum a tergo dum fuscinet agmina solus,  
Armatulque natans Romana in castra refugit.  
Quem lapide Æmilius prætor solidavit, & illum  
Æmilium de se mutato nomine dixit.

Princeps marmoreum Antoninus condidit, unde  
Posterius vulgo retinet de marmore nomen;  
Cujus sola quidem nunc fundamenta videntur:  
Hic ubi cymba frequens navalibus applicat urbis,  
Qua sub Aventino Caci prius exitit antrum.

Inde Palatinus, montis de nomine surgit,  
Sive Senatorum pons longior omnibus unus.  
In se nam bifidas Tyberinas excipit undas,  
Ponsque frequens olim dum Roma celebrior esset,  
In Tuscos, Latiosque iter alternantibus agros.

Hic ubi se geminas scindit Tyberinus in undas  
Insula saxorum solidissima molibus extat  
Parva, Lycaonia antiqui Jovis insula dicta;  
Hinc pons Fabritius, pons Cestius eminet illinc.  
Insula curvatæ formam sortita carinæ

Fluctibus ambitur Tyberinis, hic ubi quondam  
Templa Jovis fuerant, vicinaque templa nepotis  
Phœbigenæ, Stygio manes revocantis ab Orco;  
Cui rate devectus serpens Epidaurius hæsit,  
Numinis ut Genius, quo pestis ab urbe fugata est.  
Nunc ibi Virgo Parens, & Bartholomæus ibidem  
Tybridis in ripa, templis venerantur in altis.

At qui nunc mixti dictus cognomine Quarti,  
A quo instauratus pons est, Aurelius ante,  
Seu Janiculis, qui monti proximus esset  
Janiculo, faciles aditus adeuntibus urbem  
Qui daret, abruptus bellis civilibus olim,

Unde

Unde nova affurgit via Julia, nomine dicta  
Pontificis Juli, qui recto tramite jussit  
Jamdudum sterni per littora Tybridis usque  
Ad veterem pontem; cujus vestigia sola  
Nunc tantum superant medio surgentia Tybri.  
Per quem Tyrrhenos accedebatur in agros,  
Et Vaticanum campum, Circumque Neronis,  
Olim dum partis florebat Roma triumphis.  
Integer, & clarus pons Ælius omnibus unus  
Nobilior, celebri concursu, & tramite denso,  
Alternante vices, Euripi more fluentis.  
Ælius hunc Cæsar moli, quæ proxima surgit  
Infratrans, pontem conjunxit, ut omnibus esset  
Transitus hac; molisque altæ monimenta viderent;  
Ejus ubi cinis, Antoninorumque recumbit.  
Quæ tormentorum nullis obnoxia moles  
Ictibus, hostiles propellit ab urbe furores.  
Hic ubi præfulgens apparuit Angelus olim,  
Ense cruentato, manifesto numine visus,  
Unde recens nomen locus hic accepit ab illo,  
In qua comprehensus periit Crescentius arce,  
Theutonicis quondam cum sese traderet armis;  
Unde arx Crescenti appellata prioribus annis.  
Quam prior elegit nonus Bonifatius, arcem  
Muniit, & turres, & propugnacula fecit.  
Mox primo adventu Gallorum nuper in urbem  
Mœnibus, & fossis, atque aggere muniit alto  
Sextus Alexander, fossis majoribus illam  
Duxit, & aggeribus circummunivit Julius,  
Et Vaticanum campum cum colle propinquo  
Mœnibus amplecti cum decrevisset, eorum  
Quæ prius incepit plura imperfecta reliquit  
Ipso opere in medio, superas digressus ad auras.  
Milvius a Scauro pons primum conditus extat,  
Sæpius eversus, sæpe instauratus ibidem,  
Flaminiaë impositus Tyrrhenos ducit in agros;  
Ponsque frequens, reliquis quamvis pons distet ab urbe:  
In quo præclari Ciceronis Consulis arte



Legati Allobrogum, nocte intempesta fuere  
 Deprehensi insontes, interceptæque tabellæ,  
 Conjuratorum fraudes, ac tela repulsa.  
 Quo Constantini Maxentius arte tyrannus  
 Concidit, & finis datus est civilibus armis.  
 Roma bonis avibus cum condita montibus esset,  
 Pingui Roma solo, sed fontibus indiga tantum;  
 Tum primum externas altis siphonibus undas  
 Decrevere Patres sitientem ducere in urbem,  
 Propter aquæductus, quæ post uberrima facta est;  
 Undarum scatebris sitibunda rigantibus arva,  
 Atque suburbanos hortos: hinc densa per urbem  
 Balnea, naumachiæ, pistrina, stagna, lacunæ,  
 Thermarumque decus, nimphæa, lavacraque passim.  
 Marcia limpidior cunctisque salubrior undis,  
 In Pelignorum postremis montibus orta,  
 Inter dona Deum concessa, cucurrit in urbem.  
 Rex Ancus primus tentavit, denique prætor,  
 A quo nomen habet, deduxit Marcius illam.  
 Præterit hæc Marfos, qua Fucinus explicat undas;  
 Mox in speluncam demersa, per intima terræ  
 Viscera delabens, prope Tibur deinde resurgit:  
 Unde ea concipitur, deducta per absidas altas,  
 Majorem juxta portam decurrit in urbem,  
 Exquilios adiens obliquo tramite colles.  
 Intermissa diu vitiato fornice, tandem  
 Rursus ab Agrippa reparatur, tempore longo  
 Post Antoninus Pius instauravit, & amplas  
 Auxit aquas, fontisque novi nova flumina jungens,  
 Arcus ut ostendit Taurinæ in fornice portæ,  
 Fontibus elicitur geminis aqua Claudia, quorum  
 Alter Cæruleus stat nomine, Curtius alter.  
 Mixtus aquæductum sed uterque excurrit in unum,  
 Quem Cæsar princeps multa vi cœperat ante,  
 Claudius absolvit, sed Claudia dicitur unda:  
 Moxque repurgata, qua curreret apside, rursus  
 Vespasianus aquam labi curavit in urbem,  
 Ut spectare licet majoris in abside portæ;

Quam

Quam prope labentem mons Cælius excipit undam,  
Ipsa Palatinam donec se flectit in arcem,  
Ac prope Joannis, Paulique elapsa sacellum.  
Inter Sptodium, Constantinique trophæa  
Ejus aquæductus vestigia magna videntur.  
Mililibus quondam Latiis quærentibus undam,  
Conceptam quo fonte sitim restinguere possent,  
Ostendit tenues tunc quædam virgula venas  
Emanantis aquæ scatebris humoris aquosi;  
Quam lapide octavo via Prænestina notabat,  
Unde decens nacta est aqua Virgo a virgine nomen.  
Non illum esse reor Trivii cognomine fontem,  
Qui Collatinæ currit sub limine portæ,  
Ipse licet Naso Juturnæ scribat ad ædem  
Virgineum fontem labi Mavortis in agrum.  
Fons nisi nunc ille est, Janum qui surgit ad imum,  
Cujus aquæductus media scaturire Suburra  
Cernitur; at Virgo potius suppressa putetur  
Unda, velut reliquæ quæ ducebantur in urbem,  
Juturnæ fontem multi, nunc esse fatentur  
Hunc, quo Ledæi sese lavere gemelli,  
Quod prope jam fuerit communis fratribus ædes.  
Montibus ex altis Anio novus, atque vetustus  
Fornicibus summis Romam deductus uterque est.  
Hunc censor Curius, Frontinus Julius illum  
Intulit a divo Nerva Curator aquarum  
Factus, aquas omnes labentes, scripsit, in urbem.  
Julia, Juleo quondam de nomine dicta  
Agrippæ cura, per subterranea primum  
Antra, fluens, arcus per summos currere jussa est,  
Coctilibus tandem formis pervenit in urbem.  
Longinus Tepulam, & Censor Servilius undam  
In Capitolinum pariter duxere cacumen.  
De Lucullano ceu Claudius Appius agro,  
Appia cui nomen, Censor deduxerat undam,  
Cujus aquæductus currebat ad usque Salinas.  
Post has innumeræ delabebantur in Urbem,  
Augusta ut torpens, stomacho non stilis unda;

Et quæ Sabbatis de stagnis venerat olim,  
 Cujus aquæductus via nunc Aurelia monstrat.  
 Extabantque locis sive ex auctoribus undæ,  
 Montis aqua ut Cimini, Trajana, Aurelia duræ,  
 Annia, & Herculeæ, Antonina, & Cæcula molles,  
 Septimiana tepens, & Alexandrina nivalis.  
 Romulei proceres opibus, luxuque fluentes  
 Ut tepidis bruma, gelidis se æstate lavarent  
 Fontibus, ingenti condebant fornice thermas,  
 Omne quibus lapidum decus, ornamentaque mundi,  
 Gemmarumque faces adhibebant, arte nitentes.  
 Crustatus paries, diverso ut marmore recta  
 Exornata forent, cameratæque absides essent:  
 Picta pavimenta, & claris Asarota lapillis,  
 Mulcerent ut luxu animos, curisque levarent.  
 Stabat Erithræi lapidis translucida forma,  
 Stabat fuscus onyx, maculisque insignis ophites;  
 Stabat & Idæus Phrygii cruor Attydis, & quem  
 De Palamedea lapidem fert cymba Carysto:  
 Et quem tum Cyclades, vel mons mittebat Hymettus;  
 Stabat purpureus punctis Mareoticus albis.  
 Atque Therapia viridis de rupe Lacænus.  
 Ac prius Agrippæ fas est de nomine thermas  
 Dicere, quas egit spatiofo Martis in agro,  
 Post Jovis ultoris, cognomine Pantheon, ædem,  
 Quarum magna licet vestigia cernere passim  
 Ad medium conversa diem diffusa per hortos,  
 Amplaque nobilium, Romanaque testæ Quiritum,  
 Portia ubi domus, & lenarum, & rustica surgit,  
 Cæsariæque ædes, Ursina relictaque testæ.  
 Qua patet Eustachii sacra & venerabilis ædes,  
 Thermarum apparent vestigia magna Neronis.  
 Quas & Alexander Cæsar reparavit ibidem,  
 Sive novas, dictasque suo de nomine fecit:  
 Quarum confusas non est discernere moles.  
 Hic ubi nunc ædes Medicæ, pater optime, surgunt,  
 In medioque urbis tuæ prisca palatia centro;  
 Qua regione olim gens consedere vetusta,

Lingones, & Bardi milcentes nomen utrinque,  
Unde platea vetus retinet cognomen ab illis.  
Stat diffusa Titi cognomine Vespasiani  
Thermarum moles, cujus fragmenta videntur  
Inter sacra senis delubra, & vincula Petri,  
Martinique ædem, Clementis, & Amphitheatrum.  
Nunc ubi cernuntur sublimibus ampla carinis  
Antra, & cisternæ jam sub tellure capaces,  
Laocoontis ubi, & natorum signa duorum,  
Effossa, amplexis morientia membra colubris,  
Artificum quondam Rhodiorum gloria triplex.  
Haud procul Auroram versus, Caurosque frementes  
Thermarum superant vestigia magna Philippi,  
Qua collis vertex vallem declinat in inam,  
Qua colitur veteri Matthæus Apostolus æde.  
Quas alii cœpere prius densa abside thermas  
Induperatores, monstrum crudele Diocles  
Absolvit princeps, a quo sunt nomen adeptæ.  
Molis opus magnæ spatio complexus, & ingens  
Antrum, ubi cisternæ stant sub tellure capaces.  
Hic ubi Viminis collis confunditur altis  
Exquiliis, lævaque jugi sub parte Quirini,  
Sacra ubi consurgit nunc virginis ara Sofannæ.  
Hoc etiam dorso porrecti montis ad Austros,  
Hic ubi Pomponi Læti domus extat, & ædes  
Visuntur Platine, sibi Constantinus ad auras  
Erexit thermas, ubi sunt in monte Caballi  
Marmorei, & parvum Cybeles de marmore signum.  
E regione senex colitur qua Sixtus in æde,  
Qua via dicta nova est, piscinaque publica quondam,  
Nerei, Achilleique super venerabile templum,  
Montis Aventini Caracalla in parte locavit  
Ingentes thermas, altum superantia montem.  
Ad quas depresso currebat fornice quondam  
Parvus aquæductus. qui cernitur ante Capenam.  
Plurima adhuc extant thermarum nomina tantum,  
Ut quas Trajanus, quas Cæsar Commodus olim,  
Et quas Septimius, quas ipse Aurelius egit.

Trans



Trans Tyberim thermas æstivo frigore gratas,  
 Extant & parvæ nunc, & sine nomine thermæ,  
 Sive lavacrorum, cisternarumque lacunæ,  
 Intra, extraque urbem, multo squallore sepultæ.  
 Jamque triumphales arcus, & sacra trophæa  
 Urbe videbantur tota, dum Roma triumphis  
 Clara ducum fuerat, spoliisque insignis opimis.  
 Quorum tres arcus extant candore nivali  
 In sacra, celebrique via, discrimine parvo  
 Distantes; olim per quos Tarpeja petebat  
 Tecta triumphator, summo concepta Tonanti  
 Vota soluturus, solito de more Quiritum.  
 Stat Constantini jam proximus Amphitheatro  
 Arcus civili, superato in Marte tyranno,  
 Illic ut scriptis epigramma pedilibus extat,  
 Ac pompæ series, ubi fercula prisca coruscant.  
 Absidis in summa jam fronte, alata videtur  
 Bina trophæa manu gemina Victoria gestans,  
 Qua cecidit dirus justis Maxentius armis.  
 Statque Titi parvus cognomine Vespasiani,  
 Sed spoliis quondam spectabilis arcus opimis,  
 Judæis victis Mavorte rebellibus acri;  
 Gentis ut apparent ibi candelabra, tabellæ,  
 Aurea cum spoliis & mensa, & fœderis arca  
 Sacra, Hierosolymis captis, adlata triumpho.  
 Parte alia fasces sunt, & quadriga regentis;  
 Fornice supremo Victoria clara videtur,  
 Quæ penitus titulos, & vires fregit Hebræas.  
 Extat apud Tulli tenebrosum carceris antrum  
 Montis Tarpei radicibus editus imis.  
 Ingens Septimii speciosior omnibus arcus  
 Surgit ubi terrestre ducis, navaleque bellum  
 Instructæque acies, tormenta que bellica, currus,  
 Fulmineusque aries, navesque ad bella paratæ.  
 Fronte in utraque arcus geminis alata trophæis,  
 Ornatura ducem Victoria bina Severum.  
 Est in Velabro prope Janum, & templa Georgi,  
 Principis ejusdem titulis numerosior arcus,

Rex ubi sacrorum præpingui corpore taurum,  
 Ob bene res gestas, solennibus immolat aris;  
 Nam Mercatorum fuit ille Boarius arcus.  
 Hic ubi nunc Libyæ pars urbis dicta Macellum est,  
 Ara ubi nunc Viti stat martyr, atque Modesti,  
 Stat Tiburtinis compactus rupibus arcus  
 Integer, atque rudis, Galeni principis, olim  
 Qui se dicebat flecti virrute, nec auro.  
 Haud procul Odrysiæ gelidos Aquilonis ad ortus  
 Inclytus arcus erat, clypeatis undique signis,  
 E regione situs portæ super aggere Tulli,  
 Exquilio in campo, cujus Marpeſſa ſaxa  
 Exornant Damali inſtaurata palatia templi  
 Juxta Lucinam, gelida qua martyr in æde  
 Excolitur Laurens, antiquo Martis in agro,  
 Extat adhuc arcus ſenio confectus, & igni,  
 Quem dicunt Claudj (ſi vera eſt fama) Neronis:  
 Signa ubi Naumachiæ, & thermarum magna videntur  
 Nunc ubi Sylveſtri celeberrima viſitur ædes,  
 Qua caput inſpicitur ſummi venerabile vatis,  
 Qui digito Chriſtum veniſſe oſtendit, & ore.  
 Alter apud Sarræ (ſuperant nam ſigna) plateam  
 Everſus Sixti juffu, antiquiſſimus arcus.  
 Alter & ante viam ſtabat, quæ lata vocatur,  
 Tiburij (ut ſcriptum eſt in marmore) pervius arcus,  
 Dirutus Octavo Genuenſi Antifſite, nuper  
 Proxima dum renovat Genitricis limina magnæ.  
 Nec procul ad Zephyros in eodem tramite furgit  
 Arcus corrupto cognomine Campilianus.  
 Et ſub Aventino quondam juxta Herculis aram  
 Marmoreos arcus hauſit calcaria fornax,  
 In laudem Coelitis ſtruſtos & nomen Horati.  
 Extabant alij Fabianus ut arcus; & illi,  
 Quos de coſtilibus fecit barbata vetuſtas.  
 Parva theatrorum ſpectacula prima fuere,  
 Et compacta levi, pro tempore, machina ligno;  
 Duſtile pro ſcænis, aut verſile pondus habebat,  
 Frontibus alternis piſturas intus inanes

Ostendens populis, & spectatoribus urbis;  
 Pompejus magnus spectacula prima theatri,  
 Mœnibus crexit solidis Mavortis in agro,  
 Qui locus a vulgo fertur cognomine Satri;  
 Quod totum externa decoravit marmoris arte,  
 Et loca distinxit gradibus circumfusa curvis,  
 Undique diffusis adoperta, oblectaque velis,  
 Ob pluvios imbres, & hiulco pulvere soles;  
 Tum mimos adhibet scænis, grandæque cothurnos,  
 Atque humiles soccos, quos histrio Tuscus aperte  
 Exprimeret, lætosque daret plebecula plausus.  
 Extat adhuc cavæ moles diffusa vetusta,  
 Quam prope nunc surgit campus cognomine Floræ;  
 Juxta quem Damasus Laurentis condidit ædem,  
 Quæ jam collabens, & squallida tota, gravique  
 Deformata situ, instaurata est denique, & omnis  
 Prima novæ celsit facies mutata locorum,  
 Auspiciis renovata tuis, pater ample Raphaël,  
 Dives. Apostolici custos sanctissime fisci:  
 Quid referam sacro connexa palatia templo,  
 Contiguasque ædes meliora in tecta redactas?  
 A fundamentis educta ad sidera cœli,  
 Conditæque in centro, clarique in partibus urbis  
 Omnia: nil passus formæ superesse prioris.  
 De Tiburtina stat rupe quadrangula moles.  
 Stat perpendiculo pennari condita fabri:  
 Statque Syracosio diametro, & pervia circum:  
 Ædibus in primis stat porticus alta columnis,  
 Atria circumdans veluti spectacula bina.  
 Portarum vario fulgent de marmore postes:  
 Nulli par forma, ac spatio spectabilis aula.  
 Stat distincta novis nova contignatio cellis:  
 Stat facie insignis, quæ servat limina custos,  
 Pace fruens placida positis Tritonia telis,  
 Hic ubi nunc ædes & celsa palatia surgunt,  
 Atque Sabellorum domus antiquissima, clavis  
 Magnanimisque viris, & fortibus inclita dextris.  
 Stabat ibi antiquo Pietas plebeja facello,

Qua

Qua nata in matrem functa est, ut Plinius inquit.  
Mox ubi Marcelli spectacula fausta Theatri  
Condita, quæ locuples Augustus avunculus egit  
Nomine Marcelli; nam nomine multa suorum  
Condidit, ut molem hanc, Tranquillo teste, theatri.  
Quo spectatores spectabant scænica, sicut  
In Pompejana cavea descripsimus ante.  
Præterea Barbi surgebat in urbe Theatrum;  
Sed nec parva quidem nunc ejus signa supersunt.  
Extat adhuc ingens, media quod cœperat urbe  
Vespasianus opus memorabilis Amphitheatri;  
Nunc interruptæ penitus spectacula molis,  
Quam Titus exequitur, quam frater perficit omnem;  
Post obitum patris, cui succedere; sed illud  
Cœptum parte domus auratæ stabat, & amplæ,  
Qua prius extiterant immitis stagna Neronis,  
Assurgebat ubi incomperta mole Colossus;  
A quo mox cavæ locus ipse vocabula cœpit,  
Unde Colosseum vulgo dixere minores,  
Cui spatiosa subest ingentibus area saxis,  
Qua super immanis moles solidata recumbit,  
Mœnibus exterius ductis ad sidera circum,  
Ex Tiburtina compactum caute per orbem,  
Paulatim interius se dimittentibus usque  
Ad mediam cavæ, qua certabatur, arenam.  
Subter humum passim latitabant antra cloacæ,  
Et densi fontes, & humo salientibus undis,  
Ordine dispositis sitibundæ ad pocula plebis.  
Stabant fornicibus simulacra sub omnibus, albo  
Undique cælatis gypso, formisque ferarum.  
Distinctique gradus circum ad spectacula plebis.  
Unde Senatores, Equites, orchestraque tota  
Spectarent ludos, cavæ flarentis arenæ,  
Sive pares gladios, vel equo certare leonem;  
Sive Caledonios Hyrcanis tigribus ursos.  
Extat adhuc Statili Tauri verus Amphitheatrum.  
Templa ubi juncta habuit Paphia cum matre Cupido:  
Nunc ubi divæ Helenæ surgunt penetralia sacra,



Conspicuis adytis, ubi sancta recondita terra est,  
 Vesta Hierosolymis, locus unde vocabula sumpsit.  
 Est ubi pars Crucis, & titulus, compluraque sacra  
 Urbis ubi ejusdem, & clavorum cernitur unus,  
 Supplicio affectus quibus atro vulnere Christus.  
 Fluctibus Hadriacis reprimendis obrutus unus.  
 Alter equi fræno, galeæque imponitur alter,  
 Constantine, tuæ, tibi quo victoria parta est.  
 Aureus in tectis fulgor, magnisque columnis  
 Sustentata ædes, & pictis strata lapillis,  
 Quam Mendosensis Petrus renovavit Iberus,  
 Cardineo quondam sacro decoratus honore.  
 Ampla Foris inerant, spatiosaque jugera priscis,  
 Conditaque illa locis non deterioribus urbis,  
 Nobilium statuis circum exornata virorum.  
 Causarum primumque Forum, & venale fuerunt.  
 Mox procerum luxu leges superante severas,  
 Quisque suo Fora cognomento crexit in urbe.  
 Quorum nunc etiam vestigia magna supersunt.  
 Romanumque Forum primum describere fas est,  
 Inter Tarpejum, spatiosa in valle locatum,  
 Atque Palatinum montem, sub rupibus altis,  
 Qua rupes Pallara paret, templumque Georgi:  
 Est ubi planities, qua Consolatio divæ  
 Virginis apparet, divinaque gratia templis.  
 Omnis ea interior tellus sub carcere Tulli,  
 Stat Latium complexa forum, Romanaque rostra,  
 Centum ubi namque viri causas prudenter agebant.  
 Stabant Rostra foro patribus celebrata severis,  
 De consultandis ubi summis concio rebus.  
 Nam locus hic olim cunctis celebratior Urbis,  
 Quem circumsteterant septem, mox quinque tabernæ.  
 Fixa columna foro fretit hoc spectabilis, unde  
 Quæque via auspiciis sumebat itura per orbem.  
 Nunc ubi tres extant una compage columnæ,  
 Atque sub oppositi nemoroso monte Palati,  
 Curtius ante lacus fuit, & telluris hiatus  
 Ad manes imos; eques in quem Curtius, unus

Civibus e cunctis, a Postulione petitus,  
Se dejecit, equo existens, armatus, & ultro.  
Terra coit, fata implentur, pestisque fugata est,  
Propter quam Stygio sese devoverat Orco,  
Solutus pro patria, dubiaque salute Quiricum.  
Illa Palatini vergens Aquilonis ad ortus,  
Parisque forum spectans Romanum, Velia dicta est;  
In qua pastores ante usum forficis, olim  
Vellebant ovium lanas, hinc Vellera dicta.  
Hic ubi rex Tullus modicæ Hostilius ædes  
Incoluit primas, ubi sacra penatibus inde  
Ara locata fuit, mox consulis aula benigni  
Publicolæ, & Catuli, Catilinæque impia testa.  
Haud procul hinc regis præcella fuisse putatur  
Regia Pompilii, & Vestræ spectabilis ara  
Sacra, Palatini ad radices condita montis;  
Instar ubi Albani surgebat lucus, & ædes,  
Quam Numa rex fertur conformavisse rotundam;  
Ac terræ similem, quam sphaericus orbis obibat.  
Hic ubi Sylvester præsul tellure sub alta  
Ore capistratum fertur religasse draconem;  
Parva ubi nunc ædes inferni nomine dicta est.  
Quam juxta, ac circum nonnulla sepulchra reperta  
Nuper, nec dubiis rem confirmantia signis,  
Effossæque sacris positæ Vestalibus urnæ  
In quo Palladium, Romanaque sacra, sacello,  
Effigiesque Deæ, Trojano condita ritu,  
Ignibus assiduis fulgens, ubi Troicus ignis  
Luce coruscabat vigili penetralibus altis.  
Casta ubi virginitas, intacta, & munda sacerdos,  
Pulchra, decens, gracilis, sacrum cui nomen Amata,  
Labe carens omni, niveis & candida vittis,  
Moribus, & vita satis exornata probatis,  
Undique Vestalis Dea quam capiebat in ædem.  
Cautum lege fuit, numerum ne excederet ordo,  
Nec plures senis admitteremur, & essent  
Ingenuæ, incolumes, Italæ quibus esse liqueret  
Vivus uterque parens, non sex minor orta, nec annos

Major habenda decem Vestalis alumna puella.  
 Cui post octo tamen jam nubere lustra licebat,  
 Sed cunctis inerat nubentibus exitus ater,  
 Pessimus at stupro deprehensas quasque necabat.  
 Stabat Ledæis templum commune gemellis,  
 Comuni & titulo, quibus crexere Quirites.  
 Hi quia sudorem abluerant in fonte propinquo,  
 Nec noti juvenes, Jovis est ea credita proles.  
 His quoque contiguam possedit Mulciber ædem,  
 Ante fores cujus celebrer scyphus illic pependit,  
 Martis ubi expositi pueri divina propago,  
 Matre gemellipara Vestali natus uterque,  
 Territa vagitu Tyberis quibus unda pepercit,  
 Abstinentque suos dominos violare futuros.  
 Namque Palatini montis sub rupibus altis,  
 Qua colitur martyr Theodorus in æde rotunda,  
 Illic alveolo expositis lupa foeta gemellis  
 Ubera præbebat, ceu nutrix, mellaque Picus  
 Marte satis pueris, volitans ex arbore fici.  
 (Romula si quis erat ripis affixa fluenti)  
 Donec vagitum admiratus Faustus inde  
 Sustulit, uxorique Accæ mandavit alendos;  
 Regius is pastor Tyberino in littore versans.  
 Verum huc usque Tybris tunc divertebat, aquosis  
 Vorticibus sinuans flexus, & viscera montis  
 Intima radebat, donec repressus, iniquos  
 Mutavit cursus, & recto calle cucurrit.  
 Tarquinio reprimente sinus cognomine Prisco.  
 Mox intra ripas Agrippa coercuit illum,  
 Ripa in utraque gravi saxorum mole locata,  
 Quæ Tyberim attingunt, binis a mœnibus urbis  
 Unde urbem ingreditur, labensque recedit in Austros.  
 Hic ubi marmoreo moles quadrangula Jano,  
 In Velabrensi surgit regione propinqua,  
 Hac in parte forum Bovis a cognomine dictum est,  
 Quod bovis hic olim simulacrum ex ære patebat:  
 Vel quod ibi fuerit celebrata boaria merces,  
 Arcus ut ostendit prope limina sacra Georgi.

Hæc

Hæc loca sæpe prius restagnans vallibus imis  
 Albula turbabat, refluus non pervius undis.  
 Unde locus veteris Velabri nomen adeptus,  
 Quadrantis pretio quod velatura daretur,  
 Infudata seni fulcanti stagna Charonti,  
 Qui rate suspectos ripa ulteriore locabat  
 Montis Aventini, Victoris ubi **Herculis** ædes  
 Mox fuit, indigenam quod ibi prostraverit olim,  
 Semiferumque Cacus latebroso victor in antro.  
 Nec procul hinc fuerat, quæ Maxima dicitur ara  
 Numinis ejusdem, quondam celeberrima votis.  
 Unde canes, muscæque aberant formidine clavæ,  
 Quæ posita ad postes limen servabat opacum.  
 Hanc Sixtus quartus quondam a radicibus imis  
 Funditus evertit, qua nudo corpore signum  
 Effossi fuit, & Tarpejo in monte locatum  
 Conservatorum dextra intra limina rectis,  
 Æreus Alcides, & clava notus athena.  
 Stabat ab Æmilio quondam venerabilis ara  
 Structa Pudicitæ, Tyberi vicina fluenti.  
 Hoc & sacra foro olim subterranea Consi  
 Ara, ubi res tacitæ, fidæque silentia linguae,  
 Decernebantur scrutanti incognita plebi:  
 Namque is consilii Deus, ad consulta vocatus,  
 Ad quem descensu descendebatur opaco.  
 Cuncta licet gradibus divorum limina multis,  
 Aut saltem ternis conscenderit ipsa vetustas,  
 Plutonis, Consique Dei solâ abdita terræ  
 Limina, quandoquidem debent arcana latere,  
 Consilii ne fama prior; quam facta liquecant.  
 Surgit Anastasiæ qua nunc templum, ante patebat  
 Sacrum Argiletum, Argiletanæque tabernæ.  
 Inde forum extabat, cui nomen oluscula præbent,  
 Præterlabentis vicino in littore Tybris,  
 Templum ubi Fortunæ, & Matutæ sphaericus orbis,  
 Fastorum libris ut Naso probare videtur.  
 Hæc Ægyptiacæ Mariæ sub nomine sacra,  
 Altera juxta ædes Stephano sacrata, rotundum;



Qua regione habuit Spes admirabile templum.  
 Hoc affixa foro Lactaria parva columna,  
 Ad quam iactantes deportabantur alumni.  
 Hinc fora contiguis inerant Piscaria mensis,  
 Sub Capitolini radicibus edita montis,  
 Inter honoratam, cui nomen porticus, ædem  
 Virginis ætheræ, templumque insigne Georgi.  
 Stabat in urbe forum sanctæ post limina Pacis,  
 Nomine Palladium, clivosi in parte Palati,  
 Surgit ubi Andrææ Pallaræ nomine templum,  
 Nomine corrupto, quidam ut sentire videntur.  
 Pacis ubi est ædes a principe Vespasiano  
 Condita, junctæ Viæ celebri cognomine sacræ.  
 Hic breve, sed pulchrum fundatum a Cæsare quondam  
 Dictatore forum, cujus brevis area multis  
 Milibus empta fuit, statuis sed magna decoris:  
 Inter quas sibi loricatam ponere iussit  
 Cæsar, & edomiti simulacra gementia Rheni.  
 Inter magnifica, & clara ornamenta verustæ  
 Urbis, in urbe forum fuit hoc, ut Plinius inquit;  
 Quod prope Pontificis fuerant, & Cæsaris ædes,  
 Pauper cum modicas habitaverit ante Suburræ.  
 Hic ubi cum Cosma colitur Damianus in æde,  
 Quam Felix quartus condens decoravit, ut extat:  
 Et qua Faustinae, Antoninaque porticus alta,  
 Ac mutilata pater, sublimibus alta columnis,  
 Augusti complexa forum, brevis area quondam,  
 Civibus auferret ne possessoribus ædes.  
 Tanta erat in cives clementia principis ampli.  
 Ultor ubi Mavors Geticis horrebat in armis,  
 Castor ubi & Pollux, etiam victoria magni  
 Regis Alexandri, bellicæ insignia, & ipsa  
 Effigies juvenis, Cæus quam pinxit Apelles,  
 Corvinique caput. vindexque in casside corvus.  
 Inde forum Nervæ surgit post testæ beati  
 Martyris Hadriani, conclusum mœnibus altis;  
 Hortus ubi ad lævam Samiis uberrimus herbis.  
 Ad reliqua hoc urbis stabat fora transitus uno

Pervius, unde forum cognomen, ut autumo, sumpsit.  
 Lamina fulva nitens. Orichalchi summa tegebat  
 Hujus tecta fori, proceris fulta columnis,  
 Lumen ubi ambiguo discernebatur olympos,  
 Ut perhibent, extant arcus, incisæque Nervæ  
 Nomina marmoribus, qua porticus inde perusta  
 Surgit, & Albana paries de rupe quadratus,  
 Ante ædem Quirici, comitumque cacumina turris.  
 Non fuit in tota res tam mirabilis urbe,  
 Quam fuit illa fori Trajani insignis & ampla  
 Area, mox inter Tarpejum condita montem,  
 Atque Quirinalem, multoque æquata labore,  
 Collis ubi quondam se conjungebat uterque,  
 Verticis excisa postrema parte Quirini.  
 Ne locus ipse foret spatium contractior æquo,  
 Neve suo genio defraudaretur, & arte  
 Summorum artificum, quorum exquisita liquebant  
 Ingenio, totum ornamenta reperta per orbem,  
 Et lapidum diversus honos, diversæque signa  
 Phidiaca cælata manu, cæloque Myronis,  
 Credita non hominum, sed viribus esse gigantum  
 Omnia, ubi Cochlidis nunc moles maxima surgit.  
 Sunt & ab eventu, auctorum vel nomine dicta,  
 Ut fora Gallorum, pistorum, & rustica, quæ nunc  
 Nulla extant usquam, sunt & Cuppedinis, & quæ  
 Committi nequeunt concinne versibus istis.  
 Regia sacra domus regum stat nomine dicta;  
 Quæ nequit his numeris proferri nomine Grajo:  
 Inclita qualis erat præclari regia Pauli:  
 Qualis porticibus decorata ingentibus olim  
 Porcia, qualis item surgebat Julia, qualis  
 Ulpia, marmoribus mox Constantinus in urbe,  
 Petre tibi, & Paulo, Cælijque in monte Joanni  
 Condidit; & qualis stat regia virginis almæ  
 Exquilis celebrata jugis, præsepis ad antrum.  
 Stat Pacis templum, quod Vespasianus in urbe  
 Artificum celeri studio fundavit, & arte  
 In Sacra, claraque via, sub monte Palati,

Post civile nefas, intestinosque furores.  
 Extat adhuc templi fornix, pars cetera lapsa est,  
 In quo plura Titus, Genitorque locavit opima  
 Dona, Hierosolymis captis, & divite templo,  
 Argentumque, au umque verus, sacrasque tabellas  
 Legiferi Mosis, mensamque & fœderis arcam,  
 Munera quæque Titus vexit captiva triumpho.

Imminet ad dextram Mariæ sacra Virginis ædes,  
 Quæ nova dicta, viæ sacræ conjuncta vetustæ,  
 Quam Leo fundavit dictus cognomine quartus.  
 Ædis ubi a tergo tellus inclusa sub Euros,  
 Hor us ubi magnus, moles ubi maxima surgit,  
 Amplexata poros diversi numinis ædes.  
 Respicit hæc Zephyros: hæc altera vergit ad Euros.  
 Illic Pæonia ce eberimus arte, Deusque  
 Patre satus Phœbo, hic autem Concordia felix  
 Æde colebatur, prope quam stat Gallica turris,  
 Gallorum a Bustis corrupto nomine dicta;  
 Illic nam Gallos a dictatore Camillo  
 Cæsos strage gravi stat fama fuisse sepultos.

Haud procul hinc altis vicino in monte Carinis  
 Stabat Telluris quondam spectabilis ædes,  
 In qua nocturnus quandoque coire Senatus  
 In rebus solitus magnis, ut Tullius inquit,  
 Hic ubi Pompei quondam domus inclita Magni,  
 Libertique ejus, Lenæi ludus & ædes.

Hac regione fuit recidiva, immensaue moles  
 Aurea crudelis domus admiranda Neronis,  
 Instar præcellæ spatiosis mœnibus urbis,  
 Romam pæne omnem, cum conditur, occupat, unde  
 Tot privata urbis, tot publica tecta ruerunt  
 Usque a Septodio inter colles ducta propinquos.  
 Inde per Exquillas passim diffusa patentes  
 Ad Mæcenatis tendebat denique turrem  
 Jugera multa premens, ubi campi, pascua, saltus,  
 Et nemora, & pecorum diversa armenta, gregesque  
 Pascebantur agris, ubi tempestatibus horrens  
 Æquor, & Euripi, & delphines in æquore nantes:

Sta-

Stagna, lacus, fontes, piscinæ, labra, lavacra,  
Balneaque, & tubulis diffusa unguenta supernis,  
Atria ubi magnæque ædes, & porticus ampla,  
Cujus vestibulo magnus stetit ille colossus,  
Cujus adhuc etiam fragmenta videntur in urbe.  
Cetera namque domus gemmis radiabat, & auro,  
Stabat ubi effulgens Arabum de montibus illud  
Fortunæ inclusum speculari luce sacellum,  
Intima pars cujus foris apparebat, ut intus.

Curia, quod curet divina humanaque dicta est,  
Ut vetus & Calabra, atque ingens hostilia Tulli,  
Et cum Tifata Pompei curia magni;  
In qua dictator confessus vulnere Cæsar,  
Spurinæ vocem cum sperneret idibus illis,  
Ipse quibus cecidit, Bruto assertore vetustæ  
Regibus exactis, jam libertatis avitæ.  
Terna Senatorum patuere Senatula primum  
Auri nomen habens, prape rostra antiqua secundum  
Flaminio in Circo, Bellonæ ad templa furentis.  
Extra portam, aliud Mavortis in æde, Capenam;  
Tum matronarum postremum in monte Quirini.

Porticibus tum magnus honos, & amœna voluptas,  
Gratus ubi incessus quondam, & gestatio mollis.  
Altera pars umbras, brumales altera soles  
Excipiebat, iter producens tramite longo.  
Ordo columnarum per quas longissimus ibat.  
Livia qualis erat tractu gratissima lento,  
Sacrae juncta viæ, celebres ubi Cæsaris ædes  
Dictatoris erant, mox Flavia limina Pacis.  
Bina locis binis Octavia porticus, una  
Juxta Marcelli, quod scriptum est ante, theatrum,  
Altera Pompei caveam prope, diruta tandem,  
Rursus ab Augusto fratre instauratur ibidem.  
A Pompejano, quæ Pompejana, theatro  
Porticus auroram versus porrecta patebat,  
Moenibus effusis, & densis fultra columnis;  
Cujus adhuc exstant etiam vestigia quædam,  
Hic ubi sacra Rosæ cognomine dicitur ædes,



Judæam juxta sunt altera signa plateam,  
 Porticus a vulgo quæ Pompejana vocatur.  
 Haud procul hinc extat Piscaria nomine dicta  
 A fassamentis & piscibus, æmula merces.  
 Surgit ubi titulis, & nomine parva Severi  
 Porticus, ante ædem illius, qui pensitat æqua  
 Lance, graves scelere, & diuturno crimine manes;  
 Sed piscatores non æquo pondere pisces.  
 Stabat Flaminio vicina Corinthia circo  
 Porticus ære olim pretioso insignis Achæo.  
 Claudia diffusas fundebat porticus umbras,  
 Alta peregrinis, & magnis densa columnis.  
 His longe plures surgebant ante per urbem,  
 Namque columnarum fragmenta videntur ubique.

Inter Aventinum collem, montemque Palati  
 Murcia vallis inest priscum cui Murcia nomen  
 Nympha dedit quondam, quæ versabatur ibidem.  
 Mox ubi circuitu longo ad certamina, circus  
 Maximus efficitur, cui nomen Maximus inde  
 Extitit, hic ubi Circenses cognomine ludos.  
 Roma celebrabat, dum res Romana vigeat.  
 Ambitus hic totam capiebat circiter urbem;  
 Interior gradibus locus exornatus, & auri  
 Colla pavementum decorabat, & ambitus omnis  
 Heroum statuis circumdatus, atque columnis.  
 Tres circo in medio stabant Samothracibus aræ,  
 Ad ternas tria signa pares affixa columnas;  
 Unaque diis magnis, diis una Penatibus ara,  
 Tertia diis cœli, & terræ, quibus omnia constant  
 Orta, Deos magnos illos Samothracia fatur.  
 Roma suos genios, custodes, atque penates,  
 Quos tulit in Latium secum Sigæus heros;  
 Quos multo Latium quondam decoravit honore.  
 Stabant & circum clarissima templa Deorum;  
 Stabat ubi divæ Veneris spectabilis ædes,  
 Quam Fabius Gurges fundavit consule natus.  
 Stabat Mercurii, pubentis & ara Juventæ.  
 Extat adhuc cavæ species, & forma vetustæ

Sola, coaxantes ranas, & oluscula fundens.

Extat Flaminius medio nunc Martis in agro  
Circus, quem trito cognomine vulgus Agonem  
Dicit, ubi Emporium scrutis celebratur emendis,  
Mercurii quaque ad lucrum surgente dierum.  
Hic ubi Apollinei sacro certamine ludi  
Urbis agebantur populo spectante, togatæ,  
Extat adhuc ædes ab Apolline nomen adepta,  
Quæ stadii signat justo discrimine metam.  
In Vaticana, ad spectacula grata Neronis  
Circus erat valle, in qua sæpe auriga solebat  
Esse sibi princeps, & scænica sæpe referre,  
Nunc ubi pinguis ager peregrinis ossibus albet,  
Julia ubi moles Obelisci surgit ad auras.

Hic ubi nunc longo via panditur Appia tractu  
Extra urbem ad lapidem, lævaque in parte, secundum,  
Intima vallis inest, tacito semota recessu,  
Auroram versus brumalem, & mole sub alta,  
Quæque Caput bovis agnomento dicta vocatur;  
Circus Olympiacis erat in qua longus, & anceps  
Flexibus, & metis, & fervidus axe citato;  
Cujus adhuc stadium, & metarum signa supersunt.  
Stabant marmorei, fulvove ex ære Colossi,  
Terrigenum formas superantes sæpe gigantum,  
Ut fuit ille ingens, & clarus Apollinis; & qui  
Cæsaris Augusti templo sacratus, & ille,  
Quem Martis Campo compegit Claudius; & quem  
Sustulit ingentem domus aurea magna Neronis.  
Multaque præterea simulacra ex ære per urbem  
Pulchra videbantur vivo ut spirantia vultu,  
Nuda, togata, solo, vel equis surgentia, qualis  
In Lateranensi dorso spectatur equestris  
Cæsaris Aureli statua antiquissima, qualis  
Ante domum Veneris Genitricis forma ferocis  
Stabat equi, cui prima pedum vestigia visa  
Unguibus humanis distincta: & conscius ille  
Insefforis equus patiens nisi Cæsaris ibat.  
Nunc ubi tres extant una compage columnæ,

Romanique fori postrema in parte locatæ,  
 Tres prius, atque decem surgebant ordine junctæ;  
 Quas super illustris statua effulgebat equestris  
 Aurea, sacra tibi victor, Germanice, Rheni,  
 Romanum complexa forum sublimis, & ingens,  
 Ac Germanorum domitrix victtricibus armis;  
 Sub cujus pedibus Rhenus demissior ibat,  
 Atque catenatus manibus post terga revinctis.

Quos Obeliscorum lapides spectamus acutos,  
 Proceros, solidos, quadratæ molis in Urbe,  
 Rupibus excisos Ægyptia terra ferebat;  
 His ut opum luxus ostentarentur inanes;  
 Rex qualem Ægypti mira dedit arte Sesostris,  
 Qui lapis Augusti jussu devectus in urbem est,  
 Et Martis Campi postrema in parte locatus.  
 Stabant æquales gemini discrimine parvo  
 Ambo, Citatorum sub monte, everfus uterque  
 Nunc, alter partim apparet tellure regeſta,  
 Ignibus exustus confraſto ſtipite toto,  
 Fuſus humi, ſub humo totus latet alter opaca.  
 Omnibus everſis, terraque latentibus alta;  
 Integer unus adhuc a Cajo principe quondam  
 In Vaticano ſublatus monte videtur,  
 Qui nunc a vulgo perhibetur Julia Petri.  
 Sunt duo inæquales, & uterque palude ſub alta  
 Obrutus, in circo, cui nomen Maximus, extat;  
 Quorum alter toto non uſquam viſus in orbe eſt,  
 Erectus numquam præ magna mole, gravique  
 Pondere; nam circi partem lapis occupat amplam.  
 Multi præterea parvi ſpectantur ubique,  
 Quorum extant variis fragmenta notata figuris;  
 Namque characterum tales Ægyptus habebat  
 Formas, ipſa quibus ſignabat nomina rerum;  
 Nam ſola Ægyptus quondam hos mittebat in urbem.  
 Surgit forma teres cochlidum, & procera columnis,  
 Geſta quibus procerum designabantur opima.  
 Extat Trajani, Antoninique altera in urbe.  
 Principis una foro Trajani creſta videtur

A populo rerum domino, sacroque Senatu,  
Principis in laudem, monumentum & pignus amoris,  
Post obitumque ejus tanta ejus gratia mansit,  
Cujus gesta patent in marmore cochlidis altæ;  
Per cujus medium sublime cacumen aditur.

Altera Martis agro paulo procerior extat,  
Ignibus admotis, qualis mutilata, videtur,  
Quam Pius crexit quondam Antoninus, ut ejus  
Gesta patent circum numerosa, & clara trophæis.

Donec Saturni felicia sæcula novit,  
Roma probe vixit, sine vindice tutâ severo,  
At postquam scelerum petulans audacia crevit,  
Hic ubi Saturni steterant prius aurea testæ,  
Carcer Tarpejo sub clivo, nomine Tulli  
Summa in parte fori, mēdia fundatur in urbe  
Terribili squallore rigens, & fornice tetro.  
Pars hæc, illa fuit constructi carceris ante;  
Tullius extruxit, Tullique a nomine dici  
Res Ancus voluit, quem mox solidavit, & auxit,  
Ad scelerum pœnas, ad terroremque malorum.  
In quo deprensus conjuratoribus Urbis  
Supplicio affectis a Consule, libera Roma,  
Roma patrem patriæ Ciceronem libera dixit;  
Mox Mamertini dictus cognomine carcer.  
In quo cum Paulo prædura compede Petrus,  
Quod nunc nomen habet, latuit regnante Nerone.  
Carceris ante fores simulacrum immane recumbit,  
Nomine Marforius, solido de marmore signum,  
Quem dixere Deum pistorum, namque tumentes  
Marmore cælati circumstant undique panes.  
Protinus a tergo Martiæ virginis æde  
Extant marmorei vultus, & pompa triumphi,  
Cum genitore pio quem Cæsar Honorius egit.  
Alter carcer erat Romanæ plebis in urbe,  
Juxta Marcelli coëuntia saxi theatri,  
Est ubi Nicoleos in carcere Regillano,  
Quem Regillanus fundavit Claudius ille,  
Qui fuit e denis primus collega tribunis.



Et quem construxit, perit hoc in carcere primus,  
 Dum vim Virginiae petulans inferre pararet;  
 Cujus Virginii, gnatæ pater esse peremptæ  
 Maluit, & castæ, quam vivæ, & turpis alumna;

Bibliothecarum fuit antiquissimus usus,  
 Primus apud Grajos, sed Pollio primus in Urbe  
 Spectandum dedit ingeniis, ut publica dona.  
 Protinus Augusti numerosior altera, Phœbo  
 Sacra Palatino, totum celebrata per orbem,  
 Post hanc Trajani fuit altera, nomine magna.  
 Stat Vaticanis nunc ædibus, æmula priscis,  
 Bibliotheca, novis, pricisque referta libellis,  
 Munere Pontificum spectanda legentibus ultro;  
 Quam primus statuit quæsitis undique libris  
 Nicoleos Quintus; post illum denique Xystus  
 Quartus honestavit libris, atque ædibus auxit.

Urbis Naumachiae quondam pro tempore factæ,  
 Tyro quibus primis exerceretur in annis,  
 Ingens æquorei certaminis instar habebant;  
 Illa velut juxta Circum, qui Maximus olim:  
 Altera crudelis sub nomine parva Neronis;  
 Tertia, quæ domiti stabat cognomine Calvi:  
 Qua delectatus sedato pectore princeps:  
 Spectabat pugnas, soles perpeffus, & imbres;  
 Cujus adhuc extat curvatæ forma lacunæ,  
 Inter Flaminiam. & montem cognomine Pinci.  
 Stabat Roma cavis, quasi pensilis ante, cloacis,  
 Regis opus prisci sapientis acumine Grajo,  
 Quæque vehem capiens fæni sub fornice curvo,  
 Proluviemque trahens urbis torrentibus ibat  
 Undique conceptis, ductis tellure sub alta;  
 Maxima quos omnes in se capiebat, & omnes  
 In Tyberim rapido eructabat concita lapsu.  
 Extat Martis agro prope Pantheon alta cloaca  
 Auspicium sumens, quam Tybridis excipit ingens  
 Alveus; hanc locuples Agrippa capacibus egit  
 Fornicibus, pluvios campi forberet ut imbres,  
 Exciperetque undas, & restagnantia Tybris

Alumina, siquando concreveret Albula nimbis.

Hisque repurgandis, si numquam oclusus hiatus

Fluctibus instaret rapidis, ædilis agebat,

Vel curator opus regerendi oclusa luto

Antra cloacarum fluxu, si Tybridis unquam

Alveus immundis obducebatur arenis,

Efflueretve aliquis de tot labentibus olim

Urbis aquæductus, vitiata segnior unda,

Sive ædes sacræ, vel magnæ mœnia Romæ,

Scenarumve gradus, vel publica si qua ruinam

Tecta minabantur, reparabant omnia passim;

Sordida sive luto torperent strata viarum,

Omnia curabant nitido mundissima cultu.

Quis non Septhodii molem admirabitur altam,

Celsa Palatini, Cœlique cacumina montis,

Inter quos surgit. superantem vertice summo?

Sive viis septem distinctam condidit auctor,

Seu septem zonis, Grajo stat nomine dicta;

Terna columnarum nam contignatio molem

Sustentabat, ubi mollis gestatio quondam,

Nunc tantum Paphiis statio tutissima nidis,

Hic ubi Septimii simulacrum immane Severi

Mole superpositum, spectandum gentibus Afris,

Romuleam ex Lybia tum sæpe petentibus Urbem;

Nam genere hic Afer fuit, & cognomine princeps.

Pyramidas primum Memphitica condere tellus

Ostentavit, opum luxu, cinerumque sepulchris;

Extat adhuc Romæ contexta, e marmore tota

Juxta Tergeminam portam inter mœnia surgens

Pyramis e multis everfis, una superstes;

Cajus ubi veteri requiescit Cestius urna,

Ex septem quandoque viris Epulonibus unus,

Litteræ ut ostendunt cubitales solis ad ortum.

Multa sepulchrorum monumenta antiqua videntur

Marmoribus spoliata suis, ut diruta nuper

In Vaticano moles altissima campo:

Principis ac Æli, Tyberi quæ proxima surgit,

Quæ vice Tarpejæ quondam, nunc utitur arcis.

Plu.

Plura viis extant admota celebribus urbis  
Ad dextram, ac lævam monumenta everſa Quiritum,  
Appia ut oſtendit quondam regina viarum.

Inter Aventinum, Tyberimque, & mœnia Romæ  
Mons cognomento, mediis, Teſtaceus, agris,  
Ex figlinarum teſtis conſurgit, & urnis;  
Namque ibi figlinæ ſurgebant ante tabernæ,  
Hic ubi diis Stygiis, Summanoque annua patri  
Menſe gubernantur Taurilia ſacra ſecundo;  
At nunc præcipites tauri mittuntur, & axes  
Vertice de ſummo, grave, & irrevocabile pondus;  
Quin & carceribus Piſæo pulvere miſſi  
Alipedes agitantur equi ad metam uſque ruentes.  
Circumſtant equitum turmæ, peditumque cohortes,  
Plauſibus hos lætis Roma ſpectante triumphos.  
Haud procul hinc extant inter vineta propinqua  
Et ſub Aventino, juxta navalia Tybris,  
Mœnibus antra cavis, & ſubterraneæ teſta,  
Centum ubi Romanæ, quadragintaque horrea plebis  
Publica triticeæ meſſis ſervantia fruges,  
Stabant, quæ Siculas, & quas terit area meſſes  
Uberior Libycas, capiebant plebis ad uſum.  
His quoque littoribus ſudabant antra ſalinis,  
Quandoquidem deſeſſa ſuis oneraria rebus  
Exonerabatur quæque hoc in littore puppis.

Hic ubi nunc Roma eſt latum diſſuſa per agrum,  
Martis erat reſtans extra pomœria campus,  
Totus ab antiquis excluſus mœnibus urbis.  
Auguribus priſcis recipi prohibentibus intra  
Mœnia, Romanus quod Martis ſæpius illo  
Luſtraretur agro Latiis exercitus armis.  
Sed cum barbaricis toties everſa ruinis  
Roma antiqua foret, ſpreta jam denique priſca  
Religione patrum, & regno inclinante vetuſtæ  
Urbis, & everſis qui labebantur in urbem  
Fontibus & rivis, & aquarum ductibus olim  
Hoſtili fractis dextra, Tyberina fluenta  
Commoditate magis, quam cœlo haurire coacta eſt  
Au-

Auguriis tandem neglectis Roma vetustis,  
 Montibus ex altis Martis descendit in agrum,  
 Mœnibus eductis ad ripas Tybridis usque.  
 Quamvis Romulei deducere mœnia patres  
 Decrevere urbis, Collinæ a limine portæ,  
 Per juga ubi colles compendia mœnibus apta  
 Exigerent, extrema usque ad fastigia montis,  
 Et Tyberis ripam, qua nunc pons Milvius extat,  
 Planitiemque omnem concludere mœnibus urbis,  
 Montibus artatam, & labentis Tybridis alveo.  
 Ac jam decretum, si non vetuisset haruspex,  
 Quod nec fas esset sacra intra mœnia tali  
 Septa patres celebrare loco, nec militis inde  
 Eligere armifoni ad strages & bella cohortes.  
 Pars hæc jam tandem, quæ nunc habitatur, & extat  
 Montibus, & Tyberi circumdata Martis in agro,  
 Hic atque inde novis productis mœnibus usque  
 Ad Tyberis ripas clausa est, ne barbarus hostis  
 Ignibus, & ferro cultos vastaret agellos,  
 Atque per hos aditus toties invaderet urbem.  
 Nam sic expositus Martis fuit ante rapinis  
 Campus, qui totus mox consecratus eidem  
 Sorte Deo placita, diri post regna Superbi  
 Regis, in exilium Bruto curante profecti.  
 Nam rex ante fugam totum conseverat agrum,  
 Et quas consevit segetes non messuit exul;  
 Sed plebs ipsa omnem discerptam concita messem,  
 Ac jam maturam Tyberis projecit in undas;  
 Unde Tybris mediis in fluctibus insula crevit;  
 Mox & in effigiem, formamque redacta carinæ  
 Saxorum mole est, & pontibus aucta duobus  
 Insula, quo melius sustentaretur, & esset  
 Transitus hac agilis, breviorque ex urbe vicissim.

Sed redeo ad Martis castrentia prædia campi,  
 Cujus diffusus late patet ambitus, intra  
 Antiquos urbis montes, & Tybridis undas.  
 Sed quota pars ejus servat nunc nomina campi,  
 Ad Borcam vergens, Tyberique admota fluenti



Hic ubi nunc Rocchi fas est spectare facellum  
 Pauperis, & regum Gallorum e sanguine creti,  
 Hac in parte ingens excogitat Amphitheatrum  
 Dictator Cæsar, quod opus mox ipse peregit  
 Augustus spatio molem complexus eodem,  
 In Mausolei redigens ea mœnia formam,  
 Inter Flaminiam, & Tyberis surgentia ripas  
 Incumbens fluvio, quæ cernitur undiquæ moles,  
 Sphærica cui forma est, in cujus vertice quondam  
 Cæsaris Augusti simulacrum ex ære patebat;  
 Quod circumstabant tumulique, urnæque suorum,  
 Quæ nunc a vulgo moles Augusta vocatur,  
 Stabat ubi a tergo lucus densissimus umbris;  
 Nam circumvectas diversa ex arbore sylvas  
 Munificus princeps, urbisque, & plebis amator  
 In magnum populo spatiandi publicat usum.  
 Ambitus in medio niveo de marmore totus  
 Circumseptus erat cancellis undique ferri;  
 Intra cancellos nemus assurgebat opacis  
 Populeum foliis quod ibi provenerat ultro,  
 Unde vetus forsan cognomine porta recenti,  
 Cum templo dicta est nunc Flumentana propinquo,  
 Ni potius Populo positum cognomen ab ipso,  
 Cui princeps silvas permiserat ante fruendas.

Juxta Lucinæ templum Mavortis in agro  
 Ampla basis nuper tellure effossa profunda,  
 Gnomonis hîc fuerat species, & linea signans  
 Horarum distincta gradus in marmore septem,  
 Stabat ubi artificis spectabilis arte quaternus  
 Angulus, unde Noti spirabant quattuor, unde  
 Linea ventorum totidem distincta per ortus,  
 Ex opere existens musivo, & lemmate curto,  
 FLAT BORRAS ubi cernebatur marmore fracto.

Hic ubi nunc cochlidis patet Antonina columna,  
 Plurima contiguis tectis vestigia circum  
 Ante videbantur, quæ nunc sunt diruta, præter  
 Quam nunc ejusdem spectatur principis ingens  
 Porticus, a vulgo quæ fertur nomine Trullus.

Haud

Haud procul antiquis surgebat proxima Septis  
 Isis Aristoride quondam servata sub Argo  
 Inachis, Argolicis forma prælata puellis,  
 A Jove bos, iterum mulier, reginaque Nili.  
 Mox Dea facta potens Phario Memphitica sistro,  
 Et Nasamoniaci sapientis Osiridis uxor.  
 Hinc e carceribus spatium certamina curvo,  
 Ac stadio celebres exercebantur equorum  
 Flexibus Eleis, & Equiria nomine ludi;  
 Hic ubi Virgo parens ad Equiria possidet ædem,  
 Antiquum servans corrupto nomine nomen  
 Ipse suo campo Mavors certaminis auctor  
 Per septem metas aurigam urgebat, & axes.

Haud procul ad Zephyros celebris patet inde platea,  
 Surgit ubi Ultoris Jovis admirabile templum,  
 Forma quod absolvit convexo spherica tecto,  
 Agrippæ auspiciis erectum, ut Plinius inquit.  
 Area lata subest spatium diffusa profundo,  
 Qua super alta ædis moles solidata recumbit,  
 Vestibulum ante ingens, inter nymphæa leones  
 Marmaridæ gemini recubant, delubra tuentes.  
 Hic ubi jam Cybele cum natis omnibus una  
 Æde colebatur, quæ Pantheon inde vocata est;  
 Mox impetratam Romano a principe Phoca,  
 Christiparæ matri, Marfus Bonifacius ædem  
 Dedicat, ipsa ubi cunctorum regina Deorum,  
 Alma Dei colitur Genitrix, & Martyres omnes,  
 Sanguine qui fuso sortiti limen Olympi.  
 Ante fores templi stat porticus alta columnis:  
 Nomen ubi Agrippæ stat Consul, atque Severi,  
 A quo mox labens, fuit instaurata subinde.  
 Stant ex ære trabes tecti, stant ostia templi  
 Ejusdem Agrippæ cura, qui condidit ædem,  
 Quæ tota interior nitet incrustata tabellis  
 Marmoreis, quas alta Paros, rupesque Lacæna,  
 Quas porphyriacis tellus Marcotica venis,  
 Quas & ager sicciens misit de rupe Micipsæ.  
 Stant circum ingentes, interque sacella columnæ

Hisque Syracosio capita insignita decore.  
 Statque pavimentum diverso marmore fulgens,  
 Cujus enim spatium mensura constat eadem,  
 Undique per longum, quantum suspectus ad altum  
 Culmen, ubi os ingens auras admittit olympi;  
 Unde lacus curvos testudo exasperat ampla  
 Undique quadratos convexi fornicis orbe:  
 Qua patet impluvium media testudine templi,  
 Cujus tecta nitens argentea lamina texit,  
 Nunc ea liventis circumdat lamina plumbi;  
 Hac vice tectorum facta Constantis ephebi  
 Jussu, Bistonia Constantis ab urbe profecti,  
 Qui Romam veniens templum spoliavit, & urbem.

Nec procul hinc quondam Bonus hoc Eventus in agro  
 Stabat, ubi auspiciis eventus, & alea rerum  
 Expectabatur, donec manifesta paterent  
 Signa futurorum dubio nutantia voto.

Stabat & antiquo clypeata Minerva facello  
 Nota Meduseo crine, & fulgentibus armis,  
 Juxta quam divæ genitricis Virginis ædes  
 Cernitur, armisonæ cognomine dicta Minervæ.

Stabat Martis agro dictus locus ante Terentus,  
 Quo nunc quisque suo lapsu centesimus annus  
 Sacra retractatis cernebat publica votis;  
 Atque ubi Tartareus Dis, & Proserpina conjux  
 Tempa habuere pari titulo tellure sub alta,  
 Olim: nam quoties urbs lustrabatur, ibidem  
 Nomina nascentum, morientumque omnia in urbe  
 Ordine quæque suo describebantur in albo.

Stabat arenosi inter restagnantia Tybris  
 Tum Capræ celebrata palus, ubi conditor urbis  
 Armatos lustrans nusquam comparuit ultra.

Vana superstitio postquam cessavit avorum,  
 Et nova relligio, Christo sub principe summo  
 Atque salutifero, toto surrexit in orbe,  
 Conditæ templa Deo sacro mundissima cultu  
 Una velut genitrix Ecclesia, primaque sedes,  
 Et caput extollens, Romana, ad sidera cœli,

Jura datura aliis totum diffusa per orbem:  
 Extant & sacræ, præter quas scripsimus, ædes,  
 Nulla vetustatis referentes signa per agrum  
 Martis, ab antiquis patribus fundata. sacrisque  
 Urbis præsulibus, veluti quam maximus ædem  
 Papa olim Paulus Venetus reparavit, & illam  
 Pontificis summi fundatam munere Marci,  
 Marce tibi aligeri sub imagine culte leonis,  
 Et quod pictura templum exornavit, & auro,  
 Adjecitque domos, & magna palatia circum,  
 Ima in parte fori Trajani, & rupe Tonantis.  
 Extat item, Xystus qualem instauraverat olim,  
 Una ubi bissesti venerantur Apostoli in æde.  
 Quam Constantinus princeps fundavit, & ipse  
 Tertius everfam reparavit Papa Joannes.  
 Circumquaque novo spatio, nova mœnia Xystus  
 Protinus in morem munitæ condidit urbis,  
 Colle sub antiquo, celsa sub rupe Quirini.  
 Proxima Marcelli stat testis ara paternis,  
 Ipsa ubi jam stabulis prius inservivit equorum  
 In regione viæ veteri cognomine latæ,  
 Quam prope diva parens renovata visitur æde;  
 Hic ubi delituit divus pro tempore Lucas,  
 Pinxit ubi formam, quæ illic est Virginis almæ.  
 Sunt & parva suis delubra auctoribus orba  
 Prætereunda mihi lato Mavortis in agro,  
 Sed quæ digna extant memoratu scribere pergam.  
 Nec prætermittens magnum & spectabile templum,  
 Augustine tuum, renovatum nuper, & auctum;  
 Quod Rothomagensis pater instauravit, & altis  
 A fundamentis condens erexit ad auras;  
 Nam fuit ille potens pater, & ditissimus heros.  
 Stat prope Flaminium Circum spectabilis ædes,  
 Quam Paradinenlis, patriaque Alfonsus Ibera,  
 Ac Nosocomium conjunctum condidit ædi,  
 Dux Jacobæ, tibi, gentisque assertor Iberæ.

Hic ubi gymnasium media spectatur in urbe,  
 Musarum studiis, & pubertate decorum,



Eugenii quarti auspiciis, & munere primum  
 Fundatum, cui Roma dedit stipis annua dona  
 Palladias artes illic præbenda professis;  
 Hæc loca Alexander renovavit Sextus, & auxit,  
 Atria porticibus designans ampla superbis.  
 Atque academiacas priscorum more diætas,  
 Et subiecta suis subsellia docta Cathedris;  
 Pallas ubi, & Musæ custode sub Hercule florent,  
 Cecropiis quondam veluti florebat Athenis.  
 Quæsta diu Pallas, testæ intermissa tumultu  
 Bellorum assiduo, posita jam casside, tandem  
 Te Leo dive petens, Musis comitata decoris,  
 Alme pater, nostris excellens artibus, inquit,  
 Quem nos præstantem cunctis præfecimus unum,  
 Perfice Palladias, hoc solum poscimus, ædes,  
 Nam te, summe Pater, longo expectavimus ævo.  
 Hinc post Flaminii spectacula diruta Circi,  
 Solis ad occasum divæ stat Virginis ædes,  
 Quam modo fornicibus struxerunt Theutones altis.  
 Stat quoque contiguum Pacis cognomine templum  
 A Xyxtro quarto erectum, & post bella dicatum  
 Regina superum pollens ad vôtâ facellum,  
 Liminibusque frequens tritis, & lumine denso.  
 Stat Servatoris, lauri cognomine, templum  
 Jordanum ad montem prædivitis ære Latini  
 Fundatum Patris, Ursinorum e gente suprema;  
 Strata pavimento diversi marmoris ædes.  
 Nec procul hinc Celsi celebratur martyris ara  
 A fundamentis rursus instaurata profundis,  
 Clara ubi porrigitur spatium via recta patenti,  
 Ex Æli ponte, ad nova fundamenta plateæ,  
 In qua lata Fori signata est area magni,  
 Ad cujus lævam præclara palatia surgunt,  
 Quæ quondam Hispanus fundavit Papa Calistus,  
 Orbis ubi causæ, decretaque sacra geruntur;  
 Signanturque notis ubi nunc diplomata sacris.  
 Parte alia moles faxis operosa quadratis  
 Ex Tiburtina salebrofa rupe paratur;

Hic ubi iudicii capitalia jura severis  
 Decernenda manent Creteis fortibus, unde  
 Libera nec Venus, aut Mars indemnatus abibit.  
 Hic ubi pectinibus ferri stat martyr acutis  
 Membra lacer Blasius, Tyberina in fronte locatus;  
 Haud procul hinc nitidis stat virgo Lucia testis  
 Conspicua, & votis, nec non laquearibus aureis.  
 Plurima templa extant, ædesque, & tecta per urbem  
 Ac Nosocomia, & collegia sacra virorum,  
 Vestalesque chori, diversaque dogmata patrum,  
 Privatæque ædes, & publica limina passim;  
 Et loca cuncta Urbis, quorum si nomina vellem  
 Sectari numeris, opus esset Homericus ardor.

## A D A M I F U M A N I

## V E R O N E N S I S .

20 02

*Sub Effigie Athila Hunni.*

**F**Ax Orbis ille, incendium, pallor, pavor,  
 Europa monstrum quem novum genuit parens,  
 Marris ferus quod carnifex foret suæ,  
 Qui barbaro superbus ipse spiritu,  
 Dei Flagellum nomen indidit sibi;  
 Terris furens satelles irati Jovis,  
 Per quem fuere sæcla facta ferrea,  
 Quum quaque mores usque fudit barbaros;  
 Quo se ore vivens ferre suesset Athila,  
 Tabella Jovii hæc indicat planissime.

0220

*Sub Effigie Totile.*

Immanis ille, pestis Urbis, barbarus,  
 Qui barbararum gentium terror, sui  
 Ad Ortum ab Occidente fines Imperi  
 Olim feroci Marte dilataverat;  
 Qui nostra vastitate cuncta perculit,  
 Vicos, agrosque, civitates, oppida,  
 Ritu procelle, turbinisque acerrimi.  
 Deo, atque hominibus abominatus Totila,  
 Hac in tabella pictus, hospes, an vides  
 Ut sævus, importunus, impotens, adhuc  
 Stragem minetur ore, cædem, sanguinem?

*Sub Effigie Martini Turriani.*

Ruebat Eccelinus acer Italus,  
 Fretus tremenda militum ferocia,  
 Tremendus ipse diritate barbara,  
 Urbem superbam, maximam, perlucidum  
 Sidus togatæ ut perdomaret Gallie:  
 Tyrannus Eccelinus ille pessimus,  
 Illud Deo, atque hominibus infestum caput,  
 Quotquot fuere, quotque sunt, quotque umquam erunt  
 Longe Tyrannus omnium teterrimus:  
 Ab corde cujus exfularat funditus  
 Fas, jus, pium, rectum, pudorque, æquum, & bonum:  
 Qui tenera membra parvulorum ab ubere  
 Matrum revulsa, disseccare per scelus  
 Mucrone duro suctus ipse durior:  
 Quin (proh nefas!) & mulierum prægnantium  
 Extenterare amabat (o dirum nefas!)  
 Exenterare amabat alvos impius  
 Horrente scalpello: te nihil, mater, verens,  
 Lucina, justis quæ vocata partibus  
 Nitentium audis pia lacrimosas preces:

Quæ

Quæ sæpe sæpiusque repetitæ, illius  
 Numquam feroces spiritus, numquam feri  
 Durissimum mollire pectus quiverunt.  
 Et hoc Patavi novit alma civitas,  
 Vicinaque illi fertilis Vicetia,  
 Tuque urbs frequens, vetusta, magna, nobilis  
 Verona, mater urbium pulcherrima,  
 Novisti, & ante tu beata Brixia,  
 Tum facta ab illo urbs omnium miserrima.  
 Ruebat Eccelinus acêr Italus,  
 Qualis sonantis vis corusca fulminis:  
 Quum Turrianus ecce vir fortissimus  
 Martinus, indignatus, ut spumans apes  
 Lucanus, aut Sabellus, aut Afer leo,  
 Getula pubes quem veruto perpulit  
 Exire notis saltuum recessibus,  
 Clamosa pubes, & Numidicorum canum  
 Animosa vis latratibus sævis ferit,  
 Quum colla, & armos vestientibus jubis,  
 Caudæ flagello identidem graves sibi  
 Villosa terga verberans iras ciet,  
 Secumque cæco murmure dubitat ferus,  
 Quæ prima mordens obterat venabula:  
 Sic ille, acerbæ ut servitutis imminens  
 A civibus propelleret jugum suis,  
 Formidoloso & ipse cinctus agmine,  
 Virtute fretus exsilit mirabili  
 Seni incitatus obviam acerrimo,  
 Primaque pugna vulnerat, vivum capit,  
 Asportat, inque claustra cæci carceris  
 Contrudit; ubi post dirus is, diris modis  
 Squallorequæ, ac pedore tetro, pessimis  
 Suis sceleribus debitas pœnas luit.  
 Quo pervagante tam beato nuncio  
 Late per agros Italûm, perque oppida,  
 Passim puellæ virgines ductis choris  
 Lætæ canebant voce tinnula simul:  
 Martine Turriane, Martine inclite,



Tu liberator urbium, tu patriæ  
 Servator exstiristi, & omnes omnium  
 Laudes tulisti: nempe nostra tu omnibus  
 Nobis dedisti habenda, quum nefarios  
 Latronis ausus contudisti, & omnibus  
 Mentem addidisti civibus trepidis tuis:  
 Tibi & mariti conjuges, & conjuges  
 Debent maritos, atque utrique liberos.  
 Debent parentes liberi tibi quoque:  
 Tibi nos pudicitiam, tibi decus, tibi  
 Nostram incolumitatem, tibi jam denique  
 Nos nostraque en debemus hæc tibi omnia.

*Sub Imagine Canis Scaligeri.*

Scaliger, anne tua istæ, Canis inclite, imago est  
 O cari capitis cara mihi effigies.  
 Illene tu, profugis quondam qui vatibus unus  
 Portus eras, arx, spes, præsidium, columen?  
 Gaude, heros redive, heros bellicque domique  
 Illustis, juncto viribus ingenio.  
 Ecce tibi ut veteres Jovius renovavit honores,  
 En te ut honoratis junxit imaginibus!  
 Macte, tuum tersa nitidum rubigine nomen  
 Factum, jam poterit nulla abolere dies.

*De Francisco Carmagnola.*

Sedula apis veluti maturis advolat uvis,  
 Ut liquido vacuas distendat nectare cellas;  
 Ad te sic mea se celerit tulit impetè Musa,  
 Bellica quem ad magnos virtus evexit honores,  
 Francisce, æternum pietas per sæcula nomen  
 Cui peperit; cuncto procerum quum adstante senatu,  
 Ac magnis una tecum de rebus agente,  
 Ad scabrum haud veritus confestim exire parentem es,  
 Fortiaque infirmo circumdare brachia collo.  
 Scilicet hoc unum malit, quam mille referre

Gesta tua præclara, & victo ex hoste trophæa,  
 Magnorum decus Insubrum, Dux inclite: tandem,  
 Orta licet subito fractum te adtriverit ingens  
 Tempestas, Caurique, importunæque procellæ;  
 Ne dubita, tua te pietas, tua maxima virtus  
 Venturo meritis cumulabit honoribus ævo.

*In Imaginem Andreae Gritti, Venetorum*

*Principis.*

Ut vigili, doctoque ratis simul acta magistro est,  
 Undique ut aërii verrant freta cærulea venti,  
 Nec ventos, validasve timet secunda procellas;  
 Credere sed pelago, ac magnis se fluctibus audet:  
 Sic Duce te urbs prognata mari, sic Principe, Gritte,  
 Bellorum ut sciret magnos instare tumultus,  
 Bellorum metuit nullos interrita casus;  
 Sed Martis dare se magnis cita motibus ausa est.  
 Ut ratis illa eadem docto si cassa magistro est,  
 Ut nulli nusquam turbent freta cærulea venti;  
 Et ventos validasque horret malefirma procellas,  
 Credere nec pelago, aut ullis se fluctibus audet:  
 Sic Duce te Urbs, bone Gritte, eadem, sic Principe cassa,  
 Bellorum ut videat nullos instare tumultus,  
 Bellorum metuit cunctos exterrita casus;  
 Nec dubiis dare se Martis cita motibus audet.  
 Ut gregibus tauri, turres ut mœnibus, altis  
 Sunt decori, ut pelago naves cingentibus undis,  
 Sidera uti radiis internitet aurea Phœbe;  
 Sic tu, sic Venetum imperii dum sceptrâ gerebas,  
 Notus eras proceres inter, bone Gritte, superbos  
 Corporis eximia specie, virtute, animisque.  
 Nostratum o salve Heroum ter maxime; tu nunc  
 Et nostra posthac semper celebrâre Musa,

*Adventante Senectute se totum Deo dicat.*

Jam cana rugis asperat  
 Frontem senecta; corporis  
 Jam membra facta languida,  
 Sensim recedens in dies  
 Vitalis ignis deficit.  
 Sed hoc quid ad me, fervida  
 Patris supremi caritas  
 Me continenter si suis  
 Fovere pergit ignibus?  
 Ergo, o beata vivida  
 Cœlestis ignis flammula,  
 Magis magis me tu in dies  
 Fovere perge singulos.  
 Perge, o beata, perge dum;  
 Mihi usque perge amburere  
 Mihi usque perge absumero  
 Cor, ossa, nervos, viscera,  
 Venas, medullas, sanguinem,  
 Ipsamque mentem ac spiritum,  
 Ut totus ardeam tibi:  
 Ut atra quum mors frigidas  
 Afferre mihi volet manus,  
 Sic, flamma totus, flammeis  
 Alis Amorís lucidi  
 Hinc expeditus, ætheris  
 Altas ad oras subvolem;  
 Cognata ubi inter sidera  
 Non jam amplius memor mei,  
 Unum te amem, ac tua omnia.  
 Immo ardeam perenniter  
 Factus tui termamaximi  
 Scintilla parva incendii.


*In obitum Hjeronymi Fracastorii.*

Longe Vir unus omnium doctissimus,  
 Verona per quem non Marones Mantuæ,  
 Nec nostra priscis invident jam sæcula,  
 Virtute summam consecutus gloriam  
 Jam grandis ævo hic conditur Fracastorius.

Ad tristem acerbæ mortis ejus nuncium  
 Vicina flevit ora, flerunt ultimæ  
 Gentes, perisse musicorum candidum  
 Florem, optimarum & lumen artium omnium.

## LEONARDI FUSCI

## FORO JULIENSIS.

*In Petri Bembi obitum.*

**D**Um vacat, hic patriæ secessus inter opacos,  
 Quæque aurâ, & multo devia colle placent,  
 Mecum una indulgens vesano Musa dolori,

Dic age lugubri carmina mœsta sono.

Flendi obitus nobis, & tristitia funera Bembi,

Funera, quæ lacrimis haud decorare nefas.

Quæ doctæ, quæ vos tum causa morata, sorores,

Nec passa Adriacæ est Thetyos ire freta?

Amissum ingemeret Bembum cum Nereis illic,

Ac longe in mediis conquereretur aquis,

Cæruleum os, glaucosque sinus, fletu humida largo,

Canaque roranti pectora tunsa manu.

Vos decuit magnæ in partem properare querelæ,

Certatim & luctus ingeminare graves:

Nulli




Nulli hic quam vobis mage flebilis occidit, artes  
 Quarum adeo, & sanctos auxit honore choros.  
 Sæpe oras olim assuetus lustrare repostas  
 Phocidos, atque umbris avia grata suis;  
 Sæpe juga, irriguique Heliconis fontibus antra,  
 Antra nisi a casto non adeunda pede,  
 Illum ubi victuro ditastis carmine, vestras  
 Largius uni omnes & tribuistis opes,  
 Ut foret extenso quo se Adria tolleret ævo,  
 Jactaretque suas vate superbus aquas,  
 Vate, comas cui non solum, & pia tempora compsit,  
 Quæ Cynthi intonso est arbor amata Deo,  
 Verum a Tarpejo data pilea rubra Tonante,  
 Quique nitet roseo murice tinctus apex.  
 At non infelix istis tibi cultibus, isto  
 Ornatu, longum, Bembe, nitere datum est,  
 Quandoquidem exacto lustri vix tempore, postquam  
 Hæc ultro dederat munera Paulus, obis.  
 Et te non pietas, eheu, tutata merentem,  
 Non & religio casta, fidesque fuit,  
 Priscave simplicitas, ac candor pectoris, ipsæ  
 Qualem Sithoniæ vix habuere nives,  
 Atque æqui semper cultrix, & nescia fœdi  
 Criminis, a turpi & mens aliena probro.  
 Crudeles Parcæ, vestrum si fila, colusque,  
 Tot dotes, tot non sueta movere bona,  
 Quois insignem atrox funus nescire decebat,  
 Vitare & rapidi tristia damna rogi;  
 Heu quid vana optem, tumulis quemque occulit imis;  
 Atra quies, omnes & sua fata manent.  
 Quamquam, si tenebris aliquà se se eximit, alto  
 Nec penitus Lethes obrutus ille lacu est,  
 Cui decus ingenii quæsitum munere summum  
 Viventi, & cultis gloria parra notis;  
 Scilicet haud totus morieris funere raptus;  
 Bembe, tui & magna parte superstes eris;  
 Clarus & argutos inter celebrabere olores,  
 Quos Arnus, quos & Mincius amnis habet;


Nec

Nec fera eripiet latis tua nomina terris,  
 Cuncta potest quamvis imminuisse dies.  
 At fama (hanc donec tollet sua penna) loquetur,  
 Ornabitque magis laudibus, atque magis,  
 Consentur quacumque sacrae vocalia Cyrrhae,  
 Et studia, & lusus, Pieriusque labor.  
 Sed jam cessandum questu, & lugubria plectra,  
 Lugubrem nobis fas posuisse lyram.  
 Sat fletum: atque ipsum tumultum jam condere tempus,  
 Quem mandat Vati Musa parare suo,  
 Qua virides crescunt luci, vada propter amœna  
 Cœlinæ, & summis lapsa fluentia jugis.  
 Hic etiam extremo ut donetur honore, jacenti &  
 Structa quoque in nostro stent monumenta solo.  
 Quis violam indigenæ inspergant, & odora quotannis  
 Lilia, vivaci teque, amarante, coma,  
 Atque alios, quos dat flores, cum vernat aperto  
 Terra sinu, & cultu jussa virere novo est.





# BELISARII GADALDINI



*In fœdus ictum inter Principes  
Christianos.*

**C**Larior en solito exurgens natalibus undis,  
Cynthius afflicto passim nova gaudia mundo  
Nuntiat, haud sortis, venturique inscius ævi;  
Scilicet ut Reges inter sancita fideles  
Fœdera sint hodie Venetam vulganda per urbem,  
Surgite io juvenes, manibus date lilia plenis,  
Spargite humum foliis, Superumque altaria Divum  
Muneribus cumulate piis pro munere tanto.  
O quæ fatidicæ nobis felicia Parcæ  
Tempora promittunt! o quæ sæcla aurea surgent!  
Cum Libyæ extremo devictus Marte tyrannus  
Occidet, atque omnes una cum nomine Turcæ.  
Cernite, ut ante alios firmati fœderis auctor  
Ipse ingens pietate Pius, cui Rector olympi  
Turbine in hoc tanto terræ commisit habenas,  
Florentes populos inimica in prælia mittat;  
Quot Rex Hispanâ gentes tellure Philippus  
Effundat bello assuetas, & fortibus ausis;  
Quot Veneti cogant acies peditumque equitumque,  
Italaque ut pubes animis ardentibus arma  
Arma fremat; raucoque simul clangore turbarum  
Et nemora, & silvæ reboënt, collesque supini.  
Parte aliâ, innumeræ, leviter spirantibus Austris,  
Carbasa tendentes scindunt vada cærula, puppes,  
Barbaricamque petunt concordî fœdere classem.  
Quis tibi nunc, hostis, cernenti talia sensus?

Quo-

Quove metu trepidas? cum littora feruere late  
 Prospicias, totumque dehiscere classibus æquor?  
 Siccine jactabas rete, dum fœdere rupto  
 Adriacis partem Cypri multo agmine nuper  
 Cœpisti? tumidusque novo præcordia regno  
 Non hominum, non ulla Deûm sæva arma timebas?  
 Jam video Oceano in magno concurrere utrinque  
 Ardentes in bella rates; classemque rebellem  
 Funditus everti; vastumque tumescere pontum;  
 Dum rapido fractas absorbet gurgite naves,  
 Scuta virûm, galeas, devotaque corpora morti;  
 Inde Dei classem victricia signa movere,  
 Fervidus angustis qua faucibus Hellespontus  
 Æstuat, & longo fulcat duo littora tractu.  
 Hinc equitum turmas, peditumque hinc ire catervas  
 Regnisque & populis stragem exitiumque minantes,  
 Euphratem, Gangemque metu trepidare sub imis  
 Fluctibus, & septemgemi tremere ostia Nili.  
 Jam video exanimem pulso cum milite terga  
 Vertere, & ad Scythicos cursum contendere saltus  
 Selimum, ac sese extremis abscondere silvis;  
 Illum sectari Hesperios, animamque nefandam  
 Eripere, & mediâ resupinum relinquere arenâ;  
 Atque ita devictis divino numine Turcis,  
 Urbibus eversis, totoque Oriente subactis,  
 Victores prædâ immensa spoliisque potitos  
 In patrias urbes magnis remeare triumphis:  
 Tunc foliis redimita comas felicitis olivæ  
 Candida Pax late populos invisit ovantes,  
 Quam pia Religio incessu comitabitur æquo.  
 Tum fera bellandi rabies, & tristis Erinnyes,  
 Tum Maomethæ exitialia semina pestis,  
 Tartareasque domos, horrentiaque antra subibunt.  
 Aurea tunc læto nascentur sæcula mundo,  
 Sæcula quæ ventura olim volventibus annis  
 Veridici vates præfaga mente canebant.  
 Surgite io juvenes, manibus date lilia plenis,  
 Spargite humum foliis, Superumque altaria Divûm



Muneribus cumulate piis pro munere tanto.

*Super excidium Barbaræ Classis, tabellâ  
depictum.*

Quis violare ausit jurato fœdere pacem,  
Regna aliena jugo premere, atque excindere gentem  
Immeritam; patremque hominum, patremque Deorum  
Temnere, & immemorem sceleris putet esse nefandi?  
Ah te ne tanti rabies vesana furoris  
Exagiter, quicumque pii moderaris habenas  
Imperii: tenet ipse pater memor omnia mente,  
Et meritas sumit maturo tempore pœnas.  
En Asiæ Venetis pollutâ pace Tyrannus,  
Urbibus everfis, ingenti cæde peractâ,  
Contemptis victor Superis, tumidusque secundâ  
Sorte ruens, totumque fatigans classibus æquor,  
Ut cursu cadit in medio, victusque repente  
Sternitur, ac pœnas tanto pro crimine pendit.  
Non hæc consilio humano, & mortalibus armis  
Proveniunt; Deus ipse, Deus post funera mille,  
Post mille exhaustos terræque marisque labores,  
Nos tandem aspiciens, æterno fœdere pacis  
Tergeminos junxit Reges, tria fulmina belli,  
Armavitque pias cœlesti robore mentes,  
Et dedit indomitas hostis contundere vires.  
Cernis ut Jonio concurrant æquore utrimque  
Frontibus adversis inimica in bella triremes,  
Ac vario ardentes incant certamine pugnas?  
Infraſti utque duces Orientis, & agmina late  
Hesperio sub Marte cadant? congestaque classis  
Centum annis, centum victrix successibus una  
Luce ruat? viden' infectas quam multa per undas  
Telaque Threicioſque arcus, Lyciasque pharetras  
Verſet, & hostili turgescat sanguine pontus?  
Pascere oculos, animumque tuum, miroque labore  
Artificis frueri, ac partis lætare triumphis,  
Te tamen hoc unum semper præque omnibus unum  
Ad-

Admoneat, miseris quantum mortalibus obfit  
Justitiam, & summi Regem contemnere olympi.

## J A C O B I G A D D I I

F L O R E N T I N I .



*In laudem Ferdinandi II. Caesaris.*

**G**randis ut Heroum virtus æterna vireret,  
Laurigeri sudans conscendi culmina Montis,  
Spicula flammiferi Canis, atque horrentia brumæ  
Frigora contemnens, & sacro percitus æstro  
Hauſi vitalem doctore ab Apolline cantum,  
Mortis, & ignaræ victor caliginis ardens.  
Invidia incaſſum Stygias jaculata ſagittas,  
Fregit, virtuti quæ miſcet pocula fellis,  
Cognatoſque truci corroſit dente ceraſtas.  
Scilicet inuidiæ ridet mala fulmina virtus,  
Et domat omnivori pernices temporis alas,  
Si paret æterni felices carminis alas  
Æthereus vates: noſtrum ne deſpice munus,  
Heroum ſoboles, Romanique arbiter orbis,  
Qui Reges domitas, qui donas regna ſubaſtis,  
Quique rebellantes felici Marte catervas  
Proteris invictus, vel iniquæ turbine ſortis  
Concuſſus, vaſto qui nuſquam in corde timorem  
Excipis; indocilem frangi, ignarumque pavoris,  
Non populorum ardor, non conjurata rebellis  
Agmina terrificant terræ, non fulmina Cœli,  
Non peſtes Erebi, triplicis quem machina Mundi,  
Si caderet ſtabili convulſa a ſede, feriret  
Impavidum.

Quid referam Heroum ſeriem, centenæque Regum

Nomina, qui gemini frenarunt limina Solis,  
 Queis fortuna novum patefecit fertilis orbem,  
 Ipsa gradum sistens (mirare) immobilis, amplum  
 Imperium firmat generosæ in cardine prolis;  
 Cæsareæ cujus numerant capita alta coronæ,  
 Cognatasque comas regnatric infula nectit,  
 Sed tibi quot pariunt famulantia Regna coronas,  
 Tot tibi virtutes nectunt diademata, Cæsar;  
 Nullum at splendidius, quam Relligionis alumna  
 Arte laboratum, gemmis cœlestibus ardens.  
 Scilicet arbitrium generosi Cæsaris una  
 Vindicat, æquævique vehens trans mœnia Solis  
 Nectit adorantem mansuro fœdere divis.  
 Hanc sequitur Gravitas, & veri sancta cupido,  
 Nudaque simplicitas fraudes exosa latentes.  
 Quæque inconcusso clypei septemplex orbe  
 Munita infringit virosæ spicula linguæ  
 Integritas, ridetque minas Acherontis avari;  
 Mitis & astringeri moderatrix orbis, alumna  
 Pacis, ad immanes Erebi quæ torquet hiatus  
 Iramque, & rabiem, truculentaque jura furoris.

*In laudem Uladislai Regis Polonia, Sveciæ, &c.  
 Magni Ducis Moscoviæ.*

Aura, o progenies aëris innocens,  
 Lepor orbis, & voluptas,  
 Ades Aura, quæ maritas  
 Peramœna prata Floræ,  
 Dum florentia fundis  
 Astra floribus supernis  
 Pulchriora, blandiora,  
 Tu per liquidos aëris agros,  
 Super aurigas carmina pennas  
 Nostra Heroem defer ad altum,  
 Qui Sarmaticis imperat oris.  
 Olli sidereo texat de flore coronam  
 Phæbi docta cohors, virtutum munere dives.

Quæ

Quæ candore nives Ismarias superant,  
 Lilia desert, arbitra linguæ,  
 Cordisque, fraudum non docilis Dea;  
 Quæque ligat stabili pacta adamante Fides;  
 Quæque viros superis mansuro fœdere nectit,  
 Porrigit æternas flammæa diva rosas.  
 At quæ præteriti conscia temporis,  
 Venturique sagax vitreum bis consulit orbem,  
 Maculis violas pingit amœnis.  
 Devota Marri, fulminis æmula  
 Virtus, æthereo calore præstans  
 Aurea flaventis diffundit munera calthæ.  
 His opifex texat radiantem Musa coronam,  
 Cui nusquam tellus vidit alumna parem.  
 Ne jactes, Ariadna, tuum diadema, noveno  
 Sidere ab æternis quod tibi fulget agris;  
 Scilicet illa tuis florebit gratior astris,  
 Sarmaticique comas nectet Jovis, usque phalanges  
 Qui tumidas fudit bellantis fulmine dextræ,  
 Quem pavet Boi regnator barbarus orbis,  
 Qui fera Threiciæ perfregit cornua Lunæ.  
 Quique satum patulo Moschorum in corde timorem  
 Martius hostili nutrit sanguine cultor:  
 Regnaque centenas pariunt cui subdita palmas,  
 Victurumque opifex molitur gloria Templum.

*De Patria, atque immortalitate Musarum.*

Hæc virgo tellus, nescia vomeris,  
 Injuriolis invia gressibus,  
 Quæ Solis auratis patescit  
 Crinibus, astrigeræque turmæ.  
 Hic Gratiarum dulce loquentium  
 Agmen choreas ducit amabiles,  
 Cognata Nympharum caterva  
 Dum sociat, replicatque saltus:  
 Hæc flexuosis orbibus æra  
 Supervolantis flaminis æmula



Urget gemellum; mox jacentem  
 Quassat humum redeunte gressu.  
 Hic & sorores, Mnemosynes genus,  
 Plaudente Phœbo præside carmina  
 Æternitati destinata  
 Ambrosio modulantur ore.  
 Audi canentes; temporis arbitras  
 Nihil moramur sæva necessitas,  
 Quas Phœbus æternum sacrauit,  
 Fulminibus metuit ferire.  
 Busto superstes vivit ab invido  
 Mens sacra Phœbo; hanc mellifluus latex  
 Irrorat, æternatque præsens  
 Juppiter ambrosia Deorum.

*Descriptio Noctis.*

Jam Nox triste caput nectens crinalibus umbris  
 Spargebat facili somnia vana sinu;  
 Jam Dea venatrix cornu munita, ferarum  
 Agmina per Cœli clara premebat agros;  
 Florea progenies cœlestibus æmula gemmis  
 Amittebat inops luminis omne decus.  
 Silvaque vocalis cantu viduata phalangis  
 Parcebat refluis ludere mœsta comis.

*De Barbara Tiliamocha Virgine Poëtria,  
 & Cantrice.*

Si de supremis Calliope rotis  
 Æterna proles sceptriferi Jovis,  
 Vitale concentu beatrix  
 Florigeras peteret columnas;  
 Quis non canoræ nectareum melos  
 Haurire Divæ certet? honoribus  
 Quis non coronet invidendis  
 Numen, & obsequio verendum?  
 Quo me calentem, Phœbe, potens rapis?

In celsa numquid mœnia siderum?  
 Num forma regnatricis ab axe  
 Labitur in patrios penates?  
 Auditis? aures sidereus quatit  
 Sonus, catenas neciteret amnibus,  
 Belvasque frœnaret rebelles,  
 Sisteret ac volucrum phalanges.  
 Illapsa certe in pectora virginis  
 Mens pura nostræ Calliope canit,  
 Aut virgo mentis æmulatrix,  
 Musa recens fluitantis orbis.  
 Sic est: recentem mox ego carminis  
 Ducem precabor, auspice qua modos  
 Vibrare pennatos oloris,  
 Et socias animare chordas  
 Fas est. Gigantum cum Jove prælia  
 Depingat alter prodiga fulminis;  
 Aut usque victrices phalanges  
 Romulei celebret Senatus;  
 Aut Barbarorum cladibus inclitum,  
 Cui Flora mater, Pannoniæ ducem  
 Pubis, triumphantem Scholarum:  
 Ipse super famularis alas  
 Famæ volantem te prior eveham,  
 Facunda virgo, fax nova floridæ  
 Telluris, æternos honores  
 Cui parat Aonidum caterva.

*Ad Victoriæ Roboream Magnam Ducem  
 Etruriæ.*

Salve, o Tyrrhenæ regnatricis inclita gentis:  
 Salve o Roboreæ dulce decus sobolis.  
 Excelsa conjuncta Duci, genitura Minervæ  
 Heroas, Reges Urbibus, astra polo.  
 Sic voveo, sic prædico, sic monstrat Apollo:  
 Decipiet vatem divus Apollo suum?

*Ad Margaritam ab Etruria Parmæ, & Placentia  
Ducem.*

Heroum soboles, gentilibus aucta triumphis,  
Me rapis in laudes. Dux celebranda, tuas.  
Dia tibi Venu, ambrosios afflavit honores,  
Fovit & obsterrix pectore dia Charis.  
Vix natam æternum complexa Modestia nutrix,  
Texuit atque faber florida ierta Pudor.  
Artibus egregiis coluit Jove nata Virago;  
Nectare Castalidum proluit alma cohors.  
Quid mihi gentiles Heroidas obiiicit hospes?  
Has Heroïnas una puella refers.


*Prosopopœja Arni in laudem Gber. Saraceni  
Provisoris Gymnasii Pisani, &c.*

Quæ nova felici spectacula lumine cerno,  
Quæ nunc Pisano scena patescit agro?  
Dum ciet Ismario Saracenus pectine chordas,  
Argutæ socians carmina docta lyræ,  
En sitibunda soni labentes flumina lymphas,  
Frænat & aligeros blandior aura pedes.  
At dociles agitant Nymphæ per prata choreas,  
Dum Charites ludunt, ludit & alma Venus.  
Illas ambrosii comitantur pone lepores;  
Hanc amor, & lusus, deliciæ, atque jocus.  
Assurgunt faciles tenero de cespite flores,  
Atque aurita petit sylva canentis ebur.  
Sceptraferique adsunt posita feritate leones,  
Ipsaque nunc cædis nescia tigris adest.  
Cornigerique greges adsunt, volucrumque phalanges.  
Saxaque natali duritie posita,  
Non secus ac dominam resonans cum fieret ademptam  
Bistonix vates rector, honosque plagæ.  
Hic per hyperboreas glacies, Rhodopesque pruinas  
Noxia flebilibus verberat astra modis.

Scilicet Eurydicen fatali vipera dente  
 Ad nigra regna Jovis compulerat Stygii.  
 Tænareas fauces cythara penetravit amante,  
 Horridaque Ismarius mœnia Persephones.  
 Infucto victi stupuerunt carmine manes,  
 Vincitur anguineis feta Megæra comis:  
 Exangues lacrimant animæ, precibusque canoris  
 Franguntur rigidi pectora abena ducis.  
 Redditur Eurydice poscenti, dum nova vitæ  
 Stamina fatalis ducere Parca jubet.  
 Jamque virum sequitur, dedit hanc Proserpina legem,  
 Sed legis conjux immemor, atque sui.  
 Respicit instantem revolutus amore tyranno;  
 Legibus hic famulos comprimit usque suis.  
 Heu Stygiæ infelix rupisti federa Divæ:  
 Heu nimio Eurydicen cædis amore tuam.  
 Illa ruit Erebi rursus devota tenebris,  
 Quæque semel vixit, bis moritur misera.  
 Nequicquam prensas, Orpheu lacrimabilis, umbras;  
 Non datur amplecti deficientem animam;  
 Qua moveas prece inexorabile Numen Averni?  
 Nempe semel tibi sit restituisse satis.  
 Forte Abbas rursus obtineat dulcedine cantus,  
 Quo potis est ferri frangere duritiem.  
 Hunc mirata suos cohiberent sidera cursus,  
 Concentus major cujus in ore sonat.  
 Par quoque nobilitat morum symphonia Vatem,  
 Quos blando virtus temperat obsequio.  
 Quid mentis referam divinas carmine pennas,  
 Queis volat astra super, cœlicolumque choros?  
 Unus inaccessi solium venerabile Solis  
 Scandit, & a lucis fonte bibit radios,







# LAURENTII GAMBARÆ

B R I X I A N I .



*Ad Franciscum Robustum, Tarracouensem.*

L I M N I A C E .

**E**Gregium, Francisce, genus, cui conscia veri  
Pectora sunt; qui sacra tenes, & civica jura,  
Ne desis, dum pacato filet æquore pontus;  
Limniacen neve ad littus contemne dolentem.  
Nocturnos stellarum ignes vix Lucifer alto  
Dispulerat, vix orta dies renovaverat orbem  
Luce nova, dum ros madido de gramine nondum  
Decutitur, sed adhuc reficit sua pignora tellus,  
Et late redolent lætissima floribus arva:  
Cum petiit mœrens secretum Cnosia littus  
Limniace, quam mista Amyco Lyrnessia Leuce  
Connixa est furtim, multa qua pronus arenâ  
In pelagi tumidas raptim fluit Inachus undas,  
Tum mare prospiciens, dubiique incommodæ ponti,  
Hos questus secum solâ meditatur arenâ:  
Infelix virgo, liquit quam miles amator;  
Et prædas, atque arma sequi, rapidosque calores  
Sæpe pati, longasque hyemes, & frigora brumæ  
Maluit, & gelido captare sub æthere somnos.  
Interdum tamen & belli furor impius, & Mars  
Factâ pace filet; victor directa reportat  
Hostibus arma domum: mox sese ex ordine captos  
Accingit memorare duces, longoque vicissim

Con-

Contusos bello populos; superataque regna  
Dum memorat, nunc ante sui nota ora mariti  
Læta sedet, fruiturque viri sermone; nec ullis  
Exercet curis vitam, nec pignora curat:  
Et nunc mœsta silet dubio in certamine conjunx,  
Vulnera dum, bellicque vices, & prælia narrat.  
Piscator pelago captat seu flumine, pisces,  
Sive laco stagnantis aquæ; cum vesper amictu  
Nigranti gelidæ noctis se obnubit, ad urbem  
Cum prædâ lætus properat; gravis inde revertens  
Ære domum, parto fruitur cum conjuge carâ:  
Et visco qui fallit aves, seu retibus, & qui  
Vertit humum ferro incurvo, seu mollia falce  
Prata secat, frugesque metit, cum sacra Sacerdos  
Indicit populis, redeunt ad dulcia testâ;  
In triviisque agitant choreas, quas esculus umbrâ  
Ingenti tegit, & ramis frondentibus ambit.  
Venator silvas primâ sub luce fatigat,  
Involuitque feras laqueis, aut comminus hastâ  
Infensa aggreditur, moriens cadit illa repente  
Ante oculos, juga summa petit vel saucia, & altis  
Se condit nemorum jamjam moritura latebris;  
At conjunx lecto carpit secura quietem;  
Ille at enim lætus spoliis, & cæde ferarum,  
Fert serâ se nocte domum, carosque penates  
Invisit, tenerisque diu complexibus hæret;  
Infelix, quam pastor amat, cui flumina cordi,  
Et nemorum dulces umbræ; qui montibus ævum  
Exigit, aut convalle cavâ: lentusque sub umbra  
Populeâ pecudum numeros & signa recenset,  
Et modo pascit oves, viridi modo ludit in herbâ  
Agrestem calamis Musam; modo ducit ad alta  
Flumina jam saturos herbosâ in valle juvenços.  
Expectat tamen hunc residens in limine conjunx,  
Et lassum amplexu molli fovet: ille sub altis  
Claudit oves stabulis, dapibusque epulatur ad undam  
Fluminis, aut viridi in luco, qua murmurat unda,  
Frondentem subter pinum, silvamque comantem.

Infelix illa ante alias, quam torquet amator  
 Navita: nam seu frigus habet terrasque fretumque,  
 Seu floret ver purpureum, seu messor in agris  
 Maturas segetes tondet, seu colligit uvas  
 Vinitor; ille tamen lætus tenet æquora puppi,  
 Miraturque novas alio sub cardine terras,  
 Littoreis capiturque locis, & gaudet ab alto  
 Prospiciens humiles terras, atque invia Nerei  
 Regna, levesque maris volitare per æquora puppes,  
 Oblitus patriam, & dilectæ conjugis ora.  
 Quàm ferus ille, minas pelagi qui primus, & atro  
 Turbine commotum sprexit mare, seque procellis  
 Miscuit hunc Libycæ genitum de stirpe leænæ  
 Crediderim, Stygioque genus deducere ab Orco.  
 Quid profunt mihi curalia? & tua munera quondam  
 Hesperio deventa sinu, quaque altus in æquor  
 Se mergit late Ganges, ubi plurima toto  
 Littore gemma micat vario perfusa colore?  
 Immitis Celadon, sæva æquora semper amabis,  
 Et varios pelagi casus? jam vertitur æstas  
 Altera, nec curas patrios invisere portus.  
 Care redi, care ô Celadon; te te tua conjunx  
 Limniace manet, & lentos suspirat amores;  
 Nam mihi amara dies sine te, lacrimosaque nox est,  
 Vestis acu te picta manet, quam flexilis ambit  
 Limbus, & intextis circum nitet alba figuris,  
 Cernere erit fluitantem undis ab Apolline Delum  
 Firmatam, quæ prima altis emerfit ab undis.  
 Ut primum pater omnipotens subsidere pontum  
 Jussit, & immisso nimbos Aquilone removit,  
 Illic aspicias intacta per æquora puppim  
 Evectam, & Scythici tendentem ad Phasidos oras:  
 Puppe sedet procerum princeps, & ductor Jason;  
 Hunc juxta Agniades clavum regit, & vigil auras  
 Explorat, cœloque norat radiantia signa:  
 In medio ratis Alcides sedet arduus, omnesque  
 Argivos torvo proceres supereminet ore.  
 Quos inter citharâ auratâ dum personat Orpheus,  
 Astro-

Astrorum primos ortus, & semina rerum,  
Et mare seclusum terris, & ab æthere cælum;  
Subsidunt pelagi fluctus, & euntibus auræ  
Adspirant, mitisque favet Deus æquoris alti.  
Proximus his Euphemus adest, qui summa parentis  
Per freta Neptuni pedes incedebat, & auras  
Æquabat rapido cursu; cui non procul, hastâ  
Insignis, gladioque hæret Sicyonius Actor;  
Threicii in medio procerum stant agmine fratres  
Alipedes, quibus albentes cava tempora pennæ  
Attollunt sese circum; quibus aëra magnum  
Nubilaque alta secant rapidi, cœloque fruuntur;  
Cærulei per colla fluunt, per pectora crines,  
Dependent pharetræ; curvaraque taxus in arcum  
Ex humeris; lateri Ismarius sine cuspide mucro  
Dependet bullis circum insignitus, & auro,  
Ast alii juga longa tenent; hic Castora cernes,  
Pollucemque simul, quos uno candida partu  
Leda tulit, quorum contendere cestibus alter,  
Alter equos domitare bonos, vel vincere cursu;  
Queis radiant capiti galeæ, flammisque coruscant,  
Ardentes stellarum apices argentea velant  
Tempora, & aurato rutilat de vertice fulgor.  
His se Deucalion comitem Gortynius addit,  
Quique Jovi referebat avum, galeaque superbus  
Ex auro gerit Europam, Nymphasque vocantem,  
Cœlestesque Deas Sidonia marmora propter,  
Et tauri evectam Diætæa ad littora dorso.  
Ipsa Argo ventis inacta per æquora fertur,  
Quam circum exultant Nymphæ; miratur & omnis  
Neptuni chorus Heroas, radiantia longe  
Arma ducum, fulvoque ratem proscindere rostro  
Hactenus ignotum miseris mortalibus æquor.  
Parte alia stupet æquoreis Neptunus in undis,  
Miratus molem insuetam, & data carbasa ventis,  
Attonitusque haurit strepitum, dum marmora remis  
Pulsa secant magni Heroës, dum remige forti  
Cyaneas superant cautes, & inhospita ponti

Æquo-



Æquora, & optato se tandem littore sistunt.  
 Omnia quæ quondam senior mihi rettulit Agmon,  
 Dum mecum sedet ad littus, curasque relictæ  
 Colloquio levat, atque inopem solatur, & una  
 Exorat multis Nereïa Numina donis.  
 Pergebat memorare suos malesana dolores  
 Limniace; sed Sol vetuit; nam luce supremos  
 Spargebat solitâ montes, passimque sub ipso  
 Lumine splendebat tremulum mare; flabra vocabant  
 Perfusos somno vicino in littore nautas.  
 Hæc postquam de more preces pro conjuge fudit  
 Cœlicolis, lacrimans sese ad sua tecta recepit.

## T E L O N.

Orta dies sine nube polo fulgebat ab alto,  
 Et rutilis Phœbus radiis, curruque nitenti  
 Aureus Eois sese referebat ab undis,  
 Adriacique minas pelagi, commotaque fundo  
 Æquora placarat passim Neptunus, & omnem  
 Ventorum rabiem tenebroso clauserat antro  
 Æolus; & placidum subter mare pascua Delphin  
 Carpebat, virides algas, & gramina nota.  
 Non fragor auditur silvis, non littore curvo  
 Nigrantes ludunt fulicæ, non bucula ventos  
 Captat: at ipsa, hyumis secura, in valle virentes  
 Nunc avido dumos morfu, nunc pabula tondet.  
 Cum procul adventare ratem per cærula cernit  
 Sublimi stans puppe Telon, dum prospicit altum  
 Æthera jam vacuum nimbis, & murmure littus.  
 Dum vero procurva legit loca concita puppis,  
 Arma Telon habitusque virum, pîstasque biremes.  
 Novit, & è puppi surgens sic infit ab altâ:  
 O ratis ante alias felix, quæ spumea verrunt  
 Cærula, quæ pelago tecum mea gaudia defers;  
 Et magnas Orientis opes, & Lydia regna;  
 Tu pelagi decus omne, Deûm tu munera tecum  
 Sola vehis; tu digna magis, quam nobilis Argo,  
Side-

Sidereos inter cœli splendere cursus;  
 Quamvis illa foret Divæ fabricata Minervæ  
 Auxilio jussuque, vagi prope flumen Anauri,  
 Quæ posset tumidis Neptuni obstare procellis,  
 Et cavere instantes subjecta per æquora casus,  
 Venturasque hyemes pelago, nisi candida Circe  
 Flebilis Absyrti crudelia fata piasset;  
 Nec classi invidas Phrygiæ, quæ per freta longa  
 Cum vetitos peteret thalamos, abduxit ab oris  
 Tænariis Argivam Helenen; licet illa Læœnas,  
 Iliacasque nurus niveo candore, comaque  
 Per roseos diffusa humeros superaret, & ore  
 Egregio, summoque foret Jove nata parente,  
 Et sola Argolicas ad prælia cogeret urbes.  
 Non tamen inferior forma est pulcherrima Leuce,  
 Quam vehis Adriaci pacata per æquora ponti,  
 Incolumem in patriam tepidi sub tempora veris.  
 Cymothoë formâ inferior, te iudice, Triton,  
 Est tua, si te vera loqui sinit igneus ardor.  
 Nereides, quarum domus est mare, dicite Nymphæ,  
 Dicite vos; vidistis enim, dum rector Olympi  
 Juppiter in faciem tauri mutatus, ad urbes  
 (Qua rapido resonat fluctu Gortynia tellus)  
 Sidoniam veheret fraterna per æquora prædam,  
 Quæ fuerit Jove digna magis; tuque humida ponti  
 Cui freta subiiciunt sese, magnique fluenta  
 Oceani, Neptune pater, postquam alta fatentur  
 Cærule te Regem, falsos an pulchrior ulla  
 Intravit fluctus curvâ rate, dic mihi; nec te  
 Tritonum comitante choro, Glaucique juvena  
 Addere pœniteat comitem tua per vada puppi.  
 Nam Leuce quacumque tulit se, protinus omnes  
 Collectæ fugiunt nubes, & flamina ponunt;  
 Quacumque illa pedum vestigia rettulit, omnis  
 Ridet ager, resonantque avium concentibus agri;  
 Et seu sola tenet silvas, seu frondea ruris  
 Tecta subit, hæret lateri Dea Cypria, necnon  
 Dulcis Amor, Dryadum illecebris qui ferrea mulces

Pectora, & accendis tacitis præcordia flammis.  
 I felix Leuce, dignos sortita hymenæos;  
 Serta rosis intexta recentibus afferet Ægle,  
 Ægle littoreis cantu notissima silvis;  
 Necnon indigenæ tibi rustica dona coloni  
 Sponte ferent, patriisque canent connubia læta  
 Carminibus, primisque onerabunt frugibus aras.  
 Hæc memorat dum pauca Telon, lituûmque tubarumq;  
 Ingens exoritur vicina ad littora clangor,  
 Et pelagi cava saxa sono pulsata resultant;  
 Nec mora, detorquet clavum, suspensaque solvit  
 Vela Telon, mœstusque novem petit ora Timavi.

## L E U C O N.

Ducebant noctem jam sidera, plenaque Phœbo  
 Luna reidenti terras vestibat amictu;  
 Claraque nox passim radianti luce rubebat,  
 Ceu primo sub sole dies; cum dulcia Leucon  
 Liquit Amyclæus dilectæ littora Cretæ.  
 Ille dolens, curaque animum labefactus inani,  
 Accipit haud oculis noctem, sed mœstus acerbo  
 Discessu, celerique fugâ, se torquet amaris  
 Questibus, & lacrimans mortem jam pallidus orat,  
 Mox ait; heu qui me primis malus error ab annis  
 Abstulit, & tenebris merfit stagnantis Averni.  
 En velut exul agam noctesque diesque per æquor,  
 Nec reducem patria ulterius me Creta videbis:  
 Discessu mea lingua filet, suspiria mentem  
 Eripiunt, largoque tument mea lumina fletu,  
 Atque anima invalidum corpus jam lassâ relinquit.  
 Heu quanto magis illius nunc torqueor igne,  
 Me tanto magis in lacrimas jubet ire Cupido,  
 Quid mirum? magis ardet amans, cum littus amatum  
 Deferit, atque novas invisere cogitur urbes.  
 Quid referam? non carmen Amor, non gramina curat,  
 Sed ridet lacrimans, sed funere gaudet amantum;  
 Ille senex vetus est: molli lanugine quamvis

Fulgentes malas non vestiat, ille nitenti  
 Occupat & faciem, præduraque corpora fugo;  
 Et sese puerum fingit, furtimque medullis  
 Hæret, & arridens lethali armata veneno  
 Tela jacet, tacitoque petit præcordia ferro,  
 Et ludens ignem manibus gerit, ossaque torret.  
 Ah quantum illa fuit crudelis, & improba, cum m  
 Deseruit, miserosque sequi Stimiconis amores  
 Ausa fuit, cui nulla domus, cui nulla supersunt  
 Pascua, non ullæ pecudes, sed pascit Amyntæ  
 Armenta ad ripas, qua spumeus errat Oaxes,  
 Cuique color niger est, tristisque aspectus, & illam  
 Detinet insignem facie; cui mollia colla  
 Sunt niveis puro candore æquanda ligustris.  
 Et licet ille rudi confusus arundine, valles,  
 Idæumque nemus pulset, tamen illa canentem  
 Miratur, tollitque rudes super æthera cantus.  
 Ille meis fruitur donis, & dulcia miscet  
 Oscula, securus recubans; non amplius illa  
 Me tenet in gremio; sed me, & mea munera tenet.  
 Heu qui te miserande furor consumit, & omnem  
 Abstulit hei misero mentem, exanimumque relinquit?  
 O felix, quem Sol oriens prospectat euntem  
 Cum grege in herbosos saltus; dum cantat amores  
 Naiadum, pascitque greges; & lætus amantis  
 Colloquio, Superis non invidet, ac petit amnem,  
 Oceani emenso cum jam defessus Olympo,  
 Illum prospectat redeuntem in dulcia testæ.  
 Mane novo vocat in silvas; sed me tenet æquor,  
 Sive calore gravi premitur, seu frigore tellus.  
 Ah saltem ad patrias mea corpora naufraga sedes  
 Unda vehat, Leucæ alta domus qua spectat in undas!  
 Me forsan gremio accipiet miserata dolentem;  
 Nec roseis parcetque genis, tenuique capillo,  
 Et lactimas dabit interdum, dabit oscula rursus,  
 Et lecto arsurum misero mœstissima ponet;  
 Et forsan tumulum statuet, plenaque rubenti  
 Flore manu cineres sparget; non illa sub alto



Corde gerit rigidos filices, non effera tigris  
Hanc genuit, caput attollit qua Medus Araxes.  
Et maris Hircani rapido pede fertur in undas.  
Quid mirum? si me incautum, primâque juvent  
Vicit Amor; qui sæpe Jovem, & cœlestia vicit  
Numina, cæruleosque Deos; volucresque ferasque.  
Imperio nam regna tenet, quæcumque videt Sol.  
Quid dicam? tacitis accendit agrestia curis  
Armenta, indomitaque coquit corda aspera flamma:  
Indignans secum assuetas avertitur umbras,  
Fluminaque, & leves somnos, & pascua taurus  
Errantem quærens alta in convalle juvencam;  
Inventaque dies totos sine gramine condit,  
Atque illam sequitur. quoquo vestigia ponit;  
Bellaque sæpe movet carâ pro conjuge, & armos  
Durat ad horribiles pugnas, nec vulnera vitat.  
Et pelagi fera monstra incunt pro conjuge pugnas  
Æquoreos subter cursus, vitamque relinquunt  
Fluctibus in mediis; nam sæpe ego mortua vidi  
Corpora per pelagi placidos fluitantia tractus  
Vere novo, cum sævit amor, cogitque natantum  
Omne genus ruere in furias, ignemque sub altis  
Æquoribus: sed quis valeat tua tela Cupido  
Effugere? aut aliquem curis imponere finem?  
Ah demens, ubi sum? supremane fata propinquant?  
Non ita; namque iterum repetam Gortynia rura,  
Artemque, remosque tibi, Neptune, reponam:  
Idæosque petam saltus, ubi candida Leuce  
Lustra per, aut per aperta feras fugat æquora cursu;  
Aut lepores juga summa leves, patriosque per agros  
Insequor, & parto donabo munere Leucen:  
Atque ibi jam venator apros venabor, & altis  
Suspendam ilicibus victor capita hirta ferarum:  
Illa meos alta aspiciet de rupe labores.  
Quid dicam? forsan nostri miserebitur ultro:  
Vel poterit forsan precibus mitescere nostris.  
Quid tum? si capta est Siculi Stimiconis amore.  
Ipse amor instabiles animos dat amantibus, illosque  
Acri-

Acribus involuit flammis; nunc subdita solvit  
 Pectora, nunc revocat veteres in pectora curas.  
 Dum Venus infano Martis flagraret amore  
 Optatos Mars sæpe toros, & amata revisit  
 Hospitia; at postquam venantem vidit Adonin  
 In silvis Venus ipsa, alios jam percipit ignes,  
 Invisumque abolere cupit de pectore Martem.  
 Successit nova cura Deæ; Mars turbidus altas  
 Strymonis incoluit ripas, Rhodopejaque arva;  
 Interdum Phrygii Anchisæ non immemor, Idam  
 Incolit alma Venus, mollique in gramine dulcem,  
 Inter & amplexus ducit malefana soporem.  
 Quin etiam Phœbi soror Endymione relicto,  
 Pana fovet dulci amplexu; mox Pana relinquit,  
 Et gremio Endymiona fovet, miserata dolentem.  
 Dum vero hæc recolit, longe freta mota reclamant,  
 Et præceps Notus æquoreis immurmurat undis.  
 Tunc Leucon, qua ventus agit per cærula puppim,  
 Vertit iter: secat illa altos interrita fluctus.  
 Monstrat enim Portumnus iter, Panopeaque furtim  
 Impulit errantem pelago, portuque locavit.

## Æ G L E.

Alcimede, veterisque nurus Telethusa Lycormæ  
 Et Siculi Stimiconis amor (jam nubilus) Ægle  
 Tænarias iter ad fauces prope curva tenebant  
 Littora, qua patrio surgunt de marmore templa,  
 Tænario sacrata Jovi; cui maximus aras  
 Tingit odoratas nigranti tergore taurus.  
 Illæ ubi pro caris solverunt debita vota  
 Conjugibus, quos Neptunus servarat ab undis  
 Joniis; secuere viam, qua littus amarus  
 Contingit pelagi nemoroso tramite fluctus.  
 Tunc Ægle socias sic est affata silentes;  
 O comites, quas a teneris ego semper amavi,  
 Et quibus ipsa meos nudavi semper amores,  
 Me miseram tenet alter amor, animoque recurſat

Cura recens, uruntque graves præcordia flammæ.  
 Nam patriis notus pastor Melibæus in oris,  
 Taygeti cui mille greges pascuntur in altis  
 Verticibus, totidemque imis in vallibus agnæ,  
 Assiduus poscit precibus connubia nostra.  
 Hunc, magnæ cum sacra Pali solemnia ferrent  
 Pastores, templi ante fores mihi Nisa sedentem  
 Monstravit formâ egregium, & juvenilibus annis.  
 Isque ubi me Lycidæ tendentem ad pascua vidit:  
 Palluit, erubuitque simul, comitesque reliquit,  
 Et nos a tergo est per florea prata secutus.  
 Mecum erat Alcyone soror, & nova nupta Medontis.  
 Quid dicam? miser ille dies noctesque sub umbras  
 Vicini nemoris solus ipatiatur, & omnem  
 Oblitus pecoris curam me observat euntem  
 Luçe novâ ad Coriti fontes, & nocte paternam  
 Ante domum veniente sedet; sic proxima nostris  
 Culminibus mihi nuper anus Lyrnessia dixit:  
 Nunc Stimicon meus ignis abest, qui per freta po...  
 Armatos Lyciæ pedites Orientis ad oras  
 Vexit, & in patriam rediturum rettulit Agmon,  
 Transferint concreta gelu cum frigora brumæ.  
 Vos testes, quæ dona mihi pulcherrima dudum  
 Attulerit, cum Sidoniis remeasset ab oris.  
 Quin (nostri memor) extremo mihi munera misit  
 Lecta mari, quæ Threicius puer attulit Hæmon.  
 Sed tantum non dona movent, quantum ipsa jugali  
 In thalamo moror, & dulci Stimiconis amore.  
 Quid faceres Telethusa? premunt hincmunera amanti.  
 Atque amor & caræ toties promissa parentis.  
 Parte aliâ (nam vera loquar) Melibæus amari  
 Dignus & hic, cui multa soli sunt jugera, quique  
 Me solam (ni fallor) amat, cui gratus in ore  
 Est color; insonsumque caput: nec lumina nævi  
 Fronte notant agrestem animum; licet inter opaca  
 Taygeti juga sit genitus, lætasque canendo  
 Inter oves primos florens expleverit annos,  
 Tunc Telethusa refert: anima mihi carior Ægle  
Quis

Quis Divum cuiicumque velis te posse jugali  
 Connubio sociare vetat, Stimicone relicto?  
 Exanimum hunc pelagi turbata per æquora forsan  
 Fluctus habet, ventique truces morientia versant  
 Corpora per rapidos fluctus, percussaque fluctu  
 Littora: vota Deum dum tu persolvis in acta.  
 Nec data sæpe tuæ, sine te, promissa parentis  
 Ulla movent; tu sola etenim connubia firmas.  
 Ipsa ego quot mala sum noctes perpeffa diesque,  
 (Annus enim tum me bisseus cœperat, Ægle)  
 Ex quo sum nautæ tædas experta mariti?  
 Quis nescit? meus Hippocoon nunc tendit ad ortus,  
 Et modo ad occasum Solis, modo torquet ad oras  
 Cannibalum longos immensa per æquora cursus.  
 Cum vero in patriam rediit, navalia primus  
 Arma parat, quassamque ratem, & languentia curat  
 Corpora; sed cum jam Zephyri levis aura per æquor  
 Auditur, tranquilla tenet trabe marmora primus,  
 Semper amat sese surgenti opponere fluctu,  
 Ignotosque maris gaudet penetrare recessus:  
 Tantus amor pelagi, tunc me sine conjuge Soles  
 Æstivi, longæque hyemes, sine conjuge noctes,  
 In tenebrismersam adspiciunt, nec fingere crinem,  
 Cæruleave licet, niveaque invisere pallâ  
 Solemnes Superum ritus, vel proxima nostro  
 Tempa mari, miseram tantus gravis urget amaror;  
 Quin etiam mersasque rates, submersaque ponto  
 Corpora sæpe virum si quis novus advena narrat,  
 Vel quoties cœlo strident venti, aut mare ventis  
 Tollitur, & gemitus pelagi latè insonat Euro,  
 Ossa quatit toties gelidus tremor, oraque pallent  
 Frigore, & assiduis membris sese implicat horror.  
 Quid prodest, si rara domum fert munera conjunx,  
 Oceani devecta sinu? qua concolor auro  
 Sol oriens sese Eois attollit ab undis.  
 Et varios memorat ritus, inventaque nuper  
 Tot maria, & nostris incognita sidera nautis.  
 Alcimede dic cara comes (nam te quoque versat



Soror eadem) dic, nonne tuus Chorinæus Acarnan,  
 Et Phlegyas, pelagique miniſ aſſuetus Helenor,  
 Et Tegeæus Eryx. Libyæ occubuere profundo?  
 Sed miſeram dolor angit: habet nam pignora ſecum  
 Hippocoon, maria alta docet quæ currere, & alti  
 Noſcere ſigna poli, ventosque & inhospita ponti  
 Æquora. tranquillosque dies hyemeſque futuras.  
 Quid tum? ſi patrias artes vorat unda retortis  
 Vorticibus, natosque ſimul: nec pignora matri  
 Flere licet: nec jam pelagi moritura ſub undis  
 Cernere; nec tumulo cineres decorare recenti?  
 Quare age connubio juvenem conjunge volentem,  
 Cui tot oliviferi colles, tot paſcua, totque  
 Taygeti juga celſa greges, armentaque paſcunt.  
 Tu gelides inter ſaltus, ſilvaſque ſoporem  
 Sæpe levem ſecura peres: nunc læta recumbes  
 Conjugis in gremio, viridi vel in ilicis umbra,  
 Gramineove toro, vitreus qua fundit in æquor  
 Eurotas virides inter vāga flumina lauros.  
 Ille ſuos lætus patriis in ſaltibus ignes  
 Nunc tenui ſtipulâ dulci modo carmine ludet;  
 Et circum vos verna puer, parvuſque Palæmon,  
 Atque alii, quos ſæpe juvat frondente ſub umbrâ,  
 Et calamis certare, & agreſti dicere Muſa,  
 Adſtabunt, totosque dies per carmina condent.  
 Impulit hiſ animum dictis Telethufa labantem,  
 Sevit & ardentes accenſa in virgine curas.  
 Illa alacris fert nota leves per littora greſſus,  
 Suſpiranſque oculos ad ſumma cacumina torſit  
 Taygeti, qua dives agriſ Melibœus amator  
 Innumeras ſolitâ pecudes paſcebat in umbrâ.

*LEUCOTHOE, ſive Livia M Antonii Columnæ F.  
 ad Petrum Canniceram.*

Spreverat, infano Nymphæ deviſtus amore  
 Leucothoes, Venerem Mavors: ripaſque colebat  
 Tybridis, aut Aniena jugis delapſa fluenta,

Et

Et positis silvas armis peragrabat, & acres  
Oblitus bellantum acies, mulcebat ad amnem  
Indomitos cantu flammati pectoris ignes.  
Quinetiam cum pastores in roscida mittunt  
Pascua lanigeras pecudes, vel cum gravis æstus  
Cogit aprica greges loca relinquere, & abdita silvis  
Pascua depasci, pecudes comitatur, & unâ  
Aufoniis mistus caprat pastoribus umbras.  
Sæpe etiam cervos telis agitabat ad undam  
Tybridis, aut convalle cava, paribusque premebat  
Cursum agrestes nodosâ in retia prædas;  
Errantesque canes cornu revocabat adunco.  
Nunc sese extollit, primo quod vulnere cervum  
Straverit, incurvâ jamdudum in valle morantem.  
Se quoque setigerum dextro fixisse sub armo  
Jactat aprum, atque animæ calamo rupisse sonanti  
Spiramenta, levis quo vulnere fugit in auras  
Spiritus, exanguemque animâ indignata reliquit.  
Nunc etiam absentis Nymphæ candentia laudat  
Pectora, sidereosque oculos & dulcia verba  
Prostratus prope fontis aquam,, qua murmure rauco  
Unda fluit; fontemque comâ Jovis arbor obumbrat,  
At dudum succensa gravi Cithærea dolore  
Linqvit Acidalias sedes; & vecta per amplum  
Aëra Laurentes agros, atque ardua Romæ  
Tecta petit, manibus quondam fabricata suorum;  
Ut vero ripis posuit vestigia Thusci  
Tibridis, illi ingens Nympharum occurrit ad amnem  
Naiadum chorus, & ripâ sese obtulit altâ,  
Quarum una ante alias forma spectanda sorores  
Leucothoë defessa solo viridante refedit;  
Extremo quam Nympha Ephyre Laurentia partu  
Aëreos inter montes, qua fons sonat altis  
Vallibus Albunæ subter nemora, alta virentis,  
Silvano dedit in lucem, quæ candida toto  
Corpore componit flavos mira arte capillos;  
Et comptos premit in nodum, nec flamina curat;  
Ore refertque rosas, quas circumfusa coronant

Lilia, odoratis cum tellus floret in hortis,  
 Inque feras quot tela jacet, tot cæsa ferarum  
 Corpora procumbens silvis, cursuque fugaces  
 Prævertit capreas: amat hanc qui Tibridis alta  
 Flumina, & Albunæ quisquis bibit accola fontem,  
 Agnovit Citherea sui Mavortis amores,  
 Fulgentes mirata oculos, & candida Nymphæ  
 Pectora, & albei divinum in veste decorem.  
 In mentem venit hac formâ se fallere Martem  
 Posse ferum, mora nulla, Dæ faciemque, habitumque  
 Ponit; & in faciem Nymphæ mutata, repente  
 Leucothoes succensa odiis, velamine textit  
 Ardentes oculos: simul indignata profatur:  
 Hinc oculi, mea cura recens, mihi causa doloris?  
 Quo casu Dryades Nymphæ ingemuisse feruntur  
 Prata per, agrestesque domos; nec cantibus ullis,  
 Aut solito herbarum succo potuisse mederi.  
 Stant circum Nymphæ comites, Telethusa, Thoeque,  
 Eurynomeque decus nemorum, domitrixque ferarum,  
 Et jaculo bona Dynamene, vigilemque sororem  
 Solantur, variisque tenent concentibus ægram.  
 Odrysium hæc vatem cantu nemora alta trahentem  
 Commemorat, Stygiique Jovis sine sole petentem,  
 Regnaque, Tartareasque domos pro conjuge carâ,  
 Mulcentemque animos fidibus, Ditemque tremendum;  
 Promeruit quibus Eurydicen deducere ad oras  
 Æthereas, certo sub fœdere, nariat ad umbras  
 Eurydicen redeuntem iterum, Stygiique secantem  
 Cæruleâ rate fontis aquas: nam fœdera Ditis  
 Incautus violarat amans: illa addit amores  
 Anchisæ, Venerisque Pytin canit altera versam  
 In pinum, trepidans dum per juga densa Lycæi  
 Amplexus Boreæ effugeret; malletque canentem  
 Audire arboris dilectum Pana sub umbris;  
 Nec filer illa rogos Leucippi, & tristia fata  
 Leuconoes: captamque dolis & fraude Dianam,  
 Inscia dum ferro fixit caput Orionis.  
 Cum pelago puer infelix prope curva nataret

Littora, quâ rapidus ponto se immiscet Oaxes.  
Interea firmans animum Citherea, superbas  
Liquit Aventini sedes, Anienis & amnem  
Sola petit, sequiturque feras vaga flumina propter:  
Hic uti sole novo, sociis comitatus, agrestes  
Sequitur per nota feras loca Bistonius Mars.  
Audierat Venus alma procul strepitum nemus inter,  
Latransque canum densâ increbrescere silvâ.  
Tunc celerat festina viam, quâ semita calle  
Augusto nemus ingreditur: jamque abdita silvis  
Lustrâ, locumque tenet, quo Mars sub poplite cervum  
Fixerat, & trepidum nemorosa in valle premebat.  
Percurrit tener ora rubor, cum vidit amantem  
Oblitum veteris flammæ; atque exterrita primo  
Adspectu, retro torfit vestigia, & alto  
Aggere composuit sese; meditataque verba  
Non potuit confusa loqui: nam pectore sensus  
Verterat, & mentem Lethæâ immerferat undâ  
Acer amor: comites iterabat valle sub altâ  
Bellipotens; comitum cœtus tendebat ad amnem  
Non procul a viridi silva, notasque vetabat  
Reddere frondiferum nemus, & juga proxima voces.  
At tempus Dea nacta, manu capit arma, sinusque  
In rodam collecta supervenit, atque ita Martem  
Alloquitur: cervum hunc primo sub sole cœgi  
In laqueos; ferus ille plagas, laqueosque tenaces  
Evasis: sequor hunc celerans [ut cernis] & omnes  
Huc properant Nymphæ comites, non farier ultra  
Hanc Mavors finit: at jaculum contorsit, & armos  
Fregit, & ense latus geminato vulnere rupit.  
Et prædam Nymphæ dono dedit ardua terga  
Mox sese collo implicuit, tunc Cypria Martem  
Læta fovet gremio acceptum, colloque lacertos  
Circumdat tenui repetens suspiria voce;  
Atque iterum blanda Mavortem voce moratur.  
Leucothoën Mars amplexus, tunc protinus ignem  
Accipit occultum membris; ite flamma per artus,  
Nec sprete infusum gremio se sentit amantis.

Tunc



Tunc voti jam facta potens Venus alma removit  
 Leucothæ ex oculis positum velamen: & auxit  
 Egregium forma decus, insuetumque nitorem  
 Luminibus: tunc circum auræ, & nemus omne refulsit,  
 Perque arces nitidus fulgor, perque alta cucurrit  
 Flumina; quo comites Nymphæ obstupuerunt, novosque  
 Lætitiâ duxere choros; sociamque sororem  
 Adjungere sibi, & nemorum petiere recessus.  
 Accipe & hæc, quæ Musa mihi prope Tiberidis amnem  
 Concinuit, Phœbi decus, & gratissime Regi  
 Canicere; egregium fidibus, atque arte medendi  
 Quem genuit fœcunda viris Aragonia tellus:  
 Nec pigeat canere hæc olim septemplex Istri  
 Ad ripam, aut gelidi sinuosa ad flumina Rheni.

*Ad Petrum Cannicerum.*

Lydia, quæ candore nives, & cana ligustra,  
 Et nemorum cantu vincis, & ore Deas:  
 Has violas, hæc mista croco serpylla rubenti,  
 Et quas decerpit Sole oriente rotas,  
 Ille tuus tibi mittit Acon, quem sæpe canentem  
 Mirata est, rapidis quæ natat Ister aquis.  
 Addit & has post dona preces; ut cras, ubi Titan  
 Igneus ardentem ad juga junget equos,  
 Quæ viridi silva alta comâ stagnantia tangit  
 Flumina, nostra petas rura, novumque larem.  
 Pulchra aderit comitata choro Plautilla sororum.  
 Quæque colunt montes, flumina quæque tenent:  
 Erigone nova nupta aderit cum conjuge Mopso,  
 Flavaque Lampetie, Demophoontis amor.  
 Pendebunt agris opera interrupta, nec ullus  
 Mersabit puro flumine pastor oves.  
 Sed cuncti mea testata petent, cum lux nova sese  
 Tollebat ab Eois fluctibus Oceani;  
 Instituet certos vicina ad flumina ludos  
 Cum Numitore Ligur Thyrsis, & Eurymedon:

Certabitque pedum cursu Maurusius Acmon:  
 Emitter calamos ad loca certa Pharon.  
 Stabit aper, precium palmæ. juga Rhetica propter  
 Captus, & horrifono turbidus ore fremet.  
 Adstabant hirci cavæ prope limina septem,  
 Frondibus incincti cornua pampineis,  
 Cervus erit domini mensis assuetus, & intra  
 Marmorea somnum carpere nocte fores.  
 Sunt etiam gemini Ptelæ de stirpe Molossi;  
 Hic tauros morsu sistit, at alter apros.  
 Hæc ingens tabula ingenti pendebit ab ulmo,  
 Qua tu conspicias Cæsaris arma tui;  
 Nec non magnanimo victos a Cæsare reges;  
 Additaque imperio clara trophæa ducum.  
 Inque fugam versos Hispano a milite Turcas,  
 Miscentesque fero prælia Marte viros.  
 Adspicies urbem longâ obsidione levare,  
 Seberus liquidis qua petit æquor aquis;  
 Dissiectasque arces Morinum, vicinaque circum  
 Oppida, pugnaci captaque signa manu;  
 Ticinumque atro fœdatur sanguine ripas,  
 Et captos, Albis flumina ad alta, duces,  
 Ignotos habitus, atque arma ignota videbis,  
 Pœnorumque oculis agmina nigra leges:  
 Flammanis propior Phœbi quos inficit ignis,  
 Qua non claudit hyems florea rura gelu;  
 Cæsaris & puppes pelagi dominarier undis,  
 Et multa Leptin obsidione premi.  
 Cernere erit Nomadum turmas, atque horrida castra  
 Cæsaris, & Libycum per mare mille rates;  
 Quas circum Nymphæ exultant, perque æquora currunt,  
 Aut vada virgineis lusibus alta petunt.  
 Personat & conchâ Triton, notasque biremes  
 Respicit, & liquidum per mare monstrat iter.  
 Prosilis æquoreis ponti regnator ab antris,  
 Velivolum pelagi sternit & omne solum.  
 Invehitur curru Cæsar sublimis eburno,  
 Et parta ante pedes plurima sceptrâ gerit.

Parte aliâ de more refert solennia sacra,  
 Et supplex multâ cum prece templa tenet,  
 At postquam, missô certamine, debita cuique  
 Victori dederit dona senex Periphas:  
 Mox Dryadum plaudente choro, rapidum prope flumen  
 Pan Lycabæ agresti tempora fronde premet.  
 Inflabunt faciles calamos Ocnusque, Myconque,  
 Inflabit raucum Lydius Actor ebur.  
 At dum sol curru Oceani peret aureus undas,  
 Agricolæ instituent flumina ad alta dapes.  
 Accumbet mensis Dryadum chorus omnis ad amnem;  
 Confident mensis advena, & indigena.  
 Quare age, o mea vita, novos ne despice ludos;  
 Nec quæ te exiguo munere donat Acon.  
 Indue sepositam vestem, tege crura cothurno;  
 Ornet & albentes lutea concha sinus.  
 Cærule sepositam subnectant cingula vestem,  
 Et nectat flavas aurea vitta comas.  
 Talis eris Dryadas inter, comitesque sorores,  
 Qualis in Eoo lucida genima mari;  
 Qualis in irriguos florum coma cernitur horto,  
 Sive, hyacinthe, tua, sive, amaranthe, tua.  
 Et si forte abitum tibi Leda noverca negabit;  
 Protinus hanc ficto callida falle dolo;  
 Aut pete Leucothoën parvâ comitata sorore,  
 Quæ solet ad nostras sæpe venire domos.  
 Ipsa vocata aderit, comitem te adjunge forori;  
 Quid poterit de te sæva noverca queri?  
 Tu vero, nostri decus ingens, Cannicer, ævi,  
 Cui decorat gemino Phœbus honore comas,  
 Huc propera, nostrosque libens accede penates;  
 Non tibi per Syrtes longa petenda via est;  
 Cras poteris surgente die conscendere flumen,  
 Puppe levi, & nostros tutus adire lares.  
 Hic celebrem cantu invenies, & arundine Mopsū;  
 Nec deerit Dorylas, Pannoniusque Lycon.

*In fontem.*

Hos latices ne accede meos, nec tange viator;  
 Sanguine fœdata est si tua dextra manus.  
 Nostræ etenim lymphæ Bacchi gratissima miscent  
 Munera; non sævi pocula Martis amant.

*In obitum Julie.*

Flos veluti quem rivus aquæ, quem Sirius ardet,  
 Deferit, & prono vertice languet humi:  
 Quem frustra gelidi rores solantur, & umbræ,  
 Et quæ vicinum perstrepat aura nemus:  
 Julia sic cecidit primis in floribus ævi,  
 Sic cecidit roseo gratus in ore color.  
 Hanc flerunt tristes Sebeti ad flumina Nymphæ;  
 Impia & illacrimans sidera dixit Amor.

*Pro victoriâ Christianæ religionis contra Turcas, ad  
 Deum gratiarum actio.*

Jam tandem pater omnipotens dignatus ab alto  
 Et nostras audire preces, gemitusque tuorum;  
 In vinclis quos ille ferus nostrique, tuique  
 Nominis hostis habet, vel carcere detinet atro;  
 Ferre & opem nobis, tantarum in turbine rerum,  
 Et post bellorum tam sæva incendia, totque  
 Excisas ferro gentes, amissaque regna,  
 Nam nec erat spes ulla fugæ, furibundus & hostis  
 Terruerat pontum, & terras victricibus armis,  
 Et classe Adriacas valida penetraverat oras;  
 Oppidaque, & pelago, & terris invaserat urbes,  
 Atque inimicum ignem secum, cædesque ferebat.  
 Induerat quos se in laqueos nec senserat, & non  
 Quid posset, Rex ô cœli, tua dextera norat.  
 Unde agimus tibi nunc tanto pro munere grates;  
 Et templis pia thura damus, per templa, viasque  
 De-



Debita sacra tibi canimus; nam dextera partim  
 Threiciam classem tua merſit in æquore, partim  
 In noſtras impulſa manus eſt te duce, & ingens  
 Turcarum intepuit reſperſus ſanguine pontus:  
 Nam nec habet certas tua magna potentia metas,  
 Nec præſcripta tibi eſt, ſed tu poteſ omnia ſolus.  
 Tellurem & pelagi liquidas convertere in undas,  
 Et mare tellurem in ſolidam, tibi paruit æquor,  
 Æquor Erythræum; Solymæ dum robora gentis  
 Tranſierint vaſti ſicco pede marniora ponti,  
 Atque minas fugerent duri Pharaonis, & arma,  
 Namque tuo juſſu diſceſſit tunc maris unda,  
 Hinc atque hinc ſaxi in faciem durata repente,  
 Hebrææ inferrent greſſus qua parte phalanges;  
 Quæ retro tunc deinde fluens, conjunctaque curruſ  
 Involvit pelago, Mærotidaque arma ſequentum.  
 Nunc vero non ſe pontus diſiſit: at unda  
 Strata, ſilenſque (tuo ſed non ſine numine) ventuſ  
 Auxilio noſtris fuit. & tot clara per annos  
 Præteritoſ virtus, & formidabile nomen  
 Turcarum in ventos abiit, tunc gentis Iberæ,  
 Atque Italæ ad cælum bellando gloria ſeſe  
 Extulit; invictamque olim per cærule clasſem,  
 Haud noſtræ timuere artes; non impetuſ illoſ  
 Barbaricuſ juvit, ſparſuſque per æquora ciamor.  
 Nam noſtri haud lunæ ſpeciem vexilla ferebant;  
 Sed Cruce pendentem Chriſtum palmaſque, pedeſque,  
 Trajeſtumque latus ferro, pariterque parentem  
 Aſpera dilecti lacrimantem funera nati.  
 Gloria tota tua eſt, neque enim victoria noſtro  
 Conſilio, aut armis parta eſt, aut viribuſ ulliſ.  
 Et miles feruſ ille ſuo ſperabat in arcu,  
 Et gladio, quo jam totieſ cæſo hoſte triumphoſ,  
 Egerat, & victor prædaſ portarat ad oraſ,  
 Inſonat anguſta qua Boſphoruſ horriſer unda.  
 Quid dicam? ô Aſiæ regnator ſæve, Deuſ te,  
 Quem colimuſ, meritoque ſacraſ veneramur ad araſ,  
 Proteret, haud aliter quàm læti graminis herba


Cornipedis pede pressa gregis : dicamque ego ; vidi  
Regem Asiæ florentem opibus , regnisque potentem ,  
Elatumque animo , & tumidum præcordia fastu ,  
Non secus ac cedri alta comas sublimibus arbor  
Nata in verticibus Libani , sed luce sequenti  
Dum redeo , Rex non usquam , sed nec levis umbra  
Corporis illius , nec gloria parta sub armis  
Ulla erat , aut rerum vestigia facta suarum .  
Et nunc tempus adest , quo te fulcasse pigebit  
Jonios fluctus , & classe intrasse profundum  
Adriacum , tuaque arma armis concurrere nostris  
Permisisse , Deus cum nos nunc protegat , & nunc  
Pro nobis ( ut tu ipse vides ) bella aspera pugnet .  
Tunc ego lætitiâ ingenti cumulabor , & axes  
Vertice contigam cœli , dehinc ora resolvam  
In laudes , ô Christe , tuas , magnique parentis  
Qui solus pontum , & tellurem condidit , & non  
Se folia ulla movent tanti sine Numinis aura ,  
Cessabo & nunquam tua facta intexere nostris  
Carminibus , pariterque tuos memorare triumphos ,  
Nam victi cecidere hostes , paucique ( cruore  
Aspersi tamen ) ad sedes rediere paternas ,  
Et sua viderunt versis vota irrita fatis .  
Te mare , te tellus , cœli te regia laudat ,  
Cœlestesque chori , lætæque per oppida gentes  
Europæ , quæ te Dominum , Patremque fatentur ,  
Insigni super astra ferunt te laude , tuumque  
Nomen , & annales condunt ; quibus inclita facta  
Describunt , quæ dextra potens tua fecit in undis  
Joniiis , nostri ut possint hæc scire nepotes ,  
Teque colant unum , penes est quem quidquid ab alto  
Adspectat , cœli cum Sol tenet arduus oras ;  
Istiusque sacræ memores sint lucis , & aras  
Ante tuas tibi digna canant præconia laudis .  
Tuque illorum animas , fuso qui sanguine pro re  
Romanâ , sacrisque tuis , patriaque ruenti ,  
Vulnera per , pulchramque necem cecidere sub armis ,  
Sidereas supra sedes , qua fulget Olympi

Et

Regia, duc tecum, & tutâ statione repone.  
 Et vos ætherei fontes, quos non vagus imber  
 Verberat, aut pedibus turbat fera, vel gravis æstus,  
 Aut ramis folia arboreis delapsa, sed estis  
 Perspicui, gelidumque Deum laudate, manu qui  
 Pro nobis valida nostros pugnavit in hostes,  
 Tu quoque Sol, qui vidisti sublimis ab alto  
 Æthere pugnantes pacata per æquora puppes,  
 Et nunc tu canere, atque urbis per compita pompas  
 Ducere solemnes lætus nos aspicias; heu quam  
 Exiguæ sunt, & tenues, te iudice, grates,  
 In nos pro tantis meritis: qui contulit ille,  
 Ille sator rerum, & tanti certaminis auctor!  
 Jam circum septem colles, quos dividit unda  
 Tibridis, & cursu præclaram interluit Urbem,  
 Lætitiâ magna exultant, atque ardua voces  
 Terrarum lætas ad sidera lucida jactant,  
 Atque novis resonant passim concentibus auræ;  
 Ipsa coronatis Tuscum mare cornibus intrant,  
 Flumina, quæ currunt de fontibus Apennini,  
 Certaque venturis declarant gaudia sæclis.  
 Tuque Pie ante alios lætare o Quinte, tenes qui  
 Pervigil in terris Christi sedemque, locumque;  
 Nam longe es felix, sub quo Deus optimus hostem,  
 Hostem opibus, simul & terrâ, pelagoque potentem  
 Mersit in Joniis undis, qui fœdere rupto  
 Impia in insontes Venetos jam verterat arma,  
 Et Cypri regno expulerat, victorque tenebat  
 Totius pelagi imperium, sed det tibi tantum  
 Omnipotens vitæ spatium, quo cernere possis  
 Illum amittentem terras, amisit ut æquor,  
 Et dantem meritis effuso sanguine pœnas,  
 Pacatum & videas lætis successibus orbem,  
 Errantesque greges Romana in septa reducas;  
 Qui vacuos tondent saltus, dumetaque sylvæ  
 Hercyniæ, gelidique bibunt qui flumina Rheni,  
 Quosque ferus versat pastor per prata Britannus;  
 Nam tua barbaricæ populantur ovilia gentes,

Quæ

Quæ rectas liquere vias, justumque piumque.  
 Tum juvenem, Pater alme, tua pietate, tuumque  
 Ob numen serva incolumen, quem bella gerentem  
 Indomitas contra gentes, populosque rebelles  
 Vidisti toties ad curvi flumina Bæris,  
 Germanique simul referentem in regna Philippi  
 Victrices aquilas, & cæsis hostibus arma;  
 Atque ipsum hunc etiam voluisti ducere classem,  
 Atque illi summam voluisti credere rerum,  
 Effice, ut ipse etiam fasces in regna reducat  
 Æneadum amissos olim, lauroque revincta  
 Roma comas, Macedum populis, Bactrisque subactis,  
 Quique colunt Libyam, & Nilum, det jura, jugumque  
 Excutere impositum possit, violentaque fræna.  
 Huic etiam pater omnipotens da, major ut ipso  
 Sit patre, bellando quamvis tot vicerit urbes,  
 Viderit & captos reges, fusasque phalanges;  
 Et regno sumptis in regna reduxerit armis,  
 Expulsum regem, qua Bagraa currit in æquor.  
 Hæc tibi, Alexander, cecini, dum tu colis oras,  
 Umbrosis gelidus quas Farfarus irrigat undis,  
 Commissisque tibi populis civilia reddis  
 Jura tuis, ritusque sacros, & templa revisis,  
 Criminaque & vitas discis. Tu perlege quæ jam  
 Jam toties votis optasti, & gaudia mecum  
 Tu cape, & ante aras pronus supplexque age grates  
 Immensasque patri æterno, qui merfit in undis  
 Joniis Turcarum acies, inimicaque vela;  
 Atque alias magno grates persolve parenti,  
 Qui cupidum belli in patriam sedesque reduxit  
 Farnesium juvenem, qui nomine te quoque reddit;  
 Duxerat ad bellum quem clarus avunculus armis,  
 Illius virtutem anini, roburque juventæ  
 Admirans, puer adversos dum tendit in hostes.





*In Regem Turcarum post amissam classem.*

Perfide Turca, tuo quid versas pectore; postquam  
 Amissam pelago classem, stragemque tuorum  
 Audisti? qua confusus te posse putabas,  
 Non solum Adriacos fluctus, Tyrrhenaque ponti  
 Cæcula, & Hesperii maris æquora, sed quoque vastos  
 Cannibalum penetrare sinus, victorque referre  
 In patriam prædam ingentem; regesque, ducesque  
 Ante tuos currus captivos ducere; & urbem  
 Per mediam, rapida quam Bosphorus alluit unda,  
 Ire investus equis, auro, gemmisque superbus;  
 Poscere & ætherios patris omnipotentis honores.  
 Namque mare undabat bello, atque injecerat atrum  
 Tunc hominum terrorem animis tua barbara classis,  
 Sed nunc, en quantum tua te spes vana fefellit,  
 Atque incerta vides; quoniam sic evenit illi,  
 Qui numerum ob bellantum audax spem collocat omnem  
 In regnis, opibusque suis: nec cogitat iram,  
 Quam Deus omnipotens in fontes vertit iniquos.  
 Et nunc à Venetis Epiri in littoris ora  
 Audisti everfas acies, fusasque phalanges.  
 Nec dubita, ipsa manus Domini fortisque potensque  
 Quæ gentem, classemque tuam, mox te quoque victum  
 In nostras eadem ipsa manus, Turca impie, tradet;  
 Atque manus gemmas vinctus pedes ibis ad alta  
 Permixtus servis Capitolia, non sine durâ  
 Compede: & insignes juvenis ager ille triumphos  
 De te sublimis curru qui nuper in undis  
 Joniis (ducente Deo) classemque tuosque  
 Ductores pugnâ navali vicit; & irâ  
 Tunc magnâ pater accensus numenque genusque  
 Delebit, Selime, tuum: veluti per aperta  
 Plana lutum, valido aut pulvis disiectus ab Euro,  
 Inque tot ærumnas commissa ob nostra, Tyranne  
 Crudelis, nos incidimus; quarum haud tua classis  
 Causa fuit, non turmæ equitum peditumque catervæ;  
 Sed


Sed Deus ipse tuas, nobis iratus, in iras  
Nos miseros totiens concessit, & oppida, & urbes:  
Et nunc, cum sit nos cœlo miseratus ab alto,  
Et precibus nostris non obstruat [ut prius] aures;  
Iras in te acuet, quas olim exercuit in nos.  
Atque etiam tantis, urbs, quondam assueta triumphis,  
Nostrorum & spoliis dives, quam nunc ferus ille  
Incolit, atque tui contemptor numinis, ô Rex  
Omnipotens cœli, & terræ, tu turturis instar,  
Quæ nuper thalami consortem amisit, & implet  
Flebilibus nemoris nigrantem questibus umbram:  
Mortua navali pugnâ, disjectaque ponto,  
Et monstris laniata avidis, tua corpora desse;  
Et pro sepositâ pallâ, te vestibus atris  
Indue, & obscuris lacrimans te conde tenebris:  
Tantræ insperatæ cladis testata dolorem  
Insolitum; dehinc lætitiâ, ludosque repende  
Exactos gemitu mœsto, casuque recenti.  
Tu verò Deus è celsâ qui sede tuâ nos  
Prospectas, dum thura tuas adolemus ad aras,  
Et canimus te præsidium, præsensque fuisse  
Robur in Ionio, dum ponto fregimus hostem  
Threicium, lætique domum spolia ampla, ducesque  
Rettulimus; da quod populus tuus insuper orat,  
Supplicibusque petit precibus: ne jactet amarus  
Sese hostis terrâ pugnans vicisse, marique,  
Dicat & insultans: Deus illos liquit, & ultra  
Illius non dextra tegit, nec pugnat, ut olim:  
Ismariam sed tu primo in certamine classem,  
Armaque, pugnantesque viros, vasto obrue ponto;  
Instructæque juvent illum non mille triremes,  
Bellantum non mille acies, sed victus in armis  
Occumbat, tingatque suo freta salsa cruore.





# POMPONII GAURICI

## EX FANO FORTUNÆ.



### *De Statuâ Medes.*

**Q**Uod natos feritura ferox Medea moratur :  
 Præstitit hoc magni dextera Timomachi.  
 Tardat amor facinus : strictum dolor incitat enssem :  
 Vult, non vult natos perdere & ipsa suos.

### *De Cræso, & Diogene.*

Diogenem Pluto venientem ad Tartara novit ;  
 At Cræsum novit Diogenes Cynicus.  
 Quem postquam fulvas captantem vidit arenas,  
 Dum Stygios aurum credit habere lacus ;  
 Accedens propius, vilique instratus amictu,  
 Irridens, dictis talibus increpuit :  
 Major adhuc sors, Cræse mea est : quæcunque tenebam,  
 Cuncta habeo mecum ; tu nihil, inquit, habes.

### *Doctus pauper.*

Dii quibus ingenii dotes tribuere beatas,  
 Illis divitias Sors inimica negat.

### *Ad Macrinum.*

Fortunæ mira est, Macrine, ac summa potestas,  
 Parva citò crescunt, maxima quæque ruunt.

*De.*

Deponent tumidas mentes, fastusque superbi;  
 Aurea poma arbor; flumina mella dabunt:  
 Nec Boreas juncum poterit, maluamve movere;  
 Et rursus magnas sternet humi platanos.

*De infelicitate rerum humanarum.*

Quis queat humanæ tot ferre incommoda vitæ?  
 Humanæ vitæ quis mala ferre queat?  
 Si vitam vivas urbanam, jam tibi præbet  
 Mille domus curas, jurgia mille forum.  
 Sin tua rura colas, circumstant mille labores;  
 Et pelago tecum mors comitata venit.  
 Nulli gratus, inops: admota uxore quietem  
 Ne speres, viduo nec potes esse toro.  
 Orbus, eris sine prole: graves in prole labores,  
 Mente labat juvenis: debilitate senex.  
 Nil quoniam superest quod me vixisse juvabit,  
 Optandum misero, nil, nisi posse mori.

*De Tempore.*

Cujus opus? quondam Lysippi, dic mihi quis tu?  
 Tempus, quidnam operæ sit tibi? cuncta domo.  
 Cur tam summa tenes? propero, super omnia velox.  
 Cur celeres plantæ? me levis aura vehit.  
 Cur tenuem tua dextra tenet tonsoria falcem?  
 Omnia nostra secans radit acuta manus.  
 Cur tibi tam longi pendent a fronte capilli?  
 Fronte quidem facilis sum bene posse capi.  
 Cur tibi posterior pars est a vertice calva?  
 Me quia posterior prendere nemo potest.  
 Talem me finxit quondam Sicionius hospes,  
 Et monitorem hoc me vestibulo posuit.  
 Pulchrum opus artificem laudat; proh Juppiter: ô quàm  
 Debuit hoc pigros sollicitare viros!



*De fuga temporis.*


Heu sortem miserandam hominum, vitamque pigendam;  
 Quàm miserâ nati conditione sumus!  
 Non ita Maurus eques, ita non levis aura Favonii,  
 Non ita per noctem somnia visa brevem;  
 Quàm citò formosæ prætervolat aura juventæ,  
 Quàm citò jucundi temporis hora fugit.  
 Hora fugit; curæ accedunt; morbi que sequuntur;  
 Occupat & tremulum curva senectâ caput.  
 Stulti mortales; lugemus morte peremptos:  
 Legendum ætatis cùm perit ipse decor.

*Virtus immortalis.*

Omnia debentur morti? mors omnia solvit?  
 Omnia mors vincit? omnia mortis erunt?  
 Nil veri istud habet: nescit mortem inclita virtus;  
 In mortis virtus non venit arbitrium.


*Divitiarum contemptus.*

Quid mihi divitiæ? valeant mortalia vota;  
 Quæ semper magni causâ fuere mali.  
 Talia quis demens optavit habere, frequenter  
 Quæ domino fiunt perniciofa suo?  
 Sat dives. quisquis Naturæ munere parvo  
 Contentus, vitam, quo teneatur, habet.  
 Ah curvum genus, & veri corda infcia! fæces  
 Terrenas summo creditis esse loco.  
 Quàm melius Schyticæ gentes, quæ talia spernunt,  
 Quæ sat habent plaustri posse manere suis.  
 Spectetur virtus, virtus spectetur ubique;  
 Cetera mortali conditione manent.  
 Cetera sunt homini vario pendentia casu:  
 Quæ venit ex factis gloria vera venit.



# LUCÆ GAURICI

## GEOPHONENSIS.



### *Virtus immortalis.*


**A**urum quid prodest homini? quid gloria? quid vis?  
 Pallida Mors dirâ singula falce metit.  
 Nil aurum, nil pompa juvat, nil sanguis avorum.  
 Excipe virtutem, cetera mortis erunt.

### *Hominis vilitas.*

Pulvis & umbra sumus; pulvis nihil est nisi fumus;  
 Sed nihil est fumus; nos nihil ergo fumus.  
 Hora fugit, celeri properat Mors improba passu;  
 Et tegitur cœlo quidquid acerba rapit.

### *Virtus ante aurum.*

Est auro & gemmis pretiosior inclita virtus;  
 Ingenii quoniam fama perennis erit.



# L. PARMENII GENESII

*De liberalitate Leonis X. Pont. Max. in Populum  
Romanum vectigalibus oppressum.*

**N**on tam læta suas spectavit Græcia lauros,  
Nec tam laurigerum Bacchica turba Deum.  
Nec tam prisca suis lætata est Roma triumphis,  
Nec tam cum varias vidit arena feras,  
Quam, Leo, gavisa est dudum gens tota Quirini,  
Vidisses Latiae gaudia vera togæ  
Num Capitolineæ tonuerunt culmina rupis?  
Fulseruntque foci per fora, perque vias?  
Non aliter vacuum flammæ per inane volarunt,  
Quam cum Sidereo fulgor ab axe cadit.  
Hinc sonus, inde sonus; cœlo Leo missus ab alto  
Quæ dedit; hæc vero digna fuere duce.  
Æthera tranantes superabunt tempora moles,  
Quas Leo dat populis non morientur opes.  
Scribent Historici, cantabunt carmine vates,  
Pro meritis tantis ferus & astra petet.

*Ad LEONEM X. Pontif. Maxim.  
supplicatio.*

Dic rogo Pontifici, si qua est tibi gratia, vates,  
Sentiat ut populi publica damna sui.  
Vera loqui liceat; cunctis modo grata moneta est  
Julia; sed nullis æra minuta placent.  
Sedulus his loculos inventis venditor explet,  
Insolito premitur pondere vulgus emens.

Hinc

Hinc igitur Decimum numeris age flecte Leonem,  
 Ut precibus nostris annuat, & populi.  
 Respondi: hoc nostro faciet Leo carmine; saluum  
 Esse hominem mavult, quam velit orbis opes.

*De populi Romani latente Leone X. Pont. Max.  
 inæstitia; ac de eodem apparente  
 latitia, ad eundem.*

Tristis ut est aër cum Delius imbre tenetur,  
 Lætus & est flammis cum micat ille suis;  
 Sic populi mœrent cum te tenet aula Leonem:  
 Et gaudent, quotiens ora serena vident.  
 Num Latiam vulgus quod jam penetravit in urbem  
 Terruit hic clamor: vivet in orbe, Leo?  
 Te vaga dum nuper spectarunt lumina solum,  
 Nemo patres potuit cernere, nemo Duces.  
 Pontifices alios populi, Leo, semper amarunt;  
 Te modo jure colunt, & magis orbis amat.

*Ad eundem Leonem X. Pont. Max.*

Hæc ego jejunos cecini, satur altera condam  
 Carmina, quæ vivent semper in orbe Leo.

*De Leone X. Pont. Max.*

Hactenus horrifonis jactata per æquora ventis  
 Diriget in portum naufraga vela Leo.  
 Quo duce Saturni spectabunt aurea regis,  
 Sæcula mortales, quos vehet illa ratis.  
 Ut mare non poterit, poterit sic nulla potentis  
 Armorum rabies, visque nocere Dei,  
 Salve igitur, Princeps, magno demisse Tonante  
 In terras meritis non moriture tuis.

*De eodem Leone X. Pont. Max.*

Quando, Deus, liquido pisces in flumine tuti?  
 Quando canet volucrum carmina tuta cohors?

Quando

Quando



Quando feret tellus duro sine cuncta labore?

Quando legam, rubris quæ legit Indus aquis?

Quando hic Assyrii passim nascentur odores?

Hic sua quando metet gramina pastor Arabs?

Tum Deus hæc fient, inquit, mea carbasa cœlo

Demissus tacita cum reget arte Leo.

*Ad eundem LEONEM X. Pont. Maxim.  
de Coronatione.*

Quod tibi sit pietas animo, Leo, tuque futurus

Quod fautor mentis præsidiumque bonæ.

Creditur externo, populoque adstante Quirini,

In caput e cœlo lapsa corona tuum.

Hæc erat in populis vox unica, sæcula vivat

Nestoris, Euboicos continuetque dies.

Principe quo populos Asiæ, Libyæque subactos

Speſtabitque Numæ tempora nostra dies.

*De eodem Leone X. Pont. Max.*

Dic rogo de Decimo quid sentis amice, Leone,

Qui modo tam sanctus dicitur esse pater?

Hunc ego crediderim verum fore tempore nostro

Pastorem; elegit Juppiter arce sua.

Flumina melle fluent, descendet ab æthere Virgo,

Cumque sua populis jura sorore dabit.

Principe quo longa Mavors formidine terras

Solvat, & in toto pax erit orbe diu.

Si videas animi quæ vernant pectore dotes,

Vix melior Tatius, simpliciorque fuit.

Vivat in orbe diu, quando uno hoc ore loquuntur,

Quam cœlum est superis, tam bonus orbis erit.

*Ad eundem Leonem X. Pont. Max.*

Hæc loca jam bonitas, Leo, semper adire timebat;

Scilicet horriferi plena timoris erant.

Nunc

Nunc tua tanta quies pulso colit atria Marte,  
Quanta olim Nerva sceptrā tenente fuit.  
Hinc Leo quando tuis excludis ab ædibus arma,  
Auguror, Augusti sæcula nostra fore.


# UBALDI GENUENSIS



*De Duello Fed. Savorgniani & Martii  
Colloredi.*

CUM gemini juvenes, peperit quos Julia tellus,  
Ambo pares annis, invictis viribus ambo,  
Effoderent nudum per mutua vulnera pectus,  
Vidit, & ex alto veniens Pax aurea cœlo  
Sanguine rorantes pugnantibus abstulit enses;  
Ac tali ambiguum certamen voce diremit;  
Este pares in amore, pares velut estis in armis.





# PETRI GHERARDII

## BURGENSIS.



*In defunctos prælio navali contra Turcas.*

**N**on hic funde rosas: petierunt templa Deorum  
 Illustres animæ, pro pietate suâ.  
 Æternamque sibi vitam nobisque pararunt  
 Otia Christicolis longa per Ausoniam.

*De eadem pugnâ.*

Dardanidum Veneti genus, & Romana juvenus,  
 Dux quibus ad bellum præsidet Austriacus;  
 Argivâ cum classe manus, atque hostibus Afris  
 Fluctibus in mediis conseruere sali.  
 Dum pugnant, sparguntque faces, & spicula vibrant,  
 Scinduntur dubiâ seditione Dei.  
 Mars a Romulidis, & Trojæ Cynthius auctor  
 A Venetis toto pectore stare ferox  
 At pelagi domitor Danaïs, Vulcanus & Afris  
 Ore favere, & opem suppeditare simul,  
 Adstat Mavorti Cypris, Phœboque Diana:  
 Neptuno Pallas, Junoque Mulciberi.  
 Hæ cupiunt iterum crudeli evertere bello  
 Reliquias Danaum per maria alta truces;  
 Amissos illæ reparare nepotibus optant  
 Fines, & tumidi tradere jura maris.  
 Dum studia hæc inter ventos tenet Æolus antro  
 Descendit volucris regia sideribus:

Quæ

Quæ Numidum classem disiecit, & agmina Grajum  
Rostro, atque alarum præpete remigio;  
Hosque volans laniavit atrox, & distulit ungue:  
Hos fera cæruleis præcipitavit aquis.  
Obstupuere metu Juno, Saturnia, Pallas,  
Æquoreusque parens, ignipotensque Deus.  
Lætitia exultat Mars, Phœbus, Cynthia, Cypris;  
Adiiciunt Superis Austriacumque ducem.

*De eadem.*

Qui modo pestifero tot jugera ventre tegebat  
Terrarum serpens, & volitabat aquis,  
Cunctaque inexpletum rapiebat corpora passim,  
Tyrrhenis errans, Adriacisque vadis;  
Arte nec humanâ deleri posset, & astu;  
Perdidit hunc volucris regia lapsa polo.  
Namque illum e pelago fugere, elabique volentem  
Corripuit, sævos implicuitque pedes,  
Sublimemque tulit, rostroque atque ungue cruentans,  
Exanimum falsis præcipitavit aquis.  
Quo facto terras purgavit labe malignâ;  
Solvit & altivolans Itala corda metu.  
Quæque fretum timuere rates, jam cæcula tutæ  
Verrunt, nec fraudes permetuuntque dolos,  
Omnis, io, reginam avium sonat æquoris unda;  
Rura canunt Aquilam, templa, domusque virum;  
Ergo quid arguitis rapti Ganimedis honores?  
Illa Jovi lusus non agit usque suo;  
Et digna est sacris celebri certamine ludis;  
Et victor Phœbus, Pythia qui mœruit.

*Adhuc de eadem.*

Non jam Luna mari fulget, sed merfa profundo est  
Lumine cassa, fretum Solis sub luce serenâ,  
Navita, percurrere: hæc tutum per cæcula cunctis  
Reddit iter, qui classe parant accedere portum,  
Felices degant ubi veræ tempora vitæ.



*In Turcas.*

Candida Luna orbem totum complere parabat;  
Cornua sed miseræ fracta fuere modo.

*In Augustinum Barbadicum.*

Ut saluum novit clypeum, de pectore duxit  
Thebanus jaculum dux, obiitque libens.  
Ut bene rem pelago sensit succedere, traxit  
Dux Venetum ex oculo missile, obire volens.  
Lætus uterque perit pro libertate tuenda,  
Lætus & hostiles fregit uterque minas.  
O rari virtute duces, & carmine digni  
Perpetuo! o felix patria, quæ genuit!  
O præcisi, potius sæclis oriunde beatis,  
Dux Venetum, ut sapiens Græcia te caneret!

*In eundem.*

Victori lumen tibi Barbarus hostis ademit,  
Ultima ne caperes gaudia, Barbarice.

*In eundem.*

Non licuit spectare oculis quæsitæ trophææ  
De Turcis pelago dux tibi clare feris.  
Nam tibi quæ eripuit jucundum lumen arundo,  
Illa eadem vitam (proh dolor!) eripuit.

*In eundem.*

Littora pro tumulo ponas, victasque carinas  
Desuper, ut fortis sint pia busta duci.  
Ismariumque nota Mæortem in fronte sepulchri,  
Et Selynum: hoc tumulo contege Barbaricum.  
Vociferantque Leo super adsit, qui mea dicat  
Gesta, brevi magnum quid tumulatis humo?

*In eundem.*

Lumen eras Venetæ, dux illustrissime, gentis;  
Atque idem tenebras orbatus luce tulisses  
Illi, ni multo per te quæsitâ labore  
Splendorem miseræ Victoriâ læta parasset.

*In eundem.*

Affiduo Veneti perdebant lumina fletu,  
Quod dux illustris lumine cassus erat.  
Non tulit in tenebris Victoriâ læta jacere  
Hos, & se cunctis cernere posse dedit.

*De Triumviratu.*

Quæ victrix fuerat, potensque Roma,  
Paulatim cecidit Triumviratu  
Antoni, Lepidique Cæsarisque;  
Clades inde quot Actium sequutæ?  
Quot Mundi caput urbs tulit ruinas?  
At victrix iterum, potensque Roma  
Se innox restituit Triumviratu.  
Nam Pii, Venerum, Austriique vires  
Hostem non procul Actio superbum  
Fregere unanimes, & expaventem,  
Romamque, Italianque recrearunt.  
Gaude, Roma potens, Triumviratu  
Hoc brevi caput orbis es futura.

*Ad Lunam, insigne Turcarum.*

Lumine Luna notho credis te posse volucrum  
Lædere reginam, dum volat illa mari?  
Falleris; hæc oculis radiantia lumina Solis  
Sustinet, & temnet lumina parva tua.

*In obitum Fabii Gratiani.*

Cur tristes, animose Fabi, tua funera flemus?  
 Funera non lacrimis sunt decoranda tua.  
 Namque ubi tu melius poteras fuisse cruorem,  
 Aut vitam melius ponere, bella sequens?  
 Est tibi profusus Christi pro nomine sanguis,  
 Qui pro te sanguinem fuderat ipse prius.  
 Tu mortem Christi pro religione subisti;  
 Pro te sustinuit qui prius ipse mori.  
 At tibi perpetuâ, juvenis fortissime, vitâ  
 Mutatur tenebris mors adoperta caput;  
 Et Superum pennis sublatus, regia Cœli  
 Tecta petis, summo perfruerisque Deo.

*In eundem.*

Quæ tibi glans niveum trajecit ahenea pectus,  
 Suscepit igne cavis molibus acta, Fabi;  
 Eripuit dulcem tibi vitam, & gaudia nobis  
 Abstulit, & patriæ spemque, decusque tuæ.  
 Nam tu noster eras amor, & suprema voluptas;  
 Et patriæ lumen, præsidiumque potens.  
 Sed tibi nec dulcem vitam glans abstulit illa,  
 Quin vita est dulcis parta cruore tibi.  
 Nam tu cœlicolum stellanti in sede locatus  
 Ævum cum superis forte beatus agis.  
 At nos in tenebris luctuque relinquis amicos,  
 Et patriæ densis spemque, decusque tuæ.

*Eidem.*

Pro Christo tibi mors brevis est, animose, petita,  
 Qui te immortalis morte redemit amans.  
 Vita brevis tibi pro Christo est, animose, profusa,  
 Qui tulit æternam vectus ad alta tibi.  
 O nimium felix lethum, nimiumque beata  
 Vita! pias sedes hæc peperere tibi.

*In ejusdem obitum.*

Dum tendit Fabius per barbara tela, per ignes,  
 Tactus ab ardenti glande colorat aquas.  
 Dum cadit, & Turcas videt inclinare, sonanti  
 Ore inquit, gaudens hoste cadente cado.

*In obitum Ludovici Paulucii Perusini militum  
 Ducis.*

Nactus præpropere fueras qui Martis honorem,  
 Te te præpropere Mors, Ludovice, rapit.  
 Præpropere rapuit; tua si perpenditur ætas:  
 Clotho vix quatuor nam tibi lustra dedit.  
 At non præpropere, si quis tua facta revolvit,  
 Quæ fecisse puto vix potuisse senem.

*In eundem.*

Tu generis, patriæque novo splendore superstes  
 Aucturus fueras, Italiæque decus;  
 Mors tibi sed vitam, titulosque invidit honestos,  
 Noluit antiquos te superare duces.  
 Ipsa tamen Mortis, quæ spicula certa retundit,  
 Rerum gestarum gloria viva manet.

*De eodem.*

Dic mihi, quid lacrimæ? miles quid pectora tundit?  
 Quisve novus resonat mœstus in urbe sonus?  
 Cur pullas sumpsere togas tot in urbe celebres,  
 Et genere, & factis conspicuique viri?  
 Martis honos cecidit; Perusina flosque juvenæ;  
 Pauluciæ gentis spes, amor, atque decus.

*De eodem.*

Plus solito exardens cælum cur bella minatur  
 Undique; & è cælo Juppiter arma pluit?



Turcarum insidiis juvenem Mars esse peremptum,  
 Quem dolet, ulcisci cum Jove promptus adest.  
 Sanguine barbarico Martis saturabitur ira;  
 Sanguine barbarico lenta erit ira Jovis.

*Ad Fulvium Paulucium ejusdem Ludovici  
 fratrem.*

O quam Pegaseum vellem potasse liquorem,  
 Pimplæumque frequens incoluisse nemus;  
 Effererem, Fulvi, late Ludovicus ut esset  
 Cognitus Eois, cognitus Hesperiiis.  
 Pro re nunc animus tibi suscipiendus amici,  
 Ut, quod non possum, sit voluisse satis.

*Ad Antonium Parrenottum S. R. E. Cardinalem  
 Granaelanum, & Neapoli Proregem.*

Dum latos populos magna ditione gubernas,  
 Et justî, rectique tenax, moderaris habenas  
 Rerum, virtuti persolvens præmia digna,  
 Et meritas vitio tribuens sine crimine pœnas;  
 Dum te flagranti studio, atque applausibus omnes  
 Excipiunt gentes, & tanto principe lætæ,  
 Inque caput, sacrosque humeros, gremiumque, manusq;  
 Purpureos flores, & candida lilia jactant;  
 Dum tibi concelebrant solemnes ordine pompas,  
 Et festas agitant luces clamore secundo;  
 Aurea Pax summo veniens e vertice Cœli,  
 Quam pia religio, probitas, rectique cupido,  
 Et dulcis sine fraude lepos comitantur euntem,  
 Qua pater irriguo Sebethus flumine currit,  
 Constitit, & tales profudit pectore voces:  
 O fortunatæ tali sub Principe gentes,  
 O felix etiam tanto pro munere Princeps!

*Epitaphium Catellæ.*

Parva caput, variata pilo, caudaque decora  
 Lenibas curas, fida Catella, meas.  
 Et blandè hospitibus latrabas ore venusto,  
 Ludebasque tuo suave nitente pede.  
 En mensæ astabas erecto crure, bipesque:  
 Et sueta es longos ducere iussa choros.  
 Et tereti collo gestans crepitacula, totam  
 Mulcebas grato blanda sonore domum.  
 Qua nunc pro teneris includere lusibus urna,  
 Et volui titulo condecorare brevi.  
 Jam te dignavi mensa, tepidoque cubili;  
 Nunc ego te dono marmore carminibus.

---

## JO: Mariæ GHERARDII

B U R G E N S I S.

*Donati Tumulus.*

**C**onsilio, qui regna gravi fervare solebat,  
 Et populos nutu conciliare suo:  
 Qui classem, portus, arces, molesque superbas  
 Rexit Mausolum, Flora venusta, trium;  
 Qui vigilans mensarum Annonæ larga parabat,  
 Oppresso factis dulce levamen erat;  
 Qui claros virtute viros super astra ferebat,  
 Hic jacet; & virtus, blanditiæque jacent;  
 Donatus tumulo recubat, sed fama per Orbem  
 Advolat, & fruitur spiritus ille Deo.

*Votum ad Virginem pro incolamitate Magni  
Ducis Etruriæ.*

Ætherei Regina chori, Cœlique voluptas  
Aurea, tartarum non peritura salus;  
Aspice funesto mœret quam Flora dolore,  
Dum Rex Etruscus languida membra trahit.  
Errat, si dormit custos, deserta capella,  
Si dux deficiat, miles inermis erit;  
Nunc si morte premas, quis munera larga quotannis  
Offerat, & templis thura Sabæa dabit?  
Quis delubra tibi gemmarum luce coronet,  
Ceræ ubi perpetuum fundat ab igne diem,  
Et quis lunatas classes, multumque furentes  
Turcas disiciat, corripiatque mari;  
Quisnam Mavortem, nostrisque arcebit ab oris  
Pauperiem, febre si jacet urbis apex?  
Redde urbi Cosinum, firmas tu suffice vires,  
Hoc proni cuncti pectore, Virgo petunt.

*Eleonora, Ferdinandi Magni Ducis Etruriæ  
Filie, tumulus.*

Non tibi fraternæ radiarunt ora coronæ,  
Et fugis? heu tenuis pulvis, & umbra sumus.  
Eleonora jaces; sed sole recincta coruscat  
Pars melior, Cœlo quam bene nupta Deo!  
Hæc tibi virgineos celebrat festiva Hymenæos  
Dum Flora ad tumulum, solvitur in lacrimas.

*Ad Franciscum Bracciolinum Poëtam  
celeberrimum.*

In nova cum cecinit mutatas corpora formas  
Nasæ, dedit falsis nomina magna diis.  
Tu contra, Francisce, notas infanda deorum  
Crimina tu fraudes, & scelus omne domas;

Falsum commistis quod tetigit ille tenebris ,

Tu retegis veri candidiore face.

O dignum tantis certamen vatibus! ipsa

Sed dubitat qua nam laurea parte cadat.

Arbiter interea Nasonem dixit Apollo

Laudo , Brachiolus munera nostra ferat.

*De Principe Laurentio Mediceo.*

Bronzinum jussit placatum pingere Amorem ,

Sed Martem torva pingere fronte Venus .

Laurentem pinxit, dicens in pectore Mavors

Regnat , & ex oculis spicula jactat Amor .


*In Cosmum II. Mediceum Magnum Etrurie  
Ducem.*

Odrysiam sternit classem si nomine Cosmus ,

Quid cum bellatrix torqueat arma manus ?

Hoste triumphato poterit, nec fallor, in undis

Vel pro Neptuno dicere jura Mari .





# NICOLAI PARTHENII GIANNETTASII

SOCIETATIS JESU.

NEAPOLITANI.



LEOPOLDO I. CÆSARI, AUGUSTO.

TITYRUS.

Argumentum.

*Tityrus piscator, Lycida hortante, Cæsari epiniciū ob  
Viennam liberatam canit; per Tityrū Poëtam, per Ly-  
cidam vero Josephum Mediceum Octaviani Principem, qui  
primus Victoriæ nuncium Vati attulit, intellige.*

LYCIDAS, TITYRUS PISCATORES.

*Lyc.* **T**ityre, quid vitreas recubans Crateris ad undas

Otia lentus agis? tenui cur lætus avena  
Non dulcem viridi Musam meditaris in æcta?

*Tit.* Non equidem, Lycida, non hoc fert carmina tempus,  
Improba fors quando, & Scythia barbarus omnia versât,

*Lyc.* An quæ Parthenopes audiui nuper in urbe,  
Cum domino ferrem Synodontas, Tityre, nescis?

*Tit.* Dic, age, quid, Lycida, Sirenis ab urbe reportas?

*Lyc.* Tityre, læta tibi Sirenis ab urbe reporto.

Urbs secura metu: perrupit barbara castra  
Augustus Cæsar Leopoldus, & agmina mille  
Threiciū fudit, gelidoque immersit in Istro.

*Tit.*

*Tit.* Verane sunt, Lycida hæc, an dulcia somnia amantū?

*Lyc.* Vera quidem; nam fama volans pernicibus alis  
Danubio ex alto Romam pervenit, & omnes  
Italiæ implevit lætis rumoribus urbes:

Et modo Parthenopen replevit Tityre, nostram.  
Nonne vides, ut crebra sonum tormenta canorum  
Dent passim, & tutis plaudant terroribus arces:  
Nostraque festivis ardeat (1) Olympia flammis?

*Tit.* O quantum exilio, Lycida dum talia narras:  
Exsiliunt mihi læti oculi, lætum exsilit & cor.  
Munere pro tali pulchra te murice concha  
Donabo, Lycida, dono mihi quam dedit olim,  
Cum canerem, Melisæus: aquis non venit ab altis  
Pulchrior. Est circum vario depicta colore;  
Et mare depictum, & scopuli spectantur, & udum  
Litus, & in tremulo fugientes gurgite cymbæ;  
Naturæ ludentis opus, quam murice concham  
Credo equidem pinxisse manu, ingenioque magistro.  
Namque opus hoc casu minimè evenisse putandum est.

*Lyc.* Accipio pulchram, quam das mihi, Tityre, conchā.  
Tu vero Augusto dignam, tantoque triumpho  
Litoream tenui calamo meditare Camœnam.  
Namque acta in nostra jam te dixere poetam,  
Et tibi jam nostræ gratantur (2) Olympides, & te  
Velarunt musco Nymphæ, tumuloque propinquo  
Sinceri applaudunt Manes, Manesque Maronis.

*Tit.* Litoream Musam dicamus, & æquora cantu,  
Litoraue, scopulique, omnisque resultet Olympus.  
Incipiam, tu, docte, modos percurrere loquaces.

Currite, Tritones, per cærula, currite concha,  
Vicir, io; Cæsar, vos, o maris aurea proles,  
Nereides formosa Theri, formosaque Dori,  
Huc celeres imis a sedibus usque venite:

T 4

Et

---

(1) Sic antiquis dicta est ora maritima inter Lucullanum,  
& Pausilipum, vulgò *Chiaja* Scip. Manzella in descri-  
ptione Regni Neapolitani.

(2) Musæ ab ora Olympia sic dictæ.

Et viridi sertum victori texite myrto.

Cæsaris & viridi consueſcant tempora myrto :

Nam vetus eſt laurus ; nova ſint inſignia Regum .

Currite, Tritones, per cæula, currite concha.

Vicit, io ; Cæſar : calcata ſuperbia Regis

Eoi, fractæque acies, fuſique manipuli,

Threiciique, Arabesque, ſagittiferique Geloni,

Viſti omnes, verſæque retro fugere tyranno

Mille acies, & mille virum data millia letho .

Centum pro tali nunc dicite digna triumpho

Carmina, Pauſilypique Deæ . pelagique puellæ .

Currite, Tritones . per cæula, currite concha.

Vicit, io, Cæſar : Neptunia Numina, Glauci,

Voce ciete ſonum, & conchas inflatæ marinas .

Ite ſub Antipodas, celeri vos ite natatu,

Ac geminos facti ſamam proferre ſub axes :

Audiat Heſperius, ſimul audiat Orbis Eous

Auguſti palmam, & Romæ gratetur ovari.

Currite, Tritones, per cæula, currite concha.

Vicit, io, Cæſar ; per littora ſpargite muſcum

Najades, & circum vitreos confidite fontes ;

Pollice virgineo teneros hic carpite flores :

Floribus & piſtum, divæ, replete caniſtrum .

At vos, o Nymphæ Craterides, ite ſub undas ;

Ite . recurvato variata corallia trunco

Vellite muſcoſis e rupibus, & mihi conchas

Ferte Deæ pelagi, & pingui conchyliæ ſucco .

Hæc ego victori Leopoldo munera mittam ;

Atque hæc cæruleis apponam carmina donis :

Hæc piſcatoris ne temnas munera, Cæſar ;

Namque his Neptunum donamus, & his quoque Dorin ;

Eſt & Neptunus Deus æquoris, & Dea Doris .

Currite, Tritones, per cæula, currite concha,

Vicit, io, Cæſar : per marmora ludite cymbis,

O juvenes, puppeſque novis ornate corollis ;

Et niveos inter delphines ludite curſu .

Tritonum interea vocali ſcrupea concha

Antra ſonent, ſcopulique, omniſque a vertice pontus.

Et

Et circum socio responsent litora cantu.

Omnia lætitiæ concedant; omnia festis

Vocibus applaudant victori, & murmure lato

Augusti nomen Leopoldi ad sidera tollant.

Currite, Tritones, per cærula, currite concha.

O mihi si cœlo exoptatus fulserit unquam

Ille dies (illum Superi concedite Divi)

Quo te regali in puppi super æquora vestum

Antiquam imperii sedem lustrare sub Ortum,

Arque per Eoi populos dare jura volentes

Aspicerem: tunc ipse tuas jam dicere laudes

Aggrederer, nomenque tuum, tua facta per Orbem

Mœonio ferrem cantu, calamoque Sicano.

Me super assurgens humiles procul ire jubebo

Paufilypi Musas, & litora; me sacra Pindi

Accipient nemora, & Parnassi dulcia Tempe.

Litoream interea, Cæsar, ne despice Mulam,

Quam tibi cærulei cecinit Crateris ad oram

Tityius, e patrio qui primus litore Musas

Per vitreas vexit velis majoribus undas,

Primus & audaces duxit per cærula nautas.

Tu vero pulsare, puer, freta desine concha;

En cava solliciti veniunt ad litora nautæ:

Et [1] Megaræ turres jam longior occulit umbra,

## P A R T H E N I S.

### A R G U M E N T U M.

*Jolas piscator Virginem, humani generis delicias, uni-  
ce adamabat; qua cum dulce queritur, quod se ex ocu-  
lis subtraxerit. Per Parthenidem, Virginem, per Jolam,  
religiosum virum intellige.*

Parthenidem puer ardebat piscator Jolas,

Delicias divum, atque hominum, quam sæpe solebat

Ad

---

(1) Insula Lucullano objecta, quæ & castrum Luculla-  
num appellata est, *Castel dell' ova*.



Ad (1) Mergillinae vitreos invisere fontes,  
 Sacrum ubi Parthenidis stat curvo in litore templum.  
 Hic cum jam Zephyri ponebant murmura, & altum  
 Purpureus rediens pulsabat Vesper Olympum,  
 Hæc dulces inter lacrimas incondita solus  
 Fluctibus, & duris jactabat carmina saxis: [tum  
*Fol.* Quid tantum refugis, bona Virgo? quid & mihi tan-  
 Divinum avertis vultum, renuisque videri?  
 Ah miser, ah nostros contemnis Parthenis ignes?  
 Prætulerimne aliquam tibi forsan, Dia, vereris?  
 At mihi vos, Superi, testes, si corde caducum,  
 Aut unquam mortale aliquid meditatus; & ipsi  
 Sint mihi vel scopuli testes, sint litora, & undæ.  
 Dicite vos, scopuli, vos litora dicite, & undæ,  
 (Si sensus scopuli, si litora habetis, & undæ)  
 Parthenidem si semper ego piscator amavi:  
 Nam voces vos sæpe meas audire soletis,  
 Atque repercussas mea reddere verba per auras.  
 Ah nostro quoties offensæ murmure cautes  
 Parthenidem sonuere; meos jam carmine amores  
 Edoctæ rupes resonare, & concava saxa.  
 Et vos, quæ nostro frondetis litore, quercus,  
 Dicite (nam sensus, & habetis numina quercus)  
 Hæc vestro quoties incidi carmina trunco:  
 Te, Virgo, piscator, amat, & amabit Jolas:  
 Et veluti hæc quercus, crescent sic semper amores,  
 An me tu forsan, Virgo, aspernaris amantem,  
 Quod pauper piscator? erat piscator & ipse  
 Nonne puer, formosa, tuus, quem sæpe beato  
 Amplexum gremio tenuisti, & dulcia sæpe,  
 Atque optata sacris libasti basia labris?  
 Ille nec erubuit calamos, non retia, & hamos,  
 Nec parvam sociis agitare per æquora cymbam,  
 Cum

---

(1) Amœnissima ad Pausilypum Villa in extremo oræ  
 Olympiæ *Mergogliano*. olim Aëtii Syncerii, ubi cele-  
 berrimum ejus sepulchrum in templo ab ipso Virgini,  
 & Divo Nazario dedicato.

Cum Deus ipse, maris regnator, & ætheris alti,  
 Qui nutu terras, nutu qui sidera torquet.  
 Fortis amor; nostrum quis vincere possit amorem?  
 Ille Deum in terras, vel ab æthere traxit amantem;  
 Atque malis hominum pariter consuescere jussit,  
 Et tu, Diva, meos nunc aspernaberis ignes?  
 An mihi dura, quia agresti munuscula cultu  
 Nulla tibi misi? nisi tamen ipse rubentes  
 Bissenas de more rosas tibi, Dia, quotannis,  
 Et meminisse potes; namque hoc cum carmine misi:  
 Virgo, noster amor, tuus hæc tibi mittit Jolas.  
 Quin etiam variis memini misisse corollam  
 Floribus intexam, & calathis quoque lilia plenis:  
 Candida (novi equidem) quia sunt tibi lilia cordi.  
 Sunt & plura mihi in testis; cras illa videbis  
 Ante aras, Regina, tuas emittere odorem.  
 Præterea, dura quæ vix de caute revelli  
 Nuper oliviferæ piscola ad saxa (1) Minervæ,  
 Bina mihi curvos variata corallia ramos;  
 Bis petiit Nisæa Toror, bis & mihi furtim  
 Sublegere aggressa est; arca sed condita servo.  
 Illa tibi multo cum carmine mittet Jolas.  
 Natalem cum; Virgo, tuum lux annua reddet.  
 Sed piscatoris parva hæc an munera spernis,  
 O Divum Regina? tibi sed munera digna  
 Qui ferat? ipse suis vix dignum texit amictum  
 Sol radiis: vix Luna pedes tibi lambere digna est.  
 At, quia dulce sibi cor amantes mittier optant:  
 Cor tibi, quod tantum restabat, misimus ultro.  
 Quidquid idest, certe Deus ipse hoc munere majus  
 Nec sperare potest, nec reddere possumus ipsi.  
 At tibi quod totum, Virgo, jam misimus illud,  
 Scis equidem, certisque potes cognoscere signis,  
 Mane ego te primo, te vespere, Diva, saluto;  
 Sæpius atque die in medio tibi carmina dico;

Atque

---

(1) Campaniæ promontorium, *Capo di Massa*, o la *Campanella*.

Atque tuum quoties audire, & reddere nomen  
 Contingit, tunc ore fero prona oscula terræ  
 Cernuus, & cœli venerabile pignus adoro,  
 Nil tamen hæc profunt, dulcem si cernere vultum  
 Dura negas, tantumque meos contemnis amores.  
 At mihi te propria vetitum si cernere forma,  
 Appicta in tabulis saltem simulacra videbo.  
 Sic aliqua & nostro dabitur medicina dolori:  
 Est sua conspectu vel inani blanda voluptas.  
 Ah timeo (de te quoniam mihi credere tantum  
 Non equidem, bona Virgo, licet) ne pectore nostro  
 Quid lateat, quod, Diva, tuos offendat ocellos.  
 Dic mihi quis lateat malus anguis? ut & citus illum  
 Conteram, & optato dignus jam reddar amore.  
 Sed tempus rutilis percurrere litora flammis;  
 Nostra sed occultæ depascent pectora flammæ;

## A N T I G E N E S.

## A R G U M E N T U M.

*Milcon, & Dorilas piscatores mutuis inter se primum  
 conviciis, mox, advocato Antigene, carmine certant: sed  
 neuter vincit, Antigenis sententiâ. Per Antigenem intel-  
 ligit pœta familiarissimum suum Josephum Vallettam Ju-  
 risconsultum eximium, per Argilochum innuit Francis-  
 cum Solimenem Pictorem sui temporis egregium.*

## MILCON, DORILAS, ANTIGENES.

*Mil.* Dic mihi cûi nassas servas puer? an Polybôtæ?  
*Dor.* Non illi, at Lycabæ, Bajas qui nuper abivit.  
*Mil.* Infelix piscator, ovem qui nescius isti  
 Commisit servare lupo: nam sæpe revisit  
 Hic nassam, & partem prædæ sibi subripit udæ.  
*Dor.* Tu fur, tu nassis solitus subducere pisces.  
 Te modo cum præda fugientem ab litore vidi,  
 Cum fumosa citus Phrasidami tecta petebas,

Plurima sæpe soles ubi, pessime, condere furta.

*Mil.* Vidisti, Doryla, sed cum te Liber habebat  
Numine repletum multo, & dulcedine lætum.  
Quippe tibi trullas mos est siccare rubentes,  
Atque omnes vili vappa purgare tabernas,

*Dor.* Ista viris, perverse? mihi non murice pictam  
Clam nuper concham medio furatus ab antro es?

*Mil.* Nunc etiam inflaris temulento, ut semper, Jaceho;  
Non reddenda mihi pro pignore? protinus hinc te  
Ni cito proripias, saxo caput, improbe, frangam.

*Dor.* Tu Doryla? nostris ni te, scelerate, Comatas  
E manibus toties rapuisset, mortuus esses.

*Mil.* Novit, & ille tibi quoties civa tempora fregi.

*Dor.* Te, te ego: vicinus prohibet sed plura fatelles.  
Dic, age, danda tibi quonam pro pignore concha?  
Post mihi (nec fugies) pœnas tu, perfide, solves.

*Mil.* Te quia tunc mecum certantem carmine vici.

*Dor.* Tu me cantando? non tum mea carmina fluctus  
Mirati, & rigidæ movere cacumina rupes?  
At te, cum fracta strepere, indocte, cicuta,  
Nereides, pelagique omnes sprevere puellæ.  
Vis ne iterum certare? novo certamine victus  
Tum me cantando vicisse fateberis ipse.

In medio statuum duo pocula, quæ mihi Gallus,  
Cum procul Armoricis venisset portitor oris,  
Vendidit Eurialus Cumatum in litore quondam.  
Divini est opus Argilochi, qui pocula fecit.

(Argilochum memini Eurialum dixisse magistrum)

Depicta in medio spectantur cærula, & udis  
Stat senior, Batio similis, piscator arenis,  
Cui nudo nimium nitenti educere ponto  
Retia, purpureo turgescunt sanguine venæ,  
Et duri multo tenduntur robore nervi,  
Omnibus ut credas piscari viribus illum.

Non longe sedet in scopulo formosa puella,  
Seu vitrei sit Nympha maris, seu litoris una,  
Quæ viridem vario distinguit flore corollam  
Myrto intertextam, nitidisque aspectat arenis



Piscantem, & risu ludit dea pulchra soluto.  
 Parte alia surgens aprico vinea colle  
 Uvis luxuriat maturis, parvulus illam  
 Custodit puer, & roseo pulcherrimus ore est,  
 Qui sepes prope vimineas confidit, & illum  
 Stant geminæ circum vulpes, quarum altera vites  
 Per medias cursat, qua dulcior uva racemo  
 E lato pendet, folioque intacta virenti  
 Clam latet, & dulces morfu depascitur uvas.  
 In peram versata dolos struit altera furtim,  
 Atque pyra, atque nuces, atque aurea mala rapaci  
 Subripit ore, puer capiendis mane cicadis  
 Intexit junco casses, nec mitia poma,  
 Nec vites quicquam curat; sed totus in uno  
 Est opere: & puero sua sunt puerilia curæ.  
 Nec labra admovi, quamvis me sæpe rogaret  
 Nisa: sed intacta ex illo servantur in arca.

*Mil.* At mihi nodoso sunt bina corallia trunco,  
 Nuper Teleboum dura de rupe revelli;  
 Hæc sint victori sua munera: plura neque ausim  
 Ponere; namque domi, o Doryla, mihi dura noverca,  
 Et durus pater est, arca qui condita servant  
 Cuncta: nec est quidquā, quod clam subducere possim,  
*Dor.* Jam certare placet: veniam quocumque vocaris.  
 Non me iterum effugies; faciam, certamine victus  
 Ne Dorylam, aut alium posthac tu voce lacestas.  
 Audiat hæc tantum, vicino in margine ripæ  
 Qui sedet, & Zephyros, & dulcia frigora captat,  
 Antigere: nunquam sic me vicisse negabis.

*Mil.* Nec te, nec quenquam fugio. Bonus huc age nostras,  
 Antigones, audire veni, & laudare Camœnas.

*Ant.* Dicite jam, pueri, molli consedimus alga,  
 Frigus ubi lato præbet curvamine rupes.  
 Lumine nunc cælum puto nitet; æquora rident,  
 Et placidi rident Zephyri, luduntque per undas  
 Nereides, vitreosque revisunt Najades amnes,  
 Dic prior, o Doryla; referet mox carmina Mil-

cen.

Ludi.

Ludite & alternis : nam alternis ludit Apollo.

*Dor.* Cærulei fluctus , & marmoris ima capori ,

Dicite , si Dorylas cantavit amabile carmen ;

Dicite , festivas & gurgite tollite voces ;

Si secus , immoto torpescat in æquore pontus .

*Mil.* Muscosæ cautes , & aquis lita saxa marinis ,

Aurea si calamo deduxit carmina Milcon ,

Ostreaque , & læto conchylia gignite succo :

Si contra , vacuas sine succo effundite conchas .

*Dor.* Cum lentus canerem sub tegmine rupis opaco ,

Qua super incumbit placidissima Mergilline ,

° Nereides vitreis se tollere protinus undis ,

Et placidos miscere choros ad carmina vidi .

*Mil.* Qua se Pausilypus deducit in æquora clivo ,

Dum sedeo , & gracili deductum carmen avenæ

Sæpe iterò , dulci Sirenes murmure captas

Aspexi ad litus celeri properare natatu .

*Dor.* Me scopuli , Misene , tui , collesque Dicarchi

Viderunt suavi mulcentem carmine Phocas .

*Mil.* Me Prochyte aspexit muscoso in vertice saxi

Cantantem rigidas mollire in fluctibus Orcas .

*Dor.* Retia si jacio , veniunt ad retia pisces ;

Si nassas , pingui gravitant sub pondere nassæ .

*Mil.* Nunquam cæruleis immergitur hamus in undis ,

Qui mihi non molles ferat alto a gurgite prædas .

*Dor.* Dum viridi e scopulo nudus sub marmore mergor ,

Ostrea dura lego , & pingui conchylia succo ,

*Mil.* Cum noctu nitidis perlustro littora flammis

Ostipedes rigida divello e rupe paguros .

*Dor.* Blanda mihi semper Fortuna , & cærula ridet :

Et formosa suo ridet mea Nisa marito .

*Mil.* Aurea decurrunt mihi sæcula : marmora numquam

Dura mihi , & numquam tristes Amaryllidis iræ .

*Dor.* Dic ( . ) quibus in terris ( & eris mihi Proteus alter )

Sub-

(1) Tarenti , ubi non longè a litore ingentes palos incolæ  
figunt , qui vertice suprâ aquas extant , in hosce è cœ-

Subter aquas jacto nascantur semine conchæ?

*Mil.* Dic (2) quibus in scopulis felicibus Iride picti  
Versentur pisces, & pignora victor habeto.

*Dor.* Dic (3) ubi squamigeræ veniant ad littora præda  
Sponte sua, manibusque udis captentur arenis?

*Mil.* Dic (4) ubi lacteolos progignant cærula pisces,  
Os quibus est nullum, dorso nec spina rigescit?


*Ast.* Haud equidem vestras ausim componere lites;  
Tu pateras; hic nigra corallia: dignus uterque.  
Ducite jam nassas, pueri, nox humida venit.

Io ros decedit, concharumque sufficit semina, corrupto Græco vocabulo *Lo Fito* vocant, hæc inde à palis abstrahunt, subterque aquas ad ostia parvi sinus mittunt, vehemens ubi est maris fluxus, ibique mirum in modum excresecunt.

(2) Ad Pausilypum, ubi pisces triplici Iridis colore nascuntur, regiones pisces Olympici vocant.

(3) In ora Rhegina ad Cænym promontorium, de quo infra sæpè incidet mentio. Hic enim Pelamydes a Delphinis agitati, marisque fluxu ferente, in terras incidunt: utque Delphines fugiant, in litus exiliunt, capiunturque ab incolis nullo negotio, rem sæpè non finè voluptate admiratus sum.

(4) Rhegii, & Massanæ: *Cicirelli* vulgus vocat, suavissimi saporis sunt, ac veluti lac coagulatum: de his plura in *Halienticis*,



LEOPOLDO J. CÆSARI, AUGUSTO,

CÆSAR

ARGUMENTUM.

*Vienna obsidione liberata, fuso, fugatoque Barbarorum exercitu, Strigonioque recepto, promissa Superum oraculo aurea mundo sæcula jam incipere Cæsari gratatur Poëta, cui, pulsæ Europa Scythiis, Orbis universi imperium auguratur.*

Ætiades Musæ, paulo majora canamus:  
Non humiles cuncti myrtos sectantur, & algas,  
Litora si canimus, sint litora Cæsare digna.  
Tristia nunc tandem cessere oracula Divum,  
Nec duros ultra portendet (1) pagina casus.  
Spes redit, Austriacisque iterum victoriæ castris,  
Ac læti redeunt post tristia bella triumphi.  
Incipiunt jam fausta; vetus jam vertitur ordo,  
Mutatæque vices rerum: nova nascitur ætas;  
Et promissa Diis felicia sæcula Mundo,  
Ac magni fluere incipiunt ex ordine menses.  
Casta fave nunc Virgo; tuo si Numine Cæsar  
Vicit, & ingenti terras formidine solvit.  
Hoc duce, si qua manent priscæ vestigia culpæ,  
Tollentur, totoque Fides regnabit in Orbe.  
Gens sancta ex alto mittetur, & impia passim  
Desinet: èque polo veniens Astræa redibit  
In terras iterum, & Saturnia sæcla reducet;  
Pacatumque reget totum sub Cæsare Mundum,  
Non miseros posthac nautas urgebit egestas:  
Non labor uda mari committere retia, & imas

Tom. V.

V

Non

---

(1) *Martini Stredonii Soc. Jes.* qui adversa primùm, mox prospera Cæsari futura prædixit.



Non opus est refluui perquirere gurgitis undas.  
 Ipsa sinu prædas mittent læta æquora, & udi  
 Sponte sua venient captivi ad litora pisces.  
 Ipsi & odorati musco scopuli, & lita saxa  
 Fluctibus, & duræ fundent conchylia rupes.  
 Ridebunt lenes auræ, Zephyrique salubres,  
 Et tranquilla levi crispabunt cærula flabro.  
 Nam procul horrifoni pacato ex æthere nimbi  
 Semper erunt; rigidæque silebunt rupe procellæ,  
 Nec nautis Hyades metuendæ, aut ense minaci  
 Qui mare, qui terras, quique aëra quassat Orion.  
 Ullæ nec assurgent posthac mala sidera Mundo.  
 Non vacuæ metuent Lunæ dispendia conchæ,  
 Nec foliis illas unquam lentiscus amaris  
 Inficiet; pleno turgebunt ubere conchæ,  
 Ac dulci semper pinguescent ubera succo.  
 Nullæ prædonum vexabunt cærula puppes;  
 Nostra nec infames cursabunt litora lembi.  
 Non fraudes aderunt, sævæ non amplius iræ:  
 Non mala furta, dolique, execrandæque rapinæ,  
 Et nullæ scelerum facies post terga revinctæ  
 Æternum stabunt Furæ, Diræque sorores;  
 Semper & horrendi claudentur limina Jani;  
 Sordebitque sua exesum rubigine ferrum.  
 Non silvas pastor, non deferet arva colonus  
 Invitus, rigidique gemet sub pondere Martis:  
 Et curvæ falces non constabuntur in enses.  
 Non vitreas piscator aquas, nec scrupæ saxa  
 Linquet, & ærata fulcabit marmora puppi,  
 Atque insueta gravi tentabit bella tridente.  
 Rupes sed umbrosa frigus captabit opacum,  
 Blandaue litoreas revocabit ad otia Musas.  
 Pax erit; ex alto pacem regnator Olympi  
 Spondet; & optatam spondent bona sidera pacem.  
 Pauca tamen peragenda prius sunt bella per Orbem:  
 Expugnandæ urbes ferro, durique domandi

Jazyges (1) immanesque (2) Avars, Hunnique rebelles,  
 Inde (3) Scythæ & dirus (4) Maumethes, [5] Caspia victus  
 Qui jam claustra petit, fugientem (6) Bactra, neq; Indi  
 Tutantur; longe silvas, saltusque peragrat  
 Riphæos [7] latebrisque vagus se condit [8] Imai.  
 Te manet hic labor, o nostri decus, o amor Orbis,  
 Austriade Cæsar: teque unum Fata repossunt  
 Everforem Asiæ rapidum ceu fulmen, in hostes  
 Ibis, & horrenda quaties formidine gentes.  
 Mox ubi barbarica pulso cum gente tyranno,

V 2

Im-

- 
- (1) Jazyges Metanastæ Europæ populi inter Danubium, & Carpathum, qui nunc Hungariæ montana tenent, quorum Metropolis Cassovia, vulgò Alta Hungaria dicitur, quæ tota ferè Austriacis parebat ante recentes tumultus.
- (2) Avars, & Hunni populi, qui primùm circa Mæotidem paludem inhabitantes, mox in Pannoniam migrarunt, quæ Hungaria ab ipsis dicta est.
- (3) Turcæ ex Scytharum gente, qui anno 625. Heraclio Imperatore, per portas Caspicas in minorem Asiam ingressi pro Imperio Romano militarunt: mox in Scythiam reversi, irrupere iterum anno 958. Constantino Copronimo Imperatore, & Persidem primùm, hinc Asiam minorem, & totum Orientis Imperium occuparunt, capto Byzantio sub Maumethe II. anno 1453.
- (4) Quartus hoc nomine Turcarum Rex.
- (5) Pylæ, seu portæ Caspiæ, per quas ex Scythia in Asiam aditus patet, sive ex Media in Parthiam, angustia inter montes, vulgò *Le Porte di Teflis*.
- (6) *Termend* vulgò, non longè a Caucaaso, qui *Cocas*, & *Cochias* dicitur, & per totam Asiam extenditur.
- (7) Asiæ mons Scythiam secans, Sarmathiamque, vulgò *Oby* dicitur, quo nomine fluvius etiam appellatur.
- (8) Mons Scythiæ, ex quo Scythia intrà, & extrà Imaum appellatur, longè per Asiam extenditur: In Tartaria nunc *Moregar* barbaris indigetatur, in India verò *Dalangaer*.

Imperium Eoi, sedemque tenebis avitam,  
 Invades Asiam, spoliis (1) Babylona superbam  
 Diripies, & regna Cypri vastabis opima.  
 Hinc Syriam evertes totam, fœcundaque Nili  
 Regna, & palmiferam submittes victor (2) Idumen.  
 Hic (nimium o felix, hominum pater, atque Deum rex  
 Te, te in spem tantam, tantosque reservat honores)  
 Sanctam Urbem intrabis, regum stipante corona,  
 Numen adoratum, & dulci dabis oscula ligno,  
 Unde salus nobis orta est, & gaudia Mundo.  
 Auspiciis & jam lætis, felicibus & Diis,  
 Talia concordēs nent aurea sæcula Parcæ.

Aggredere o tantos, spondet quos Numen honores,  
 Chara Deo Soboles, magnum Fidei incrementum.  
 Aspice totum imo concussū a cardine Mundum,  
 Oppidaque, urbesque, & nutantia regna sub armis:  
 Aspice, læta novo gratentur ut omnia sæclo.  
 O mihi si tantum concedant Numina vitæ,  
 Egregios quantum sat erit celebrare triumphos,  
 Et partam imperio pacem, & tua dicere facta,  
 Non me divinus poterit superare canendo  
 Actius, aut dignas cecinit qui Consule silvas:  
 Sicelides quamquam adsint huic, Nereides illi.  
 Judice si mecum certet Deus ipse Palæmon;  
 Judice se, victum dicet Deus ipse Palæmon.  
 Incipe, macte animis, claras decerpere palmas,  
 Et tua victrici intertexere tempora lauro.



AL-

[1] Bagdat.

[2] Idumea, quæ in sacris litoris Edem dicitur, ab incolis *Bidumi*.

ALPHONSO PHILAMARINO  
Turris Duci

THYRSIS

ARGUMENTUM.

*Corydon, & Mopsus piscatores Thyrsidis Olympici piscatoris mortem deflent, alterque epitaphium, apotheosin texit alter; sub Thyrsidis personâ luget pœta familiarissimum suum Ascanium Philamarinum Ascanii Cardinalis nepotem Turris Dominum. Per Corydonem intelligit Alphonsum Philamarinum demortui germanum, cui in acerbissimi funeris solatium Eclogam conscripsit pœta, eique nuncupat, omnemque felicitatem precatur.*

CORYDON, MOPSUS.

*Cor.* Cur non, Mopse (leves quoniam demissimus undis  
Jam nassas, longo capturas tempore prædas;  
Et tenues calami nobis, & carmina) molli  
Hic musco super interea confedimus ambo?

*Mop.* Tu major, Corydon, faciam quæcumque jubebis.  
Aut hic qua Zephyri strepit auræ, & marmurat unda;  
Sive tibi gelidum potius placeat hic sub antrud.  
Aspice, ut ante fores myrtus stipaverit antrum,  
Atque leves subter sternantur molliter algæ.

*Cor.* Litoribus nostris unus tibi certat Jolas.

*Mop.* Quid si idem certet Tritona laceßere cornu,  
Et niveos inter delphinæ Arionæ cantu?

*Cor.* Incipe, Mopse, prior (sunt & mihi carmina) si quas,  
Synceri vel habes laudes, vel jurgia Batti.

Incipe: nam pelago nassas servabit Amilcon.

*Mop.* Imo hæc, quæ vitreas deduxi nuper ad undas,  
Jam repeto: mox ipse mihi fac certet Jolas.

*Cor.* Ut mergos dulci superant modulamine cycni;  
Judicio nostro, sic carmine vincis Jolam.



*Mop.* Desine plura, puer; vacuo successimus antro,  
 Nereides Thyrsin crudeli morte peremptum  
 Flebant: vos testes scopuli, vos litora Nymphis;  
 Cum conjux amplexa viri miserabile corpus  
 Perfudit lacrimis, & questibus aëra complet:  
 Sæpe Deos, sæpe astra vocat crudelia conjux.  
 Nulli cæruleis illis errare diebus,  
 Nec resiliere leves visi Delphines in undis:  
 Non & sueta citi venere ad pabula thynni.  
 Thyrsi, tuum Phocas etiam ingemuisset per æquor  
 Interitum, fluctusque maris, cautesque loquuntur.  
 Thyrsis Olympiacas cursu contendere cymbas  
 Instituit, lætisque dedit certamina nauris,  
 Et ludos Thetidi, & solennia vota quotannis.  
 Fluctibus ut piscis decori est, ut & ostrea saxi,  
 Litoribus myrtus, scopulis ut muscus odoris,  
 Sic nobis decor omnis eras; sed tristitia postquam  
 Eripuere tuis te Fata, immitia Fata!  
 Ipsa Thetis fluctus, & Nereus ipse reliquit.  
 Retia sæpe, leves quæ misimus humida in undas,  
 Purgamenta maris, quassataque ligna tulere:  
 Pro pingui Mullo, pro cæruleo Melanuro,  
 Muscus, & infelix provenit gurgitis alga.  
 Spargite humum foliis, puppesque ornate corollis,  
 O piscatores; petit hæc sibi munera Thyrsis.  
 Erigite hic tumulum, tumuloque inscribite carmen:  
 Tyr sis ego hac quondam capiebam notus in acta  
 Formosos calamo pisces, formosior ipse.  
*Cor.* Tale mihi, divine puer, tua buccina cantu,  
 Quale truci pelago jactatis litora, quale  
 Sole sub ardenti Megara venientibus umbra,  
 Fortunate puer, non amisisse magistrum  
 Nostra tibi læto gratatur Olympia plausu,  
 At nunc cærulea quæcunque hæc carmina concha  
 Expediam, tollamque tuum sub sidera Thyrsin;  
 Thyrsin in astra feram: dilexit nos quoque Thyrsis.  
*Mop.* Nil erit, o Corydon, nobis hoc munere majus,  
 Munere & hoc dignus fuit ille; & carmina nobis

Jampridem ista Mycon laudavit, lentus ad umbram  
Cum mecum molli farciret vimine nassas.

*Cor.* Lucida purpureus summi subit atria cœli,  
Et vaga sub pedibus despectat nubila Thyrsis;  
Perque alios amnes, tranquillaque marmora Divum  
Felices sequitur pisces, felicior ipse.

Ergo alacris fluctus, & litora læta voluptas,  
Et lætos pacata tenet per cœrula nautas.

Tempestas jam nulla mari; non sævus Orion

Æquora turbabit nimbis, læta otia felix

Thyrsis amat, Divosque inter jam gestit ovantes,

Ipsi lætitia cœlo sua murmura tollunt

Æquorei fluctus: ipsæ jam carmina rupes,

Ipsa sonant cava saxa: procul responsat & Echo:

O Corydon, Deus ille, altarum & numen aquarum,

Sis felix, faustusque tuis: tibi litore septem,

Quot pater ipse tenet Nereus altaria ponam;

Quæ mihi Pausilypus fert aurea vina quotannis

Spargam lætus humi, viridique altaria musco

Intexam, fociis hilarans convivia læta,

Surget si Caper ante focum, si Cancer in umbra,

Tityrus interea, & fulvus cantabit Amyntas:

Nereidum choreas imitabitur alba Lycoris:

Delphinum & saltus imitabitur Artemidorus,

Hæc sacra, Thyrsi, tibi faciam solemnia semper,

Seu tumidum remis findam mare, litore noto

Seu mihi subductum firmabunt saxa phasellum.

Dum Nesis pelago stabit, dum litore surget

Pausilypus, fluctusque maris dum piscis amabit,

In terris semper, semperque per æquora notus

Thyrsis eris, laudesque tuæ, tua facta manebunt.

Ut Nereo, Glaucosque vovent in gurgite nautæ,

Sic tibi, tristesque reos damnabis tu quoque votis,

*Mop.* Tali digna tibi quæ reddam carmine dona?

Nam neque me tantum labentes pumice fontes,

Nec Zephyri tantum delectant murmura, nec qui

Propter aquas dulci modulantur gutture cycni.

*Cor.* Ipse sed ante mihi hac ibis donatus avena;

312 NICOLAI PARTHENII

Hæc nos, Parthenidem ardebat piscator Jolas,  
 Hæc eadem docuit, Cui nassas? an Polybotæ:  
*Mop.* Accipe tu concham, qua nos donavit Amyntas,  
 Donatam & mihi tunc doluit pulcherrimus Anthus.  
*Cor.* Sed jam surge puer; de litore clamat Amilcon;  
 Tempus & e pelago plenas educere nassas.

MARCO ANTONIO JUSTINIANO

Venetorum Duci.

G L A U C U S.

A R G U M E N T U M.

*Venetorum classi in Orientem ex Italia solventi, cum  
 Auxiliariis copiis, Innocentio XI Pont. Max. adhortante,  
 Poëta sub Glauci persona felicia omnia auspiciatur.*

Si juvat edomito de Thrace, Scythisque superbis,  
 Te Duce, venturas patriæ prænoscere palmas,  
 Huc ades, Adriaco veniens de litore, Marce  
 Antoni, atque animum a curis averte parumper,  
 Quæ jam fatidicus nautis oracula Glaucus  
 Obscura sub nocte dedit. nunc accipe; magnæ  
 O decus Ausonix, & Venietæ clarissima gentis  
 Gloria; litoreas nec dedignare Camœnas.  
 Fors erit, [o utinam fortunent Numina vota!]  
 Ut tibi grande meo veniat de carmine nomen,  
 Cum, duce te, partos cantabo ex hoste triumphos.

Piscatur Stabiis multa jam nocte redibat  
 Bajanus Milcon; focique per æquora cymbam  
 Pellebant Lycabas, & Surrentinus Amilcon.  
 Nulla cavo flabat vicini a flumine (1) Sarni  
 Aura mari: at puro splendebat ab æthere Luna,  
 Et subtus tremuli splendebant marmora ponti:

Jam

---

(1) *Fiume di Scafati.*

Jam veterem in (1) scopulum, qui servat ab Hercule  
nomen

Venerat; audiri cœptus cum litore ab udo  
Fatidicus Glaucus, tumidi qui monstra profundi  
Innubi sub nocte solet mulcere canendo.

Quin & sæpe canit trepidis oracula nautis  
Cæruleus pelagi vates, aperitque futura.

Et tunc vaticinans Deus hæc ex ore profatus.

*Glau* Ægæi tumidas percurrere puppibus undas  
Victtricem aspicio classem, plena æquora velis,  
Et longis video remis freta pulsa sonare,  
Aspirant lenes Zephyri: præit agmina prima  
Adriacis Leo, quem centum comitantur ovanti  
Cum plausu, fremituque rates, juxtaque carinas  
Assultant læti Delphines, & humida ponti  
Gens tota, & vario ludunt per marmora cursu.  
Ipsæ etiam pelago surgunt Nereides udæ,  
Oræ omnes pulchræ, nitidisque in vestibus omnes,  
Et niveis omnes, discincta veste, papillis,  
Nudæ humeros, nudæque genu, sparsimque solutæ  
Cæsariem per colla levem, vitreasque per undas  
Solemnes ducunt, Nereo plaudente, choreas;  
Concertantque vago puppes ambire natatu,  
Dum resona Triton cita personat æquora concha,  
Scilicet egregios jam nunc spectare triumphos,  
Et debellato palmas ex hoste videntur.  
Unda fremit plausu; geminant cava litora plausum;  
Laudibus & meritis Venetus Leo tollitur astris.  
Illius adventu pulsos dare terga Gelonos  
Jam video, celerique fuga se trudere in (2) Hellen.  
Ceu timidi fugiunt silvosa per avia damæ,  
Cum prope venator jaculo ferus, & canis instat  
Latratu, & nemorum cæcis conduntur in umbris.  
Sed nec securos se faucibus Hellesponti

Sta-

(1) Rovigliano aliis est Scoglio d' Orlando inter Stabias, &  
Vicum Æquensem.

(2) Stretto dell' Dardanelli.



Stare putant; fugiunt trās(1) Bosphorū, atque per altū  
 Euxinum in gelidas contendunt(2) Phasidis oras.  
 Exultant lætæ Cyclades, Venetumque salutant  
 Victorem, & festas jactant ad sidera voces.  
 Auratasque sinu puppes, gentemque togatam  
 Accipiunt, sparguntque novos per litora flores.  
 Libera servitio[3] Leucas, servataque plaudit  
 Nicopolis(4) facio responsat Græcia plausu.  
 Ipsa sed ante alias fremitu gratatur ovanti  
 Nascenti data Creta Jovi, populoque potenti  
 Applaudit servata, jugoque exuta Tyranni  
 Gestit ovans, plausuque sonant late omnia circum,  
 Litoraque, scopulique, omnisque remugit olympus.  
 Jam secura metu sunt omnia: rura colonus  
 Exercet sua: gramineas errare per herbas  
 Jam tutæ incipiunt capræ, simæque capellæ.  
 Populea pastor recubans securus in umbra,  
 Attritos certat calamos compingere cera,  
 Dulcia & agrestes revocare ad carmina Musas,  
 Securæ ludunt pecudes, salusque peragrant  
 Diætæos: baculo puer armentarius illas  
 Cressus agit, pastuque sua ad præsepia ducit;  
 Et lætæ redeunt stabula ad Gortynia vaccæ.  
 Tutus & ipse sedet viridi piscator in acta:  
 Atque leves gracili dum texit vimine nassas,  
 Nereidas resonare docet cava litora cantu.  
 At focii interea celeri vada falsa phasello  
 Solicitant, captantque vagi per marmora pisces.  
 Nulla nocens currit mare puppis, & æquora nulli  
 Prædantur lembi: securæ cærula pinus  
 Alta secant, Syrioque vehunt de litore merces,  
 Et fortunati convectant dona Canopi.

Nam

- 
- (1) Canale del Mar Negro, o stretto di Costantinopoli.  
 (2) Fasso urbs, & fluvius Colchorum Giorgia.  
 (3) Santa Maura  
 (4) La Prevesa ab Augusto condita contrà Actium, post  
 victum M. Antonium, & Cleopatram.

Nam victi fugere Scythæ : jam Caucasus illos  
Rursus habet ; cœcis & saltibus abdit Imaus :  
Atque Afer pulsus Libyæ in deserta refugit.

Hæc dedit : & magno plauferunt murmure Nymphæ  
Et vada Tritones pulsarunt humida cornu.

E P Æ N E T E R I A.

A R G U M E N T U M.

*Cum forte Tityrus pastor, & Amilcon piscator convenissent, Sylvestrem alter vitam, litoream laudat alter.*

TITYRUS PASTOR, AMILCON PISCATOR.

Forte Dicarchæis servabat montibus hædos

Tityrus, argutæ recubans sub tegmine quercus :

Hic & lentum oves tenui mulcebat avena,

Ad sua sylvestres compellens carmina Divas :

Cum longe Baiis veniens piscator Amilcon,

Fasce sub ingenti pressus confedit ad umbram.

Ut piscatorem conspexit Tityrus, inquit :

Non hæc piscator, vobis sunt otia læta

Litoribus, non blanda quies, non vita beata est.

Cui piscator ait : Nobis sunt otia læta

Littoribus, tranquilla quies, & vita beata est,

Versibus hinc ambo incipiunt certare vicissim :

Tityrus & sylvas laudabat, littora Amilcon.

*Tit.* Nos hic vere novo in sylvis, cum lumine puro

Purpurei fulgent Soles, & lucidus æther,

Cumque rubere novis jam prata coloribus, & jam

Incipiunt læto turgere in cortice gemmæ,

Et nidum tignis jam garrula figit hirundo,

Per virides late colles, & florea rura

Erramus læti, & cœlo gaudemus aprico,

*Am.* Tunc nos blanda mari quoniam pellacia ridet,

Et pura sub luce dies micat aureus, & jam

Felici crispant Zephyri placida æquora flubro,

Musco-

Muscosos inter scopulos, & litora cymba  
 Cursamus, mollesque citi per cœrula jactis  
 Retibus, aut longa captamus arundine prædas.

*Tit.* At vero nimis cum jam fervoribus æstas  
 Incipit exardere, nemus tunc inter opæum  
 Ac gelidos inter fontes, & flumina circum  
 Optatas auras, dulcesque inquirimus umbras.  
 Hic & sub parvæ prostrati tegmine fagi,  
 Sylvestrem tenui meditamur arundine Musam:  
 Et tristes cantu curas solamur amaras.  
 Nos hic & rauco delectant murmure rivi,  
 Dum per saxosæ decurrunt concava vallis.

*Am.* At nos æstate in media dum litora fervent,  
 In vitreas pelagi nudi descendimus undas.  
 Hic juvat & celeri delphina laceßere cursu,  
 Et crebro variis assultibus ire sonantes  
 Subter aquas, vitreasque domos lustrare profundi:  
 Mox & cœruleis emergere protinus undis.  
 At nunc in viridi considere vertice saxi,  
 Muscus ubi suavem de caute exhalat odorem.  
 Alta dies medio sed cum libratur olympo,  
 Nos antrum in gelidum contendimus; hic ubi mollis  
 Mixta hederis myrtus vestit pallentibus antrum,  
 Roscidus èque cavis distillat rupibus humor,  
 Cærulea longe pulsamus litora concha,  
 Litoream & Musam, & dulces cantamus amores.

*Tit.* At nos per silvas, Zephyris motantibus umbras,  
 Argutæ mulcent vocali murmure quercus,  
 Atque avium cantus inter virgulta canori.  
 Hic philomela loquax, & garrula turtur ab ulmo,  
 Et rauca ardenti resonans sub Sole cicada  
 Sepe levi somnum suadent captare susurro.

*Am.* Nos in litoribus, Zephyris crispantibus undas,  
 Et pelagi murmur. percussaque litora fluctu,  
 Ac tenuis raucæ delectat sibilus auræ.  
 Nec vicina silent myrteta, & concava saxa,  
 Sæpe ubi pennigere volucres modulantur ad auras.  
 Hic fessis gratum membris vaga murmura somnum

Conciliant, fractæque ad litora leniter undæ.

*Tit.* Hic nemore umbroso cœtus spectamus ovantes  
Nympharum, Dryadasque inter, rurisque puellas  
Ducimus immixti choreas, & Oreadas inter  
Erramus summis in montibus, atque repositos  
Lustramus saltus nemorum, sedesque beatas,  
Hic Satyros etiam saltantes cernimus ipsos;  
Sæpius & calamos, sylvestria Numina, Panes  
Inflare ad cantum, & Divas iterare cachinnum.

*Am.* Inter Nereides cœtum nos ducimus udum,  
Atque leves agimus vitreo sub gurgite lusus,  
Doris ubi formosa choros exercet ovantes.  
Nos hic Tritones pulsantes æquora cornu  
Audimus, Proteumque senem, Glaucumque canentem;  
Cernimus & vario delphinas ludere cursu:  
Nec pulchræ defunt per litora nota puellæ,  
Non & Naiades redimitæ tempora musco,  
Quæ dulces nectant choreas, & carmina dicant.

*Tit.* Cum vero Autumno in pingui vindemia spumat,  
Atque sua passim sternuntur in arbore poma,  
Sylvestres ludos celebramus, & Orgia Bacchi.  
Tunc & dona Deum, & lætas decerpimus uvas,  
Atque nuces, & poma & castaneas hirsutas:  
Non & oves defunt nobis, nec copia lactis.

*Am.* At nos Neptuni ludos celebramus in undis:  
Et cursu cymbæ, & juvenes certare natatu  
Festinant, plausuque sonant cava litora, & æquor.  
Phycides haud nobis defunt, rutilæque per undas  
Auratæ, Rhombique, & amantes saxea Pagri.  
Ostrea dant scœpuli, & pingui conchyliâ succo;  
Undique & armatos radiis venamur echinos;  
Et pingues mediis (1) onychas scrutamur arenis.

*Tit.* Nos, dum bruma rigens dirumpit frigore saxa,  
Et rapidos glacie cursus infrænat aquarum;

An-

---

(1) *Cannolicchi* vulgus vocat, ex arenis educunt nautæ  
ad Sebethum, & Olympiam oram: dulcissimi saporis  
sunt, habenturque in deliciis.



318 NICOLAI PARTHENII

Ante focum, succensus ubi non deficit ignis  
Plurimus, & pingues stant tædæ, & fissile robur,  
Et dulces chara circumstant conjuge nati,  
Frigora ridemus, flatulque Aquilonis iniqui,

*Am.* Nos, quia tristis hiems late maris asperat undas,  
Et patrium tectum, & fumosa revisimus antra.  
Hic tantum pelagi curamus murmura, quantum,  
Aut delphin numerum, aut insanos litora fluctus.  
Desine sed jam, Pastor; iter mihi restat agendum.  
Tu silvas, & rura colas; ego litora, & undas:  
Nam sive in silvis, seu curvo in litore, lætam  
Quisque suo vitam contentus munere ducit.

G E N E T H L I A C A

A R G U M E N T U M.

*Zephyraus, & Artemidorus cum ad Virginis Templum,  
quod in extrema Olympia ad Pausilypi radices juxta cry-  
ptam, qua via Puteolos ducit, extructum est, natali die  
ad pompam celebrandam, ut moris est, convenissent, illius  
genetbliacum texunt.*

ZEPHYRÆUS, ARTEMIDORUS.

Virginis Augustæ ad templum sub monte repositum  
(Namque dies natalis erat) convenerat omnis  
Pausilypi, Megaræque manus: Zephyræus aprico  
Pausilypo, Megara descenderat Artemidorus:  
Nare periti ambo, & durare in fluctibus ambo,  
Velocique vagum delphina laceffere cursu;  
Et versus cantare, & acuta ludere canna.

Tum prior hæc patula vitis Zephyræus ab umbra,  
*Zep.* Natalem, Virgo alma, tuum lux aurea vexit,  
Lux semper Mundo, & mihi læta, age, Delie currus  
Siste rotas properantis; aquas ne tangere tantum  
Festina; pede lento ut eas, similisque moranti,  
Virgo jubet; laudes celebrandæ Virginis hujus.

O utinam si anno flueret mihi longior hæc lux.

Virginis est Natalis, age, ede, o buccina, cantus,  
O piscatores, date flores, spargite muscum,  
Sacraque cæruleis altaria cingite vittis.

Et vos, o pueri, atque intacto flore puellæ,  
(Vos amat hæc Virgo) calathis nunc lilia plenis,  
Pubentesque afferte rosas, caliamque nitentem;  
Pulchraque nascenti subtexite ferta Puellæ,

Virginis est Natalis, age, ede, o buccina, cantus.  
Candida gemma velut concrevit matris in alvo,  
Et nitida ætherias cœli se prodit in auras:  
Sic matris concepta utero mundissima Virgo  
Candidior nive, purpureisque nitentior ipsis  
Erumpit gemmis: mirantur sidera, & omnes  
Cœlicolæ, & roseis delibant oscula labris.

Virginis est Natalis, age, ede, o buccina, cantus.  
O Virgo formosæ Deo gratissima Virgo,  
Jam tibi nascenti se per tua tempora flectunt  
In gyrum stellæ, & radiantî luce coronant:  
Jam tibi Luna vagos submittit frontis honores;  
Atque suis nitidum radiis subtexit amictum  
Purpureus Titan, circumque nitoribus ambit.

Virginis est Natalis, age, ede, o buccina, cantus.  
Tu magni regina maris, tu sidus amicum  
Nautis semper eris, lætum & piscantibus omen.  
Se tibi submittent, ventique, atræque procellæ,  
Et se se prono curvabunt vertice fluctus.  
Teque homines, Divique colent, dominâque vocabūt  
Ac tibi dona ferent hæc ad delubra quotannis.

Virginis est Natalis, age, ede, o buccina, cantus.  
Hæc Zephyræus: opacæ innixus protinus ulmo,  
Dicite, Nereides, quæ luserit Artemidorus.  
Nec possum meminisse: canentem audire negabar  
Turba virum stipata: nec omnia possumus omnes.  
*Art.* Omnia lætantur, tellus, mare, sidera, cœlum,  
Et Superi, atque homines, quid mirum; nascitur Orbî  
Aurea nunc Virgo; ut cum matutina resurgit  
Aurora, & gremio Solem paritura rubescit.

Divinum & Solem nostra hæc paritura Puella est,  
Atque optata dabit felici gaudia Mundo.

Ducite solemnes, bona pubes, ducite pompas,  
Cernite, ut alma dies innubi effulsit olympo,  
Et roseos Phœbi currus, aurumque revexit:  
Cernite, pacatis ut rideat æquor in undis,  
Et Zephyri levis aura, & saxa virentia musco.  
Omnia nunc rident: gratantur & omnia Divæ  
Nascenti: Superique ipsi ad cunabula ludunt.

Ducite solemnes, bona pubes, ducite pompas,  
Non posthac rauco Triton per cæcula cornu  
Horrendos pelago nimbos instare monebit;  
Nec frontem Sol ipse sua ferrugine tinget,  
Nascitur en Virgo: placantur Virginis ortu  
Et venti, nimbi que, impacatæque procellæ:  
At sua jam mites deponunt murmura fluctus.

Ducite solemnes, bona pubes, ducite pompas.  
O summo dignata Deo, dum despicit omnes,  
Te te unam Pater elegit, divina Puella,  
Incipe jam totum risu componere Mundum,  
Tellurem, freta lata maris, camposque liquentes,  
Incipe, lætæ adeunt tua jam cunabula gentes,  
Annua Natalis recolunt dum gaudia lucis.

Ducite solemnes, bona pubes, ducite pompas.  
Ire juvat, vitreique maris perquirere fundum;  
Vertere Tritonum latebras, & quidquid in alto  
Doris avara sinu late abdit, sive rubentes  
Murice sint conchæ, aut pictis interlita punctis  
Ostrea, seu curvo ramosa corallia trunco,  
Sublegere; illa feram nascenti dona Puellæ.

Ducite solemnes, bona pubes, ducite pompas.  
Hæc illi: & memini venisse ad litora pisces,  
Et rigidas caput crexisse e fluctibus orcas.



D O R Y L A S

A R G U M E N T U M.

*Dorylas piscator Jola pueri, quem delphinus spinacasu transverberaverat, immaturum obitum deflet: illum autem solatur Anthus, Jola apotheosin referens. Per Jolam Poëta sub Dorylæ personâ Alumno suo Orontio Montalvo, & genere, & indole nobili illacrimat, qui omnium dolore, quoniam feбри correpto vena incisa est, interiiit. Per Anthum vero intelligit Nic. Cas. demortui socium.*

DORYLAS, ANTHUS.

Piscoli vitreas (1) Lucrini nuper ad undas  
 Defunctum Dorylas flebat piscator Jolam:  
 Lugentem Dorylam consolabatur, & Anthus,  
 Anthus amor Musarum, atque Antho charus Jolas;  
 Et patri nimium Dorylæ dilectus Jolas;  
 His autem lacrimis, his questibus ora rigabat  
*Dor.* Quis mihi te, pulcher, quis casus, ademit, Jola,  
 Et dulcem rapuit risum, & mea gaudia tecum?  
 Heu! qui molle latus crudeli vulnere fixit,  
 Nate, tibi, & multo turpavit sanguine membra?  
 Membra, olim niveus quæ vivida candor habebat:  
 Sed nunc pallor habet, fædoque aspersa cruore  
 SorDESCUNT, clausique oculi, nec lumine fulgent,  
 Lumine quo nostros tum venabantur amores.  
 Non placidus fronti color est, non gratia labris,  
 Atque insueta permixti dulcedine risus,  
 Risus, quos Nymphæ suspiravere marinæ:  
 Quæ nunc discissis nimio mœrore capillis

Tom. V. X Fle-

---

(1) Lacus Campaniæ inter Avernum, & sinum Puteolanum maximè Piscosus: multis est *Marè morto*, aliis *Lago di Licola*.



Flebilibus passim replent vada falsa querelis.  
Et pisces etiam, & tumidi fera monstra profundi  
Te, miserande puer, nunc cassum lumine lugent.  
Inscius & qui molle latus delphinus acuta,  
Transfixit spina, & Fato demisit acerbo,  
Attonitus jacet, & sese, stimulante dolore,  
Discruciat, quæritque miser diffundere vitam.  
At mihi quis vitam, & duræ fastidia lucis  
Auferat? immiti nam funere te mihi raptō,  
Dulce mori citius, longum sed vivere durum est.  
Triste mari in medio tempestas horrida nautis,  
Delphin Pelamydi, triste & delphinibus orca;  
Puppibus & Syrtes; misero tua funera patri,  
Quis mihi, quis posthac servabit in æquora nassas,  
Retia & ad Solem expandet, madidosque rudentes,  
Nate, parentis amor, dulcis mea vita, meum cor?  
Namque puer mihi nullus erit, dum, pulcher Jola,  
Occidis, & vili pallescis stratus in alga;  
Ceum niveus medio delphinus in æquore pallet,  
Quem durus celeri tenuit per marmora cymba  
Piscator fugientem, & acuta cuspide fixit,  
Tu pelagi decor omnis eras, tu litoris hujus  
Risus eras: tu dulcis amor, tu gaudia nostra;  
Per te grata mihi quondam freta cæcula; per te  
Muscosæ cautes, & aquis lita saxa placebant,  
Et dulces Zephyrorum inter myrteta susurri.  
Omnia nunc sordent sine te: simul omnia tristis  
Luctus habet, mœstæque silent Nereides antro,  
Et tristis concham projecit in æquora Triton.  
Crudeles Parcæ, & crudelis tu quoque delphin;  
Formosum patri quoniam eripuistis Jolam,  
Unus qui vitam longos producere in annos  
Debuerat, seroque pios invisere Manes.  
Non vos oris honos, non frontis amabile lumen,  
Nec faciles pueri potuerunt flectere mores?  
Quid queror? haud species flectit pulcherrima Parcas  
Nec placidis hominum mansuescunt moribus unquam?  
Ah puer! ah male caute; nimis confidere monstro

Au-

Aufus, & insolito vitam committere ludo.  
 Ergo etiam læti crudelia funera lusus,  
 Et tristes pariunt luctus, atque inter amantum  
 Blanditias mors dura venit, læta omnia turbans.  
 Ite procul calami: tenues piscator avenas,  
 Nec posthac dulces animabo ad carmina cannas,  
 Non me Pausilypi vada læta, sinusque (1) Dicarpi  
 Aspicient vitreas deducere retia in undas:  
 Non viridem celeri visam [2] Nesida phasello,  
 Atque humilem (3) Euplæam, quondam felicia nautis  
 Litora Pellæa venientibus urbe Dicarchum:  
 At mihi semper erunt sævi monumenta doloris.  
 Hos virides linguam scopulos, hæc litora, & antra,  
 Retiaque, & calamos, & vimineos labyrinthos:  
 Solus & in saxis, & litoribus desertis  
 Vitam infelicem per dura, per aspera ducam,  
 Quo tandem mites scindant mea stamina Parcæ,  
 Interea hæc duro describam carmina saxo,  
 Carmina, quæ, molli dum texit vimine nassas,  
 Piscator legat, & lacrimans suspiria fundat.

Delphinum in ludo hic periit formosus Jolas:

Hic Dorylas illum, & Nymphæ flevere marinæ.  
 Sed, puer o dilectè, vale, vale pulcher Jola.

Hæc dedit: & calamos jam frangere, & ire parabat,  
 Cum flentem cœpit solari talibus Anthus.

*Ant.* Desine flebilibus cava saxa replere querelis,  
 Et tristem, Doryla, tandem solare dolorem.  
 Non dignus lacrimis puer ille: nec impia Fato  
 Sors illum misero rapuit: sed victor olympo  
 Redditus, & Divos inter jam gestit ovantes.  
 Vidi ego, purpureus dum Sol luceret in Orbe,  
 Turmatim in terras summo descendere cœlo

(1) Puteoli.

(2) *Nisita*, Insula Pausilypo objecta ad Occasum vergens.

(3) *La Gajola*, Insula ad Notum Pausilypo opposita, sic dicta, quod naves Alexandria venientes cùm vidissent, bonam egisse navigationem lætabantur.

Aligerum cœtus : pictisque exercitus alis  
 Ardebat, citharisque omnes, cantuque fremebant,  
 Aspexi & tenues inter volitare per auras,  
 Et choreas agere, & lato preludere cœlo.  
 Cycnorum veluti niveum volat agmen, ab alta  
 Nube ruens, placidoque sonans replet æthera cantu:  
 Et vario circum cursans secatur aëra gyro.  
 Quos inter puerum [ nec me sententia fallit ]  
 Ire coronatum lauro, nitidoque coruscum  
 Lumine, & è terris cerno super astra volantem.  
 Atque hæc siderias longe resonare per auras  
 Audita est mihi vox, & reddita vocis imago  
 Sæpius ex alto : Cœlo jam victor Jolas  
 Tendit, io, Superi, venienti plaudite, & inter  
 Felices puerum cœtus, sedesque locate.

Hæc Anthus ; læto solatus & omine patrem est.

## C H R Y S I S.

### A R G U M E N T U M.

*Ladon Urinator, Polydoro adhortante, Chrysidis apothefin anniversaria pompa celebrat. Per Chrysidem D. Saverium intellige: per Ladonem poëtam, per Polydorum Joannem Berardum S. I. D. Saverii cultorem egregium, meditatus hanc Eclogam poëta est, cum jam se ad Indicum iter accingeret, hinc Urinatores ad Gangis ostia introduxit.*

### LADON, POLYDORUS Indi Urinatores.

*Lad.* Mirabar, Polydore, mari dum nuper in alto  
 Immergor, rutilas piscatum gurgite conchas,  
 Quid tanta, insolitum, narent conchyliis fundo?  
 Vidi etiam e vitreo spumosa Tethyos amne  
 Huc una properasse Deas, ubi cœrula Ganges  
 Lata subit, nitidasque auro devescat arenas.  
 Cœruleos hic blanda Deos ad carmina, & ipsos

Au-

Auritos etiam pisces, & monstra vocabant.  
 Ecce dies aderat, victor qua Chrysis olympum  
 Ascendit, novus æquoreis Deus additus undis,  
 Qua locus astriferi in medio vacat aureus orbis,  
 Inter Phillyridæ jaculum, Ægocerumque sequentem.  
 Et nos stamus adhuc, nec reddimus annua magno  
 Vota Deo, lætique agimus spectacula pompæ?

*Pol.* Scilicet id fuerat, Gangis quod nuper ad ora  
 Dum sedeo, & rutilas auro perquirere arenas,  
 Carpere & e fluvio nitidos mihi cura lapillos,  
 Nescio quæ læti canerent mihi carmina cygni.  
 Illos [credo equidem] stellato Chrysis olympo  
 Ad pompam, o Ladon, atque annua sacra vocabat.

*Lad.* Sic ipse, o Polydore, reor, solemnia Divo  
 Æquoris æquoræ ducunt sub gurgite Nymphæ;  
 Candentesque sonant ripa in Gangetide cygni.  
 At tu quæ pepigisse mihi te carmina quondam  
 Dixisti, vacuo recubans dum frigus in antro  
 Captabas mecum, tenui meditare cicuta.  
 Incipe: jam raucus cecidit Notus, atque silentes  
 Aspice tranquillo sternantur ut æquore fluctus.

*Pol.* Non eadem est ætas, Ladon: jam prorsus & illa  
 Sunt oblita mihi tot carmina: quin quoque vires  
 Defecere: seni mentem & longa abstulit ætas.  
 Tu puer, & meminisse potes, mihi nuper ad undas  
 Dic, quæ litoreis cecinisti carmina Musis.

*Lad.* Imo hæc, quæ nitidas medio de gurgite conchas  
 Dum refero in litus, Divo properata parabam,  
 Jam repetam, & resona complebo cærule concha,

*Pol.* Incipe: pacaris en jam tibi Doris ab undis,  
 Et tibi gemmifero applaudit de gurgite Ganges.

*Lad.* Da mea vocalis, mecum vaga murmura, concha.  
 Quæ nunc, o Divæ (1) Chryseides, æquora læta  
 Quæ colitis, roseus surgit qua Phæbus ab undis,

---

(1) Nymphæ Eoi maris, sic dictæ a sinu Magno, qui &  
 Chrysa ab antiquis appellatus est: hodiè vulgò dici-  
 tur *Golfo di Siam*.



Litora vos mihi, vel fluviorum panditis oræ,  
Chrysidì lætus ubi solemnes ducere pompas  
Incipiam, & musco redimita altaria ponam.

Da mea vocalis, mecum vaga murmura, concha.  
An sedet hic, Nymphæ, qua turgidus influit auro  
Ganges, & rutilus gremio Thetis accipit undas?  
Nosco. Divæ, omen: sacra hic altaria ponam  
Muricibus contexta rubris, albisque lapillis.

Da mea vocalis, mecum vaga murmura, concha.  
Ostrea da, Polydore, mari quæ duximus alto,  
Et miris referunt variata coloribus Irim,  
Affer & e duris evulsa corallia saxis.

His ego cæruleis contexam altaria donis.  
Tu, Chrysi, in medio, tot quando cærulea conchas  
Effudere sinu, tua munera gemmeus esto.

Da mea vocalis, mecum vaga murmura, concha,  
Huc age, Lyda, veni, fer tecum mascula thura,  
Portitor illa mihi quæ quondam vendidit Afer:  
His ego thuriferis incendam altaria donis.  
Affer & apricis quæ collibus uva ministrat  
Vina mihi. totumque cadis servata per annum:  
Illa ego diffundam læta hæc altaria circum.

Et duo, Chrysi, tibi, & Didymo duo pocula patri.

Da mea vocalis, mecum vaga murmura, concha.  
Jam fortunatus summo confidis olympo  
Perque alios erras amnes, & cærulea Divum,  
Cærulea, quæ numquam perturbant flamine Cori;  
Sed Zephyro semper gaudent, semperque per undas  
Cælestes ludunt, felicia Numina, Nymphæ.

Da mea vocalis, mecum vaga murmura, concha,  
Cuncta tibi nautæ per litora, quæ vaga Doris  
Alluit, & late vaga circuit Amphitrite,  
Septem aras ponent, totidemque ex more quotannis  
Oceani vitulos ante aram, Orcamque litabunt.  
Et tibi servati sua vota in litore solvent.

Da mea vocalis, mecum vaga murmura, concha,  
Ite per Eoi vastissima cærulea puppes;  
Nam novus Oceano Deus additus: ite per undas,

Audaces nautæ, & placidos jam findite fluctus:  
Chrysis enim pelagi spumantia marmora placat.

Da mea vocalis, mecum vaga murmura, concha,  
Ite, nec infano quassantes turbine ventos  
Oceanum, rapidas, nec formidate procellas.  
Ille animos mulcet ventorum, & temperat iras:  
Ille nigras pellit nubes, Solemque reducit.

Da mea vocalis, mecum vaga murmura, concha,  
Ite sub æquoreas, nudi vos ite sub undas,  
Divitis, o pueri, quæsitum abscondita Nerei.  
Jamque novum cœlo processit Chrysidis astrum;  
Astrum, quo matres gauderent roribus, & quo  
Lucidus aurata in testa concreveret humor,  
Lætæque purpureis flavesceret unda lapillis.

Da mea vocalis, mecum vaga murmura, concha,  
Hæc levibus properata modis nunc accipe, Chrysi,  
Carmina plura tibi mox, & meliora canemus.  
Desine vocalis, mea desine murmura, concha.  
At tu nos cœlo pius aspice; marmora conchas,  
Et rutilas Ganges, te Numine, fundat arenas.

Desine vocalis, mea desine murmura, concha.  
Aufpice te, placidum semper mihi rideat æquor;  
Rideat & puro suffusum lumine cœlum.

Desine vocalis, mea desine murmura, concha,  
*Pol.* Dulce mihi, Ladon, cecinit tua buccina carmen;  
Non tam suave sonant hæc per Gangetica cycni:  
Nec quæ sublimes semper summo aëre sidunt;  
Uranides (1) modulantur, aves, cum rore beato  
Jam saturæ, dulces effundunt gutture voces.  
Ille tibi Phœbum inspirat: facit ille poëtam;  
Et tecum concha mare personat. Illius ergo  
Egregias laudes meditare, & grandia facta,  
Digna Deo tua semper erunt, & dulcia nobis  
Carmina: te nostra laudabunt semper in acta,

---

[1] Sic dictæ, quia numquam in terris consistere videantur, undè & *Paradisæ Uccelli di Paradiso*.

Dum juvenes læti repetunt tua carmina nostri.  
*Lad.* Surgamus, Polydore; vagis Sol mergitur undis,  
 Et late maria, & montes umbrantur opaci,

THEODORO COMITI BARBOVIO.

Æ G O N

ARGUMENTUM.

*Cum Ægon ad (1) Posidonium felicem nuncium attulisset, excessisse nimirum Messana Gallicam classem, urbemque a Comite Theodoro Barbovio receptam; Melibæus pastor, & Lycabas piscator læti carmen Victori canunt. Per Ægonem pœtam intellige, qui Rhægii hanc Eclogam conscripsit, cum severiori Minervæ operam daret.*

ÆGON Nauta, LYCABAS Piscator, MELIBOEUS  
 Pastor.

Actiadis magnum nostræ decus, & nova Musæ  
 Gloria, seu pictis alacer splendescis in armis,  
 Aut petis adversos ærata cuspide reges:  
 Sive tibi merita præcingunt tempora lauro  
 Servatæ gentes, plausuque ad sidera tollunt.  
 Huc ades, o Theodore, atque has ne despice Musas,  
 (Si qua tibi nostræ velocis gratia cymbæ)  
 Quas pastor Melibæus, oves dum pascit ovantes,  
 Ac tibi piscator Lycabas, dum retia ducit,  
 Alternis referunt certantes versibus ambo:  
 Tuque etiam facilis tenuous Ægonis avenas;  
 Accipe; nam nostræ debent tibi carmina Musæ.  
 Forte mari ex alto ducebat retia in actam  
 Piscator Lycabas, tristesque in pectore curas  
 Versabat: pelagi sed per vicinia pastor  
 Lanigeras Melibæus oves non lætus agebat.

Ad

---

(1) Seu Columnnam Reginam, *La Catona*.

Ad [ 1 ] Cœnym Lycabas habitabat : Pastor ad umbras  
Vicini nemoris, viridique in valle ( 2 ) Salicti.  
Improvisus adest, timidisque supervenit Ægon,  
( Ægon Euboici quondam maris accola, ponto  
Tunc Siculo errabat, patriis procul exul ab oris )  
Protinus & læto sic incipit ore profari :  
Cui trepidi juvenes mox respondere vicissim.

*Æg.* Solicitos vestros depellite corde timores,  
O pueri ; felix vobis en nuncius adsum.

*Lyc.* Dic age, quæ nobis Ægon nunc læta reportas ?

*Æg.* Infestæ Siculo excessere ab litore puppes :  
Arma procul cessere, minæque, infandaque bella.  
Pax redit, & læti capiunt exordia menses ;  
Vidi ego lunati surgit qua pompa theatri  
Magnanimum Heroem, regisque insignia nostri,  
Agmina mille ducem stipantia litore vidi,  
Et lætas voces, plaususque his auribus hausi.  
Ceu regi agglomerantur apes, post prælia quando  
Victor regna petit, cæsoque ex hoste superbus  
It lætos inter cœtus, plausuque faventum.

*Lyc.* Scilicet id fuerat, prima quod luce diei  
Sæpius, infuetum, resiliaret ab æquore delphin,  
Nereidesque choros agerent dum murmura longe  
Cerulea in vectus concha ciet æquore Triton.

*Mel.* Hoc etiam ( nec fallor ) erat, quod prata capellæ  
Tonderent nimia passim dulcedine lætæ ;  
Ac virides inter salices, & flumina circum  
Errarent Dryades festivæ, & Najades udæ :  
Quas inter mixti, sylvestria Numina, Panes  
Inflarent læti calamos, & læta sub auras  
Murmura jactarent volucres per compita sylvæ,  
Credo equidem ; nam sensus inest divinitus illis.  
*Æg.* Ergo agite, & vestræ possunt quæ carmina Musæ,  
Dicite, & alterno, juvenes, contendite cantu,  
Ipse

---

(1) Promontorium, & fluvijs, de quo Libr. IV. Nauticorum.

(2) Amœnissima Villa *lo Salici*, de qua eodem libro.



Ipse has interea pulsabo pectine cordas.

*Mel.* Ite per apricos colles, & rura capellæ,  
Ac lætæ cytisum, & florem tondere salicti:  
Hostis abit; cessere minæ, pax aurea venit.

*Lyc.* Ducito securi choreas delphines in undis,  
Et vario circum litus cursate natatu;  
Paxredit; & placido rediens nitet aura ponto.

*Mel.* Vos, o pastores, inducite fontibus umbras;  
Et finite optatas tenerum pecus ire sub umbras,  
Hostis abit: cessere minæ; pax aurea venit.

*Lyc.* Vos, piscatores, læti deducite cymbas,  
Et piscosa leves jam solvite retia in undas;  
Paxredit: & placido rediens nitet aurea ponto.

*Mel.* Fecundos proscindat agros festivus arator,  
Et pingues pedibus presset jam vinitor uvas.  
Hostis abit; cessere minæ: pax aurea venit.

*Lyc.* Alta rupe sedens piscator arundine pisces  
Captet ovans, nudusque mari scrutetur echinos.  
Paxredit: & placido rediens nitet aurea ponto.

*Mel.* Hic ego sub parulæ prostratus tegmine fagi,  
Dum teneros carpunt flores, mea cura, capellæ,  
Ac Phyllis formosa comas mihi daphnide cingit,  
Agrestes tenui modulabor arundine Musas.  
Hostis abit; cessere minæ: pax aurea venit.

*Lyc.* Hic inter scopulos, Zephyrique tepentis ad auras  
Dum moror, & molles expecto ad retia prædas,  
Ac mihi de myrto nectit Galatea corollam,  
Æquoreas resonare Deas cava saxa docebo.  
Paxredit: & placido rediens nitet aurea ponto.

*Mel.* At vos, Pierides, victori cingite lauro  
Tempora; & Aoniæ, vos dicite carmina, Musæ:

*Lyc.* Vos illi sertum viridi contexite myrto,  
Nereides, plausuque sonans ciat æquora Triton.

*Mel.* Illi ego per sylvas, septemque altaria circum  
Bissenos de more dies sacra liba quotannis  
Spargam lætus humi, atque incendam mascula thura,  
Non me carminibus superabit fuscus Amyntas;  
Nec Pan ipse Deus vincet: nec Thracius Orpheus.

*Lyc.*

*Lyc.* Ast ego litoribus, totidemque altaria circum,  
 Et sacros latices, & vina liquentia fundam,  
 Et spargam pelagi muscum festivus ad aram.  
 Non niveos inter cantu delphinas Arion,  
 Nec mihi per scopulos certet Deus ipse Palæmon,  
 Sic illi alterno miscebant carmine Musas:  
 Ægon interea calamos inflabat acutos.  
 Cum tandem (alta jugis jam Solem absconderat Ætna)  
 Amborum invitæ fecere silentia Musæ:  
 Arque hinc muscosi scopuli, rupesque cavatæ,  
 Hinc longe colles responsavere beati.

MOERIS

ARGUMENTUM.

*Cum Phrasidamus Mærim puerum rosas, & corallia ferentem vidisset, suspicatus ne puella alicuius amore teneretur, conatur illum ab amore revocare. At puer se Virginem amare ingenue fatetur, & quo modo a Virgine vocatus fuerit, exponit. Per Mærim intelligit poëta Olympicum piscatorem, qui annos duos, & viginti supra centum habet, virgo semper, & Virgini addictissimus.*

PHRASIDAMUS, MOERIS.

*Phr.* Cui tu, Mæri, rosas, & nigra corallia portas?

Ah timeo tibi, Mæri, furor ne te improbus ille  
 Prævertat, præcesque trahat malè sana cupido.

*Mær.* Vera tibi fateor, jam me pulcherrima Virgo  
 Totum habet, & dulces animo mihi ventilat ignes.

*Phr.* Ah puer infelix, quæ te dementia cœpit!

An nescis quam durus amor? non sævior illo  
 In terris Leo, vel pelago crudelior Orca est.

Illum sæva mari, canibusque incincta marinis  
 Scylla tulit; natumque sinu impacata Charybdis  
 Fovit, & immanes admorunt ubera Phocæ.

*Mær.* O nescis, Phrasidame, mihi quæ flamma medullas  
 Tot-

Torreat, & quæ me teneat formosa puella.

*Phr.* Dic age, quæ flamma, & quæ sit formosa puella?

*Mær.* Incendit me dius Amor: me Parthenis, o, quæ

Non consueta meum pertentant gaudia pectus!

Illa meos poscit (si quicquam credis) amores.

Illa habeat, mentem hic semper bonus occupet error.

O nimium felix, hanc si, piscator, amares!

*Phr.* Non humana sonant tua verba, sed unde repente

Parthenidis tibi tantus amor? quo Numine dextro

Mæri, tibi sacræ exarsere in pectore flammæ?

*Mær.* Dicam equidem, Phrasidame: Cavo stat picta sub  
antro

Qua Mergillina illustres via ducit in (1) ædes,

Virgo decus cœli, quæ me dum spectat euntem,

Pubentesque rosas dextra tunc forte ferentem,

(Ipsa mihi soror e testa decerpserat Ægle)

Cui, formose, rosas, puer? inquit, at ipse repente

Obstupui; captusque nova dulcedine mentem,

Illi hæc: Diva, rosas vis tu pro munere, Virgo?

Accipe: parva quidem, sed si dignabere, majus

Cor, nostri, Regina, tibi do pignus amoris,

Tunc dextrâ mihi Virgo tetendit: & has, puer, inquit,

Accipio, dilecte, rosas, quæ pignus amoris

Semper erunt: semperque tuos dignabor amores,

Sed tu, Mæri, alias sectari, & amare puellas

Mitte, nec insanæ incendiant tibi pectora flammæ.

Cui contra: Tibi, Diva, meos piscator amores

En voveo: immotumque animum tu Numine firma,

Ac veluti numquam tot me flexere puellæ,

Litora quæ mecum passim per nostra vagantur:

Sic & nulla mihi poterit prævertere mentem:

Non Beroë formosa comas, non picta Lycoris,

Non Hyale, quamquam nobis pro dote superba

Centum regna daret, rubroque e gurgite gemmas,

Quot

---

(1) Magnifico sumptu extractæ ad Pausilypi litus à Methymnæ Duce, & Anna Carafa conjuge Proregibus Neapolitanis.

Quot veniunt, quantumque Indis deducitur aurum.  
 Tuque, Puerque tuus nostro sub pectore fixi  
 Stabitis, æternumque mei vos semper amores.  
 Nec vestra ex oculis unquam labetur imago,  
 Diva, meis: nec erit quicquam mihi gratius unquam,  
 Ni dius Puer, & Pueri tu candida Mater;  
 Nam dulcis puer est, & dulcis tu quoque Mater.  
 Ipsa, Puerque meus te semper amabimus, inquit  
 Illa mihi: tu noster amor, tu maxima cura.  
 Proque rosis, quas, Mæri, mihi, Pueroque dedisti,  
 Jam tibi luciferis sertum subrexitur astris.  
 Hæc dedit, & placidis mihi mox subrisit ocellis.  
 Subrisit Puer ipse, sinu quem dia tenebat,  
 Et mihi divinos animo inspiravit amores.

*Phr.* Fortunate puer; diæ tu Virginis ergo  
 Factus amans, quæ tantum alias formosa puellas  
 Exuperat, quantum reliquas Luna aurea stellas,  
 Illam Cœlicolæ, nitidisque exercitus alis  
 Aligerum observat venerans, plausuque coronat.  
 Fortunate puer, numquam tibi dura negabunt  
 Æquora captivos piscosa in retia pisces.  
 Non posthac vacuas velles de murice conchas;  
 Nec tenues inter sabulum venaberis [ 1 ] aulos:  
 Nam Virgo, cui Sol, cui Luna, & sidera parent,  
 Et venti, nimbique, undosi & cærula ponti,  
 Placabit maria, & ventos, pulsabit, & imbres;  
 Piscibus & nassas, succoque implebit echinos.  
 I, felix puer, o! fer nigra corallia Divæ,  
 Purpureamque rosam, & flammæ testare pudicas,  
 Sed veniam comes ipse tibi, si forte benignis  
 Aspiciat me Virgo oculis, nec spernat amantem.

*Mær.* Corripiam prius ipse viam: tu pone venito.

C A-

---

(1) Idem, ac onyches, qui & Solenes a Græcis, a Latinis digiti, etiam appellantur.



## CAROLO CARDENIO

Sacri Romani Imperii Principi, Laini Marchioni,  
Acerrarum Comiti.

## CARDENIDES.

## ARGUMENTUM.

*Cardeniden Mœœnatem suum Poëta sub ætatem unam cum Phyllide ad Pausilypum invitat, locique amœnitatem, ac delicias describens: atque illi & piscatoria munuscula, & versus spondet. Per Phyllidem intellige Franciscam Mariam Spinellam è Scælarum Principibus, Marchionis Conjugem, mulierem præstantissimam.*

Optatos jam pande mihi, formosa recessus,  
Mergillina, cavis, & amicam in rupibus umbram,  
Quo plenas referam nassas, & frigora captem.  
Pauca sed ante meo gracili sunt carmina avena  
Cardenidæ dicenda: neget quis carmina magno  
Cardenidæ, me cujus amor facit esse poëtam.  
Sic tibi, cum vitreas pelagi descendis in undas,  
Et blandam cursu sequeris Nesida sororem,  
Non Protei possint, Phorcique nocere petulci,  
Incipe, Pausilypi ad litus, sedesque beatas  
Cardeniden tenui calamo, cantuque vocemus.

Carole, dum summis ardet fervoribus æstas,  
Incenditque suo rutilans fata Sirius igne,  
Huc, quo Pausilypus scruposæ rupis in antrum,  
Et formosa vocat re Mergillina. venito.  
Ipsa sed in primis veniat tua Phyllis, & ipsa  
Ceruleas inter ludat non ultima Divas:  
Euboidum Phyllis pulcherrima, quam tibi casti  
Dulcis amor thalami concordii fœdere junxit:  
Et quæ jam pulchra fecit te prole parentem.  
Hic lenes spirant auræ, Zephyrique salubres,

Et

Et placido intendunt felicia marmora flabro :  
Crebroque impulsæ modico clangore jocosæ  
Per virides scopulos, per litora leniter undæ  
Assultant, vitreique tegunt saxa humida rores,  
Hic & odorifero florentes pumice cautes  
Cæruleum gignant muscum, æquoris aspice, ut omne  
Litus, & objectos scopulos maris integat herba,  
Qua non purpurei spirant fragrantius horti :  
Gratus & halat odor, qui thure suavior ipso  
Leniter immissa insinuat se naribus aura,  
Atque ægros reficit sensus, viresque ministrat,  
Stant rigui fontes, multoque foraminè manat,  
Qui nitidas inter fugiens strepit humor arenas,  
Et sincerus aquæ se litora propter amœna  
Fons agit e scopulis, cui non vicina recurrens  
Doris amara suum immiscet perfusa liquorem.  
Inter & optatos subsultant Najades amnes,  
Ore omnes formosæ, adianti frondibus omnes  
Ornatæ, & viridi succinctæ crura corhurno ;  
Sunt hic & rupes, tepidæque in rupibus umbræ,  
Quæ nimios relevent æstus, læta ministrent  
Otia Musarum : gelidis hic sæpe sub antris  
Cantando ingentem poteris lenire laborem,  
Dum choreas tua Phyllis agit, luditque beato  
Nympharum sociata choro, mediasque per undas  
Humida delphinum ad cantum gens affilit omnis,  
Eja, age, rumpe moras : tibi jam per litora muscus  
Sternitur, & passim mollis se subiicit alga,  
Aspice, ut undivagi nantes per cærula pisces  
Te placido invitent lusu, cursentque per æquor  
Festivi, & frutices inter spatientur odoros,  
Ipsa tibi rident Zephyrorum animata susurre  
Æquora, vocalique laceffunt murmure cautes.  
Hic juvat in vitreo ludentes gurgite Divas  
Nereides spectare, & fluctivagas Sirenas ;  
Quippe suus nunc mensis adest, quo gurgite ludunt,  
Cum flabro incipiunt Zephyri spirare canoro.  
Interdum picto lustrabis læta phasello

Litora Paulilypi, & colles spectabis apricos,  
 Et quæ magnifico surgunt palatia luxu:  
 Nec non & mixtim pueros, tenerasque puellas  
 Innocuos celebrare choros, & ludere in undis.  
 Sæpe etiam celeres sublabi gurgite cymbas,  
 Et pubem remis certare, & scindere fluctus,  
 Ut primi metam teneant, & præmia tollant,  
 Aspicies, lætos & ovanti murmure plausus  
 Atroili, & festas cava litora reddere voces,  
 Ac longè scopulos plausu, & freta pulsa sonare.  
 Quia etiam, si nostra tibi munuscula cordi,  
 Barbatos tibi ego Mullos, Rhombumque trilibrem,  
 Auratumque feram, & Turdum, flavosque (1) Erythinos:  
 Addam atque his (2) Apyrenum, & cæruleum (3) Melanurum,

Atque leves (4) Synodontas [amat hos nam tua Phyllis:  
 Sæpius atque illos memini, me ferre rogabat]  
 Hos & odorifera contactos desuper alga,  
 Vimineosque inter calathos tibi munera ducam.  
 Præterea, primis quæ sunt gratissima mensis,  
 Dona feram, æquoreo madeant quæ plurima rore,  
 Atque vaporifero spirent circumdata musco,  
 Et per læpe famem quæ irritavere morantem,  
 Ostrea, purpureoque ardentes murice conchas,  
 Et saxosa mihi servat quos Nefis Echinos,  
 Quosque Dicharchæis nutrit Thetis humida faxis:  
 Illos è fundo, rigidaque è rupe revellam,  
 Cum jam Luna suum complevit lumine cornu.  
 Insuper & pictum, non ultima dona, quasillum  
 Cæruleis plenum digitis, quos litora propter  
 Sebetii medias inter scrutamur arenas.  
 Hinc cum læta inter myrteta, & concava saxa,  
 Aut riguos inter lenta otia ducimus amnes

Jam

---

(1) *Frangolino*, & *Pagro*.

(2) *Lampreda*, sic dicta quia exossis est;

(3) *Occbiata*.

(4) *Idem*, ac *Dentices* latinè, *Denticæ*.


Jam vacui, & Zephyrum, & frigus captamus opacum,  
 Quam mihi Syncerus moriens donavit, avenam  
 Inflabo, & nostro freta carmine pulsa sonabunt.  
 Tunc genus antiquum regali è sanguine regum  
 Cantabo, stirpisque tuæ primordia dicam,  
 Magnanimos addam Heroas, Regesque superbos,  
 Quos Tagus auriferis regnantes vidit arenis,  
 Et quos dives Iber, niveaque incinctus oliva  
 Bætis, & umbrosa coluit cervice Pyrene:  
 Quos & Parthenope titulis majoribus auxit:  
 Noster & in viridi miratus sæpe recessu  
 Pausilypus fovitque suas Euplæa per undas.  
 Non taceam tua facta, mihi si pulcher Apollo,  
 Et digna Aëtiades concedent carmina Musæ.

Hæc fat, Nereides, vestrum lulisse Poëtam,  
 Dum sedet, & rarum subtexit arundine linum.  
 Hæc vos &, Divæ, facietis maxima magno  
 Cardenidæ, mihi cujus amor sic crescit in horas,  
 Orbe velut pleno succus pinguescit Echini:  
 Aut matutino ut turgent conchyliæ rore.

Surgamus; nam prima gravis cantantibus aura  
 Vesperis, atque aër gelidi nocet humidus antri  
 Ite domum teneræ, Sol occidit, ite puellæ.







# PETRI GIBELLINI

PISAURENSIS.



*In Sebastiani Maccii Durantini.  
Soteridem.*

**S**I tantum potuit celeberrima Musa Maronis,  
 Arma, virumq; canens jactatum fluctibus, atque  
 Laomedontæ referens incendia Trojæ,  
 Versibus ut fuerit tot sæcula vivere dignum,  
 Doctorum ille virum victurus in ore Poëta,  
 Lucida dum supero splendent sidera cælo,  
 Perpetuum si vivent Vatribus edita priscis  
 Tot monumenta Heroum demandata papyris:  
 Unde sagax Ithacus notus, nota inclita gesta  
 Romulei ducis in cladem Carthaginis altæ:  
 Ogygium pariter fervens discordia fratrum,  
 Qua fontes misere flagrarunt undique Thebæ,  
 Bellaque præstantis latum pugnata per orbem  
 Cæsaris, & strati Romana cæde Philippi;  
 Maccius æternum Vates non vivet in ævum,  
 Et sophiæ decus, & lumen, columenque Latinum,  
 Quem virtus multo illustrat preciosior auro?  
 Maccius, Euterpe voluit cui tradere plectrum  
 Auratum, Charitesque favent, & Suada, Decorque  
 Verius ast animum decorant huic unica Christi  
 Religio, alma fides, & spes. Charitesque sorores,  
 Quas reliquæ e cælo innumeræ comitantur ovantes  
 In girum placidæ, Maccique in mente quiescunt.  
 Ad ripam Vates, quam diluit unda Metauri

Edi-

Editus, & patulæ recubans sub tegmine quercus,  
Glandiferæ Quercus, Divis quæ grata supremis,  
Est olim viridi Musam meditatus in umbra,  
Quæ posset varios hominum mulcire labores,  
Et revocare animos, mœstumque fugare timorem.  
Nunc vero a Stygia ut cuncti sint nocte redempti,  
Quos error miseros prisca culpaverat Adæ,  
Is canit hoc opere, & mortem lacrimatur iniquam,  
Mortem, inquam, infandâ, cujus memor usq; tremisco,  
Illius æterni Regis de Virginis alvo  
Progeniti, quem procumbens agnovit humibos,  
Stratum membra solo stolidus cognovit asellus  
Et cui post paullo portarunt dona Sabæi.  
Jamque puer factus bisseis floridus annis,  
Sub templi excelsi confidens fornice, multa  
Lege super rogitans obscura arcana reclusit:  
Quem Dominum Baptista lavat Jordanis in unda,  
Unde salus ægris. Ter maxima gesta sequuntur:  
Audivere etenim tellus, & ventus, & æther  
Imperium Christi, cæcorum abiere tenebræ  
Ex oculis: surdorum aures patuere, loquela  
Mutis clara fuit; membrorum habuere salutem  
Ægroti firmam; concessum currere claudis.  
Aufugit rabidus non raro e corpore Dæmon.  
Pallentes animas Soter revocavit ab orco,  
Quas iterum jussit mortalem degere vitam.  
Post gravis excepit mensa Phariseus amica,  
Et sacris pedibus peccatrix oscula fixit.  
Occurrunt pueri ramis, & carmina promunt.  
Frigore percussus vicinæ mortis in horto  
Sanguinis exudat guttas: vincitur Jesus.  
Lictor ad Annam vinctum abducit, & ictibus instans,  
Percutit (heu) pugnīs, visu miserabile, vultum.  
Heu nudat, religatque artus, tortisque flagellis,  
Hinc, inde ingeminat plagas, corpusque cruentat,  
Tum capiti insultat, spinisque coronat acutis.  
Apparet facies atro fœdata cruore.  
Indutum lacera demonstrat veste Pilatus,

Si populi rabiem, & voces compescere possit.  
 At non bacchantes animos cruciatibus explet  
 Pontius, infontem ni ad mortem damnet iniquam.  
 Imponunt igitur truncum, Calvaria ducunt  
 Ad loca; Christum crudeles in stipite figunt.  
 Nimirum, lapide e duro, duroque metallo  
 Stirps hominum, si dira necis ludibria fideis  
 Commemorant oculis, quam passus Rector olympi.  
 Perfusum Christi pretioso corpus odore  
 Dum ponunt in dura exciso rupe sepulchro,  
 Ille hominum semper casum miseratus acerbum,  
 In quem pertraxit primorum culpa parentum,  
 Tartareas visit sedes. Erebumque profundum  
 Captivam ut turbam superas revocaret ad auras.  
 Adventante Deo, variarum monstra ferarum  
 Protinus horrendis implerunt vocibus Orcum:  
 Ast animæ assurgunt dextra, lævæque piorum,  
 Nec non turba Patrum dejecto lumine fata est,  
 Quod nequeat dignas Domino persolvere grates.  
 Hostibus afflictis, ad cælum morte reclusum  
 Extemplo egreditur victor, secumque triumphans  
 Captivos trahit e tenebris ad gaudia vitæ,  
 Perpetuum læti ut patria potiantur amata,  
 Tantus amor nostri divina in mente repositus,  
 Tum matri apparet lacrimanti a morte resurgens  
 Primus & hinc aliis, quos summo elegit amore,  
 Postque dies aliquot, sociis spectantibus, altas  
 Sublimis sedes petit ad cœlestia Regna,  
 Suspiciunt, figuntque oculos: sed candida nubes  
 Discipulis aciem obtundit, privatque magistro.  
 E cœlo Paracletus tunc orantibus una  
 Discipulis, datur ignitæ cum turbine linguae;  
 Illi promissum numen venientis adorant.  
 Judicium tandem extremum cantare Poëta  
 Horrescit, sed enim magnis volventibus annis  
 Hoc erit, excitæ proprio de pulvere gentes  
 Cum sistent supremi Judicis ante tribunal  
 Qui exegit paria hæc magnò monumenta Maroni,  
 Qui-

Quique bibit sacro Andinos de fonte liquores ?

Maccius ista pio modulatus carmina sensu,  
Gratum opus ingeniis, duroque perennius ære,  
Emeritam Aonidum laurum, viridemque coronam  
Contextam ex hederis, quæ doctæ præmia frontis,  
Haud poscit Vates, sed opem nunc flagitat unam  
E cœlo, una Dei merces sibi sola laborum.


Altera Calliope, quæ menti carmina fundat,  
Virgineum decus eligitur, materque Tonantis,  
Pectoris affectus movet, os ea flatibus urget,  
Signat cuncta manu, expolit, illustratque canenda.

Sancte Pater, gregis e cœlo cui est credita sacri  
Cura: vices superum geris hic tu maxime Pastor,  
Tu procerumque, Patrumque decus te Maxime Clemens,  
Vatis opus tanti multo cumulabis honore:  
Sic etenim sperare decet de Principe Summo.  
Quare age, mi Macchi, viventis nulla Theonis  
Tela reformides usquam; tua carmina namque  
Grata, volente Deo, Clementi in sæcula vivent,  
Multaque percipies reliquæ tibi commoda vitæ,  
Atque tuum nomen semper, laudesque manebunt.

Magnus honorabit Vatem te Feltrius Heros,  
Heros, præsidium cunctis quem Vatribus ipse  
Cœlicolum Pater æthereo demisit olympo.  
Magnanimus Princeps, summorum a sanguine Regum,  
Augusto major: quo non præstantior alter  
Consilio: summis qui ornat virtutibus orbem.  
Is te secernet populo, quænaque corona  
Tu ornatus, series sublimi vertice cœlum.








# ANTONII GIGANTIS

EX FORO SEMPRONII.



*De Villa Tusculana Jo: Baptista Campegi, Episcopi  
Majoricen. in agro Bononien.*

**N**unc humiles primum conemur tollere versus,  
Et nostra assuescat magnas intexere laudes  
Pagina: fume animum, ac torporem expelle, Thalia,  
Splendida Campegi dicamus rura beati.  
Rura humili quondam Saliceti nomine dicta,  
Tusculi ab auspicio sed nunc meliore vocata.  
Multas illa quidem Italiæ jam nota per urbes,  
Ipsius & domini scriptis celebrata disertis.  
Non igitur rerum ambages, aut ficta sequemur,  
Omnia quin celebri referemus consona famæ.  
Sed tam multa loci illius ornamenta recurrunt  
Una animo, ut nequeat laudum servarier ordo,  
Temperies tamen inprimis, cœlumque salubre  
Laudetur: partim indiciis id Phœbus apertis  
Arguit, exurgens tractu vel semper Eoo  
Conspicuus, vel raro atra caligine septus.  
Partim etiam indigenæ ostendunt, qui robore firmo  
Longævi incedunt plures, viridique senecta  
Haud cessant duro terram exercere labore.  
Nec minus illa adeat male sano corpore si quis  
Rura, brevi invalidas firmabit tempore vires,  
Aut requiem plane inveniet, morbique levamen.  
Tum matutinas æstivis mensibus horas;  
Atque adeo medium Titan cum fervidus axem

Invehitur curru, lenis refrigerat aura.

Mox uber glebæ, magnique & fertilis agri  
Cultum admirari libeat. quo haud lætior ullus  
Bellineos intra fines versatur aratro.  
Frugibus omnigenis hic magna explere quotannis  
Horrea, & optatum potis est superare coloni.  
Optima quin idem fert, & mollissima vina,  
Ut vineta putes illic florere Falerna.

Tot bene culta soli fœcundi jugera parvus  
Alluit haud rapidis, lembosque ferentibus undis  
Rhenus, ad ingentes villæ percommodus usus;  
Sive quid efferre inde libet, seu afferre necesse est,  
Seu vicina juvat quandoque invisere rura,  
Plurima quæ circum late ornant æquor amœnum,  
Nobiliumque opibus dominorum, & splendida cultu.  
Præterea squalos large, canerosque rubentes,  
Procerosque lupos, & parvos sufficit, atqui  
Molles pisciculos, & grati nempe saporis.  
Ipsa etiam fluvialis aqua, & perlucida currit.  
Et bona [momenti quod non puto nullius esse]  
Escas ardenti properè mollire camino,  
Atque per æstatem perfundere membra salubris.

Huc etiam accedit, quæ laude est digna voluptas,  
Innumeras pascit volucres: ibi Phasidis undæ  
Nomen avis referens, & turtur amica pudori  
Nidificant, ac turba avium infinita minorum.  
Non ibi vel perdix deest, vel peregrina coturnix,  
Et merulæ, turdique suo stant tempore obesi.

Præbet item damis latebras, passimque vagantes  
Prata per, & cultos cernuntur sæpius agros  
Auriti lepores: variis ut mensibus anni  
Contingat, grato exercentem membra labore,  
Accipitri, laqueis, cane, visco, & retibus uti.

Nec tamen hæc cum sint ingentia commoda ruris,  
Naturæ proprio concessa, & munere Divum,  
Non etiam insignes magnam ars imitata parentem  
Addidit ornatus; hinc est pomaria, & hortos  
Conspicere irriguos, ac multo flore nitentes,

Constitaque arboribus quadra, atque salubribus herbis,  
Et ducta egregie in varias topiaria formas.

Quorum ego si nitidam speciem comprehendere versu  
Evaleam, nihil aut fructu jucundius illis,

Pulchrius aut visu sperem me offerre legenti.

Sæpius aut eadem verba hæc iterare decebit;

Singula nam miro fulgent concinna decore.

Magnam præsertim Villam [ an palatia dicam

Regia? ] suspiciens stupet, ac sublimia tecta

Hospes, & aspectu primo penetralia secum

Concipit ampla animo tacitus; verum omnia longe

Majora offendens oculis, miratur & alta

Atria, & atriola, atque adjuncta cubicula, & omnes

Percupidus partes supra vestigat, & infra,

Cunctaque magnificis in cælum laudibus effert;

Et merito: neque enim surgit formosior ulla,

Nec mage culta domus (livor procul omnis abesto)

Sapina qua pingues, Rhenusque interfuit agros.

Sed neque, mi, calamo quamvis properante, silenda

Pars erit inferior tecti, penitusque reposta,

Ut satis una domus speciem præseferat amplæ.

Multiplices uti partitæ sunt nomina cellæ,

Quæ non vina modo, & servanda cibaria condunt,

Servorumque ministeriis, ac usibus aptæ;

Verum etiam quivis in eas diverterit hospes,

Perbelle exceptum se coram dicet, & absens.

Harum ad mundiciem ducta est spatiosa latentem  
Subter humum via, quæ recta decurrit in amnem.

Illa pavimentis constrata, & fornice tecta

Perpetuo muris validis fulcitur utrinque,

Totaque vel largo Solis splendore nitescit;

Mirum sane opus, & grandi quondam ære redemptum.

At superas iterum jam nos referamus in ædes,

Multa ubi præterea laude attingenda supersunt.

Præcipue illa ingens altis suffulta columnis

Porticus, aspectans Boream, septemque Triones,

Mirificum præbet rapido tutamen ab æstu.

Hoc itidem interior celsa testudine, & amplis

Parietibus, latisque domus constructa fenestris  
 Præstat, & egelidos sic accipit, atque remittit  
 Ventorum flatus, ut protinus arceat omnem,  
 Vel sinat haud ægre rabiem tolerare leonis.  
 Sunt etiam mediis conclavia in ædibus omni  
 Usqueadeo strepitu, ac penitus semota suturro,  
 Ut minime intomnes liceat traducere noctes.  
 Nec putei desunt ingentes, atque perennes  
 Dulcis aquæ, & nitida murorum mole decori.

Tum vero latos liber prospectus in agros  
 Miris quippe modis oculos, & corda tuentum  
 Exhilarat, gelidas seu flectant lumina ad Arctos,  
 Sive se ad occasum vertant, seu Solis ad ortum.  
 Ac frons illa domus, Austri quæ vergit in oram,  
 Continuos colles, & cellas prospicit arces  
 Urbis Felsineæ; via quo mollissima quarto  
 E lapide inventum cilio deducit, equove.

Quid calles memorem, & quos protegit umbra recessus  
 Compitaque apricos circum spectantia campos?  
 Aut quos concentus dulces aurora volucrum  
 Excitat exoriens, pæne ipso in limine tecti?  
 Quis vero digne vivaria dixerit umquam.  
 Quæ magna in magno lymphis currentibus horto  
 Inclusos servant pisces, accedere ad escam,  
 Atque manum assuetos non exhorreere vocantis?  
 Illa autem magis hoc etiam miranda videntur  
 Nomine, vicini quod aquas e fluminis alveo  
 Accipiunt juges, longo reddente canali:  
 Villæ ingens decus, atque animo prædulce levamen.

Stragula vestis item foret, ac pretiosa supellex  
 Dicenda, & quantus rebus nitor omnibus insit;  
 Qua bene compositos exornant serica lectos,  
 Et conopæa egregio contexta labore.  
 Quaque aulæ tegunt muros pendentia ad unguem  
 Argentoque, auroque, & vario distincta colore,  
 Qualia cernuntur Regum intra tecta potentum:  
 Et qua perlepidis pulvillis, atque raperis  
 Strata pavimenta, & sellæ, tripodesque renident.



Atqui ego non is sum, innumeras qui carmine dotes  
Enumerare velim, queis villa, & fundus abundant:  
Nec si ausim, pulcher votis aspires Apollo.  
Hoc sit scire fatis, longe pulcherrima adesse  
Omnia, magnanimoque viro, & prædivite digna.

Non Parii lapides, fateor, non ænea signa,  
Plurima quæ Tybris forsan miratur, & Arnus,  
Confurgunt illic, aulæque, & limina servant.  
Nec tamen ignoro, minimum quam conferat usum  
Signorum ornatus, quo cetera prorsus abunde  
Contulerit natura potens, atque artis acumen:  
Sed vice mutorum lapidum, rigidique metalli,  
Si quis eo accedat, quo tempore rura frequentat  
Dives herus, virtute viros, omnique lepore  
Præstantes, illic inter se docta ferentes  
Colloquia inveniet, tales nam semper amicos  
Munifici bonitas Campegi abducit ab urbe,  
Et nitida excipiunt lautis triclinia mensis.  
Tunc Academiam potius, gratumque Camœnis  
Dixerit hospitium, quam villam ruris amœni,  
Præsertim si aderit tum Bolognetus, & una  
Sigonius domino ante alios dilectus uterque.  
Ille Senatores inter clarissimus, idem  
Eximio Phœbi vates insignis honore.  
Hic florente stylo late monumenta per orbem  
Diffundit, magni Ciceronis proxima scriptis.  
Ipsam præcipuè dominum mirabitur instar  
Numinis, ac illo inspecto mage lætus abibit,  
Quam si cuncta simul sit contemplatus ibidem  
Marmora Praxitelis, famosique æra Myronis.  
Si vero audire illius doctissima verba  
Contigerit; sæcli haud dubie vestigia prisca,  
Atque sales mediis dignos agnoscet Athenis.  
Quamquam aliis etiam illustrem virtutibus omnes  
Suspiciuntque virum, ac efferre ad sidera certant  
Laude extollentes largæ pia munera dextræ.

Sed quo me diversa rapis? jam desine versu  
Garrere illepedo, satis est utcumque Thalia

Hæc

Hæc calamo cursim infueto potuisse referre.  
 Forfan & hinc aliquis vel caprus Tusculi amore,  
 Vel certe in nostris illud sordescere chartis  
 Indignans, ejus laudes sibi scribere sumet,  
 Et nova majori sociabit carmina plectro.  
 Atque ita Campegi villam, nomenque Joannis  
 Baptistæ, ut par est, longum æternabit in ævum.

*EX D. GREGORIO NAZIANZENO*  
*de Vita vanitate, communique omnium*  
*sine.*

Quis mihi det celeres Aquilæ, vel hirundinis alas,  
 Ut avolem ex mortalium  
 Cœtibus, ac deserta vager per lustra ferarum,  
 Ibique contubernio  
 Illarum assuescam? quas jam mortalibus ipsis  
 Fideliores autumo.  
 Namque ita fors possim levius traducere vitam,  
 Tot hic refertam fraudibus:  
 Sed tamen hoc unum, generi haud commune ferino,  
 Exors mihi dari velim;  
 Nempe Dei gnaram mentem, & cœlestia semper  
 Curantem, omissis perdit  
 Illecebris sæcli, ac abrupta compede sæva  
 Immanis Orci principis.  
 Sin minus effugere hinc liceat, nec me esse malorum  
 Rex Cœlitum expertem annuat:  
 At cuperem aëriam in speculam conscendere, ut orbis  
 Me posset omnis cernere:  
 Ac etiã exaudire procul, dum talia voce  
 Sæpe intonarem maxima:  
 Mortale homines, fluxum genus, atque caducum,  
 Quousque tandem somniis  
 Delusi fallis, levia, & ludicra sequendo,  
 Summum relinquetis bonum?  
 Inspicite o miseri, cuncta ut sub Sole creata  
 Sint morti, & umbris debita.

En viridi hic nuper gaudebat flore juventæ,  
Membrisque robustissimis.  
Hic forma egregia, & præstanti corpore dudum  
Verterat in sese omnium  
Lumina, ut ante diem cunctis formosior astris  
Cælo renidet Lucifer.  
Marta hic arma manu forti tractabat, honore  
Fulgebat hic Olympico.  
Optimus hic agitare feras, & vincere cursu  
Damas, & apros viribus..  
Hic mensas vino, dapibusque gravabat opimis,  
Et terra, & ære, & mari  
Ingluviem explebat. Sed contemplamini, ut omnes  
Nunc curvi & infirmi fient.  
Corporis excessit decor, & subeunte senectâ  
Defloruerunt omnia.  
Languent effætæ vires, ventrisque, gulæque  
Omnis voluptas occidit.  
Nil prope adhuc retinent hominis, similesque sepulchris  
Ducunt anhelum spiritum.  
Rursus & huc acies, ac sanam advertite mentem,  
Et vera falsis cernite.  
Hinc sermone potens est, hic insignis avorum  
Alto superbit sanguine.  
Consilio valet hic, naturæ hic omnia novit  
Arcana, hic est dux maximis  
Strenuus in bellis; hic opes sibi condidit amplas,  
Talentaque auri plurima.  
Hic rigido torquet populos examine iudex.  
Ostro hic nitens, & laurea  
Sic tumet, ut regem ipsum parvipendat Olympi.  
Veruntamen jam omnes brevi  
Momento exiguum in cinerem vertentur, & omnes  
Æquabit unca falce mors.  
Servos, dominos, inopes, opibusque potentes  
Unæ tenebræ, una & domus  
Excipiet cunctos, quamvis sibi marmore priva  
Sepulchra viventes struant,

Ac titulos frustra scalpant, & nomina faxis;  
Namque æqua lanx omnes manet.  
Et jam jam nudatæ erimus calvæ, aridaque ossa.  
Jam desinet superbia,  
Pauperies, morbi, rixæque ac tristia bella,  
Et efferæ libidines.  
Omnia corporeâ simul hæc cum môle peribunt,  
Donec sub horrendum tubæ  
Clangorem rursus jussi consurgere, magnum  
Distamur ante judicem.  
Cujus ad imperium pœna male facta perenni  
Plectentur; at pii optima  
Præmia percipient, ac tuta pace fruuntur  
Celsis locatis in sedibus.  
Proinde meis dictis præbere fidelibus aures,  
Gravem & veternum pellite.  
Eja agite & mundum fugite, & quæcumque dolosus  
Fomenta serpens suggerit.  
Et genus, & formam, & fascēs, & opēs infidas,  
Ut stercora arbitramini.  
In Cælumque oculos, animumque attollite, veræ  
Ubi sunt opes, & gaudia:  
Quæ non tempus edax, non ulla injuria tentat  
Mutare, namque ibi Deus  
Verax illa piis animis bona tanta paravit,  
Quæ nec oculus vidit, neque  
Auris percepit, nec item mortalia possunt  
Corda meditando assequi.

*Ad Lauram Battiferram Amanatam.*

Egregiæ formæ laudes, seu carmine prisce  
Concelebratas, sive recenti,  
Ut lubet assumat mulier sibi pulchra licenter,  
Ac multum se jactet in illis:  
Dum nitidis oculis, & lævi gratia fronti,  
Atque comis infederit aureis.



Sed mox paulatim deflorescentibus annis,  
 Aut ultro, aut invita reponet.  
 Ast animi quæcumque bonas est femina dotes,  
 Et pectus fortita pudicum,  
 Haud quaquam tristis metuens erit illa senectæ,  
 Nec cultu exultabit inani.  
 Quin Regum quavis uxore beatior ævum  
 Transiget, ut facere admiramur  
 Te te ope nobilium virtutum Laura tuarum.  
 Quarum splendorem haud nitor auri,  
 Nec gemmæ æquiparare valent, quas utraque plures,  
 Diversis fert India ab oris.  
 Jure igitur tanto te Flora illustris honore  
 Excipit, & quocunque locorum  
 Tusci Heliconis adit præclarum nomen, eodem  
 Battiferræ fama peragrat.  
 Quod nostra hæc ætas, melioribus æmula sæclis  
 Grajorum, te læta vocare  
 Jamdudum Sapphona suam consuevit, in uno  
 Hoc etiam felicior illis;  
 Nam cultrix tua Musa sacri intemerata pudoris,  
 Carmina castis auribus usque  
 Digna sonat, laudesque Dei plectro aptat Etrusco,  
 Quas numeris cœlestibus olim  
 Jesta cecinit vates, quo hic gratior aura  
 Te sequitur, majoraque longe  
 Præmia deinde manent: æqua cum lance rependens  
 Facta bene, ac bene dicta piorum  
 Rex Cœli, æternis redimitam tempora fertis  
 Ætheria te in sede locabit;  
 Angelicis ubi juncta choris, animisque beatissimis  
 Perpetuos modulaberis hymnos.  
 Sed tu Laura tamen, dum mente hæc concipis alta,  
 Exigues ne despice flores,  
 Quos tibi, ad indicium studii, atque ingentis amoris,  
 Legit parvi Musa Gigantis,  
 Dum prato in viridi terit ocia, nec sibi visus  
 Est laudum experts esse tuarum:

Nobilis Urbini cum non procul urbe Penates  
 Ipse suos veneretur, apricas  
 Qua valles fecat, & Semproni mœnia læto  
 Subter labitur annæ Metaurus.

*De Cosmo Medice Magno Etruriæ Duce.*

*Ant.* Qua laude, vel quo, Pieri, carmine  
 Digne canemus nominis Itali,  
 Etruriæ nedum potentis,  
 Eximium decus, atque robur?

*Mus.* Ne tu id pusillis versibus audeas,  
 Sed magna Magnum plectra sonent Ducem:  
 Quem Mincii cygnus deceret  
 Elysiis revocandus oris.

*Ant.* Quis ergo laudes illius inclitas  
 Feret per orbem? quis venientibus  
 Testabitur sæclis recentem  
 Impositam capiti coronam?

*Mus.* Ignare, nescis, Tuscia quot viros  
 Alat celebres dotibus ingenî?  
 Hi Maximi Cosmi tum avitos,  
 Tum proprios referent honores.

*Ant.* Non immerentem, Diva, redarguis:  
 Verum hoc roganti dic age! Quis sibi  
 Tam grande opus præstantiori  
 Pectine concelebrare sumet?

*Mus.* Petrum inter omnes Angelium meæ  
 Fovent sorores [ tabificus procul  
 Hinc livor esto ] insignem Apollo  
 Huic citharam dedit, atque cantum.

*Ant.* Vatem o beatum, quandoquidem tuus  
 Tantam cothurnus materiam manet:  
 Tu nomine hoc uno vetustis  
 Haud eris inferior Poëtis.

*Mus.* Ducem o beatum, quem magis in dies  
 Cœli benignus prosequitur favor:

Heroibus næ jure prisceis  
Postera te annumerabit ætas.

*Ad Camillum Palaotum Senatorem Bononiensem  
de laudibus Ruris.*

Vita hominis, bene qui canos sibi cogitet annos  
Vivere, ab urbe procul lætus agellus erit.  
Villa ubi prospectans in colle astringat amœno,  
Et fontis vitream quercus obumbret aquam.  
Maturæ huc adeat, superant dum corpore vires,  
Nec vincit validos tarda podagra pedes;  
Copia librorum mentem comitetur ab omni  
Explicitam cura, quam nitor Urbis alit.  
Mensa abiegnata toris hic longe præstet eburnis,  
Vasque concedant aurea fistilibus.  
Sint procul arte cibi nimia. sumptuque parati,  
Nec parca expectet vina Falerna sitis.  
Hortus, & ipsa cohors, succidia, & hirta capella,  
Vel lautas poterunt suppeditare dapes;  
Rusticus interdum vicino e flumine molles  
Pisciculos domino munera grata feret.  
Interdum leporem, aut deceptas arte volucres  
Deferet, incomperto sedulus obsequio.  
Ipse domi certas studiis nunc dividat horas,  
Liber in apricis nunc spatietur agris.  
Cœlicolum regem supplex in vota, precesque  
Sæpe vocans, illo auspice cuncta gerat.  
Vere rosas errans, & per lætissima flores  
Prata leget, passim dulce querentur aves.  
Æstivos viridi Soles vitabit in umbra,  
Et quæret primi frigora opaca die.  
Mox dulces carpentem uvas spectare juvabit  
Agricolam, & forti mitia poma manu.  
Tum vigil hybernas extendat lumine noctes,  
Et duras hiemes arceat igne focus.  
Interea absentes compellans carmine amicos,  
Laudibus in Cœlum rura beata ferat.

Interdum hospitio narrantem urbana sodalem  
 Excipiens memori plurima mente roget.  
 In olitos fascēs, & ludum fortis inanem,  
 Illius ærumnas audiet, hujus opes.  
 Tunc magis obfirmans vitam laudabit agrestem,  
 Hanc colet, hanc regum præferet imperiis.  
 Cui sic continget senium traducere, porro  
 Corporis atque animi est tuta reperta quies.  
 At tibi, patrone illustris, licet omnia læta,  
 Cedere & ad votum prospera cuncta precer:  
 Non tamen hæc adeo optarim liberrima ruris  
 Ocia, ut urbe omni tempore abesse velis.  
 Id tibi nec Genius, nec amicus suadeat auctor,  
 Cui tuus in patriam sit bene notus amor;  
 Quive tuam norit virtutem in rebus agendis,  
 Quam multos opera, consilioque juves.  
 Culta igitur quamvis vario Argentina lepore  
 Gestiat assidue te retinere sinu:  
 Emeritum senium, & longos cum laude labores,  
 Clarorum & memorans facta imitanda virum:  
 Propositi tamen ipse tenax hoc adde sequendum  
 Civibus exemplum, magne Camille, tuis.  
 Publica privatæ nempe anteferenda quieti  
 Commoda, dum recte membra, animique vigent.  
 Hastenus ergo pater conscriptus rura frequentet,  
 Curia ne absentem, ne doleatve cliens.  
 Discat & hunc vitæ duce te servare tenorem,  
 Qui patriæ ex animo dicier optat amans.

*Ex Italico idiomate Latine redditum.*

Accipe languidula, quæ nunc tibi voce, Lycori,  
 Ad strepitum citharæ carmina sera cano.  
 Quando ego non potui tota te luce videre,  
 Dum passim huc illuc anxius usque vagor.  
 Sæpe hodie fontem petii te propter, & agros,  
 At nusquam audita es, nullibi visa mihi.



Vix tandem e foribus non discedente Lycisca,  
 Te senti tacitam continuisse domi.  
 Ecquæ tam assidue potuit te causâ morari,  
 Quin semel in specula conspicienda fores?  
 Fac amabo, mea lux, summo te mane revisam,  
 Longior hæc anno nox erit una mihi.  
 At tu forte levi recubas evicta sopore,  
 Me Jove sub gelido sævus adurit Amor.

*Ad Georgium Gotium Ragusinum Romam.*

Goti, meorum amabilissime omnium  
 Sodalium, quot nunc mihi  
 Sunt, aut fuere, aut post erunt, dum spiritus  
 Hæc membra vitalis reget:  
 Cur litteras sitire me dulcissimas  
 Diutius finis tuas?  
 Nam quinque jam fere peractis mensibus  
 Tuum queror silentium  
 Nunquid tibi fluxisse me dicam sinu?  
 Sed absit, hoc ut suspicer,  
 Notamve turpem amico inuram candido.  
 Quid ergo? num te forsitan  
 Minus valere cogitem? at menti omina  
 Dii tristia avertant piæ.  
 Quin optime tibi esse, teque mutuo  
 Gigantem amore prosequi,  
 Tam continenter credo, quam lubens velim.  
 Ast interim mihi male  
 Scito esse. Goti: non quod artus langueant,  
 Sed quod laboret anxia  
 Mens, dum tabellas tandiu expectat tuas,  
 Quod te per omnes Gratiâs  
 Oro, hanc ut illi deleas molestiam,  
 Sic te vicissim Cœlites  
 Amant benigni, ac jam tibi diutinum  
 Bene explicent negotium.

*Ad Albertum Albertanum Collensem Prætori  
Pratenſi aſſeſſorem.*

O Collis altis nobilior jugis,  
Cingunt potentem quot quot Etruriam,  
Inſignium o ſator virorum,  
Fertilibuſque opulente glebis;  
Hunc lætus hymnum ſuſcipe, quem ſacras  
Biſenti ad undas condidimus, tuum  
Præconio Civem efferentes  
Non humili, neque laude ficta.  
Præclaram in illo namque peritiam  
Bonique, & æqui dicimus inſitam,  
Mentemque ab omni labe tutam,  
Muneribuſque manum abſtinentem.  
His nempe quiſquis præditus artibus  
Judex tribunal ſcandet, is omnium  
Hinc inde virtutum catervas  
Ordine conſpiciet decoro  
Sibi aſſidentes; nec ſuperum Pater  
Nequicquam ab altis verticibus poli  
Sp. ſtabit illum judicantem,  
Aurea nec Themidis puella.  
Quæ, ut fertur, olim moribus improbis  
Inſenſa terras deſeruit graves,  
Cælumque ſublime, & parentis  
Sidereas repetivit arces.  
Alberte ſed tu, quique tibi pares  
Intaminatos juſtitix gerunt  
Faſces, eam feliciori  
Omne conciliatis orbi.  
Dum nec ſeveras parcitis in reos  
Inferre pœnas, nec ſinitis mala  
Quemquam opprimi fraude innocentem,  
Aut hominum rabie potentum.  
Vos & benignam patre carentibus  
Præbetis aurem; vos viduas (pium

Opus ) tuemini, advenasque  
 Præsidio, atque inopes foveatis.  
 Dii magna vobis præmia pro bene  
 factis rependant; præmia, quæ vorax  
 Nec tempus unquam auferre possit,  
 Nec Lachesis violenta dextra.  
 Tum vestra doctis nomina paginis,  
 Vestrasque laudes carmine prædicet  
 Amabili, cuicumque dexter  
 Cynthius adfuerit canenti.  
 Me namque grati (quidquid id est) tibi  
 Præstasse amici officium juvat,  
 Meisque te, Albertane dulcis,  
 (Quod potui) voluisse parvis  
 Ornare scriptis: dum populus frequens  
 Præsentis actus approbat integros,  
 Tuamque procurationem  
 Egregio celebrat favore.

*Ad Carolum Sigonium.*

Muneris historię finem, lætumque, bonumque  
 Gratulor hoc primum tibi nomine, docte Sigoni,  
 Quod mentem assiduo explicitam, longoque labore,  
 Postmodo amicorum congressibus, atque lepore  
 Sermonum, & grato conspectu ruris aprici  
 Liberius solito interdum recreare licebit.  
 Quin & corporeæ haud firmo sat robore vires  
 Id poscunt, primæque ætas vicina senectæ,  
 Scilicet ut vehemens studium vigilesque lucernas  
 Seponas paulum, salvusque, & lætus amicis,  
 Et tibi jam vivas: nostrum quo longius ævum  
 Sic florente stylo exornes, ac voce superstes,  
 Ut tua perpetuo mortales scripta juvabunt.  
 Deinde tibi ex animo lætor, quod gloria tanta  
 Hinc te consequitur, quantam non audeat ullus  
 Concepisse quidem votis hoc tempore scriptor.  
 Namque ea quo possent majore volumina plausu

Certatim Italicis, externique excipi in oris,  
Floret ubi cultus linguæ, studiûmque Latinæ?  
Quas omnes veluti immensum resonare theatrum  
Audimus Caroli laudes, nomenque Sigoni.  
Nobilium vero Procerum potes ipse, virumque  
Clarorum plane innumeras proferre tabellas,  
Testantes quanti fias, & qualis ubique  
Virtutis sit fama tuæ, atque ut numinis instar  
Denique te quisquis præsens veneretur, & absens.  
Docta quidem monumenta tui jam multa per orbem  
Manarunt, summaque tua cum laude leguntur;  
Ast opus hoc insigne recens quo majus ab omni  
Parte animi præfert studium, ingenique laborem,  
Hoc magis ingentem decoris super addit acervum.

Quinetiam ulla tibi penitus ne præmia desint  
Digna tuis meritis; ecce illustrissimus ille  
Indole divina, & clara virtute Jacobus  
Te sponte officiis, & grandi munerat auro,  
Magnorum exæquans animos, & munera regum:  
Hoc uno dignus facto, quem florida passim  
Ingenia, & linguæ; calamique, & plectra celebrent.  
Quamquam mille modis aliis, atque artibus altam  
Materiam præbet laudum, seu strenuus armis  
Turatur fines Romanos, ac vigil arces  
Invisit, summo seu magna negocia tractat  
Consilio, seu dat populis responsa benigne;  
Sive ille impatiens frustra disperdere tempus,  
Ingenuo exercet nunc fortia membra labore,  
Nunc animum studio recreat, doctisque libellis.  
Quare etiam hinc lætor, juvenis quod gratia tanti  
Te foveat, nec non donis, & honoribus ornet.  
Tu vero virtute tua, eximioque favore  
Præsentis sæcli, ac venturi laude perenni  
Gaude vel merito, vir præstantissime, cujus  
Nunc opera effecit, multos ut quæ ante per annos  
Italia in densis languebat mersa tenebris,  
Vivida jam superas se tollere possit ad auras,  
Ac mereat tandem vere illustrata vocari.



BENEDICTI GORII  
FLORENTINI.



*Ad Vincentium a Filicaja Senatorem.*

**S**atis curuli viximus exedræ,  
 Satis forensi (nec sine nomine)  
 Decerpere acclinem triumpho  
     Fama dedit trabeata laurum,  
 Satisque suetus fallere subdolæ  
 Illudit Aulæ fulgor, & aureis  
     Fasces Coronis bracteatos  
     Ambiguo madefecit ostro.  
 Sed versipellem fulguris in modum,  
 Videnda quæ vix obtulit, abstulit,  
     Speique forte succiplenam  
     Nunc iterum male format umbram.  
 At quæ fugaci ludit imagine  
 Præstigiarum, non iterum meos  
     Affabit obtutus, mei que  
     Pacem animi in scopulos, procellasque  
 Impellet: altæ jam capitis nives,  
 Caligo mentis, vis animæ impotens,  
     Vigorque depressus, propinquam  
     Esse diem monuere vitæ;  
 Dixisse vitæ sic liceat diem  
 Quæ sanctioris murice sanguinis  
     Christo dealbatum, & Parenti  
     Virginæ, superisque sistat.  
 Hæc una tecum mo, Filicaja,

Curarum adurat : quos simul ut sacri  
 Catena Amoris alligavit  
 Excipiat Paradisus ambos.

*Ad eundem.*

Quæ se lutoſo Glanis ab alveo  
 Remota late Cecina diſgregat,  
 Hæc una Muſarum jocoſis  
 Me ſalibus, Filicaja, mixtas  
 Volentem ad undas evocat; oh meis  
 Optata curis otia, quæ tibi  
 Utcumque diſtantiem per annos  
 Colloquio propiore jungunt!  
 Miraberis fortasſe ſenilibus  
 Excuffam ab alto pulvere tibiam  
 Ad uſque Tyrrhenos ſonantis  
 Vocibus incaluiſſe plectri.  
 Aſt in medullis, & ſilicis ſuæ  
 Scintilla flammæ eſt, ſi calybem incutiſ  
 Ardebit, æterna ligatus  
 Compede nec lapideſcet ignis.  
 Ergo ſequaci non liceat lyra  
 Referre amicæ vocis imaginem  
 Quando repercuffas ubique  
 Fama tuas gemitat Camœnas?  
 Nec me tenacem propoſiti abſtrahet  
 Severa, torvos quæ Themis imperat  
 Criſpare vultus, & reorum in  
 Excidium cataphracta circum  
 Sæpire multo vincla ſatellite:  
 Ut deſtinatas remigio manus,  
 Sontesque terrarum pyratas  
 Supplicio præcunte plectat.  
 Sic prurientem Juſtitie ſacris  
 Lyræ juvabit neſtere lancibus,  
 Jungentis exemplo Dynaſtæ  
 Terſiadæ ſua ſceptra Pfalmis.

Laboriosi mole negotii  
 His immorari seposita libet,  
 Præesse dum curis remotis  
 Imperio licet otioso.

*Ad eundem.*

Et me rogato Juris ab otio  
 Sequi volentem prælia bellicus  
 Abstraxit ardor, commodatas  
 Da cytharæ, Filicajæ chordas,  
 Auro micantes, te duce concinam  
 Decussa nuper cornua Bosphoro,  
 Certoque subductas Viennæ  
 Thracis ab imperio ruinas.  
 Alterna mixtis carmina lacrimis  
 Fregere pectus, cum Scythiæ jugis  
 Effusa tempestas, tubæcto  
 Morte tumens fluitavit Istro,  
 Stravitque pagos, & pecudum greges,  
 Gregique junctum florem Alemanniæ,  
 Florem juventæ jussit uni  
 Implicitum dare colla loro:  
 Quas ussit aras igne Fides sacro  
 Has aut nefastis perdidit ignibus  
 Hostilis ardor, aut equorum  
 In stabulum male destinavit.  
 Quin & Quiritum Regia Cæsarum  
 Propinqua pavit vincula, compedes  
 Mirata vicinos suasque  
 Circumagi obsidione turres.  
 Disiecta ahenorum ariete fulminum  
 Delubra nutavere, Palatiis  
 Mensura structuræ ruina est  
 Ambiguus male fulta tignis:  
 Dolosus udo subditus aggeri  
 Irepsit ignis, scissa remugiit  
 Repente tellus, & revulsis

Mœnia diffiluere faxis.

Et jam patentem, scnderet impiger

Obsessor Urbem, jam caderet tui

Sepulta busto, luctuosi

Imperii regimen Vienna,

Nisi imminentem firma repelleret

Fides ruinam, pectore civium

Supplente muros, hostiumque

Cespribus reparante vallum.

At o quis aures eminus incurit

Clangor tubarum? quæ nova consuunt

Vexilla? quantis in Gelonos

Mors equitat cataphracta turmis?

Vident, revulsas Thracis ut e manu

Victoriarum frangat adoras?

Bersosque compellat fugaces

Theutonicis dare terga signis?

Agnosco; Bojos Isara, Saxones

Hinc misit Albis, Molda Bohemicas

Illinc cohortes, hinc Visurgis

Uvestphalici tulit arma tractus.

Proh quantus undis auxiliaribus

Immixtus Istro Vistula Pannenum

Stagnavit in campis, cruore

Decolor Amathio, & voluta

Ad usque ripas mole cadaverum:

Ut iam phalanges non ego dixerim

Certare pugnares, sed unam

Esse Asiæ. Scythæque stragem.

Jo sodales, vicimus, & Dei

Pugnante dextra vicimus impares.

Erepta victores fatentur

Signa Arabum venerata castris,

Quæ Vaticanis de laquearibus

Hæc ipsa dicent bella Nepotibus

Eruntque in annos æviterna

Odrysiæ monumenta cladis.

Quod si remotos viliæ Littavos



Aut inquieti tela Boristhenes

Conjunget arcus, aut Boruffas

Balthicus associabit hastas,

Vates futuri præscius auguror,

Nec Astra fallent vota, videbimus

Fines recessisse, & relicto

Ire Aquilas Narabone nostras

Et qua Tibisco limes Jazygum,

Et prima Savo Myfia frangitur,

Budæque regales in aula

Austriacis posuisse nidos.

Sic te potenter dextera Numinis,

Invicte Regum, fospitet, Imperi

Labantis assertor, Polonæ

Dulcis amor, columenque gentis,

Ut nostra cernent sæcula barbaram

Romana rursus fræna Propontidem

Mordere, contractamque longe

Trans Asiam trepidare Lunans.

Oh ergo pubes Itala Thracios

Perrumpe tractus, jungere Gallia

Armis triumphantum, & vetustis

Adde novos Asiæ triumphos.

Sed, oh, canenti Barbitos excidit

Allisa saxo; collige fragmina

Puer remittenda, & silentes

Consilio meliore chordas.

*Ad eundem.*

Post jam solutum Fabulæ nodum, vocas

Sic finiendis litibus?

Ut tamen amicis jussibus obtemperem

Edisseram quid sentiam.

Laudare semper facta, vetus Adagium

Facienda scrutari docet;


Has quam libenter subsequi Leges placet

Et dicere, oh factum bene!

*Florentinum Harpastum vulgò Calcio, veteris  
Gymnastica Compendium, Militiæ  
rudimentum.*

Devota bello sæcula barbaram  
Edocta ferro quærere gloriam,  
Superque Regnantum ruinas,  
Ruderaque Imperiorum avarum  
Decus cruentæ carpere Lauræ;  
Pacatoris discere si juvat  
Præcepta Martis, innocenter  
Qui studium paret, & triumphos,  
Adeste: pugnas Arnus Olympicas,  
Ductumque ab Isthmi pulvere prælium,  
Et cædis expertes jocosam in  
Militiam renovavit iras;  
Hic & Pelasgæ dogmata Gymnadis,  
Discique, Cursusque, & Pugilum simul  
Noscetis artes, & Palæstram  
Romulei veterem Theatri.  
Audistis? an me ludit amabilis  
Imago belli? jam duplici phalanx  
Colore difformis propinquam  
Increpitat generosa pugnam;  
Assuetus armis ut sonipes (tuba  
Urgente) totis emicat auribus;  
Hinnitque, subsultatque, & hostem  
Unguibus oppositum laceffit.  
Et jam tonitru sulphur aheneo  
Accendit iras, jam lituis strepit  
Libido vincendi, & morarum  
Impatiens animosus ardor.  
Conserta circum signa videbitis  
Certare turmas, & premere, & premi  
Nurantis in morem procellæ,  
Et cuneos cuneis repelli.  
Pars prima pugnæ Ventus, ut arguat  
Constare casu bella volubili,

Paresque nimbis præliorum  
Ambiguas fluitare fortēs.  
En destinato missilis impetu  
Ad astra Follis pellitur, & solo  
Reiectus insurgit, volaru  
Congeneres præeunte ventos,  
Nunc obstinato vel teritur pede,  
Furtim sagaci nunc rapitur manu,  
Aut ludit illusus, fugaces  
Aut sequitur, fugit aut sequentes.  
Tandem torosæ robore dexteræ  
Metas Theatri transilit ultimas  
Impulsus, assequente plausu,  
Emeriti pretio triumphi.  
Sic bellicosis fora laboribus  
Syllana virtus edocet instrui  
Certantis ardorem Juventæ  
Spe decorum, stimulisque laudum.  
I perge Pubes, spes Patriæ, & decus  
Futura Patrum; sic te animi vigor  
Extollet Elæis coronis  
Altius, Isthmiacæque lauru.  
Si bella poscunt, nec popularium  
Te spondet in spem Mars adolescere  
Adorearum, laureatis  
Bella juvent memoranda Fastis,  
Quæ non amici sanguinis ebrum  
In nostra ferrum viscera torqueant,  
Regesque certatim Quirina  
Relligione pares laceffant.  
Sed quæ subactæ claustra Propontidis  
Fregisse, centrum Fama tubis sonet,  
Solisque funestos in ortus  
Occiduum pepulisse Lunam.  
His cresce palmis: scilicet auspice  
Quæ Ferdinando non liceat tibi  
Sperare virtutis trophæa?  
Quid nequeas superare Magnum?




## ALEXANDRI GRATIANI

P E R T I E N S I S .



*In Othonem Truchses Cardinalem  
Augustanum.*

**M**agnus Alexander totum quasi subdidit orbem,  
Et Cæsar gessit maxima bella potens.  
Alciden memorant claros subiisse labores;  
Annibalem tollunt fortia facta ducem.  
Condidit immensam Babylona Semiramis urbem,  
Quod Ninus insignem struxerat ante Ninam.  
Si peteres, non est illorum expleta cupido;  
Quo plus potarunt, plus habuere sitis.  
Felix, qui parvo vivit contentus honeste;  
Non qui, cum teneant plurima, plura petunt.  
Haud hos Heroas tot opes fecere quietos,  
Haud urbes, populi, Regna subacta, duces.  
Principibus cupidis non cedo, beatior istis,  
Cum me tranquillum reddat Othonis amor.





PETRI GRAVINÆ  
NEAPOLITANI.



*De Actio Sincero.*

Qui divina legis Sinceri carmina vatis,  
Magnaque virginei sacra puerperii:  
Non hæc humanæ creda procedere sensu.  
Auctori mentem movit, & ora Deus.  
Hunc sibi delegit, quo non cœlestia quisquam  
Grandius, aut pleno cultius ore sonet.

*De Consalvo Magno.*

Te prius accepit, quam fecerit, inclita Magnum  
Sors tua; te virtus vindicat una sibi.  
Nec Fortuna tuæ tribuit cognomina laudi;  
Te ducē sed potius fors bona nomen habet;  
Cui tantum hoc debes, quod te comitata priorem  
Non dux, sed Magnum est, fida secuta ducem.  
Abs te, quidquid habes, tibi provenit: omnia tecum  
Magne tenes, ante hæc maxima Magnus eras.  
Felix ipse tuo, non Sortis nomine felix,  
Qui geris æternum non aliunde decus.

*Ad Prosperum Columnam.*

Nil obstat, Dux magne, tuis, nil amplius ausis;  
Fortunæ obsequium, signa sequentis habes.  
Vidimus indomiti superata pericula belli,  
Vidimus hostiles succubuisse manus.

Oppi-

Oppida vi capta, & validis trajecta manipulis  
 Flumina, & oppositos terga dedisse duces.  
 Restabant arces, tormentaue bellica; tandem  
 Cesserunt arces, flumina, saxa, minæ.

*In obitum Marchionis Piscariae.*

Non vivam sine te, mi Brute, exterrita dixit  
 Portia, & ardentes forbuit ore faces.  
 Davaie te extincto vivam Victoria, dixit,  
 Perpetuo tristes sic dolitura dies.  
 Utraque Romana est; sed in hoc Victoria major,  
 Nulla dolere potest mortua, viva potest.


# ANTONII GRAVINÆ


## NEAPOLITANI.



*In mortem filii.*

**N**ON lacrimis indignè meis, nec honore sepulchri,  
 Rapte mihi ante diem, dulcis alumne, jaces.  
 Intra bis denos te ostendit, & abstulit annos  
 Parca ferox, votis insidiata meis.  
 Nec potuit probitas, nec amœni gratia vultus  
 Flectere; non ætas, nec pia turba Deum.  
 Spes hominum stolidas! tumulavi mœstus ephœbum,  
 Qui me debuerat lætus humasse senem.





## MONTERCHIENSIS.



*In Cosini Medices Magni Tuscorum Ducis  
obitum.*

**C**Lara propago Ducum Tuscorum Ductor & armis,  
 Consilioque potens, ardua ad astra meas?  
 Tutcia qui poterit largo requiescere fletu,  
 Eloraque delicere mentis amariciem?  
 Ausonia ut duros gemitus, rapidosque dolores  
 Arnus non trahere? ac Tibridis ora ferax?  
 Hec Cosinus Medices crudelibus occubat umbris,  
 Orbem qui regum fœdere continuit?  
 Ter quater, in Cosmo nunc fari legibus acto  
 Felices fuimus, litora cuncta sonant.  
 Omnia sed pereunt modo tecum gaudia, cuncta  
 Commoda ubi nobis te abripit atra dies  
 Jucundum pietate ducem, comitare parentem  
 Deslemus raptas delicias hominum.  
 Quique ausus vada falsa sequi, & regna inclita, fato  
 Atque suo potius Chr stigenum rapitur.  
 Italus inque tuo interitu de mente fugavit,  
 Quod decus eximium, militiæ studium.  
 Usque tamen Cosmi celebretur gloria fama,  
 Notescatque magis dotibus ingenii.  
 Omnibus inque loci laudabitur optimus auctor  
 Proles magnorum cuncta per ora Ducum.  
 Hæc fata & ad pacem, & castrensia signa sequendum,  
 Adjuvet ut Tuscos officiis populos.

Hæc


Hæc ardet raptum, quantum Trinacria rupes,  
 Fertur in obsequium, Flôra beata, tuum.  
 Crede meis dictis: æquabunt istaque magnos  
 Pignora vel Cœsmos egregiæ scobolis.  
 Hæc dico ut vobis: vos Muli dicite cunctis  
 Per mare, per terras jura benigna leget.  
 Nam patriæ rectæ vitæ præcepta recepit,  
 Tentet ut exemplis quem superare suis.  
 Franciscus magnus gemmantia sceptrâ tenebit;  
 Hernandus Christi signifer altus erit.  
 Petrus cæruleo depellet lintea ponto,  
 Cum sint apta suæ bellicæ tela rati:  
 Isabella dabit prolem, Europæque, Asiæque  
 Imperiis dignam, finibus & Lybiæ.  
 Cœsmum addentque suo Divi inter numina regno, ut  
 Ocia decerpât sedibus ambrosiis.  
 Ergo cur simus stultorum more gementes  
 Non est; censem nos cruciari modo;  
 Flôraque clora diis, requiescant lumina luctu,  
 Et magno facias regia iusta Duci.





## BAPTISTÆ GUARINI

FILII, VERONENSIS.



*Ad Janum Pannonium, Quinqueeclesiensem  
Episcopum.*

**N**ON ita muneribus, Præsul doctissime, lætor,  
 Judicio ut clarum me juvat esse tuo,  
 Jane pater: cujus meritas percurrere laudes  
 Non valet ingenii vena pusilla mei.  
 Tu Latiae, Graejæque simul pars optima linguae;  
 Te cuncti priscis dicimus esse parem,  
 Pallada crediderim. Phœbumque, novemque sorores,  
 Thraciaque armifero qui terit arva pede,  
 Ante Jovem tales quondam fuisse precatus,  
 Dum caneret vates bella futura Themis;  
 Contra Turcarum populos, regemque superbum  
 Ut te Pontificem sæcula nostra darent;  
 Qui sævo regeres hosti contermina regna,  
 Et forti premeres arma inimica manu:  
 Facundus Latias posses legatus ad urbes,  
 Dicere pro Christi verba diserta grege.  
 Credibile est igitur Patrem mandasse supremum,  
 Ortus Gradivo, Mercurioque tuos.  
 Nectare te parvum dulces aluere Camœnæ,  
 Nutricesque tulit docta Minerva manus.  
 Firmior hinc ætas magno est commissa Guarino,  
 Ornandumque bonis moribus ingenium.  
 Quippe ubi terra ferax docto cultore movetur,  
 Exoritur cumulo fertilior seges.

Nec

Nec te pulchra minus Ferraria gaudet alumno,  
Quam læta est ortu Pannonis ora tuo.  
Sic te nostra bonum viderunt tempora vatem,  
Quales in cœlum sæcla futura ferunt.  
Nam seu clarorum scribis connubia regum,  
Funera seu ploras, seu fera bella canis:  
Seu præceptorem laudat tua Musa Guarinum;  
Seu de maternis increpat astra rogis;  
Seu queritur morbos, celebrat seu numina fontis;  
Seu canit in medio sidera visa die.  
Alfifono quidquid memorandum carmine sumis;  
Nosceimus eloquii flumina larga tui.  
Hinc Rex Matthias, Turcarum maximus horror,  
Pannoniæ clarum Marte, togaque decus,  
Præside te, regni non parva negotia tractat,  
Sive domi fuerint, sive gerenda foris.  
Hinc te Pannoniæ plebs admiratur, amatque;  
Nobilium hinc Procerum turba verenda colit.  
Hinc urbs pontificem te Quinqueecclesia cœpit;  
Hinc gaudet rebus sacra caterva suis:  
Cum te consilio magnis ductoribus æques,  
Et linguâ promptus bella, manuque iuues.  
Tales sancta duces votis Ecclesia poscit,  
Protegat ut miseros debita cura greges.  
Is mihi bellorum damno fuit usus in isto,  
Quod vultus nostrâ conspicer urbe tuos.  
Namque ita gaudentes hilari te vidimus ore,  
Ut solet æthereo plaudere Creta Jovi.  
Ergo minus dono, quam doni auctore movemur:  
Dantis honos, precium munere majus habet.  
Cornipede in niveo cum me obvia turba videbit,  
Dicat delicias pectoris esse tui.  
Verum opis haud nostræ est dignas, pater optime, grates  
Solvere, nec meritis præmia iusta tuis.  
Mens tibi mercedem virtutis conscia reddat;  
Et quæ respiciunt Numina sancta pios.  
Illa tibi ad patrios saluum remeare penates,  
Hosque de tumido gaudia longa ferant.

*Ad eundem Pannonium.*

Non minus antiquis, Præsul venerande, poëtis  
 Jane, decus vitæ, præsidiumque meæ,  
 Qui patrium claris ornas virtutibus Istrum,  
 Doctrinâ, ingenio, viribus, eloquio:  
 Quando erit illa dies, quæ tecum visere possim  
 Litora saxosæ proxima Dalmatiæ?  
 Illyricumque latus, Dravus quas irrigat oras;  
 Et glaciem gelidi cernere Danubii?  
 Et castella jugis altè constructa nivosis,  
 Martiaque argenti mœnia Pannoniæ?  
 Durum iter est, fateor, longos perferre labores  
 Per pelagus, silvas, flumina, saxa, feras;  
 Qua fera setosis, incultisque horrida barbis,  
 Vocibus occurrat dissona turba meis.  
 Omnia sed tecum vivendi optata voluptas,  
 Atque incredibilis lenia reddet amor.  
 Tecum ego non dubitem Syrtes intrare vadefas,  
 Et loca quæ nimius torret adulta vapor.  
 Tecum ausim pedibus mediam penetrare Charybdim,  
 Cyaneasque vagas, navifragosque canes.  
 O ego ter felix: si te monstrante videbo,  
 Qua pater adstrictis orbita fluminibus,  
 Qua conjuratus deduxerit agmina Dacus,  
 Quæ Scythia non stabilis, quæ colit arva Getes,  
 Per quos intonsus discurret Sarmata campos,  
 Et quibus angusti sunt sua plaustra larès,  
 Quæ via Riphæos alto sub vertice montes  
 Adspicit: Euxini qua fluit unda maris:  
 Atque Tomitanæ qua sint confinia gentis,  
 Nasonis nostri cognita terra malis.  
 Discam etiam Augustus quæ vicerit oppida Cæsar:  
 Quæ fuerit Latis sanguinolenta viris:  
 Fervida Tûrcarum rabies quas vicerit urbes;  
 Quos dederit populos gens truculenta neci:

Qui

Qui desolati sævis populatibus agri;  
Atque unde ingenti præda sit acta manu.  
Si te forte pudor tua dicere gesta verabit;  
Non erit hic magnus noscere cuncta labor;  
Cum valeant claris dudum vulgata triumphis,  
Illa vel ignavi facta referre senes;  
Quam longas hiemes, & quantos sæpe calores  
Pertuleris duræ tempore militiæ  
Quæ vallatæ tuo fuerint, quæ diruta ductu;  
Quæ defensa tuis oppida consiliis;  
Quam rapido cautum cursu prævenieris hostem;  
Difficileque nova feceris arte vias:  
Ut Mahometæ dederint tibi terga cohortes,  
Non ausæ populi tela videre tui:  
Agmina quæ Stygio fugientia miseris Orco,  
Aut ferro, aut altis obruta gurgitibus.  
Hæc pro virginco gessisti prælia Christo;  
Hoc habuit sanctæ religionis amor.  
Nec minus adspiciam quas præstant ocia sedes;  
Hic ubi stat docti sacra caterva chori:  
Hic ubi vel legitas præcorum carmina vatum,  
Vel nova venturis scripta legenda canis:  
Tristia Mæonio celebrans nunc prælia versu;  
Nunc referens claudo mîra facta pede.  
Hic ubi Smyrnæas solitus percurrere chartas,  
Et gelidis quidquid vallibus Asæra canit:  
Lucida sidereo quæ sint animalia cælo,  
Quæ ventum, aut pluvias prævia signa ferant.  
Quidquid Sicaniâ pastor modulatur avenâ;  
Quidquid Aristophanes scribit, & Euripides.  
Quid tumido fingit stultæ reus ore senectæ,  
Et quis Olympiacis scandit in astra rotis,  
Et quos errores, acies quas Mantua narrat,  
Et silvis pariter cognita, & agricolis.  
In nova quæ fuerint mutatæ corpora formæ,  
Quos notet in fastis Martia Roma dies.  
Postquam legisti quæ dat præcepta Cupido,  
Discis quæ tanti sit medicina mali.




Gramina quæ pandat Macer ; & quid Musa Catulli,  
 Quid genio Plautus nobilis & salubus.  
 Quâ Pœnus foccos exprefferit arte Menandri ;  
 Quid ludant Elegi turba faceta chori.  
 Carmina quos celebrent fidibus Venusina canoris :  
 Qui primâ rapiant vellera fulva rate.  
 Quo sonitu juvenis civilia bella tonarat ,  
 Laudandâ jussus seditione mori .  
 Corduba quid memoret , Grajos imitata cothurnos ;  
 Quâ fera Papinius concinat arma tubâ.  
 Mordacesque jocos , & falsa Epigrammata Marci ;  
 Quæ cantet Latius Punica bella senex .  
 Quidquid Pierides mollis sonuere Canopi ;  
 Quos laniet Satyris Musa Latina suis.  
 Perspicis illustres vitas Regumque , Ducumque ,  
 Quas & Plutarchus tradit , & Æmilius .  
 Nunc arguta gravis Tranquilli scripta revolvis ;  
 Nunc avide primi Cæsaris acta vides .  
 Lactea quam currant Patavinis flumina chartis ;  
 Mirandâ Crispus quam brevitate juvet .  
 Justinus quantâ dulcedine permeet-orbem ,  
 Librorum numero par , Troge magne , tuo .  
 Et quamcumque dedit linguis Latialibus artem  
 Arpinas cunctis altior ingeniis .  
 Nec documenta latent quæ rhetor Cantaber ; aut quas  
 Dant Senecæ morum scripta deserta vias .  
 Non te divini fugiunt monumenta Platonis ,  
 Aut docti largum flumen Aristotelis .  
 Non quidquid dictat perplexa Academia veri ,  
 Porticus aut rigidum Stoica quidquid habet ,  
 Non quisquis radio terras metitur & astra ,  
 Aut rerum causas quærit , & ingenia .  
 Non te Pontificum , non te civilia jura  
 Scitaque divini non latuere fori ,  
 Noscis & antiqui numerosa volumina Mosis :  
 Qui primi terras incoluere viri ;  
 Qui sacri vates mundo cecinere futura ,  
 Quique Palestinis regna habuere locis .

Terrea quæ suetæ venerari Numina gentes  
 Quos Deus imperiis egit in arma suis.  
 Perfida quam sævos passa est Judæa tyrannos,  
 Quam sæpe est meritis obruta suppliciis.  
 Nec tantum hæc legitas, verum hinc præcepta requiris  
 Ut vitæ constet formula certa tuæ.  
 Fortunatus ero si quando ea venerit hora,  
 Qua fruar hospitiiis, optime Jane, tuis;  
 Et tecum insomnes valeam perducere noctes,  
 Et tecum longos continuare dies.  
 Interea memori si te non pectore servem,  
 Idem etiam possim non memor esse mei.

*In obitum: Jani Pannonii.*

Pannoniæ decus, & nostri lux maxima sæcli,  
 Hic situs es cunctis, Jane, gemende bonis.  
 Te nemus Aonium, laceris te Musa capillis,  
 Te positâ mæstus flevit Apollo lyrâ.





# LILII GREGORII GYRALDI

FERRARIENSIS.



*In Amorem.*

**N**ondum perfidiæ finis erit tuæ,  
 O crudelis adhuc in mea fata, Amor?  
 Sævis pectora flammis  
 Exures iterum mihi?  
 Ardebam miserè, heu, in patriâ mea.  
 Formosam Glyceren crinibus aureis  
 Auroram superantem,  
 Et vultu Idaliâ Deam.  
 Postquam hæc rapta mihi legibus improbis,  
 Jam me subtrahere (hoc nam sat erat) mea  
 Duris colla decebat  
 Longum fella jugis tuis.  
 En sævis iterum maceror ignibus;  
 Rursus bella moves dira, iterum tua  
 In me spicula torques.  
 Jam me torret amor novus,  
 Urit me facies pulchra Lycoridis,  
 Urit Sythonias ipse sinus nives  
 Vincens: sic miser heu heu  
 Duris vexor amoribus.  
 Quo nos usque tuâ. sæve puer, face  
 Perdes? num pharetræ est ulla quies tuæ?  
 An post funera nostra, &  
 Extinctum cinerem petes?

*Ad Lycoram.*

Hoc quod habes fragile est totum, mea pulchra Lycora:  
Forma licet cœli vincat & ista Deas.  
Jucunda hæc facies, coma flava, hæc lumina tantum  
Quæ possunt; tota & denique quod Venus es,  
Labentur nimium paucos victura per annos,  
Ni formam hanc vitæ carmina nostra dabunt.  
Donabunt vitæ formam hanc mea carmina longæ,  
Si mihi tu vitam, pulchra Lycora, dabis?

*Ad Amorem.*

Spernes puellam plus nive candidam?  
Spernes Lycoræ gratiam amabilem?  
Clarosque ocellos, & labella hæc,  
Quæ Paphiam superent Dionem?  
Nectunt catenas brachia mollia,  
Mittunt faces heu lumina fervidas:  
Jam jam manus do supplices: jam  
Castra Cupido tua, & tuum jus  
Sequor lubens. o grata protervitas!  
Amat Lycoris me face mutuâ:  
O ter beatum me, quaterque,  
Nec Superum ambrosiæ invidentem!

*Ad Venerem.*

O cœli decus inclitum  
Supremi soboles Jovis:  
Quæ Cypron colis, & Paphon,  
Blandi mater Amoris,  
Nunc te nunc carimus Venus;  
Divis tu Dea pulchrior,  
Et tu maxima Cœlitum,  
Orbis delitiæque.  
Nostris tu, Dea, perditis



Dextro numine amoribus

Faves : en cupido in sinu

Ludit pulchra Lycora .

Nunc quæ sacra tuis damus

Sume hæc thura , Venus , focus ;

Sume & lilia candida ,

Mixtos iisque amaranthos .

Serva tu mea gaudia ,

Serva dulcia basia :

Ob quæ certa , memor , tibi

Solvam vota quotannis

*Ad Auras .*

Auræ , quæ miseri mei furoris

Tot suspiria , tor gravesque questus ,

Hinc inde accipitis fugaciores :

Gratum & quæ legitis meæ puellæ

Quod spirat melos , ore dulciori

Sirenum modulis , suaviores

Cycni cui merito invidere possunt :

Vos suspiria hæc , gravesque questus

Ad surdas dominæ adferatis aures ;

Mitem his reddite jam mihi Lycoram ,

Dulces illius aut modos amanti

Portetis , requiem mei doloris .

*Ad Cupidinem .*

Vulnera quid geminas in me nova ? quid , furens Cupido ,

Faciesque sævas adiacis medullis ?

Anne parum tibi visa una est meæ puella curæ ,

An pulchra nobis non sat est Lycora ?

Parce faci , puer , & pharetræ ; jam quis locus sagittis ?

Novis quid ures ignibus , proterve ?

Una etenim satis in me flamma est , me meæ Lycoræ

Nitor perurit totum , & hinc & illinc .

Hæc nisi , nulla meas lapsura est flamma per medullas ,

Nec si ipsa cælum deferat Dione .

*Tumulo Cælii Calcagnini.*

Adsta viator; non moræ est dispendium.  
 Mortalitatis hoc memor nuperrimè  
 Sibi sepulchrum Cælius construxerat,  
 Quo doctiorem neminem Sol lampade,  
 Quacumque spargit lumen orbi, viderat;  
 Eheu, repente raptus hic est conditus,  
 Cui sunt parem visura nulla sæcula.  
 Hic gloriæ, dum vixit, invidit suæ,  
 Celans opes tantas avarus ingenî,  
 Tot splendida eruditionis lumina;  
 Quæ, maximo Alcida jubente Principe,  
 Vulgata, densas different caligines,  
 Quæ passim oberrant sensibus legentium.  
 Jam abi, viator, & memento sedulo,  
 Præclara tantum facta Fata vincere.

*Epitaphium M. Ant. Antimachi.*

Adsta viator paululum;  
 Brevis moræ pretium feres.  
 Hac Marcus est Antonius  
 Antimachus urna conditus,  
 Qui patriæ, ac testudinis  
 Confors Maronis exstitit  
 Et Tullianæ lecythi.  
 Hunc Graja par facundia  
 Seu carmen ille pangeret,  
 Seu pede soluta scriberet.  
 Sed ne putes hunc tantulâ  
 Urna tegi, cujus volat  
 Virum per ora gloria,  
 Quacumque florent litteræ  
 Bonæ, vigetque humanitas.  
 I nunc viator, collige,  
 Virtute nil præstantius.

*Ad Lectorem.*

Si tibi profuerint, Lector studiose, libelli,  
 In medium pridem quos mea Musa dedit;  
 Gaudeo; non fuerit noster labor irritus omnis:  
 Quod sic accendat nostra lucerna tuam.  
 Sin secus acciderit; fructus nec carpseris ullos;  
 Gaudeo sic etiam: nam voluisse lat est.

*In Occasionem ex Græco.*

Unde hic est plastes? Sycionius, ede age nomen.  
 Lysippus, tu quis? Cærus ego, omne domans.  
 Cur summis instas pedibus? semper rotor alas.  
 Cur plantis gestas? ut levis aura feror.  
 Dextræ est cur inserta novacula? signum homini hoc est,  
 Vis conferri acie quod mihi nulla queat.  
 Cur coma fronte jacet? venientem ut prendere possis.  
 Parte est cur calvum posteriore caput?  
 Quod postquam levibus præceps effugero pennis,  
 Ne valeat tergo qui revocare velit.  
 Talem, vos propter, me plastes finxerat hospes,  
 Pro foribus positus qui documenta darem.

*Ad Jo: Bapt. Cynthium Gyraldum.*

Senex, & æger Lilius,  
 Dono suo dat Cynthio  
 Hoc quidquid est voluminis:  
 Orans Deos Novensiles,  
 Ut hoc velint plus sæculo  
 Manere; amoris mutui,  
 Sit testis ut perennior,

*Ad Barthol. Ferrinum.*

Dum, Ferrine, meam hanc tibi pararem  
 Dono mittere nescius Minervam,

Munus conveniens ratus futurum  
 Hoc nostrum tibi, qui tuo hoc juventa  
 Flore, æqualibus omnibus peræque,  
 Virute ac sapientia præires.  
 Sed, proh fors fera, dura lex Anantes!  
 Nondum imposita libello erat coronis,  
 Nec sinopide frons notata rubra;  
 Ferrino improba Parca cum recidit  
 Fila argentea: læta quo recepto,  
 Gratis Persephone suum Dionæ  
 Adonin sine lacrimis remisit.

*Alexandro Guarino.*

Ingens Herculei decus Senatus,  
 Idemque Aoniæ pater catervæ:  
 Unus nam pote sustinere curas  
 Magni Principis, & præesse rebus.  
 Idem & Rhetoricos doces colores,  
 Et priscos simul explicas poëtas:  
 Quare quem tibi dedico libellum,  
 Quo Fortuna Dea est relata paucis,  
 A tot si liceat vacare curis,  
 Hunc limâ expolias severiore,  
 Tentescque indice Lydio rogamus,  
 Ne fallax Dea ludat hinc & inde,

*Catd. Salviato.*

Debebam tibi, Salviatæ præsul,  
 Vitæ quod superest mihi imbecillis;  
 Quod victu & lare me foves benignus,  
 Sed cum muneribus tuis subinde  
 Numquam desinis optime mereri;  
 Me ingratum video interire coges,  
 Et tu munificentior fereris.



*Ad Musas Cœlestes, pro suis Musis.*

Musæ, quæ vario mulcetis sidera cantu,  
 Et Jovis ad solitum dulce moveris ebur;  
 Adpice has famulas, vestro quæ numine fretæ,  
 Evolitant, placidum carpere detis iter.  
 Non hæ Pieridum temeraria fata secutæ,  
 Vos cantu sperant æquiparare suo.  
 Degener, ah, tantum ne vobis turba putetur;  
 Hoc fiat erit; placidum carpere detis iter.

*Duci Herculi Estensi.*

Quam magnus patet Orbis, ut suctus  
 Parvâ pingere pictor in tabellâ,  
 Sic parvo tibi colligo libello  
 Omnes Herculis, Hercules, labores:  
 Ut mirere minus, græves timentem  
 Pygmeum hunc aliquando provocasse.

*Ad eundem dedicatione libelli de re nauticâ.*

Jam classis bene navibus referta est,  
 Instructi simul ordines, & ipsa  
 Armamenta parata, machinæque,  
 Ut fluctus ferat, impetumque venti.  
 Adbuc sed tamen artifex veretur,  
 Ignem ne patiatur. & procellas,  
 Quod nondum est datus imperator illi,  
 Si, Dux magne, voles novæ præesse  
 Instructæ simul, & favere classi,  
 Non ignem patietur, & procellas.

*Prospero Pasetho J. C.*

Me promereri haud desinis  
 Donis, Pasethe, regiis,

Et usque & usque, & indies  
 Majora jungis maximis,  
 Et digna magno Principe.  
 Sed unde te remunerer?  
 Vel par tibi respondeam?  
 Sors nil reliquit aspera,  
 Ipsos nec artus corporis;  
 Nec mens satis constat sibi.  
 Quid ergo fiet? turpiter  
 Silebo tanta munera  
 Ingratus? ast infantia  
 Malo pudens damnarier,  
 Referre quàm tibi nihil.  
 Hæc ergo fume incondita,  
 Sed prompta ab imo pectoris,  
 Tibi quæ me oberatum arguant.

*Ad Renatam Principem Ferrariæ.*

Nomen carminibus licet perenne  
 Divini pariant sibi Poëtæ,  
 Ne mirere tamen, Renata Princeps,  
 Me collecta duobus his libellis  
 Horum nomina texuisse chartis.  
 Nam regalibus occupata curis  
 Cùm sis, non potes omnibus videre,  
 Vatum nomina, & editos libellos.  
 Quare habe tibi qualecumque munus  
 Defecti fenis; & rogo tuere,  
 Nequam ne blaterare lingua possit;  
 Cùm tectum Ægide viderit Minervæ.

*Ad Lectorem.*


Quin nos sæcla, dies, menses metimur, & annos,  
 Obrepat tacito mors inopina gradu:  
 Duæ feret æthereamve diem, noctemve profundam:  
 Acta tibi qualis, talis agenda dies.

*Epi-*

*Epitaphium quod sibi condidit.*


Quid hospes adstas? tymbion  
Vides Gyraldi Lilii,  
Fortunæ utramque paginam  
Qui pertulit: sed pessimâ  
Est usus alterâ: nihil  
Opis ferente Apolline.  
Nil scire refert amplius  
Tua, aut sua: in tuam rem abi.





# CYNTHII JO: BAPTISTÆ GYRALDI

FERRARIENSIS.



*Ad Herculem Estensem. Fortuna.*

**Q**Uæ cuncta instabili verso mortalia motu,  
Sors præpes, cunctis & malefida viris,  
Firma futura tibi semper, tibi fida, nec unquam  
Mutatura vices mobilitate meâ,  
Has tibi do volucres, Dux invictissime, pennas:  
Inque tuo implumis ludo benigna sinu.

*De Jove & Amore.*

Pasceret armenta Admeti cum pulcher Apollo,  
Juppiter ecquid, ait, sparget in orbe jubar?  
Huic Amor: ille, inquit, qui cælum, & sidera rexit,  
Fulmine dum posito tu quoque pastor eras.

*Ad Venerem.*

Ne gnatum in triviis fugitivum, Cypria, quæras.  
Huc propera: in nostro pectore regnat Amor.  
Hicque furit latitans, agrum & crudeliter urit,  
Igni addens ignem; nec volat hinc alio.  
Tu puer hinc, Cytherea, voca: non basia posco;  
Sat mihi mercedis si puer hinc abeat.  
Sic tuus adsiduo tecum Mars igne caleseat,  
Sic semper cedat Juno, Minerva, tibi.



*De Daphnide.*

Quid mirum Daphnis formâ si pectora Mopsi  
 Torreat? hac posset sollicitare Deos.  
 Fac petat hic cœlum, videatque hunc Juppiter: ipsi  
 Pocula miscebit pro Ganymede Jovi.

*Lesbia.*

Sic me blanda tui succendunt, Lesbia, ocelli,  
 Ut miser ardenti concremer usque face.  
 Tot rursus rigor iste tuus sub pectore luctus  
 Cit mihi, ut assiduas cor fluat in lacrimas.  
 Sic flammâ per te exuror, sic solvor in undas:  
 Sic geminæ sola es tu mihi caussa necis.

*In Tollam.*

Non mihi tu Gorgon, mihi non Acheloia Siren;  
 Quod rapias, potius tu mihi Scylla vorax.  
 I vincas cantu Sirenas, & ore Medusam:  
 Non tibi præda maris; non tibi marmor ero.

*Ad Lesbiam.*

Luminibus fundis tot lumina & illice vultu,  
 Ut Cytherea tibi cedere jure queat.  
 Horrida tot rursus celas sub pectore monstra,  
 Ut tibi Phorcynis cedere jure queat.  
 Sicque trahis miseros illis, his perdis amantes:  
 Cypride pulchra magis, Gorgone sæva magis.

*Ad Marcum.*

Ore nitet tanto, tot fundit lumina Cypris,  
 Marce, tua, ut Veneri nil mage sit simile.  
 Nique suæ Veneris Mavors flagraret amore,  
 Mars uri poterat Cypridos igne tuæ.

*Amor Jovi.*

Juppiter ut sensit Divorum pectora Amoris  
 Igne uri: his avidum corripuit puerum:

Pone modum flammis, Divosque exurere cessa;  
 Ni cesses, pœnas fulmine, crede, lues,  
 Risit Amor, genitorque inquit. quo fulmine terres,  
 Jacere debueras cum mihi taurus eras.

*Ad Gallum.*

Quid tentas undis extinguere Cypridis ignem,  
 Qui tibi sub misero pectore, Galle, furit?  
 Hunc Venus orta salo genuit; jam ponito lymphas,  
 Ex undis ortus non timet ignis aquas.

*Dindymo.*

Ipsa tibi soror, & conjunx est, Dindyme, Jela:  
 Nimirum terris Juppiter alter ades.

*Herculi Efesti.*

Alcide, patriæ rector, dominusque, paterque,  
 Sub quo læta quies, & bona cuncta vigent:  
 Cum tua sceptrâ leges, tenui quæ carmine dixi,  
 Conveniens Regi pone supercilium.  
 Nec licet æqua tuis referant mea carmina factis,  
 Tu tamen hæc veri pignus amoris habe.  
 Mens mihi major erat: sed cum sim viribus impar,  
 Deficiantque humeri; sit voluisse satis.

*D. Alfonsi Ducis Efestis Manibus.*

Hic Alfonsæ, jaces; sed non jacet inclita virtus  
 Hic tua: nam celebrat te mare, terra, polus.

*D Herculis Efesti. II.*

Balsama, thura, crocum, tradant & grandia dona,  
 Quis nitet Attalica conditione domus.  
 Do tibi populeas frondes, silvasque virentes,  
 Alcide, inculti munera parva soli.  
 Parva tamen magni non spernunt munera Reges,  
 Parva etiam magno munera grata Jovi.

Tu cape dona libens, dantis simul accipe mentem,  
Sic tibi erunt parva hæc, balsama, thura, crocum.

*De Cæli Calcagnini Hymno.*

Anne tuo rupes etiam de carmine surgunt?  
Promit & arenti de Nuce Musa nemus?  
Aura Paretonias colubris præmiscet arenas,  
Marmaricusque leo servat herile latus.  
Illyricus pater in media perlustrat heremo  
Cælum, & cælicolas, tergeminumque Patrem.  
Idem animo, idem oculis nostræ vexilla salutis  
Spectet, & inclusum pectore numen alit.  
Si Nux tantarum monstrat spectacula rerum;  
De Nuce quis promptam perneget Iliada?

*De D. Hercule Estensi II.*

Terribilem gereret summa cum casside cristam  
Dux meus, & forti stringeret arma manu:  
Obstupuit Mavors, dicitque: ut Thracia Martem  
Gaudet, sic gaudes, Ausonis ora, tuo.

*De Solone & Venere.*

Palladis adflatu patriæ cum conderet olim  
Jura Solon, illi candida Cypris ait:  
Quid sequeris demens plena hæc monumenta laboris?  
Cur placidum numen non colis ipse meum?  
Forte piget coluisse Cyprin? Tritonia nobis  
Est longe inferior, judice vel Paride.  
Huic senior: Phrygio si mens non læva fuisset,  
Non esset flammis Troja cremata tuis.  
Tu vero ne quæso iterum me judice certes;  
Nam tibi non cedent aurea poma Venus.  
Me juvat iste labor, vera hæc parit otia sudor:  
Otia sed flammæ, quæ facis ipsa, ferunt.

*Ad Petrum Bembum.*

Thufca tuo debes Petrarchæ, Musa, parenti  
 Multum, Bembæ sed magis una lyræ.  
 Namque is te genuit: Bembus revocavit ab Orco,  
 Illud, mortale est; hoc, reor esse Dei.

*De D. Hercule Estense II.*

Vidit ut Alciden cœlo Saturnia ab alto,  
 Gestantem forti regia sceptrâ manu;  
 Immemor irarum dixit; pulcherrime rerum,  
 Esse tibi poterat quam bene Juno parens!

*Ad Dianam Areostam.*

Ore refers veram, castissima Cynthia, Phœben,  
 Fronte, decore, comis, nomine, & ingenio.  
 Hoc solum differs, quod figit Delia cervos:  
 At tū luminibus, sæva puella, viros.

*Ad eandem.*

Jactat tela, faces, & retia tendit ubique  
 Delia; quo vertis lumina, sævus Amor?  
 Et quicumque semel claros conspexit ocellos,  
 Figitur, ardet, amat, captus amore perit.  
 Infelix igitur postquam tua lumina vidi,  
 Hei misero, patior retia, tela, faces.

*De eadem, ad Herc. Estensem.*

Quid pendent lychni, Alcide, laquearibus aureis?  
 An forte ut noctis nubila luce fugent?  
 Nubila luce fugat, mediaque in nocte nitefcit  
 Delia; sint procul hi; nam satis ipsa nitet.



*Ad Turcum de Carolo Imperat.*

Quid frustra cogis molles ad bella phalanges,  
Si Caroli audito nomine, Turce, fugis?

*De D. Hercule Esten.*

Cum meus Alcides inter thoracas ahenos  
Arderet, vibrans fortia tela manu,  
Hunc spectans Cypris cœlo delapsa per auras,  
Venit in amplexus, Marte negante, Ducis.  
Tunc gemuit Mavors: & quid mihi numina profunt,  
Si nunc mortali lumine vincor? ait.

*De Diana Areosta.*

Vidit Amor Phœben; visâ cecidere sagittæ:  
Ipsa illas sumpsit, pro pueroque ferit.

*Tamulus Anna Bereguarde.*

Cur flent hic Charites? cur hic flet aurea Cypris?  
An fato est hominum fas lacrimare Deas?  
Non flent Divæ hominem; sociæ sed justa ministrant:  
Anna etenim terris, Gratia, Cypris erat.

*De Amore & Areostâ.*

Sumperat arma Puer Veneris, quo pectora Phœbes  
Ureret igne sacro frigidiora nive.  
Ut vero hunc vidit sinuantem cornibus arcum,  
Flammiferis oculis trux petit ipsa Deum:  
Quid nos ut ferias, dixit, tua tela fatigas?  
Nunc age, nunc nostras experire faces.  
Et dicto citius oculis sic ussit Amorem,  
Cesserit ut Phœbæ spicula sæva puer.  
Illa triumphales deprompsit læta sagittas,  
Urit & hinc homines, urit & inde Deos.

*Artusi canis tumulus.*

Cerberus est sedis custos Plutonis opacæ;  
 Possidet Icarius lucida regna canis.  
 At si virtuti tradantur præmia digna,  
 Artuso danda est, illa vel illa domus,  
 Namque is dum vixit, superavit grandibus ausis  
 Facta canis Stigii, vel canis Erigones.

*Ad Dianam Areostam.*

Pectora cur flammâ flagrent, cur frigida fiant  
 Sæpe gelu, quæris, sæva puella, mihi.  
 Non scis, quod claros in me cum vertis ocellos,  
 Oraque inhumanâ virgine digna Deâ,  
 Urit crudeles misero mihi flamma medullas,  
 Nec requies vitæ tunc datur ulla meæ?  
 Quodque ego si specto quanta est reverentia famæ  
 Juncta tibi, in mediis ignibus ossa rigent.  
 Sic per te uruntur, per te sic pectora torpent;  
 Unaque tu glacies, ignis & una mihi es.

*De suo Amore.*

Exutor glacie in mediâ, dumque uror, in igne  
 Algeo; cur patiar hæc malâ quæris? amo.

*De Statuâ Veneris.*

Sic similem Veneri Venerem cœlavit Julius,  
 Ut Mars non lapidem, sed putet esse Cyprim.  
 Ut vero hic statuam cupidus complectitur, inquit  
 Aut Venus in lapide est, aut riget ipsa Venus.

*Tumulus Jo: Manardi.*

Non hæc quam spectas claudit brevis urna Manardum  
 Claudere tam magnum nam brevis urna nequit,  
 Est ipsi tumulus, quidquid Sol lumine lustrat,  
 Et quidquid magnus proluvit Oceanus.

*De D. Alfonso Esten.*

Alfonso extincto Mors secum læta : quid , inquit ,  
 Hoc potuit majus sternere dextra mea ?  
 Hoc cæso , cecidit Mavors , hoc , bellica Pallas ,  
 Hoc , decoris toto quidquid in orbe fuit .

*Ad Flavium Antonium.*

Fortunæ nimium , Flavi , ne crede secundæ ;  
 Sed mage quo blanda est , hoc graviora time .  
 Nam modo quos placida extulerat , nunc deprimit atrox ,  
 Et firma in solâ est mobilitate Dea .  
 En , Xerxes , Cræsusque , astris felicibus usi ,  
 Mox tristes dominæ succubuere rotæ .  
 Et Priamus sævi urebant cum Priamon ignes ,  
 Indiguit flammis ad sua busta miser  
 Crede mihi , ex tenui pendent mortalia filo ;  
 Et celeri fugiunt gaudia nostra pede .

*De Julo sculptore .*

Si posset faxis animam conjungere Julius ,  
 Arte ejus possent marmora dura loqui .

*Ad D. Herculem Esten. II.*

Magna canant quamvis de te , Dux inclite , vates ,  
 Nemo tuis meritis versibus æqua facit .  
 Et quamvis cupiant quamplurima fingere cantu ,  
 Tu quoque , Dux , fictis maxime major eris .  
 Namque ut nulla valent lucem addere lumina Soli ,  
 Sic tua carminibus crescere fama nequit .  
 Ergo licet crescant vates , & carmina , nullus  
 De te unquam mendax esse poëta potest .

*Ad eundem .*

Non quod me Phœbus super ardua culmina Cynthi  
 Duxerit , ad sacras aut Heliconis aquas ,

Hæc

Hæc pango, Alcide, tibi quæ modo carmina mitto:

Adflatu veniunt numinis ista tui.

Namque ego te spectans, divinos protinus ignes

Haurio, & invadit pectora nostra furor.

Musæ aliis adsint, adsitque vocatus Apollo,

Mi faveas; solus tu mihi numen eris.

*De se & Diana ad anras.*

Auræ, quæ legitis quos mitto e pectore questus,

Quosque hilari fundit Delia voce sonos:

Aut illuc rapidæ nostras deferte querelas,

Aut huc, quod spirat *Cynthia* ab ore melos.

Sic illa, aut nostris mitescet flexa querelis,

Voce ejus linquet vel mea corda dolor.

Sic vobis Boreas nigris non obstrepat alis,

Agnaque sic vobis candida sæpè cadat.

*In Lycum.*

Narcissus liquidis dum se spectabat in undis.

Ipse sui (hei misero) victus amore perit.

Nunc tua forte tibi si occurrat turpis imago,

Infelix, odio mox moriare tui.

*Delia Damiana tumulas.*

Quæ Venerem formâ referebas, arte *Minervam*,

Ingenio *Phœben*, hic *Damiana* jaces.

Quid sperem in terris firmum, si munera tanta,

Totque animi dotes *Parca* inimica tulit?

*Balthasaris Bardelli tumulus.*

Balthasar hic jaceo, primo quem flore juventæ

Decerpit rapidâ Mors inimica manu.

Si spectes annos, juvenem me fata tulerunt,

Si ingenium, dices me periisse senem.



*In Archemorum.*

Fortunam Archemorus petulanti voce laceffit,  
 Munera quod meritis non ferat æqua suis,  
 Huic Dea; pro meritis dederò si munera digna,  
 Iro pauperior jure eris, Archemore.

*De Georg. Loxano & Catharina Aquila  
 conjug.*

Tectus olorinis plumis Pater ipse Deorum  
 Venit in amplexus, Læda beata, tuos.  
 Nunc Aquilæ (mirum) flecta sub imagine Juno,  
 Loxani in gremio fœdere juncta cubat.  
 Tyndaridas Læda enixa est, duo lumina Divûm:  
 Nil mirum, ediderit si quoque Juno Deos.

*Ad Lilium Gregorium Gyraldum.*

Implumem quod me niveis subvexeris alis,  
 Et tua dejectum Musa levarit humo;  
 Hæc tibi do, Lili, nobis non debita ferta,  
 Istaque honoratis munera digna comis.  
 Tu modo quem rapidis fers altâ ad sidera pennis,  
 Ne linguas, ne te deficiente cadam.

*Ad D. Renatam Esten.*

Dives opum Juno, prudens Tritonia Pallas,  
 Delia casta, nitet pulchra decore Venus.  
 Tu dives, prudens, tu casta & pulchra Renata, es:  
 Te minor est Phœbe, Juno, Minerva, Venus.

*Ad Cælium Calcagninum.*

Ut Sol cum toto radios diffundit olympo,  
 Sidera fulgenti lumine cuncta fugat.  
 Sic Cœlî promit sese cum dædala Musa,  
 Carminibusque novum spargit in orbe jubar,

Sola micat, cunctosque premit, qui luce coruscâ,  
 Flagrant vates, lampadis igne suæ.

*De Venere & Areostâ.*

Vidit ut alma Venus radianti lumine Phœben,  
 Cœlestes cunctas exuperasse Deas:  
 Non ego vincar, ait: perfusaque nectaris imbre,  
 Divum exeruit conspicienda jubar.  
 Sed postquam exprompsit fulgentia lumina Phœbe:  
 Cedo, inquit, Venerem nil juvat esse Deam.  
 Hanc si vidisset Phryx olim in collibus Idæ,  
 Tunc mihi, tunc poterat dicere: cede Venus.

*Ad Lesbiam.*

Si tot me jaculis figis, totque ignibus uris,  
 Nomine vix solo, Lesbia, nota mihi;  
 Quos ignes patiar, quæ spicula, Lesbia, si in me  
 Convertas oculos, sidera clara, tuos?  
 Ignis ero totus, totus comburam; eroque  
 Qui modo vir fueram, pulvis & aura levis.

*De eadem.*

Sparserat auratos crines, mea Lesbia ventis,  
 Sparserat & nitidum lumine in Orbe jubar.  
 Cum Sol hanc spectans, radios contraxit, & inquit,  
 Cedant luminibus lumina nostra tuis.  
 Haftenus humanos vicisti, Lesbia, vultus:  
 Nunc gaude, cedunt numina sacra tibi.

*De cujusdam amoribus.*

Aurea te quondam Cypris, nunc tristis adurit  
 Vesbia, Tisiphone fœdior, & gravior:  
 Quæ matre Eumenide, & Stygio generata parente,  
 Imo ignes in te de Phlegethonte tulit.  
 Si face te quondam sæva ussit pulchra Dione;  
 Quam gravis hæc misero flamma futura tibi est?

*In Eudolemum.*

Presserat Eudolemus tollentem colla chelydrum,  
 Cum sæve hic fixit dentibus Eudolemum.  
 Sed quæ illi serpens properabat dente venena,  
 Sanguine gustato sensit, & interiit.  
 Nec mirum, Eudolemi periit si sanguinis haustu;  
 Corpore nam toto nil nisi virus habet.

*In Vesbiam.*

Tres habuit Furias quondam; sed Vesbia manes  
 Ut petiit, Furias quattuor Orcus habet.

*De Amore.*

Quid mirum exultet si sævis, Lygdame, flammis,  
 Si fletu gaudet nec minus acer Amor?  
 Mulciber est illi genitor, flammâ altus, & igne:  
 Hunc peperit medio nata Ericina mari.  
 Ergo ille hinc lacrimas ciet, illinc pectora adurit,  
 Cumque undis flammæ, cum face miscet aquas,  
 Sic versat lacrimas oculis, sic uritur igne  
 Pectore sub medio, Lygdame, quisquis amat.


*Ad Lesbiam.*

Audit Sirenas, qui te audit dulce canentem;  
 Et qui te cernit, Gorgonis ora videt.  
 Hinc riget alta flix; subit inde pericula ponti,  
 Et gemina per te, Lesbia, morte perit.

*Lucretia Romanâ.*

Candida fama mihi cum vitâ carior esset,  
 Sanguine fervavi damna pudicitix.  
 Roma tamen nostra fuerit cum libera morte,  
 Sic me pro patriâ procubuisse juvat.





# HADRIANII S. R. E. CARD.

S. CHRISO GONI CORNETANI.



## VENATIO.

**E**Ja surgite, nunquid excitavit  
Dudum rauci sono Diana cornu  
Actutum properate, jam parata est,  
Et secum Ascanius suus paratur.  
Venatoribus hac die est eundum,  
Qua Salaria prospicit lacunas,  
Claras sulphure Tiburis superbi.

His dictis juvenum ruunt manipuli  
De conclavibus omnibus frequentes.  
Hic venabula, cuspides ahenas,  
Ærata, validasque fert bipennes.  
Ille hastilia, ferreas secures,  
Cruda spicula Martis universi.  
Deducunt alii canum phalanges,  
Latrantes abeunt simul molossi,  
Mox indaginis unicæ segaces.  
Tollunt retia rara muliones.

Procedit Dea prosequente magna  
Caterva, clamydem recincta pictam,  
Ventilantibus aureis capillis,  
Suras purpurei tegunt cothurni,  
Aurata ex humero sonat pharetra.  
Jungit Ascanius suas cohortes,  
Solertissimus unus inter omnes.  
Sublimes Lybicus equis vehuntur.

Aure-



Aurora interea thorum relinquens,  
 Quadrigis roseis diem vehebat.  
 Ventum est ad juga, deviosque saltus,  
 Convallis quibus obsideretur ingens.  
 Præterabitur hanc, secaturque rivus,  
 Rauco murmure, levibus salebris,  
 Limo sordidus hinc, & inde ripas  
 Multa tectus harundine, & palustri  
 Janco, nec procul albicat salictum.  
 Dextra qua videt Herculis popellum.  
 Clivi sylva latus tenet sinistri,  
 Floret perpetuo, viretque juxta  
 Vasta planicies feracis agri.

Ut signum Ascanius dedit repente  
 Sortiti juvenes vices laborum,  
 Servat quisque sui locum negoti,  
 Hi vallant aditus, nemusque cogunt:  
 Hi per invia lustra mustitantes  
 Vestigare feras docent catello,  
 Extendunt alii plagas dolosas,  
 Disponunt alii feros molossos.  
 Hic sub ilice, & ille sub vetusta  
 Quercu sternitur, hunc tegit supinum  
 Gravis juniperi virentis umbra.  
 Densa sub platano, & comis opaca,  
 Quæ de colle levi tumore surgit,  
 Diva, & Ascanius simul recumbunt,  
 Omnes solliciti videre, quæ nam  
 Ex tanto veniat labore præda.

Ecce protinus horridus, feroxque  
 Aper spumeus ore, dente frendens,  
 Volvens trux oculos modo huc, modo illuc,  
 Dorso horrentibus, hispidisque setis,  
 Callosa cure caute duriore,  
 Excitus canibus per antra fertur  
 Præceps, vulnificis utrinque rostris,  
 Stipatus gurgis mordicus petentum  
 Aures, & latus omne lancinantium.

Accurrit Dea, nec globus sinebat  
Quicquam præter apri videre rictum.  
De promptis pharetra illico sagittam,  
Lunavitque genu potenter arcum,  
Et jacit. Volat illa, qua videri  
Rictus vix poterat, secansque hiatus  
Per præcordia labitur. Quis unquam  
Vari crederet? ultimos recessus  
Caudæ transiit. solumque fixit.  
Procumbit quadrupes humi volutus,  
Tendens ilia, calcibusque frustra  
Alternis vacuas laceffit auras.  
Flumen sanguinis undat ex baratro  
Vasti gutturi, hispidaque cauda.

Dum spectant stupidi, feræque magnos  
Artus, grandia, & aspera extimescunt  
Ossa, & ingluviem capacis alvi,  
Umbrosi nemoris fugatus antro  
Cervus, cassibus expeditus ingens  
Celsus cornibus arduus ruebat,  
Septus pulvereæ canum corona  
Saltu transilit unico paludem,  
Ripaque ulteriore adhuc veretur  
Vertens arboram subinde frontem.  
Dum certant properi canes natæ,  
Summis naribus, & reslant hiantes,  
Volans Ascanius levi veredo  
Præcatus Triviæ perenne numen  
Invadit jaculo, diuque librans  
Jecit eminus, hæsit impeditum  
Ferrum cornibus, ac sola reflexa  
Ne quicquam ante oculos pependit hasta,  
Fremens Ascanius rapit, rotatque  
Ensem fulmineum, abiecitque ab armis  
Cum cervice caput, micat per herbam  
Hic corpus, caput hic, rubet cruore  
Interfusa palus, ruunt repente  
Venantes querula procacitate,

Strataque obstupuere mole cervi,  
Ridens Delia; quid stupetis? inquit:  
Noster Ascanius minora nescit,  
Clamor intera tumultuantum  
Circum retia vertit ora turbæ.  
Captam terribilem histricem fremebant,  
Quæ rostrum, atque pedes plagis ligata,  
Spinis missilibus canes, virosque  
Arcebat procul, & fugabat omnes.  
Venator sibi quisque consulebat.  
Multi sub clypeo arborum latebant,  
Multos obliice texerat crepido,  
Post carecta canes inane latrant.  
Densant spicula mutua, & vicissim  
Bellantum furit incruentus ardor.  
Nam spinæ nequeunt ferire tectos,  
Et testi nequeunt feram ferire,  
Tanta duritie cutis rigebat,  
Crebris missilibus petita, nullis  
Interpuncta notis. Erat Sicamber  
Forte nam celebri sodalitate,  
Audax prælia tanta qui cieret,  
Libs cognomine, machinæ repertor  
Mirandæ, horrificæ, minacis, atræ:  
Qualem nec Steropes, nec ipse fertur  
Pater Lemnius inferi cavernis  
Informasse Jovi, nec ulla in orbe  
Per tot sæcula cogitavit ætas,  
Nam truncum teretem, æneum, cavumque  
Nitro, sulfure, pulvere, & saligni  
Carbonis replet usque ad umbilicum,  
Includitque pilam ex liquente plumbo  
Superne, tenue oppido foramen  
Spirat, hinc jacet igneam favillam.  
Histrix continuo forata fumat.  
Non sic fulminis impetus trifulci,  
Nec falarica sic rotata fertur,  
Sed nec sic Scythico sagitta nervo,

Nec

Nec fundis Balearibus lapillus .

Mox tanto intonuit fragore cœlum,

Et tanto ingemuit tremore tellus,

Ut quidquid caveis latebat usquam

Ferarum omne genus, feri leones,

Auriti lepores, lupi voraces,

Et damæ timidi, volatilesque :

Cervi, & capreoli leves, fugacesque,

Apri Serigeri, dolisque vulpes

Insignes, ruerent metu per agros.

Vasta ut planitie nihil videres

Usquam præterea; latent sub illis

Arbusta omnia, & omnis herba prorsus.

Canes interea, modo has, modo illas

Passim cædere, nec locus cadenti est.

Denso in agmine stant, feruntque morsus

Immotæ, superambulant molossi

Strage incredibili u'que sævientes.

Sævitur nimis est, Diana clamat,

Quo tandem ruitis? redite in orbem,

Palantes, neque enim expedit ferarum

Omne funditus interire nomen.

Sat nostro Ascanio datum, nec ultra

Modestissimus omnium rogaret.

Cornu personat aureo, reducens

Triumphalia castra, mox recensent

Plenum sanguinis agmen interemptum,

Nec tot millia computare possunt.

Implent effeda, convehunt quadrigis,

Pars gestant humeris, folove raptant,

Hi sub ponderibus gemunt iniquis.

Fervet mulio, corbuloque fervet.

Rus est non præcul hinc penes sacellum

Desertæ Cereris loco remoto.

Huc armenta, greges, canum labores,

Et vastas nemorum ferunt ruinas.

Hanc cuncti properant tenere metam;

Hic tandem reduces simul quiescunt,



Ruri subditus hortulus virebat,  
 Qualis Corycium senem bearet,  
 Et qualem Hesperides velint sorores.  
 Hinc inter violas, thymum, ligustrum,  
 Narcissos, hyacinthinofque flores,  
 Fons scatens vitreis aquis fufurrat.  
 Hunc pomaria tam beata cingunt,  
 Ver ut perpetuum colant, & usque  
 Argutis avibus canora vernent.  
 Regis Alcinoi fuisse credas.

Patens area propter ima fontis  
 Labra tenditur, hanc tegunt corymbis  
 Pallentes hederæ, & rosas acanthi  
 Flexo vimine textiles obumbrant,  
 Lentæ lilia subligant genistæ

Sub his floribus apparata mensa est,  
 Instratusque thorus tapete picto,  
 Et Semiramia manu figuris  
 Distincto variis, super tapetum  
 Albet mappula delicatioris  
 Villi, barbaricis notata punctis.

De mensis abactis nitens acernis,  
 Pandit vascula Mentoris vetusta,  
 Priscorumque toreumata aulicorum.

Ætate, & facie pares ministri,  
 Nympharum Triviæ chorum æmulantes,  
 Expectant thalamo beatiore  
 Divam. & Ascanium labore fessos.  
 Pars sacris adolet focis penates.  
 Et jam sol medium secabat axem  
 Flammis omnipotentibus coruscans.  
 Tandem numine prodeunt secundo  
 Felici omine, quidquid est ferarum  
 Magno Pontifici dicant Julo,  
 Crines furilibus rosis coronant,  
 Unguentis Megalensibus madentes.  
 Custodit soleas puer relictas.

Sponda se mediam locat Diana.

Gemmis splendidulis decora virgo,  
Post multo Alcanius coruscus ostro.  
Flexo poplite cernuus minister  
Dat summis digitis aquas odoras,  
Mox mantilia Nympha subministrat.

Apponunt alii novas figuras  
Exstructæ Cereris, Dryas catillum  
Fragrantem ambrosia gerit Dianæ.  
Post hanc siderei ferunt ephebi  
Lances ordine: Phasiana prima est,  
Stat Junonis avis superba cauda,  
Phœnicopterus eminente lingua,  
Et crista Meleagrides rubenti,  
Et pluma nivei patent olores.  
Hinc albi jecur anseris tumebat,  
Hinc capo Cybele Dæ dicatus.  
Perdices strue maxima ferebant,  
Et pulpæ melioris attagenes.  
At sturnos inopes, grues, palumbes,  
Cunctas cortis aves cocis relinquunt,  
Subvestant alii salariorum  
Quidquid ars potuit novare lauti.  
Ac farcimina dant vetustiora,  
Turget lactea fuminis papilla,  
Campano petasone gloriantur,  
Vestino quoque caseo intumescunt.  
Non Lucanica, non tomacla desunt;  
Fracto ventre suis solo ex phalisco.  
Non deest oxygarum, offulæ, minuta,  
Liba adorea, candidæque pultes,  
Conchis, glandia, spondyli, botelli.  
Nec mustacea lixulæ Sabinæ,  
Cerebella avium, salaxque bulbus.  
Nec jecuscula jusculis odora,  
Nec desunt patinæ omnium nepotum.  
Exquiruntur & omnibus popinis  
Pulmentaria vesca, quæ palatum  
Irritare saporibus putentur.

Vincunt fercula cogitationem,  
Nec stylus meus explicet, nec usquam  
Major in pretio fuit culina.  
Nusquam prandia sumptuosiora.  
Triumphalia erant minora multo.  
Nemo Pontificum dapes reponat;  
Aut cœnis saliaribus laboret.  
Ponunt mox alii maris rapinas.  
Mullos Adriaci salis colonos,  
Murænas Siculis aquis natantes.  
Latum amplissima fert patella rhombum,  
Bajana ostrea, murices, luposque,  
Auratas, acipenseris, scaposque  
Structoris manus erudita raptim.  
Cultello dirimit, secatque parvo.  
Dum cœnat, citharis comatulorum,  
Et cantu vario, novoque plausu  
Valles undique concavæ resultant.  
Et jam prima epulas quies tenebat,  
Cum cellarius eligit ministros,  
Bacchi munera læta qui propinent.  
Hæc est amphora nectaris beati,  
Qua Latonia sola proluatur.  
Trullam hanc Ascanio dedere Galli  
Spumantem Bromio Parisiorum.  
Misce his tu cyathis Dryas Falernum,  
Tu cape has pateras boni Caleni,  
Inger tu hos calices Optimiani.  
Vos Setina date his scyphis verusta,  
At vos Cæcuba fundite hoc triente,  
Nomentum dedit hæc heri lagenam.  
At surrentum hodie cadum hunc picatum,  
Cupa hac conditur Adrianus humor.  
Privernatia congio hoc Sagunti:  
Chium hoc urceolo sapit rotundo.  
Vino hæc seriola optimo redundat.  
Plena hæc aurea defruto metreta est.  
Mulsam hæc cirnea dulcius recondit.

Tum bellaria largiori ponunt  
 Mensæ delicias Deum secundæ,  
 Electissima poma porriguntur.  
 Inter quæ melimela principatum  
 Malorum facile omnium obtinebant.  
 Post petitia parva, Manliana.  
 Tum spadonia Græcula, Appiana,  
 Lanata, orbiculata Septiana.  
 Dant pannucia, serica, & gemella.  
 Ad hæc crustumiis pyris abundant,  
 Succis plena tument Falerna cissa.  
 Et longo pede Dolabelliana.  
 Pompejana placent favore Magni,  
 Et testacea de colore testæ.  
 Dant Voconia, laurea, & volema  
 Ampullacea prominente collo,  
 Nardina, & decumana grandiora.  
 Hæc tum nomina repperit vetustas,  
 Nunc sæclum insipiens novis inepritis.  
 Adduntur cariotides mariscis,  
 Et Cotonia costanis recincta,  
 Et tuber Libycis madens pruinis,  
 Nux amygdala, pinea, atque juglans.  
 Laxant castaneæ suos echinos.  
 Picenas quoque porrigunt olivas,  
 Ollares etiam dabantur uvæ.  
 Ponunt frigore gratiora rapa.  
 Plura his & meliora quæ silentur,  
 Redundantibus ingerit canistris  
 Miris munditiis secunda mensa.

Exempta procul esuritione,  
 Et mensis procul omnibus remotis,  
 Sic est post epulum locuta virgo:

Ascani ducis optimi propago,  
 Ingens purpurei decus senatus,  
 Vides ut jaceant in orbe cuncta,  
 Quæ mortalibus esse jam solebant  
 Vitæ præsidium laboriosæ,



Et quibus tenebris operta virtus  
Passim calcibus improbis teratur,  
Quid primum querar o diarve primum?  
Cum superstitio Deos putaret  
Id quod quemque suus movebat ardor,  
Mundus artibus optimis scatebat.  
Postquam de Solymis Deus perustis  
Veræ relligionis imperator,  
Nostra numina vana dissipavit.  
Et totum pedibus subegit orbem,  
Apportans pereuntibus salutem.  
Jus, fas, veridicas tulitque leges,  
Et mores docuit bonos, suoque  
Culpas sanguine omnium expiavit,  
Ut clausum ad superos iter pateret,  
Fit mutatio numinum repente.  
Certatim properant, volantque cuncti,  
Et cultus avidi novos adorant.  
Fassi unum coluere. Sed quod ille  
Ferre omnes voluit, tulere pauci,  
Nec omnes capiunt, quod omnibus dat.  
Ut perversa hominum, malignaque est mens,  
Versa in segnitiam fides. & omnis  
In quæstum pietas; simul secuta  
Miris illecebris placens voluptas.  
Numquam deliciæ supiniæres,  
Numquam avaritiæ altior charybdis,  
Quando ita ambitio negotiata est?  
Quando nequius, inquinatiussve  
Peccatum? Patet Ilias malorum  
Grandis, fons scelerum scaturientum,  
Vel gentes penitissimas revisit  
Quæ vestro sine numine insolescunt,  
Bacchanturque magis monente nullo.  
Tu vero genus inclytum Senatûs,  
Flamen ætheræ Dialis aulæ,  
Quo respublica tota gloriatur,  
Cujus cardine sustinetur orbis,

Ne mentis propriæ inquilinus erres,  
 Ab omni popularitate debes  
 Divinos animi avocare motus.  
 Nec plebecula quid misella latret,  
 Sed quam sit fragilis, caduca, fluxa,  
 Et quam lubrica vita cogitare,  
 Causas discere, & æstimare rerum,  
 Quidnam gigneris, unde quo fêraris.  
 Spem longam reseces: vides in orbe  
 Nihil perpetuo tenore verti.  
 Si fortuna facit pecuniosum,  
 Nil remordeat esse liberalem.  
 Scis quantum deceat potentio rem,  
 Ut comi domus hospitalitate  
 Januis bipatientibus fatiscat.  
 Laus non ultima, displicere nulli,  
 Præstare ingenuum, facillimumque,  
 Verbis parcere contumeliosis,  
 Adversis fuerint. malisque rebus.  
 Servorum meminisse, qui fidèles:  
 Novit Ascanius, quid ipsa dicam.  
 Nec casus memorabimus peractos,  
 Quis fratrem sine questibus revellat,  
 Ducem Insubria quem tremebat audax?  
 Quis siccis poterit nepotem ocellis  
 Regem Parthenopejum referre?  
 Ærumnas tibi quis peculiares  
 Monendo renovet? Satis superque  
 Deploravimus ista, dum ruebant.  
 Et nunc scis quibus erutus ruinis,  
 Et qui sis modo redditus memento.  
 Nec tam perdita, quam reperta cures,  
 Perfer qualiacunque; non pigebit  
 Tot pericula ferre, tot tulisse.  
 Possem pluribus admonere, & ultra  
 Quæ pœnæ maneant malos docere,  
 Et quæ præmia debeantur illis,  
 Qui non corporeo obruti sepulchro

Perstringunt animi igneum vigorem,  
 Nec terræ fodiunt datum talentum;  
 Nec tibi ista domi elegantiora  
 Nascerentur, & unicus Deorum  
 Vestris vatibus omnia explicasset.

Ad hæc Ascanius refert: Diana,  
 Silvarum, & nemorum patrona virgo,  
 Seu Proserpina noctibus relucens,  
 Seu Lucina, Hecate, vel alma Juno,  
 Diſtynna, aut Trivia expetis vocari,  
 Te quæcunque meum levas laborem,  
 Semper pectore conditam tenebo.

Vesper interea exiens olympo,  
 Nocturnis comitantibus tenebris,  
 Mergensque Oceano caput ruebat.  
 Jamque in faucibus atrii ministri  
 Pæana ad litui sonum canentes,  
 Expectant in equis heros ituros,  
 Lucum Delia fertur in propinquum.  
 Densæ Oreades hinc, & hinc sequuntur,  
 Stipant Ascanium suæ cohortes.  
 Ardentes animis redire in urbem.

### *Iter JULII II. Pont. Max.*

Augusti memoranda dies vicesima sexta  
 Pontificem magna Roma dimisit Julum,  
 Pæne omni patrum, & procerum comitante Senatu  
 Formello pius excepit Jordanus, & uxor  
 Moribus, ingenio, formaque & nomine Felix.  
 Postera lux Nepete Antiquum, tum proxima Veios  
 Ostendit, mox per Cimini montemque lacumque  
 Tendimus insignem per balnea multa Viterbum.  
 Discordes bonus hic cives pacavit Julius.  
 Præbuit hinc celebrer mons dulcia vina Faliscus,  
 Detinuitque diem. Veterem post vidimus urbem  
 Excelsæ rupi impositam sine mœnibus ullis.  
 Hic templum genitrici ingens, cui sculpta vetusto

Mar-

Marmore stat facies, spirantque in marmore vultus.  
Carnajola procul, pons hinc sex milia distans,  
Cyaneas transmittit aquas, sparsasque paludes  
Per sata, per silvas: ah quantum absumitur agri!  
Plebis ad indomitæ Castrum pervenimus, inde  
Impellitæ apparent Perusinis collibus arces.  
Castellana lacus Trasimenus mœnia cingit:  
Hunc ratibus læti tranavimus, Insula lætos  
Accipit hospitio, Pasianum allabimur, unde  
Prospicimus campos Romanis ossibus albos,  
Servat adhuc nomen locus, & de sanguine fuso,  
Sanguineos campos Perusini nomine dicunt.  
Hic ubi commissio fallax certamine Pœnus  
Flaminiumque ducem. Mavortiaque arma subegit,  
Per colles, ripamque lacus, Cerclana subimus  
Mœnia, oliviferis tumulis lætissima rura.  
Vicina placuit patribus recubare sub ulmo.  
Hic simul occurrunt equitum peditumque catervæ  
Urbinate Duce, illo nec melior fuit alter.  
Nec pietate prior, sed nec præstantior armis;  
Tot dotes juveni invidit lapidosa podagra.  
His circumsepti legionibus, ordine longo  
Ingredimur Perusinam urbem, civilibus ætana,  
Eversamque odiis: hanc tu pater optime Juli,  
In placida tandem compostam pace relinquis.  
Non procul oppidulum est, Fractam cognomine dicunt:  
Amaïs obit muros cæno, & graveolentibus undis.  
Huc ubi delati, montes Eugubia testæ,  
Hærentemque jugis urbem superavimus; inde  
Perpetuos colles Cariani villula findit.  
Villula munifico non aspernanda popello.  
Hos prætervesti tumulos plebecula callem  
Quæ colit angustum. Cagli cognomine dicunt,  
Occurrit facie obducta; nam tabida fertur  
Infecisse lues, celeri pede fugimus omnes.  
Hinc ad aquas Lantias petreximus, unde Motaurus  
Confusus Gauno Foruli spectacula præbet.  
Est operæpretium versu describere mirum



Naturæ ludentis opus, stant vertice ad auras  
 Hinc atque hinc montes prærupti, flumine subter  
 Secretis labente viis, ut fumus ab imis  
 Surgat aquis, lateque fluant aspergine cautes.  
 Rupis ad extremum læva venientis ab urbe  
 Porrigitur molis dorsum, qua fœnita nulla,  
 Nulli aditus quondam, nec erat via pervia cuiquam;  
 Cæsar inaccessam patefecit Titus, & illam  
 Quantum acie possunt oculi servare cavavit,  
 Inscripsitque fores; & adhuc vestigia utrumque  
 Limen habet, scabro, & fragili vix cognita topho.  
 Sunt soliti hac camera multi latitare latrones,  
 Exceptosque viatores demergere in amnem.  
 Reptimus e crypta, atque angusta fauce viritim  
 In campos, Ubalde, tuos, hinc imus in urbem,  
 Urbinum dixere patres tua regia tecta:  
 Ardua quæ saxo colitur Macerata vetusto  
 Hinc petitur, vicoque brevi succedimus, inde  
 Scandimus excelsa nimboſa cacumina pennas,  
 Dive Marine tuas, tumidi hic subsidere montes  
 Incipiunt, superoque mari consternere litus  
 Planitiem ingentem terris, opibusque superbam  
 Gallia qua fluvio Rubicone comata pateſcit.  
 Italiæ hic finis quondam nunc omnia miscet  
 Effera barbaries, antiquaque nomina vertit.  
 Savignana vocant pinguissima rura coloni,  
 Hunc madidi, multoque luto, fessique venimus.  
 Progreſſi meliore via, cœlo graviore  
 Cæſenam intramus, culices avertere ſomnos  
 Omnibus, & variis vultus maculare figuris,  
 Pompilii, Livique forum divertere cogunt:  
 Terra ferax populusque ferox, ac cæde frequentî  
 Terribilis, ſemperque furens civilibus armis.  
 Ut ter quinque dies abjerunt, Livia tecta  
 Linquimus, atque iterum montes jubet ire per altos  
 Julius, & Caſtri ad lævam juga viſere Cari.  
 Imus præcipites per mille pericula rerum,  
 Turrigerasque arces, rupes, & inhospita saxa.

Appenninicolæ accurrunt, visoque senatu,  
Reptantes genibus per humum nova numina adorant.  
Modiliana jacet vasto depressa barathro,  
Accola, torrenti, truncis, salebrisque fragoso.  
Hanc terram pedibus celso de monte ruentes  
Prendimus & placido curamus corpora somno.  
Postera lux alios scopulos, cœloque propinquas  
Nubigenasque Alpes aperit; Marradia vulgus  
Saxa vocat, summun excipiunt magalia Julum.  
Inde Palatiolum statio opportuna labori,  
Hospitio lassos refovet, tum fluminis arcta  
Provehimur ripa tenui discrimine euntes.  
Ist locus extremis in montibus asper Etruscis,  
Hunc dictum perhibent a tussi Tussinianum.  
Huc quoque delati montes devovimus omnes.  
Orta dies latos campos, & amœna vireta,  
Cornelique forum, feliciaque arva reducit.  
Hic meus ortus habet sedes Papiensis avitas  
Nobilis, & clarnm genus alto a sanguine ducit.  
Constitit hic pastor, dum prospicit omnia, Julius:  
Et belli pacisque simul dum pondëra librat,  
Consilioque patrum rerum moderatur habenas;  
Appulit interea Gallorum exercitus ingens,  
Conferuitque manum, & muros circumstetit armis  
Fellina docta tuos, volat impiger actus ab urbe  
Nuntius, & Serram exactam pulsumque tyrannum  
Excussumque jugum patriæ cervicibus affert,  
Pontificem implorat fessis succurrere rebus.  
Hoc oratores certatim ex urbe frequentes,  
Exposcunt, patriæque patrem properare precantur,  
Thura adolet Julius templis, sacrisque peractis  
Tendit iter, gressum celerans, urbiq; propinquat.  
Urbs antiqua ingens Etruscis regia quondam  
Fellina, cum Boiis fato irrumpentibus impar  
Accepisse novum fertur Bojonia nomen.  
Verum ubi sunt Boi Romano milite pulsi,  
Barbariem excussit, cœpitque Bononia dici.  
Subditur ad Boream radicibus Appennini;

Planitie acclivi, procumbens folis ad ortus,  
 Inter aquas Sapinæ, & Rheni, quarum utraque in urbem  
 Ducta vehit, revehitque rates, pistrinaque versat,  
 Æmilix decus, & belli, pacisque patrona,  
 Dives opum variarum, & nullius indiga cultus,  
 Musarum domus, atque omnis nutricula juris.  
 Jamque dies aderat, mediumque vehebat ad axem  
 Omnia conspiciens Phœbeæ lampadis astrum;  
 Obsedere patres majoris limina portæ,  
 Qua modo Felsinea pastor requieverat æde;  
 Porticibusque amplis expectant numen Juli.  
 Tandem de thalamo sella sublimis eburna,  
 Gestatusque hominum scapulis, longo agmine prodit;  
 Cui trabea ex auro, gemmis, ostroque coruscat,  
 Tempora conchili fulgent redimita tiara:  
 Progreditur procerum legio tua, Felsina, proles:  
 Æratæque ruunt acies, clypeataque circum  
 Agmina funduntur, placidos dat Curia gressus  
 Æquati spatii omnes, & vestibus omnes;  
 Purpureisque Patres tecti capita alta galeris  
 Obvia quæque oculis perstringunt numinis instar:  
 Visendi studio effusi juvenesque senesque,  
 Et matres, puerique simul tecta omnia complent:  
 Culminibusque astant, portisque & turribus hærent.  
 Ut vero ad divi venit penetralia Petri  
 Julius, aspersitque patres in limine primo  
 Rore levi, geminis manibus veneratus ad aras  
 Effigies sacras, Grates quas possumus, inquit,  
 Accipe, Christe Deus, nam quæ sat digna queamus  
 Munera, quas laudes humana voce referre?  
 Tu nos incolumes per tot discrimina vectos  
 Urbe hac Felsinea sine cæde, & sanguine donas.  
 Da pater omnipotens, rerumque æterna potestas  
 Sic superos penetrare aditus, verosque triumphos  
 Terreno involucro exutos, vitiisque subactis.  
 Hæc ubi supplicibus votis oravit Julius,  
 Quisque domum properat, factoque hic sine quiescit.


LAURENTII JACOMINII  
TEBALDUCCII MALESPINÆ  
FLORENTINI.



*Ad Antonium Gigantem.*


**Q**uis Superum tantum nuntien divinitus ori  
 Afflavit? sacer hic spiritus unde tibi?  
 O te felicem nimium, quem lumine vidit  
 Nascentem placido summus Apollo Deum!  
 Exceptum gremio quem molli aluere foventes,  
 Pandentesque juga florea Pierides.  
 Virtutem cur ergo tuam ignotam esse vereris,  
 Abditam & in tenebris posse latere putas?  
 Si Diis tam carus, clarum si nomen in omnes  
 Oras extendit candida Musa tuum,  
 Mira scripta arte, & divino ornata lepore  
 Carmina, cur nobis despicienda times?  
 Cur quoque me invitas, atque in certamina cantu  
 Non æquis Diis, nec viribus ipse vocas?  
 Æquali cursu volitantem flamine cursum  
 Non valet heu premere cymbula litus amans.  
 Obstant fata mihi, nullo Fortuna labori  
 Aspirat, fautor nullus adestque Deus.  
 Lactavit mentem, falsa & delusit Apollo  
 Spe, nunc neglectus perfuga reiicior;  
 Ni ille tuis precibus, nimio es cui carus amore,  
 Adductus, mihi nunc adsit, opemque ferat.






# DONATI JANNOCTII


## FLORENTINI.



*De Laurentio Medice Juniore.*

**D**Um populis Tuscis spectacula læta pararet  
 Laurus, Apollinei spes modo magna chori.  
 Pierides Geticis illum videre sub armis  
 Cornipedem miris exagitare modis.  
 Quem colere has artes quia Martis amore putarunt,  
 Implerunt querulis æthera carminibus.  
 Solarum accurret mœstas Jove nata sorores,  
 Nam nota huic tanti causa doloris erat:  
 Lacrimulas cōhibete Deæ, non hæc movet arma  
 Sævus, ait, Mavors, casta Minerva movet.  
 Convenit Aonium nectar bene Pallados armis,  
 Ingenium quid, si stent procul arma, valet?  
 Hunc igitur juvenem Divæ celebrate frequentes,  
 In quo Pieriis junximus arma modis.






# BENVENUTI DE IMOLA.



*In laudem clarissimi Poëte Dantis.*

**N**escio quo tenui sacrum modo carmine Dantem  
 Eloquar insignem studiis quem celsa per orbem  
 Explicat æterno memorandum nomine virtus:  
 Nam postquam patrios Florentia sæva penates  
 Linquere conspicuum juxit sine crimine Civem,  
 Fortuna quatiente sterit, sortemque superbam  
 Excutiens semper misero securus in orbe  
 Vixit, & innumeros toleravit mente labores.  
 Ipse hominum, rerumque Patrem qui cuncta gubernat  
 Imperio, & lati solus tenet aurea mundi  
 Lora manu, cui semper erit sine fine potestas,  
 Agnovit sine fine Deum. vitamque per omnem  
 Impiger angustis operantia sidera terris,  
 Stelliferi secreta Poli, quibus Astra fruuntur  
 Consiliis Cælo noluit divinus ab alto.  
 Artibus ingenii redimitus acumine septem  
 Exhaustit sacras Musarum e fontibus undas.  
 Hinc sacris animatus aquis quæ dura cadentes  
 Præmia dignoscant miseri, quibus ipsa salutem  
 Pœna ferat sceleris, quos gratia rollocet altis  
 Sedibus, audaci cecinit sub tegmine cantu,  
 Scribere non possem viduas quot fletibus artes  
 Quotque novem Musas lacrimis subiere dolores  
 Cum rapuit mors sæva virum, sed fama superstes  
 Gentibus extinctum memorat populumque per omnem  
 Vivet, & æterno referetur laudibus ævo.



# JOANNIS VINCENTII IMPERIALIS

JANUENSIS.



*Ad Torquatum Tassum.*

**Q**ui Phrygium pietate Ducem, virtute superbum  
Æaciden vicit, major utroque senex  
Non Andinum illis, magnumque invidit Homerum,  
Goffredus Tassi prætulit hinc tubam.

*De Jo: Baptista Marino.*

Cum terris iterum Veneri dilectus Adonis  
Carminibus vixit, docte Marine. tuis.  
O lacrimis dignate meis, Cythereia dixit,  
Serus, sed longe pulchrior ecce redis.

*De seipso.*

Ut Ligurum prima cessit Vincentius Urbe  
Dignus Cecropio creditus exilio;  
Attonitæ flerunt utroque in litore gentes  
Insignem dextra, consilioque Ducem.  
Ille Syracoliæ foliis indignus olivæ,  
Virtuti cuius debita laurus erat.

*De seipso.*

Nulli certa domus. Te patria longius a se,  
Impatiens tanti luminis ire jubet.

Sic

Sic mage scintillant, quo sidera longius absunt,  
 Clarus civis eras, clarior exul eris.

*De seipso.*


Quid faciat Janus sine te? sua limina nolle  
 Linquere: te profugus vellet ab urbe sequi.  
 Quo patriam, quo te spectet: non aptius unquam  
 Sustinuit facies Janus habere duas.

*In suam effigiem.*

Sæviate immiti Fortuna proterva tumultu,  
 Axeque præcipiti me rota tristis agat.  
 Exagrent odiis diri me nominis Austri,  
 Undaque per Syrtes invidiosa trahat.  
 Mœnia seu dulcis patriæ, charique Penates  
 Me teneant, alio seu mea fata ferant.  
 Mens immota manet, nixusque moventur inanes  
 Non fors, non odium, non mihi livor obest.

*In Academicum suum stemma, quod est concava rupes  
 contrariis ventorum afflata turbinibus.*

Tunditis ærium rapido quid flamine Montem  
 Alpini Boreæ? quis novus ardor agit?  
 Creditis intrepidam certatim evellere Rupem?  
 Non nutat celfo vertice, sed reboat.  
 Me ferias, livor, falso me crimine latres,  
 Assiduo tundas verberare, lingua procax,  
 Inconcusus ero. Quid si mihi numina donent,  
 Ut charum Patriæ det sonus iste sonum?







## ANGELI JOANNINI

20 02  
20 02

*In Leonem vermiculati operis Iguvii in Gabrieliorum  
Suburbano repertum, cum nuper inter Venetos  
& Turcas bellum suscitatum est.*

**E**St locus insignis fama, cui vertice summo  
Tectus nimbofo, & madido Apenninus amictu  
Imminet; Iguvium nunc illum nomine dicunt.  
Quem subter jacet apricis circumdata campis  
Planicies bene culta, tibi gratissima tellus,  
Alma Ceres, nec non tibi jucundissima, Bacche.  
Namque Autumnus ibi gravidis tua colla racemis  
Nectit, & apparet pomis fragrantibus arbor.  
Fertilis: hæcque legit Pomona, & tempora cingit.  
Hic parte ex alia, quæ moenia respicit urbis,  
Templa, ferunt, veteres sublimibus alta columnis  
Jam Triviæ sacrasse Deæ: nunc diruta passim  
Apparent pictis circumvariata lapillis  
Ornamenta operis tanti, artificumque labores.  
Hic, dum Turca ferus, terræ, cœloque minatur  
Contemptor fidei, pacisque, hominumque, Deumque,  
Jactat & Adriacas gentes absumere ferro,  
Effoditur signum, victores quod fore bello  
Ostendit Venetos. Tunc læti ad sidera voces  
Extollunt omnes: veniet Victoria læta,  
Exclamant; lætis respondet vocibus Echo.  
Ecce Leo jam victor adest, monstrantque Leonem,  
Qui

Qui Pardum premit unguibus, & qui viscera dente  
 Jam jam dilacerat, jam jamque vorare videtur.  
 O Parde infelix, quæ te dementia cœpit,  
 Cum tibi conjunctum fraude irritare Leonem  
 Ausus es? en merito fraudis das improbe pœnas;  
 Atque alii exemplo hoc moniti haud injusta sequentur,  
 Et servare fidem, ac pacem non temnere discent.  
 At nunc victoris victrici fronde Leonis  
 Tempora cingantur, nunc ejus fortia facta  
 Nereides cantent, resonet nunc Adria circum  
 Litora, nunc omnes lætum Pœana canamus.

## BENEDICTI JOVII

## NOVOCOMENSIS.



*Ad Franciscum Julium Calvum.*

**H**Æc tenui calamo Jovius tibi, Calve poëta,  
 Dum vacat à curis, distica composuit.

*Vestibulum domus.*

Prima salutatrix implebit turba clientum  
 Vestibulum, dominos dum sopor altus habet.

*Janua.*

Lucidus ecce dies; servi jam pandite postes:  
 Compulsor Jano Janua sacra Deo.

*Atrium.*

Atria (si pudor est) hospes ne excedere tentes?  
 Hæc tibi; sed dominis aula parata suis.

*Culina.*

Sit nitidus matrona coquus, famulæque recinctæ;  
 Ipsa dabit lautas unctæ culina dapes.

*Penarium.*

Partibus immixtis claudantur limina cellæ;  
 Hinc veniet pueris plena merenda tuis.

*Cœnatio.*

Sternite divitibus junctis aulææ tapetis:  
 Pauperis in cœnâ fella vetusta iat est.

*Eadem.*

Parcite convivæ totum ferbere Calenum:  
 Expectat socios crastina mensa novos.

*Cubiculum.*

Hic tibi delicias, dulcemque parato quietem:  
 Serpat in exuviis si modo cura tuis.

*Sacellum.*

Flecte Deum precibus: cœlo spes una relicta est;  
 Quod tibi conducatur, si petis, ille dabit.

*Bibliotheca.*

Ista beata tibi sola est quæ ducitur ætas;  
 Cum tot docta vides ora vetusta loqui.

*Horrea.*

Hic frumenta tibi solum condantur in annum:  
 Esuriem populo grande tulisse nefas.

*Apotheca.*

Rhœtica quid tandem facient? quid Massica, dives?  
 Si dabitur fociis nulla lagena tuis.

*Hortus.*

Delicias hortus, varium præstabit & usum;  
Hic tenues auras, hic quoque poma capis.

*Hortus Urbanus.*

Non cœnacula picta, non dietæ  
Ridentem facient domum, sed hortus.

*Carduus Sativus.*

Tempore quo certo nascatur mascula proles:  
Uxor cauta serat; meque maritus edat.

*Solisequa.*

Vertor ad occasum, rursus convertor ad ortum;  
Solis amo radios, an-mihi sensus inest?

*Buxus.*

Perpetuus mihi fronde viror: sine munere truncum  
Esse putas: & me sedula quærit apes.

*Amygdalus.*

Quæ tibi prima novo Calabris densissima campis  
Flore viret, quondam Thressa puella fuit.

*Cerasus.*

Non colitur Latias qui me transvexit in oras;  
Vitis at inventor dic mihi cur Deus est?

*Mala Armeniaca.*

Armenios fuimus quæ tantum nota per agros  
Nunc Italii & nos mensa secunda sumus.

*Uvæ penfiles.*

Istis vere novo cum totâ vescere brumâ:  
Si tamen e viridi palmitibus sustuleris.



*De fructum.*

Perpetuum servo qualem dedit uva saporem :  
In conditaris mella minoris eme.

*Trisus Piscis.*

Trisus ardenti mihi sit bene coctus olivo ;  
Da jecur, & lactes : cetera reddo tibi.

*Anguilla.*

Me colubram fortasse puta : sum piscis obesus ;  
Tostaque post troctam gloria prima feror.

*Trocta.*

Majorem varium troctam dixere vetusti ;  
Quam tibi præpinguem Larius ipse fovet.

*Idem piscis.*

Cur torrentinam ? fluvidis quod solus in undis ?  
Cur trudam nullâ me ratione vocas ?

*Idem.*

Qui troctam dixit ; voluit signare voracem :  
Piscivorax apto nomine trocta vocor.

*Persicus piscis.*

Eupylis exigua sum persicus ortus in undâ.  
Meque peregrinum Larius inde tulit.

*Tinca piscis.*

Tinca vocor : quare ? maculosum respice tergum :  
Allia des lardum, dum coquor, atque piper.

*Lucius Piscis.*

Non me præda fugit, quia dentibus amor acutis,  
Sum lupus ut referunt, sed mihi terga nitent.

*Aquo*

*Aquo piscis.*

Larios innumeros in gurgite pascit aquones;  
Molle animal demptis vivere nescit aquis.

*Natali Christiano.*

Alpini sit costa bovis, sit falsa tenelli  
Mala suis; festum cum celebrare paras.

*Die sequenti.*

At de Seplasiâ lux altera monstrat amicos  
Qui tibi dant mulsam, cinnameasve dapes.

*Kalendis Januarii.*

Sic mihi fausta precor Jani fortuna Kalendis;  
Donet & insertam festa placenta stipem.

*Summa die Bacchanalium.*

Ignibus accensis; cum vocibus æthera complet  
Vulgus iners; populis tum caro supprimitur.

*Vinum Volturenium.*

Hibernos celebret Divos, & festa Decembris  
De Volturrenâ quod tibi caute venit.

*Vinum Grantinum & Varenense.*

Hoc madeat Pomona mero, quod amœna Gianti  
Rura ferunt; & quod clara Varena dedit.

*Larius lauris & olivis redimitus.*

Pallada si nescis, magnumque ab origine Phœbum  
Hos coluisse locos; laurus, oliva docent.

*Fons intumescens & residens apud Larium.*

Inscie cur fontem docti de nomine Plinî  
Ducis, ab indigenis quæ Pluviana vocor?

*Quot Larii pisces, tot collium aviculæ.*

Quot tibi pisciculos argentea lymphæ creavit,  
Collibus apricis tot numerabis aves.

*Passer solitarius in cavea.*

Si falio testis, & rura domestica cantu  
Rumpo libens; scelus est claudere me caveis,

*Idem.*

Asperius vinclis nihil est, & carceris antro:  
Solvite me miserum, solvite, dulce canam.

*Hirundo.*

Hospitis humani tectum mihi fecit amicum  
Cantus; ut hic edam pignora, nec capiar.

*Coturnix.*

Cur fuit hæc volucris mensis ingrata priorum,  
Quæ modo supremis sola petita viris?

*Noctua ludens.*

Luditis ô volucres? illudimur; absit ut ista  
Ludatis scænâ, seria res agitur.

*Varia ruris & urbis officia.*

Rure potes calamis, & inempta vivere præda,  
Urbibus in mediis vivitur ingenio.

*Medicus.*

Balsama, thura, crocum valeant: nil dulcius illis,  
Quas ampulla dedit, quas mihi trulla dapes.

*In malum leguleum.*

Quid legum certas dictis invertere sensum?  
Non est hoc studium, pessime, sed stadium.

*In malum causidicum.*

Te clamante forum reboat, subsellia nutant:  
Prætores obtundis, garrule causidice.

*In tabellionem.*

Te celeri decet esse manu, sed parce lituris,  
Ignores proprias ne quoque forte notas.

*In ludi Magistrum.*

Quid te flagra juvant, ludi venerande magister?  
Parce precor pueris, turba severa, tuis.

*Disciplina.*

Artibus ingenuis quisquis mansuescere nescit,  
Hic puer indocili sævior est tygride.

*Ocium.*

Ocia corrumpunt animos, pectusque virile:  
Tristius ignavâ nil tibi segnicie.

*Abſtinentia.*

Qui studet ingenio victurum extendere nomen,  
Huic opus est cunctis parcere deliciis.

*Deliciae.*

Quæ causa ad Medos Babylonis transtulit arces?  
Tonosconcoleros deliciosus erat.

*Industria.*

Perculit hæc acies numerosi militis una:  
Venit & hinc parvo gloria magna loco.

*Labor.*

Optima quæque vides? longo sunt parta labore:  
Hic peperit Grajum, Romuleumque decus.



*Furor.*

Ne furuisse velis: sed nec decet iste poëtas:  
 Infanit, si quis forte poëta, furit.

*Cura.*

Insomnes agit hæc noctes, quatit ista medullas;  
 Ut vivas, miseros excute corde metus.

*Quies.*

Dulce bonum Superis, verâ est, & amica voluptas:  
 Ingenii fomes semper amanda quies.

*Amor.*

Dic mihi quid sit amor? pessum quo cuncta feruntur,  
 Pondus amor meus est: nil nisi pondus amor.

*Nuptiæ.*

Connubium commendat amor, non fœda libido:  
 Hic tibi blanditiæ, fornice nequitia.

*Lucrum.*

Hoc poteris lætam vel tristis ducere vitam:  
 Hoc nihil ægroto gratius est animo.

*Nummi.*

Fulgure perstringunt oculos Hyperionis axes,  
 Excæcat radiis sacra moneta suis.

*Factura.*

Sæpius ista virûm sensus dejecit ab arce:  
 Hanc suades? fieri nec Cicerone potest.

*Conscientia.*

Judicis examen fugerunt sæpe scelesti:  
 Defuit at numquam pectore iudicium.

*Peccatum.*

Peccatum est quidquid prohibent æquissima jura :  
Quodque jubent fieri, ni quoque perficias .

*Impunitas.*

Quas tulerint leges frangunt impune Tyranni ;  
Impunis populus, sub duce ridiculo .

*Punitio.*

Corripiet populum regnator vindice scepro :  
Quem nequeunt homines, puniet ira Jovis.

*Nota.*

Quæ fuit inventum Marci Ciceronis ? & unde  
Desiit antiquis formula prisca notis ?

*Numeri perfecti.*

Est Telios citra denos Senarius unus ;  
Intra centenum quis numerus numerum ?

*VI. & VII diversâ ratione perfecti.*

Perfecti numeri sunt sex, septemque : diserta  
Hæc ratio ; haud similis quod tibi causa parit .

*Tonus Musicus.*

Non potes in geminas æquè discindere partes,  
Ipsum quod vocitat turba canora tonum .

*Gnomon.*

Quadratum paribus fas est producere fulcis,  
Certa monet ratio gnomona si addideris .

*Eccentrici & epicycli.*

Eccentrum nihil esse polo sapientia suadet :  
Sideribusque vagis haud epicyclus erit .

*Horoscopus.*

Quæ fortuna viris Horoscopus ipse docebit.  
O quantum refert quo generere die.

*Liberum arbitrium.*

Libertas hominis, cælo sua jura sereno  
Abstulit, & varias non timet illa vices.

*Ingenium humanum.*

Multiplici natura feras munimine textit:  
Flus habet ingenii munere nudus homo.

*Mors.*

Mors potius subeunda viro, quam turpibus ausis  
Candorem vitæ commaculare suæ.

*Pœnitentia.*

Emendare velis infectos crimine mores,  
Despicient animum Numina nulla tuum.

*Præmium, & pœna.*

Virtutis sectanda via est; vitiumque fugandum:  
Præmia digna bonis: pœna parata malis.

*Fama.*

Quid superest morti? gestorum gloria fatum  
Nescit, & hæc cineri postumat una suo.

*Victoria animi.*

Quod si magnificæ deerunt tibi munera famæ;  
Vincere disce animum, tu quoque magnus eris.



# PAULI JOVII JUNIORIS

## NOVOCOMENSIS.



*Sub effigie Nicolai Picinini.*

**H**Æc tibi manfuras æterna in sæcula laudes,  
 Hæc spolia, & victo celebres ex hoste triumphos,  
 Robur, & astutæ præstanti in corpore vires,  
 Et populis defensæ urbes, tuaque inclita virtus  
 Sanguinea peperere solo, fortissime ductor  
 Ausonidum: quisquam an tanto tibi certet honore  
 Armorum, ac titulis clari Mavortis, & almæ  
 Militiæ? Nonne hos oculos, atque ora ferebas?  
 Nonne sub hoc quondam gladio cecidere volantes  
 Turmæ equitum, peditumque simul, pulsique tremore  
 Oenotrii obstupuere duces, atque Italia signa?  
 At nos exigui miramur corporis artus  
 Sufficere hoc oneri, & tantos perferre labores?  
 Scimus & Ismenias bello fregisse cohortes  
 Sæpius, in parvis victorem Tydea membris.  
 Ipsa equidem, longe terris Arlante relicto,  
 Caucaiseisque jugis, & cincto nubibus Ofsâ.  
 Laurigerum redimita caput, petit ardua cœli,  
 Inde alacris sese tollit super æthera Virtus.

*In imaginem Cosmi Medici magnifici.*

Quid de Sidonio bis tinctam murice vestem?  
 Quidve manus similem doctas formare figuram?  
 Artificisque decus tantum admiramur, & artem?

Su-



Suspice grandævi cœlestes oris honores,  
 Effigiem quicumque vides, & fixus in illis  
 Tranquillum Heroa, & mixtâ gravitate verendum  
 Sume oculis, dulcique notâ pia lumina vultu.  
 Non hic insigni gladio per tela, per hostes  
 Egit equum, aut largo fœdavit sanguine dextram.  
 Non illi Mars durus erat, non classica cordi,  
 Verum consilii fœcundum pectus, & alto  
 Ingenio virtus; qua toto cognitus orbe  
 Ipse sui columenque fori. sanctique senatus  
 Etruscum decus, & nomen super æthera vixit.  
 Sed qui honor? aut ulli laus major contrigit unquam,  
 Ingrata quam de patriâ duxisse triumphum,  
 Adriacis exul veniens revocatus ab oris?  
 Quæ poterant potiora peti? quam cum modo sævam  
 Mortem expectabat, diramque in colla securim  
 Audiret populi tollentem ad sidera vocem,  
 Expectate veni Patriæ Pater inclite nostræ.

*In percussores Galeacii Sfortiæ.*

Quis te dira cohors furor? & quæ insania tanta  
 Impulit, horribili stimolata  
 Eumenidum rabie, & sævis agitata colubris?  
 Ut domini nil tale merentis  
 Corpus in egregium, crudam convertere dextram  
 Auderes, scelerisque nefandi  
 Pro laqueo, & meritis pœnis, tibi præmia certa  
 Sperares, nomenque perenne?  
 Te non eximii juvenis deterruit alto  
 Insignis reverentia vultu,  
 Impia, sed nec te tenuerunt templa, nec aræ,  
 Nec Superum solemnia sacra.  
 Non (ut rere) ferum crudeli morte tyrannum  
 Conficis, at justum, innocuumque  
 Rectorem Insubri Imperii, cunctisque colendum;  
 Quo simul una concidit omnis

Spes Italum, longos semper lugenda per annos;  
 Scilicet ut nostros populatus,  
 Urbibus everlis, fines, in viscera nostra  
 Cum Gallo sæviret Iberus.  
 Vos vos o Scyllæ, formaque tricorporis umbræ,  
 Harpyiæque, & vos Gorgones atræ  
 Ardenti fontes animas immergite Averno  
 Et Stygio exercete flagello.

*In Carolum Burgundiæ Ducem.*

Vidisti ut Pyrrhi effigies armata Sarissam  
 Vibret, & a summo spargantur funera ferro?  
 Utque ferus Lybicam contorqueat Annibal hastam?  
 Huc simul ac converte oculos, fulgentiaque arma  
 Egregii ducis, & late mucrone corusco:  
 Inspice turbatos vultus, spirantiaque ora  
 Martis adhuc tristes pugnas, atque horrida bella,  
 Hos olim insignes habitus, atque ora gerebat,  
 Illum sanguineis quum formidavit in undis  
 Et Liger, & trepidi spectator Sequana belli;  
 Infractæ Gallorum acies, & Belgica passim  
 Agmina lethiferæ senserunt fulmina dextræ.  
 Heu miser, heu nimium pugnandi dira cupido,  
 Heu laudis vefanus amor! quem Gallia dives,  
 Belgarumque omnes procerum tremuere cohortes,  
 Contempsere rudes populi, gens barbara victrix  
 Funeribus stravit mediis, victumque trophæis  
 Expoliat cunctis, nudumque relinquit arena;  
 Vix tandem inventus parvâ requiescit in urnâ.

*In Caithbejum Magnum Sultanum.*

Si quondam Hesperio quos misit Bætis ab orbe  
 Dalmatave, aut Libiæ Mauris circumsona tellus  
 Æneadum fasces, Capitoliaque alta tenentes  
 Obstupuit populus Latialis, & inclita Roma  
 (Externos quamvis dominos) æquavit Olympo,

In.

Infueta admirans alienæ nomina terræ,  
 Nonne erit hic etiam toto admirabilis orbe?  
 Qui genere ex humili Riphæis natus in oris  
 Adversæ fines mundi, rigidamque relinquens  
 Arcton, Cimmerias ubi Bosphorus asperat undas,  
 Venerit ad magni septemflua flumina Nili?  
 Atque ibi serviles habitus exutus, & ora,  
 Consensuque ducum magno prælatus honore  
 Tum demum Ægyptum, & Pharias compescat habenas?  
 Et Byriam quacumque rapax procurrit Orontes  
 Sceptra tenens late magna ditione gubernet?  
 Scilicet hæc & virtuti, ingenuoque labori  
 Conveniunt, namque ille diu in sua damna ruentes  
 Victor Erythræi depellit litore Ponti  
 Prædones Arabum: simul & felicibus ausis  
 Trans fluvium Euphratem, trans pictæ Persidis arva  
 Cogit Ithyræo gaudentes vulnere Parthos.  
 An memorem quod Coryciæ prope mœnia Tarfi  
 Rettulit infesto ex Turcâ sublime trophæum?  
 An subito oppressa Æthiopum servilia bella?  
 Sed nec adhuc tanto famæ contentus honore,  
 Muneribus placet Italiam penetrare, suaque  
 Laude frui; magno sic vecta per æquora sumptu  
 Bellua, quam prisca conjuncta voce Camelo  
 Pardalim appellant, geminum cui vertice cornu  
 Fulget, & insigni distinctum tegmine corpus.  
 Felix ille quidem, cunctis qui cognitus oris  
 Non vitam ferro amisit, sed morte quietâ  
 Et natus lacrimans posuit sua membra sepulchro.

*In Mattheiam Corvinum, Regem.*

Vos o qui celeri gradu  
 Lucum Castaliæ rupis, & ardua  
 Parnassi juga scandere  
 Certatis viridem per nemorum comam,  
 Qua rivo resonans sacro  
 Leni lymphæ fugax perstrepat alveo;

Aura-

Auratæ cytharæ modos,  
 Insignemque lyram ponite, ponite;  
 Si quis posse putat suo  
 Cantu, & grandiloqui carmine Pindari  
 Regem Pannoniæ decus  
 Corvinum meritis tollere honoribus;  
 Nam si Mæonii senis,  
 Seu quæ Virgilii Musa canit Deos  
 Se se reddat ab inferis,  
 Nec curet Siculæ regna Proserpinæ,  
 Haud unquam valeat fatis  
 Summis, ceu deceat, tollere versibus  
 Corvinum egregium ducem;  
 Quem nec Laurigeri pascet Apollinis.  
 Laus, nec Pierii Chori  
 Princeps, dulce canens Calliope melos.

*In Vitellotium.*

Eheu quid faciant, cuiquam homines curve habeant fidē?  
 Ten' sic negligis? atque ipse tui nil memor, impii  
 Te imprudens potuisti manibus credere Borgiæ,  
 Infauftis manibus, sacrilegis, atque nefariis?  
 Quid si non tibi notissimus usque, & fatis, & super  
 Cunctis ille fuisset rabidus, Barbarus, impotens,  
 Humani generis perniciēs, atque hominum lues?  
 At non te latuit quid fugiens Cæsaris impetum  
 Olim dixerit è carminibus Mæonii senis  
 Pompejus, Pharii quum peteret littora perfida  
 Regis nave citâ. Non equidem vita ferocibus  
 Committenda Tyrannis, iter haud tutum ad eos fatis,  
 Dixit, sed mala fors omne animi consilium rapit.

*In Ludovicum Sfortiam.*

Quantam ruinam præcipiti dabit  
 Lapso, tonantis tacta Jovis manu  
 Turris, quæ ab excelsa minetur



Mole, Deis, medioque cælo!  
 Sic concitatus quos rapuit furor  
 Regni parandi, atque ambitio mala  
 Evexit ad summum cacumen,  
 Sæpe ruunt graviore casu.  
 Nam te quid olim consilium juvat,  
 Quid cum dolosi pectoris artibus  
 Astus juvant, atque in periclis  
 Ingenii experientis usus?  
 Felix cruento *Sfortia* prælio  
 Si concidisses, nec miserabilis  
 Fœdum exitum vitæ tulisses;  
 Quum patria, folioque avito  
 Expulsus, alte in carcere Gallico  
 Pœnas dedisti; quod nimis improbus  
 Non tutor, at crudelis hostis,  
 Præripis imperium Nepoti.  
 Ergo intolentem pone superbiam,  
 Qui fidis alti viribus ingenti;  
 Fortuna sic gaudet jocari,  
 Vertere quum cupit ima summis.

*In Alidosium Card. Papiensem.*

Improbior Caco, Lernæque immanior Hydræ,  
 Geryonæ asperior,  
 Ille est Ausoniæ non enarrabilis aulæ  
 Pestis & opprobrium  
 Jam tum vulgatum cunctis Alidosius oris;  
 Quem tamen impavidus  
 Sustulit Herculeo confossam Eltrius ictu,  
 Scilicet ut merito  
 Sublatus terris Stygias inviseret umbras  
 Tergeminumque canem;  
 Perpetuas illic pœnas, & sæva daturus  
 Supplicia: heu miserum!  
 Te pudor & pietas, & religionis honores  
 Deseruere simul:

Pro quibus invidiam & rabiem exercere solebas,  
Imperium patriæ

Affectans, tumidi dum te victoria Galli

Erigit, atque putas

Illius auspiciis cuncta exoptata referre;

Sed vetuere Dei.

At vos jamdudum cæso gaudete Tyranno,

Patriciorum animæ,

Et tu cum placido lætare, Bononia, Rheno;

Nam quis erit scelerum

Tantum inventor, qui tristes improbus iras

Effugiat Superum?

*In Bartholomæum Livianum.*

Cæsar eras quondam exectus jam matre preceptâ

Infans, vitales blandi dum luminis auras

Haurires, cœlum medium Mavorte tenente.

Mox quia te cunctis clarum tua maxima virtus

Fecit, & æternâ vexit super æthera famâ,

Quod te magnanimum, quod fortem pectore, & armis

Contra mille acies, atque agmina millia contra

Hadriaci censere patres, Venetumque Senatus,

Certè non aliud tibi, quam de Cæsare nomen

Sumere debueras; quis enim te dignior illo?

Quum toties validum bello dejeceris hostem,

Et toties referas Veneto victore triumphum?

Testis erit Germana suo cum Cæsare pubes,

Fulmineâ disiecta manu; longeque fugati

Finibus insubrum Helvetii, gens effera, testes.

Improbis at si aliquis tibi forte objecerit illud,

Ut te pugnandi cupidum nimis impiger olim

Vicerit, inque suo servarit carcere Gallus:

Nesciet heu demens quantum sibi vendicat ipsa

Fortuna omnipotens; non hoc objecerit unquam

Qui sapiens, rerum dominam cognoverit illam.

*In Maximilianum Cæsarem.*

Vatum Musa decus, Pierium quæ laticem colis;  
 Tolle, o magnanimum, tolle precor laudibus inclitis  
 Jam pridem Superum consilio ad sidera Cæsarem  
 Evectum; cytharâ, dulciloquæ seu fidibus Lyre  
 Hunc cantare juvat. Quam juvenem gloria maximis  
 Factis extulerit, Danubius novit, & impiger  
 Qui lambit veterum mœnia circumflus urbium  
 Rhenus, dum rapidis Oceanum vorticibus petit.  
 Hunc olim trepidis extimuit Sequana fluctibus:  
 Regem namque suum, proh pudor, illa inclita Gallia  
 Spectavit fugientem, Austriacis viribus imparem;  
 Spectavit fugientem Austriaci Cæsaris impetum,  
 Findentis gladio perdomitis hostibus agmina;  
 Qualis quum tumidus profluit è vertice Vesuli  
 Vastans arva Padus; seu Boreas quum fremit impotens  
 Nautas attonitos æquoreis fluctibus obruens;  
 Vel quum irata Poli porta furens intonat aëre  
 Sternens templa Deum fulminibus celsâ cacumina:  
 Verum Barbaricis jam parilem nilinisi proëliis  
 Tentare Italiam quippe juvat: miles ab Alpibus  
 Ductu Cæsareo dira fremens Teutonus evolat.  
 Novere inde Patres Hadriaci, quàm celeri manu  
 Moles contuderit flammivomas, & propugnacula:  
 Quum Verona sui, scuta virum, & corpora fortium  
 Deplorans Athesis sanguineo volvitur alveo,  
 Spectavit facibus fulmineis spargier omnia:  
 Tormentoque strepenti indoluit mœnia concuti.  
 At qui Tusca colunt litora, qua pulcher Etruriæ  
 Arnus rura rigat, velivoli olim domini maris  
 Pisani, eximiâ laude canunt illius inclitum  
 Nomen, justitiâ percelebre, & munificentiam.  
 Salve Auguste diu; teque simul magnanimus nepos  
 Inviectus Carolus, perpetuis auctet honoribus,  
 Ardentis Libyes perdomitor. Nam tua gloria  
 E splendore suo nobilior fulget; ut aureis  
 Ex Phœbi radiis pulchra micant cornua Cynthiæ.

*In tres Duces Familia Balionea.*

Tres simul Heroas pictor, tria fulmina belli  
 Pinxit in hac tabulâ.  
 Hospes summissis genibus ter lumine lustra:  
 Ter venerare duces.  
 Gaudeat ut geminis pater inclitus, aspice, natis;  
 Et pariter gemini  
 Ut patre lætentur nati, Mavortia pubes.  
 O celebranda diu  
 Norica progenies, centum dominata per annos,  
 Te mea Musa canet:  
 Nam patrem insigni clarum virtute, maligna  
 Perculit invidia.  
 Credulus heu nimium, summisit colla securi  
 Præsidis Ausonii.  
 At vos Etrusci (meruit nam sculpiæ auro)  
 Carmine perpetuo  
 Ductorem vestrum Baleonum tollite ad astra,  
 Ob patriam, atque domos  
 Hostibus ereptas, servataque templa Deorum.  
 Nec minus interea  
 Egregius toto celebretur Horatius orbe:  
 Vivite in Elysio  
 Felices animæ, quorum tenet æthera virtus  
 Sidere nobilior. .

*In Pandulphum Petruccium.*

Occultine tibi juvere in pectore sensus  
 Petrucci, tacitæve artes, secretaque rerum  
 Consilia, atque astûs veteris prudentia solers?  
 An contexta dolis mendax tibi credita virtus:  
 Atque humeris pullata diu circumdata vestis,  
 Nullaque celsa domus comitum tibi nulla caterva?  
 Dum tu dissimulans pro libertate tuorum,  
 Artibus his blandis incautam decipis urbem;



Et patrias leges renovans ; soceroque perempto  
 Arripis Imperium , atque in te jura omnia transfers.  
 Laude equidem dignum facinus , si numine dextro  
 Di foveant : aut fors non averfata fecundet .  
 Sed qui te cafus , quæ te Fortuna fequatur  
 Aspice : vidifti numquam tranquilla bis exul  
 Tempora turbatæ per mille pericula vitæ .  
 Adde quod & nati , quibus impia Regna parafli ,  
 Convulfi inter fe fœde , pars cæfa fecuri ,  
 Haud vixere diu : regnandi heu dira libido !  
 Difcite mortales contenti vivere parvo .

*Pompejo Columnæ .*

Virtutem mirata tuam tuaque inclita facta  
 Lætata eft tanto Roma fuperba viro .  
 Virtutem illa eadem indoluit , tuaque inclita facta  
 Ingenio civis Roma caduca fui .  
 Sic patriæ carum virtus te fecerat : orbi  
 Illa eadem ingratum reddidit , & patriæ .

*In Bafilium Moscoviæ Principem .*

Etfi te nullis infignem fama trophæis  
 Jam Bafili fine laude , per orbem ,  
 At femp̄ victum referat , femp̄que fubactum  
 Horribili in certamine Martis ,  
 Sarmata quum toties te fuderit , atque Gelonus  
 Obruerit tua castra fagittis ;  
 Et tua Regna ferox pubes populata Scytharum  
 Te patriâ folioque fugarit :  
 Non ingrata tamen tibi fe debere fatetur  
 Haud meriti immemor Itala tellus ;  
 Namque tuo nobis ignotos munere Moscos ,  
 Et Scythici Borealia cœli  
 Regna aperis , Tanainque trucem , penitusque repositam  
 Perpetuis fub nubibus Arcton .

Sed

Sed quid Hyperboreos veterum mendacia jactant  
Riphæo sub cardine montes?

Tu Basili nobis cæcam tu discutis umbram,  
Nos ideo pro munere tanto,

Rite tuam effigiem Larî veneramur ad undam:  
Nomenque immortale facramus.

*In Muleassen Tunetanum Regem.*

Linque tuas rupes, & inhospita faxa Celæno,  
Infandis Strophadum fixa diu scopulis;

Currite vos aliæ Harpyiæ, furialia monstra:  
Non Calais, Zethes non agitator erit.

Huc agite: antiqui renovetur fabula Phinei,  
Atque iterum intactas polluite ore dapes.

Oedipus haud fuerat qui fœda ob crimina, lucem  
Ipse sibi infensis unguibus eripuit.

Pœnorum ille fuit cunctis notissima labes,  
Maurorum ille fuit pestis, & opprobrium.

Nec duro exilio factus miser, atque superbus  
Pontificis sanctis oscula dat pedibus.

Eruit huic lumen natus, vel numinis ira,  
Illius ut fratres, & pater ultus eat.

Tu tamen his gaudes scriptis Rex Barbare, quod te  
Posse diu credis vivere in historiâ;

Scribitur hæc aliis, ne tam impia facta sequantur,  
Utque auctor scelerum in Tartara solus agas.

*In Pyrrhum Stipicianum.*

Hunc cinerem. & magni saxum venerabile busti,

Et nimis ereptum propere vitalibus auris,

Heroa insignem lacrimis decorete supremis,

Ingentemque animam mœstâ ter voce vocate

Heu Proceres, quibus ardor inest, & gloria Martis;

Quis melius fera bella colat venerandaque jura

Militiæ? tu frange comas & percutite pectus

Ipsa tuum, Bellona, manu, validisque lacertis

Ensesque, & galeas, & forti hastilia ferro  
 Dislice deturbans, immitique obrue ponto  
 Quidquid in Æoliis excudsit Lemnius oris.  
 Ille per Elysium, perque umbriferas convalles  
 Terrenam exutus molem, nostrique laboris  
 Securus, veteres Phrygas inter, & inter Achivos,  
 Romulidumque Duces, Romani sanguinis ipse  
 Nunc acres exercet equos, nunc agmina victor  
 (Passim pugnaci sternens quæque obvia dextra)  
 Proterit, atque hostes cogit dare terga sequenti.  
 Sed quid in Elysio prodest victoria campo  
 Ausoniæ? quæ mæsta diu sarcire ruinas  
 Hoc duce sperabat. Cimbros non illa farentes,  
 Aut sævum duris Gallum extimuisse in armis:  
 Obsidio, & rerum tristis penuria testes.  
 Ille animum invictum numquam in discrimine su-  
 Dejecit, dum se crudeli traderet hosti:  
 An se jactabit Casilini gloria tantum,  
 Extremamque famem perpeffa Petilia quondam?  
 Nunc gemat Ausonia (& certe hæc est ira Deorum)  
 Vos Manes gaudere pii, sanctumque per altos  
 Fortunatorum saltus, sedesque beatas  
 Ferte Ducem, celsumque humeris imponite vestris;  
 Et tantam magno virtutem extollite cantu.

*Sub effigie Caroli V.*

Devictas Turcarum acies, Libyenque subactam  
 Milite Casareo victrix quum viderit Arctos,  
 Undantesque procul Pœnorum sanguine campos,  
 Proluit horrenti, quos Bragada concitus unda;  
 Quumque minor genibus latis Germania terris:  
 Atque tuas totus sub leges iverit orbis;  
 Undique te canimus vates permaxime Cæsar:  
 Præsentique tibi meritos largimur honores.  
 Hic te monstrari populis gens Itala mavult,  
 Quàm tua si Parii sublimis mole colossi  
 Effigies mediis latè caput inserat astris.

Nam lapides, atque æra cadunt, quibus imber, & ignes  
 Officiunt, longique vorax injuria sæcli.  
 At te olim Cæsar cœlestia testâ tenentem,  
 Complentemque tuo felici nomine terras,  
 Et tum etiam Lybiæ populis, Turcæque timendum  
 Ante alios longè mirabitur alta vetustas.

*Ferdinando Regi Romanorum.*

Te quoque nubiferas qua Larius alluit Alpes,  
 Tor claras inter Regumque, Ducumque tabellas  
 Litore lunato Musea palatia servant  
 Spectandum populis, Rex augustissime Regum.  
 O vere egregium cunctis decus addite terris,  
 Quam bene Pannonii cura est tibi tradita regni!  
 Scilicet ut Duce te, nostris quandoque superbum  
 Finibus arceri speremus posse tyrannum;  
 Qui velut immixtus silvis arentibus ignis  
 Quum furit, infano Boreâ spirante, per agros,  
 Corripit è medio crepitantibus omnia flammis  
 At tibi nec virtus; spectataque dextera bello  
 Defuerit: tandemque tuis, sic auguror, ausis  
 Converso felix studio Fortuna favebit.

*In Cosinum Medicem Florentinum Principem.*

Qualis Hyperboreo lætus Gradivus in orbe  
 Fumantes quum solvit equos, sudantiaque ora  
 Strymonis in ripâ victricibus abluit undis;  
 Jam furor, & rabies armorum, iræque, minæque  
 Belligero cecidere Deo, tranquillus inerrans  
 Ore rubor placido signat sua lumina vultu;  
 Ille sedet iustrans oculis, & mente benignâ  
 Armiferam Thracen, defensumque hostibus Hebrum  
 Prospicit, & Geticæ secunda mapalia terræ;  
 Tum Veneris blandum pertentant gaudia pectus.  
 Talis magnanimi divino lumine Cosmi  
 Ante alias longè radians effulget imago,



Ingentesque gerens humeros, augustaque membra  
 Effigies ullum numquam peritura per ævum,  
 Vertice nudato celsum caput exerit armis;  
 Sidereosque oculos, regalia lumina vibrans  
 Pacatam sese populis spectantibus offert.  
 Ceu cum deposito magnarum pondere rerum  
 Olli tranquillam demulcent gaudia mentem,  
 Ingenti cum jam ceciderunt monstra ruinâ  
 Qua se devicto mons Murlius erigit hoste;  
 Quum jam lata suo felix Duce Flora quiescit,  
 Atque Etrusca salus tanto sub Principe tuta est.





# JULII JOVII

NOVOCOMENSIS.



*Joannis Medici.*

**P**incipis Etrusci genitor fortissimus Heros,  
 Qui nova belligeri gloria Martis eras:  
 Barbara gens vidit quantum pollebat in armis  
 Vis tua, quæ semper terror in hoste fuit.  
 At te equidem constat percussum fulmine, fato  
 Italiæ potius, quam cecidisse tuo.  
 Attamen es felix Italum fortissime ductor,  
 Non quia perpetuos det tibi fama dies  
 Sed postquam imperium, tibi quod virtute parabas,  
 Magnanimæ proli fata dedere tuæ.

*In Carolum Aurelianum Francisci Regis filii.*

Te fera mors Carole eripuit florentibus annis,  
 Insubriæ Cæsar dum tibi regna parat.  
 Illa diu extinctum ingemuit; te sospite nam se  
 Crediderat tantis posse carere malis.  
 Insubriæ, & Gallis raperis; majora sed illi  
 Damna tulit, mœstæ mors tua quam patriæ.

*Ferdinando Gonzaga.*


Macte animo egregio decus insuperabile gentis  
 Gonzagæ; quem tanta rapit super æthera belli

Glo-

Gloria, quæ stabit clavis æterna trophæis,  
 Ausonios inter proceres, & Martis alumnos.  
 Sic iplendore nites, quantum omni fidere major  
 Sol micat irradians, totum qui illuminat orbem  
 Belgica gens, Libyæque urbes, Rhodanusque superbus,  
 Arnus, & ingens Danubius, Tybrisque fatentur  
 Quantum consilio Fernandus possit & armis;  
 Æternos cui bellipotens concessit honores  
 Militiæ, ut Carolo dignus, dignusque Philippo,  
 Infubriæ regeret justo moderamine gentes.  
 Ergo tibi partos invicto Marte triumphos  
 Suscipe magnanime Heroum, te celsa fugatis  
 Hostibus assequitur celeri Victoriâ passu.  
 Vive igitur felix, volitans tua nam inclita virtus  
 Clara per ora virum, celsum conscendet Olympum.

*In Joau. Tarnovium Sarmatam.*

Salve ô Sarmaticæ gentis fortissime ductor;  
 Justitiâ atque armis, quis se tibi conferat unquam?  
 Quum tua dat sonitu bellorum buccina signum,  
 Poscis equos, atque arma gerens in prælia, turmas  
 Sternis, & armatos exultans deliciis hostes.  
 Moldaviæ dominum campo congressus aperto  
 Fundis, Sauromatis cladem excidiumque minantem,  
 Te superis Astræa plagis transcribit, & ipsa  
 Jam tibi perpetuos Divûm concessit honores,  
 Sarmata magnanime; agnoscat ventura verustas  
 Nullum posse tibi similem monstrarier orbi.  
 At tu, vivus adhuc, multis dominaberis annis.



# JOSEPHI DE JULIIS

A P R U T I N I .

*Pacis Augurium sub CLEMENTIS X.*

*Pont. Max. Patrocinio.*

**Q**Uò me furem, Pegase, quò rapis  
Hinc inde vatem? cur jugà deserens  
Umbrosa, Parnassique colles

Astra quatis fugiente penna?

Periculosas desine pervicax

Librare pennas: imbris horridas

Transse nubes, & Gradivi

Nonne vides tetigisse cœlum?

Jam culmen Ossæ, jam mihi Pelion,

Et fracta telis Acroceraunia,

Hæmusque, Mænalusque, Olympusque

In vacuas tenuantur umbras.

Jam nec gementis litora Bosphori,

Nec quæ per æquor Cycladas innatant

Lustrare fas est, & minantes

Vix datur enumerare rupes.

Quam vos cruento fulmine Bistones

Vertistis Urbem, & non sine lacrimis

Diçtea propugnacla quondam

Intueor tumultata faxis.

Jam quæ refusis litora naufragus

Tyrrhenus undis lambit, & Adria,

Spectantur, apparetve latè

Roma ferox per amœna Tybris.

Tumultuosus cur micat ignibus

Discissus aër? quis fragor intonat

Ab arce læva? cur boatu

Ter-




Terribili sonuere valles?  
 Cur æstuanti vortice perstrepit  
 Per arva flavus Tybris, & horrido  
 Non auspicatas imbre voluit  
 In pelagum violenter undas?  
 Cur Vaticanum vocibus insonat  
 Plausuque culmen? qui Capitolio  
 Tolluntur arcus? an triumphos  
 Roma Ducum memorare gaudet?  
 Hinc inde fufis astra tonitruis  
 Plausere; Divi vota precantium  
 Sensere, promissumque Romæ  
 Alterium dedit urna fidus.  
 Hinc bella, Mavors, hinc procul exulent  
 Furoris ignes, & furor improbus  
 Contempta cernens arma, morsu  
 Odryfias laceret sagittas.  
 Euros, & Austros Hæresis incitet,  
 Fluctusque tollat: Sidera Principis  
 Sedant procellas, Vaticanæ  
 Facta ratis Cynosura felix.  
 Jam nec Gradiyi tela videbimus  
 Vastare terras, regnaque Belgica,  
 Non conditi aptabuntur enses,  
 Nec rabidus fremet arma miles.  
 Jam nec tumultu Sequana bellico  
 Vexabit urbes, nec Tagus aureas  
 Trahens arenas, se sub alveo  
 Arma timens inimica, condet.  
 Nec bella miscet, nec ferus Italas  
 Mars occupatas seditionibus  
 Spectabit oras, nec cruenta  
 Eridanus properabit unda.  
 Sulcare rutis æquora puppihus  
 Nautam juvabit, non sine gloria  
 Clementis, & sprevisse ventum  
 Auspicio meliore flatus.  
 Pallete, Thraces, queis super impia

Cervice pendent fulminis impetus,  
Pallere, confurgit daturus  
Excidii genus omne Clemens.  
Armare vultum non penetrabili,  
Et membra ferro quærite milites,  
Nullisque Vulcanus sub antro  
Arma struat penetranda telis.  
Nil arma profunt, mœnia Bistonum  
Vastata ferro, Cretaque sub jugo  
Demissa si lugent, & agri  
Sanguineas peperere fruges,  
Luenda pœna est; Threicii canis  
Clemente mœsta clade iterabitur  
Fortuna; quælitamque palmam  
Christiadum refecabit ensis.  
Ægæa, Traces, ibitis, ibitis,  
Non usitatis per freta navibus,  
Ducente puppes & Favoni,  
Et Zephyri recreantis aura.  
Turgebit æquor, nec Tethys abnegat,  
Eurique pontum flabra videbitis  
Miscere, dum Clementis astra  
Fulmineos minitantur imbres.  
Pallere Thraces; jam videor rates  
Videre quassas. & sine puppibus  
Errare, disiectasque ventum  
In pelago tumulare classes.  
Hæc bellicosus funera Thracibus,  
Prædico. Clemens maxime Principum  
Regnabis, o tutela præsens  
Aufoniæ, columenque Romæ.  
Te victor orbis, te Tagus aurifer,  
Et nil paventis littora Galliæ,  
Te Scorus asper, te Gelonus,  
Et gemini venerantur orbes.

F I N I S.

I N.





# INDEX

Rerum notabilium, quæ continentur  
IN TOMO QUINTO.



## A

- Æ** Nigmata pag. 303. 304.  
 Albertanus Albertus 355.  
 Allidosius Cardinalis Papiensis laudatus 434.  
 Amans redux 260. discedens 262.  
 Ammanata Laura Battiferra 349.  
 Amoris descriptio 262. Deos vincit 264 376. 377.  
 385. ejus potentia 264 fugiendus 332. ad amo-  
 rem deprecatio 378 queritur a Venere 385. Fo-  
 vem minatur malum 386. definitio 426.  
 Angelius Petrus laudatus 351.  
 Anni tempora 107.  
 Antimachus M. Antonius 379.  
 Antonius Flavius 392.  
 Aquæ potio vituperatur 140.  
 Aquila Catharina 394.  
 Areosta Diana laudata 388. 389. 390. 393. 395.  
 Athila Rex Hunnorum 231.  
 Aucupium descriptum 257.  
 Avium varia genera 403. 424.  
 Tom. V. Ff. Aug.



- Aurelianus Carolus Francisci Regis filius* 443.  
*Aurora descripta* 260.  
*Aurum. V Divitiæ.*  
*Austria Margareta laudata* 131. 132. 133.

## B

- B** *Alionea Familia tres duces pag.* 437.  
*Bandellus Balthasar* 393.  
*Barbadicus Augustinus laudatus* 151. 286.  
*Barbovius Theodorus* 328.  
*Bembus Petrus, ejus obitus* 237. *laudatus* 388.  
*Berardus P. Joannes Sac. Jesh.* 324.  
*Bereguarda Anna* 390.  
*Bibliotheca Urbis Roma* 222.  
*Bolignetus laudatus* 346.  
*Bracciolinus Franciscus pœta* 292.  
*Bramans architectus* 195.  
*Burgundie Dux Carolus* 431.

## C

- C** *Ælius Calcagninus laudatus pag.* 388. 394.  
*Caithbejus Magnus Sultanus* 431.  
*Calvus Franciscus Julius* 419.  
*Campegius Joannes Baptista* 342.  
*Canum cura* 70. *natura, & stirpes* 71.  
*Cardenius Carolus Acerrarum Comes* 334.  
*Cardinalatus dignitas descripta* 238.  
*Carmagnola Franciscus* 234.  
*Caroli V. Imperatoris effigies* 440.  
*Carolus Burgundie Dux* 431.  
*Carpurum fabula* 84.  
*Christi Natalis Ecloga* 152.

*Colloredus Martius* 283.

*Columna Livia laudatur* 131. 134. *Victoria* 134.

*Prosperus* 366. *Pompejus* 438.

*Consalvus Magnus* 366.

*Convivium descriptum* 403.

*Cornelia Clara laudata* 150.

*Cortefius Hernandus* 132.

*Corvinus Matthias Rex* 432.

*Cotta mortuus defletus* 76.

*Cræsus Rex* 276.

## D

**D** *Amiana Delia pag.* 393.

*Dantis laudes* 415.

*David Prophetia* 153.

*Diana ad venationem procedens descripta* 397.

*Diogenes Cynicus* 276.

*Divitie contemnende* 276. 278. 279.

*Dona parva Dii non spernunt* 97. 378.

*Donum malorum aureorum, atque corporum* 84. *con-*  
*num* 97.

## E

**E** *Cælinus tyrannus vituperatur pag.* 232.

*Eclogæ* 102. 152. 294.

*Effigies Athile Hunni* 231. *Totile* 232. *Martini Tur-*

*riani* 232. *Canis Scaligeri* 234. *Andreae Gritti*

235. *Medeæ* 276. *Temporis* 277. *Jo: Vincentiæ*

*Imperiæ* 417. *Nicolai Picinini* 429. *Cosmi Me-*

*dicæ Magnificæ* 429. *Caroli V. Imperatoris* 440.

*Epitaphium Francisci Marii Molsæ* 111. *Catella* 291.

*Donati cujusdam* 291. *Eleonore Magni Ducis E-*

- truria filia* 292. *Anna Bereguarda* 381. *Capis* 391. *Jo: Manardi* 391. *Delia Damiana* 384. 393. *Balthasaris Bardelli* 393. *Cælii Calcagnini* 379. *M. Antonii Antimachi* 379.  
*Epularum varia genera* 403.  
*ad Eridanum fluvium deprecatio* 130.  
*Estensis Hercules* 382. 385. 387. 388. 389. 390. 392. *Alfonfus* 392. *Renata* 383. 394.

## F

- F** *Arnesius Octavius laudatus* 133. *gemini Farnesii laudati* 134. *Horatius* 134. *Alexander* 97. 100. 273. *Victoria* 110.  
*Ferdinandus Rex Romanorum* 441.  
*Ferrinus Bartholomeus* 380.  
**a** *Filicaja Vincentius* 358.  
*Flaminius Marcus Antonius* 91.  
*Florimontius Galeatius* 91.  
**in** *Fontem* 269.  
*Fortune non fidendum* 383.  
*Fracastorus laudatus* 237. *filios mortuos deflet* 79.  
*Fregosius Caesar* 86. *Janus* 110.  
*Fulminis ruina descripta* 433.

## G

- G** *Abricliorum suburbano Leo vermiculati operis re-*  
*peritur pag.* 418.  
*de Gallico morbo* 1.  
*Ganimedes* 386.  
*Gibertus Jo: Matthaus* 84. 112.  
*Gigans Antonias laudatus* 413.

*Gonzaga Ferdinandus* 443.

*Gotius Georgius* 354.

*Gratianus Fabius occisus in bello* 288. 289.

*Gratiarum actio* 371.

ex *D. Gregorio Nazianzeno carmen translatum* 347.

*Gritus Andreas laudatus* 235.

*Guarinus Alexander* 381.

*Gyraldus Lilius Gregorius* 384. *Jo: Baptista Cynthius* 380.

## H

**H** *Arpasti ludus* pag. 363.

*Helena* 261.

*Hercules in expeditione Jasonis* 258.

## I

**J** *Asonis expeditio descripta* pag. 258.

*Imperialis Jo: Vincentius* 416. 417.

*Innocentius XI. Pont. Max.* 312.

*Jovius Paulus* 231. 234.

*Jozola Euphemia* 130.

*Julii II. Pont. Max. iter* 408.

*Julius III. Pont. Max.* 102.

*Juppiter ab amore superatus* 376. 377. in *Cygnum* versus 394.

*Justinianus Marcus Antonius Venetorum Dux* 312.

*Igavii descriptio* 418.



- L** *Ada ab Jove compressa* pag. 394.  
*Louretana ades laudata* 137.  
*Laus Medici* 77. 112. *Cardinalis* 100. *strenui du-*  
*cis* 233. 234. 235. *poëta* 237. 238. 338 413.  
 415. *Imperatoris exercitus* 286. 288. *Mulieris*  
*Musas celebrantis* 350. *Judicis* 355. *Oratoris*  
 356.  
*Leo Quartus Pont. Max. urbem Leoninam Romæ ad-*  
*dit* 174.  
*Leo X. Pont. Max.* 156. 230.  
*Lipomanus Joann. Prætor Veronensis laudatus* 111.  
*Litteræ amici desideratæ* 354.  
*Livianus Bartholomeus laudatus* 435.  
*Loxanus Georgius* 394.  
*Lucretia Romana* 396.

- M** *Accius Sebastianus* pag. 338.  
*Madrutius Aliprandus* 96.  
*Manardus Joannes* 391.  
*Maria Virginis laudes* 297. 318. 331.  
*Martinus. Joannes Baptista* 416.  
*Maximilianus Cesar* 436.  
*Medæ effigies* 276.  
*Medicinæ artis laus* 83.  
*Medices Leo X Pont. Maxim. laudatus* 156. 230.  
 280. 281. 282. *Eleonora Ferdinandi Magni Du-*  
*cis filia* 292. *Laurentius Princeps* 293. *Cosmus*  
*II. Magnus Dux* 293. *Josephus Octaviani Prin-*  
*ceps* 294. *Cosmus Primus* 351. 368. 441. *Joan-*  
*nes*

- nes* 443. *Laurentius Junior* 414. *Cosmus Magnus* 429.  
*Mendocia Maria* 132.  
*Minerva ex Jove nata* 87.  
*Moyses Legislator* 153.  
*Molsa Franciscus Marius* 111.  
*Montalvus Orontius* 321.  
*Montanus Joannes Baptista* 112.  
*Moscovia Princeps Basilius* 438.  
*in Morte Cotta Poëta* 36. *Marci Antonii Turriani* 75.  
*Filiorum Hieronymi Fracastorii* 80. *Aliprandi Madrutii* 96. *Pastoris* 106. *Ascanii pueri* 131. *Horatii Farnesii* 134. *Pompei occisi* 135. *Francisci Ghisii Ducis* 145. *Augustini Barbadici* 151. 286.  
*Petri Bembi* 237. *Julia* 269. *Fabii Gratiani* 288.  
*Ludovici Pauluci* 289. *Catella* 291. *Ascanii Philamarini sub nomine Thyrsidis piscatoris* 309. *Orontii Montalvi* 321. *Marchionis Piscarie* 367.  
*Filii Antonii Gravina* 367. *Cosini Medices Magni Ducis Etrurie* 368. *Fani Pannoni* 375. *Alfonsi Estensis* 383. V. *Epitaphium*.  
*Muleasses Tunetanus Rex* 439.  
*Mundi creatio* 80.  
*Musa levat miseros* 75.  
*ad Musas cœlestes* 382.

## N

- N** *Atalis dies pag.* 110.  
*Natura arcana* 92.  
*in Navis inventorem* 258.  
*Naupactiaca Victoria* 147.  
*Noctis descriptio* 246. 262.  
*ad Nubes deprecatio* 139.

## O

- in **O**ccasionem ex Græco pag. 380.  
 Occidens Sol. V. Sol.  
 Oriens Sol. V. Aurora.  
 Orpheus fuit in expeditione Jasonis 258. Euridicem  
 plorat 78.  
 Ovidius correctus 203.

## P

- P**alzotus Camillus pag. 352.  
 Pannonius Janus laudatus 370. 371. &c.  
 Parnassus Mons 238.  
 Parrenottus Antonius S. R. E. Cardinalis 290.  
 de Partu Margareta Austria 133. Victoria Columna  
 134.  
 Parvo contentos esse oportet 438.  
 Pasethus Prosper J. C. 382.  
 Pastoris vita laudata 103. 315.  
 Paulucius Ludovicus 289. Fulvius 290.  
 Paulus III Pont. Max. laudatus 130. 131.  
 Pausylipi laudes 334.  
 Pax Clementis X. patrociniis parata 445.  
 Petrarcha parens Etruscae linguae 380.  
 Petruccius Pandulphus 437.  
 Phaëtonis casus descriptus 76.  
 Philamirinus Ascanius 309.  
 Philippus Rex Hispanie II. 240.  
 Philosophia naturalis 92.  
 Phœnix 137.  
 Picininus Nicolaus 429.  
 Piscatio descripta 257.

Piscinum

*Piscatoris vita, & Pastoris laudata* 315.

*Piscium varia genera* 422. 423.

*Pius V. Pontif. Maxim. laudatus* 150. 151. 240. 272.

*Poëtarum carmina immortalitatem donant* 144.

*Poëtis favet Scaliger* 234. *varia opera descripta* 373.

*Pudicitia laudata* 350.

*Puella naum habens in ore* 128. 129. *Deas superans* 129. 130. 131. 132. *cantans* 130. *Aurora illi invidet* 131. *illius munus* 132. *Dea* 132. 133. *queritur de absentia conjugis* 257. *reduntem a longe conspicit amans* 260. *crudelis* 263. *mortua* 269. *carmina pangs* 350. *oculis capit amantes* 380. 382. *amorem vincens* 381. *difficilis visu* 354. *urit, & solvit in lacrimas amantem* 377. 382. *pulchra, & seva* 376. *Venerem superat* 377. 386. 395. *nomine tantum nota* 395.

## R

**R** *Ainerius Daniel laudatus* pag. 82.

*Roma a Romulo fundata* 159. *ejus antiquitates* 159. *ejus laudes* 160. *ejus reges atque historica* 161. *ejus colles* 175. *ejus Ecclesie* 180. *ejus Bibliotheca* 222. *ejus via* 224.

*Ruris laudes* 94. 342. 352.

## S

**S** *Alviatus Cardinalis* pag. 381.

*Sannazarus laudatus* 366.

*Savorgnani Federici Anellam* 283.



- Scaliger Capis laudatus* 234.  
*Senecius adventans describitur* 136. 358.  
*Senecius descripta* 236.  
*Sfortia Galeacius* 430. *Ludovicus laudatus* 433.  
*Sigonius Carolus laudatus* 356.  
*Similitudo fluminis* 77.  
*Simulacrum Veneris* 382.  
*Sol oriens*. V. *Aurora*.  
*Sol Occidens* 260.  
*Solimena Franciscus pictor* 300.  
*Solon legumlator* 388.  
*Spinella Maria & Scalea Principibus* 334.  
*Steropes* 400.  
*Stipicianus Pyrrhus* 439.  
*Studia litterarum, ac scientiarum enumerata* 373.  
*Syphilidis sive de morbo Gallico* 1.

## T

- T** *Arnovius Joannes pag.* 444.  
*Tassus Torquatus* 416.  
*Temporis descriptio* 277. *fugax* 279.  
*Tormenta bellica* 147. *descripta* 400.  
*Tetila Rex vituperatur* 232.  
*Trafimenus lacus* 405.  
*Truchses Orto Cardinalis* 365.  
*Turce victi ad Naupactum* 147. 269. *in eos fœdus*  
 151. 240. *amittunt classem* 274. 284. 285. 287.  
 312. *victi* 305. 390. *vincendi* 419.  
*Turrianus M. Antonius mortuus* 75. *Joannes Bapti-*  
*sta* 75. 79. 107. *Franciscus* 94. *Martinus* 94.  
 232.



## V

- V** *Alesia Margarita Navarra Regina* pag. 86.  
*Valletta Josephus J. Conf.* 300.  
*Venatio descripta* 98. 257. 269 397. &c.  
*Venus Martem, Adonem, & Anchisen amavit* 265.  
*laudata* 377. *e mari orta* 378. *amorem quarens*  
 385. *Solonem adloquitur* 388. *ejus statua* 391.  
*Via Romam ducentes* 168.  
*Victoria Christianorum in Turcas. V. Turcæ.*  
*Vienna ab obsidione liberata* 294. 305. 360.  
*Villa Tusculana descripta* 342.  
*Vini varia genera* 404.  
*Virgilii Musa* 433.  
*Virtus ante aurum* 278. 279.  
*Virtutes enumerata* 244.  
*Vita humana vanitas* 347.



- V  
 1. The ... .. 100  
 2. The ... .. 100  
 3. The ... .. 100  
 4. The ... .. 100  
 5. The ... .. 100  
 6. The ... .. 100  
 7. The ... .. 100  
 8. The ... .. 100  
 9. The ... .. 100  
 10. The ... .. 100  
 11. The ... .. 100  
 12. The ... .. 100  
 13. The ... .. 100  
 14. The ... .. 100  
 15. The ... .. 100  
 16. The ... .. 100  
 17. The ... .. 100  
 18. The ... .. 100  
 19. The ... .. 100  
 20. The ... .. 100  
 21. The ... .. 100  
 22. The ... .. 100  
 23. The ... .. 100  
 24. The ... .. 100  
 25. The ... .. 100  
 26. The ... .. 100  
 27. The ... .. 100  
 28. The ... .. 100  
 29. The ... .. 100  
 30. The ... .. 100  
 31. The ... .. 100  
 32. The ... .. 100  
 33. The ... .. 100  
 34. The ... .. 100  
 35. The ... .. 100  
 36. The ... .. 100  
 37. The ... .. 100  
 38. The ... .. 100  
 39. The ... .. 100  
 40. The ... .. 100  
 41. The ... .. 100  
 42. The ... .. 100  
 43. The ... .. 100  
 44. The ... .. 100  
 45. The ... .. 100  
 46. The ... .. 100  
 47. The ... .. 100  
 48. The ... .. 100  
 49. The ... .. 100  
 50. The ... .. 100  
 51. The ... .. 100  
 52. The ... .. 100  
 53. The ... .. 100  
 54. The ... .. 100  
 55. The ... .. 100  
 56. The ... .. 100  
 57. The ... .. 100  
 58. The ... .. 100  
 59. The ... .. 100  
 60. The ... .. 100  
 61. The ... .. 100  
 62. The ... .. 100  
 63. The ... .. 100  
 64. The ... .. 100  
 65. The ... .. 100  
 66. The ... .. 100  
 67. The ... .. 100  
 68. The ... .. 100  
 69. The ... .. 100  
 70. The ... .. 100  
 71. The ... .. 100  
 72. The ... .. 100  
 73. The ... .. 100  
 74. The ... .. 100  
 75. The ... .. 100  
 76. The ... .. 100  
 77. The ... .. 100  
 78. The ... .. 100  
 79. The ... .. 100  
 80. The ... .. 100  
 81. The ... .. 100  
 82. The ... .. 100  
 83. The ... .. 100  
 84. The ... .. 100  
 85. The ... .. 100  
 86. The ... .. 100  
 87. The ... .. 100  
 88. The ... .. 100  
 89. The ... .. 100  
 90. The ... .. 100  
 91. The ... .. 100  
 92. The ... .. 100  
 93. The ... .. 100  
 94. The ... .. 100  
 95. The ... .. 100  
 96. The ... .. 100  
 97. The ... .. 100  
 98. The ... .. 100  
 99. The ... .. 100  
 100. The ... .. 100



## ERRATA.

## CORRIGE.

Pag. 14. v. 15. vinclis	vinclis ,
v. 16. victorem ,	victorem
15. v. 27. religione	relligione
19. v. 7. bdelamque	bdellenque
23. v. 27. fugentia	fugientia
25. v. 19. bdelæ	bdellæ
v. 24. lasser	laser
26. v. 1. erodens	erodent
29. v. 3. satis	fatis
45. v. 33. bdelamque	bdellamque
47. v. 22. reperit	repperit
50. v. 8. regno	regna
80. v. 17. confecte	confecto
82. v. 14. Hister .	Ister .
84. v. 10. <i>Mattheum</i>	<i>Mattheum</i>
114. v. 15. præstas	perstas
285. v. 32. mœruit	meruit
290. v. 14. <i>Grannelanum</i> ,	<i>Granuelanum</i>
361. v. 16. Bersofque	Bessofque
363. v. 8. Lauræ ;	Laureæ ;
364. v. 15. fora	fota
v. 17. comitate	bonitate
416. v. 3. JANUENSIS.	GENUENSIS.
419. v. 18. distica	disticha
422. v. 14. fluidis	fluidis
v. 15. trudam	tructam
v. 24. des	des ,
v. 26. amor	armor
423. v. 2. Larios	Larius
v. 19. <i>Grantinum</i>	<i>Griantinum</i>
424. v. 25. <i>leguleum</i> .	<i>legulejum</i> .
430. v. 11. vixit .	vexit .
v. 12. qui	quis









851.08 B751C v.5 376488

Bottari

Carmina

DATE

ISSUED TO

851.08 B751C v.5 376488



